

زاید حسن

تسلی دھرتی

ناول





زاہد حسن دیہی پنجاب والیجیہا سہتر ہے جیسے ماں پوئی دی بھولی مریچ چوتھاناول گھست کے اپنا ناواں ای اُچھا نہیں
 کھینا سگواں لبہدا بھرم دی رکھ لیا ہے۔۔۔ اسٹاڈی معلومات مہربان ایسہ پہلا ناواں ہے جیہڑا کسے بار و اسی بار
 بارے لکھیا ہے۔ جیہڑے آتے آگ درحد ہی ہے اوہ اوہنوں کیویں بیاتدا ہے۔ ایہی تار پٹنی شعور وڈے وڈے
 جگا دھریاں دے بگھر کٹھ جھیندا ہے۔ **سعید بھٹنا**

تسی دھرتی

ناں: زاہد حسن (زاہد حسین)
 جنم: 1۔ اپریل 1969ء
 جمن بھونیں: چک 596۔ گ ب (فیصل آباد)
 کم کار: پہلی کیشنز آفیسر، ڈیموکریٹک کمیشن فار ہیومن ڈویلپمنٹ

لکھتاں: سسی لکھ شاہ (کھوج) پاکستان پنجابی ادبی بورڈ لاہور، جولائی 1996ء، بلوچی ادب
 (ترجمہ) پاکستان پنجابی ادبی بورڈ لاہور، ستمبر 1996ء، عشق لتاڑے آدمی (ناول) ادارہ پنجابی
 زبان تے ثقافت، لاہور، جولائی 1999ء، فرید وچار (چون تے کھوج) پاکستان پنجابی ادبی بورڈ
 لاہور، نومبر 1999ء، پنجاہ ورہیاں دی اداسی (کہانیاں) ادارہ پنجابی زبان تے ثقافت، 2003ء،
 ریلوے پھانک تے ہور کہانیاں (ترجمہ) سانجھ پہلی کیشنز، لاہور 2008ء، عشق لتاڑے آدمی
 (گرکھی) دیپک پہلی کیشنز، جالندھر (انڈیا) 2009ء، رت اساں دی ہانی (شاعری) سانجھ پہلی
 کیشنز، 2009ء، آزادی مگروں پنجابی نظم (چون، کھوج) پاکستان پنجابی ادبی بورڈ لاہور، 2011ء،
 غلیچا اُنن والی (ناول) پنجابی مرکز، سلطان پورہ لاہور 2012ء، قصہ عاشقاں (ناول) پاکستان
 پنجابی ادبی بورڈ لاہور 2014ء

تستی دھرتی

زاہد حسن

پاکستان پنجابی ادبی بورڈ،

2۔ کلب روڈ، نرسنگھ داس گارڈن، شاہراہ قائد اعظم، لاہور

ISBN - 978 - 969 - 411- 408 - 4

کتاب داناں: تسی دھرتی

لکھیار: زاہد حسن

چھپن ورھا: دسمبر 2015ء

چھاپن ہار: پروین ملک (سیکرٹری)

پاکستان پنجابی ادبی بورڈ،

لاہور

قیمت: 300 روپے

چھپن تھاں: برکی آرٹ پرنٹرز، لاہور

اکادمی ادبیات پاکستان اسلام آباد تے محکمہ اطلاعات و ثقافت و
امور نوجواناں، پنجاب سرکار، دے مالی مل ورتن نال چھاپی گئی

بار واسیاں دے ناں

ساڈے ولوں

پنجابی ادب وچ ناول پکھوں اک وڈی تھوڑ لگی آندی سی، خاص کر کے ناول وی اوہ جیہڑے آج دی حیاتی دیاں مسئلیاں توں بیان کردے ہوں۔

جیہناں پنجابی لکھاریاں ایس پاسے رُخ پھیریا اوہناں وچوں اک اگھڑواں ناں زاہد حسن دا اے۔

ایس توں پہلاں اوہ پنجابی ادب دی جھولی وچ ”عشق لتاڑے آدمی“، ”غلچہ اُنن والی“ تے ”قصہ عاشقاں“ ورگے ناول پاکے نامناکھٹ بیٹھا اے۔

ہتھلا ناول ”تسی دھرتی“ سمجھو اوہدیاں پُرکھیاں تے ہوئی بیتی دی وارتا اے جیہنوں زاہد حسن نے دھرتی دا پتر ہون ناطے بیانیا ایں۔
اسیں آس کرنے آں ایہہ ناول وی پڑھنہاراں لئی پنجاب دی دھرتی دے تواریخی وسیب توں نیڑیوں جانن دا سبب بنے گا۔

پروین ملک
سیکرٹری

تسی دھرتی

زاہد حسن دیس پنجاب دا اجیہا سَتر ہے جیہنے ماں بولی دی جھولی وچ چوتھا ناول گھت کے اپنا ناواں ای اُچّا نہیں کیتا سگوں ایہدا بھرم وی رکھ لیا ہے۔ ”تسی دھرتی“ پڑھیاں سچ سبھا پتہ لگدا ہے کہ اوہ فلشن دے کسب تے کلاتوں چنگی طرح جاؤ ہے۔ اوہدا پہلے تریئیں ناولاں دا ہنڈھیا وڈی کرنی دا آہرتے سٹابن کے بتریا ہے۔ باردے دو سوو رہیاں دے جیون تے بارو اسیاں دے سروا پریاں نوں اوہنے انج گنج سانجھ کے لیاندا ہے کہ پریت محبت، وسوں وسیب، کرودھ ہنکار، پنے تے ڈاڈھے دی ایہہ کہانی اکھ نہیں جھمکن دیندی۔ ایہو وسب باہواں اُلا ر کے پڑھن ہاراں نوں اپنے ول سدیندا ہے۔

ناول دی مڈھلی کہانی تاں اوہو ہے جیہڑی صدیاں توں تری آرہی ہے، ڈاڈھے تے پنے دی اجوڑ۔ صدیاں توں لکھاری ایس وشے تے لکھدے آئے ہن تے لکھدے رہسن۔ سچی گل ہے کہ مڈھلے انسانی مسئلے سداتوں سگوں لگے آئے ہن۔ کسے ناول نگاریاں سرجن ہاردی نرولتا ایسے وچ ہوندی ہے کہ اوہ ایہدی تند کیہڑی لاہموں پیدا ہے۔ وت وسیب دی مورت، لینڈ سکیپ تے انسانی جذبیاں نوں کیویں گنھ کے موہرے لیا وندا ہے۔ ایہہ ناول اُنہویں تے ویہویں صدی دے پنجاب دے وسیب تے وسوں اُتے اُسریا ہے۔ پانی ای رزق دا مڈھلا سوما ہے تے حقیقت وی۔ دریاواں دے کنڈھیاں اُتے پانی سوکھ نال لبھدا ہے تے تھلیوں گھوہ دا پانی اُچّا ہوندا ہے، جیہڑا خوشحالی دا کارن بندا

ہے۔ ایس خوشحالی دا ازلی ویری دھاڑوی ہے جیہڑا اکھیں ویہندیاں دھی، دھیہن تے دھن لٹ لے ویندا ہے تے پچھے نموشی تے خود گشی دیاں نویاں کہانیاں اُلک ویندا ہے۔ جے اپنی ہوند بچاون کان بار اندر جا کے گزارے دا سوچیوے تاں رزق ویلے اتنے گھٹ ہوندن کہ وت اوہی پُرانا لوبھ جاگ پمدا ہے کہ ہتھ سوکھا تھیوے تے جیون ٹورا ٹریا رہوے۔ رزق وسیلیاں اگوں وت ٹھگن تے دُھر بناون والیاں قوتاں راہ ڈک کھلوندیاں ہن۔ انج نما ناجی ہتھوں سکھنا ہو کے پیٹ دا دوزخ بھرن کان نویاں راہواں اُتے ٹر پمدا ہے۔

ناول تاریخ دے تریئیں سمیاں، انگریزی راج توں پہلاں دا پنجاب، راج دے پنجاب تے مگرلے سے نوں کلاوے وچ لیا ہویا ہے۔ پہلے سسے وچ بھاویں دھاڑوی تے مُمورے فنیانے ورگے پاتروی ہن، جیہڑے جیون عذاب بنائی رکھدے ہن، پر او تھے ہک گھل ہے۔ پیو دادے دی نبھی نبھائی تے تھاہراں نال جذباتی واقعیات دیاں سانجھاں۔ ایہو سانجھ جیون دیاں اُچیاں قدراں دی اگوان ہے۔ جے انگریز جوئیاں دیاں سوانیاں پیدا ہے تاں باریں وچ اگ لگ ویندی ہے تے وت راء احمد خان کھل دی شہادت بلدی تے تیل دا کم کریندی ہے۔ نور محمد ولا راء، برکے نوں قتل کرن والی واہر دے وچ ہوندا ہے۔ انگریزی راج دے رت نیڑن دے انگ وکھرے ہوندے ہن۔ نہراں، ریلواں، تھانیاں، کچھریاں مگروں بارواسیاں دے موگھے چھوٹے رکھ کے مالے تے ٹیکساں دی اجیہی جھپٹیر دتی ویندی ہے، اکھے مارنہ گٹ تے آندر چاں گھٹ۔ خاص کر کے جیہناں 1857ء وچ ہتھیار کھلے کیتے یاں مگروں لاماں دی بھرتی توں نابرہوئے۔ اگلیاں پیٹریاں بھاویں آل دوالے دی معاشی ترقی تے وڈکیاں دے نت اُچالے توں ساہ ہیر کے ٹردیاں ہن، پر انگریزاں دے جاسوس تے ہیرو وت وی اوہناں نوں اکھ وچ رکھدن تے اوہناں

دیاں سوچاں نوں ٹوہندے رہندے ہن۔ پہلا وسیب نور محمد پیدا کر دا ہے تے دُوا وریام،
پر گلیہنا ویہار وِن دو سے وریام نوں وی نہیں چھڈا تے پنجویں پیڑھی وِت سواہرے خاں
پکھی واس بنسی۔ سچ سوچن دا درد یلا انجام۔

ایتھے مینوں گارشیا مار کینر دی ہک گل چیتے آگئی ہے کہ جدوں اوہنوں نوبل
انعام ملیا تاں پارکھاں اپنیاں رچھانیاں وچوں وِن پونے رچھ کڈھ لے تے اوہدیاں
لکھتاں نوں مدھولنا شروع کر دتا تاں مار کینر نے آکھیا کہ ایہہ سدھیاں اساڈے وڈکیاں
نال دھروہ دیاں کہانیاں ہن، جیہڑیاں نانیاں دادیاں اسانوں سُنائیاں، ایہا سگوں گل
”تسی دھرتی“ دی ہے۔ ایہہ ناول زاہد حسن اپنے وڈکیاں دے چیتے وچوں گھر چ کے،
اتے اوہناں دے سینیاں اُتے لکیاں پھٹاں نوں پڑھ کے، اساڈے موہرے لیا دھریا
ہے۔ ایہناں پھٹاں دا سُدگایاداں تے حقیقتاں دوہاں رُوپاں وچ دس پمد ا ہے۔
چار لا بھو گھراں نوں چھڈ کے، بارو اسیاں سرور تے دوسو ورھیاں دی کہانی ہے۔ بار بارے
دُونیاں وسیباں دے لکھاریاں دیاں کہانیاں، ہڈ بیتیاں، یاداں، باہر مگھی سوجھ دا سٹا ہن۔
ایہہ مُونہاں دی پلٹن نوں چھناں دا کارن تاں آکھ سکدیاں ہن، پر اوس دھروہ توں کئی کتر
اجاندیاں ہن، جیہناں ایہناں دیاں جڑھاں پٹ چھڈیاں۔ ایہہ دھرتی جائے ولوں ہو کے
وچار ای نہیں سکدے۔ اساڈی معلومات موجب ایہہ پہلا ناول ہے جیہڑا کسے بار واسی
بار بارے لکھیا ہے۔ جیہدے اُتے اگ ورھدی ہے اوہ اوہنوں کیویں بیاندا ہے، ایہی
تاریخی شعور وڈے وڈے جگا دھریاں دے پگھر کڈھ دیندا ہے۔



1

بندا خانہ بدوش جمیا آہا

ڈھول دی ڈھم ڈھمکار چاروں پاسے ڈھم گئی۔

اودھر جدھر رڑا میدان تے ٹاویاں ٹاویاں کنڈیا لیاں جھاڑیاں ہائیں۔ جیہناں
وچوں دینہہ بھر رات واء سیٹیاں ماردی ہوئی لنگھدی۔ اوس پاسے ایہہ ڈھمکار دور تیک
اپڑی..... اودھر گجدھر نگھے رُکھ، ٹوئے جے گج نال اُسرے بھوئیں دے کنڈھے ہائیں،
اودھر اوویں ای اڑدی بھڑدی گئی۔ جیویں واء ہو کے بھردی ہوئی جاندی۔

تتے ہمس آ لے دناں وچ واء دے ایہہ ہو کے ہاواں وچ بدلی جاندے۔ انج
ای جیویں انج فجرے ہسرد وچ ڈھول دی ڈھمکار..... مُرد کے جیویں گھائیں وچن نال ڈھول
دے چمڑے وچ سوراخ ہو گیا ہووے۔ یاں جیویں چکڑ بھرے کھوبھے وچوں نُچردی ہوئی
ڈھم ڈھم دی واج۔ واج جیویں گڈ دے پیسے نال گھسردی جاندی ہووے۔

میر و مراٹھی، تھوڑے تھوڑے سے مگروں ڈھول نوں تھاپڑدا، گھائیں مارداء، پہلوں
ہولی ہولی، مُرد نال دی نال آپ وی ٹنگاں گھماندا جانداء، آونداء، سُراں دے سفر نال رلداء۔
واج دی مستی نال ای اوہدے ہتھ وچ وی تیزی آوندی جاندی۔

شاماں پے کھیاں، میرو مرانی نوں گھائیں ماردیاں، ٹنگاں گھماندیاں، اگے کچھے
سُراں دے پینڈے نال رلدیاں، پر آل دوالیوں اوس جھگی ول کوئی نہ اپڑیا۔ ڈھور ڈنگر تے
بُجو دے پنج منکھ اپنے اپنے کم کار لگے اک دو جے ول انج جیویں اوہناں دے
دِلاں وچ پنگر دے سوالاں دا اُتر ساہمنے والا آپ ای آپ دے رہیا ہووے.....

”دریا دی من وی ایٹھوں دور نہیں۔ کوئی بھلیا بھٹکیا راہی ای ایدھر آجاندا.....
پر کوئی نہیں۔ کوئی ایس اُجاڑ بیابان وچ کیوں آوے۔ منکھی دا تاں جگ تے کال پیا اے“
سُہرائی کم لگی لگی اپنے آپ نال گلاں کردی رہی۔ انج جیویں دوجیاں تُوں وی سُناندی
ہووے۔ ساہمنے گہنے خاں تھے دی نڑی مونہہ وچ لئی اُکیا تھکیا ڈونگھیاں سوچاں وچ پیا۔
انج جیویں اوس ماں سُہرائی دی گل سُن لئی ہووے پر اوہنوں ولدا دین دی تھاہرے اوس
میرو مرانی نوں ٹچکر کیتی:

”میرو! لگدا اے تیری گھائیں وچ ہُن اوہ پہلے والی گل نہیں رہ گئی..... اسیں
جیکر مٹھے پانی آلی بھوئیں تیک آن ای اپڑے آں تاں چک لہوان لئی خلقت ای نہیں لہ
رہی۔ پہلے چک جس اوکھیاں نال استھ لیا ندا اے توں جاندا نہیں ایں۔ اُتوں عیسے دی خیر
خبر ہے نہ ویسے دی تے نہ ای ولا رادے آون دا کوئی پتا سُر۔ لگدا اے ایس واری گڑ جیہڑا
خلقت وچ وٹن لئی لیا کے رکھیا اے، اوہنوں وی اُلی ای لگ جاسی۔“ گہنے خاں جیویں
میرو مرانی نال گل کردیاں مُڑ کے اپنے آپ نال گل کرن لگ پیا ہووے..... آل دوال
دی اُجاڑ تے اوہناں دی اپنی بے وسی نے اوہناں ساریاں نوں اپنے آپ نال گلاں کرن
دا عادی کر چھڈیا آہی..... اُتوں اوس نک سُک دے مُک جاون دا خوف جو اوہ بچا کے
اپنے نال لے آئے سن۔ تماکو، گڑ، آٹا..... کپڑے لتے انگھال لئی اوہناں نوں ست کوہ
دور جھلار تے جاون پوندا۔ پین لئی اوہ اُوٹھ والی گڈ اُتے پانی لے آوندے۔ جنور نیڑے
دے مہیاں وچ کھلوتے مینہاں دے پانی تے گزارہ کردے..... ہر اوہ مسئلہ ساہمنے آہا

جیہدے نال حیاتی دُکھی ہوسکدی ہئی۔

”بہوں اوکھ ہے میرو، تے کوئی راہ دسدانہیں۔“

”گل ایہہ نہیں چودھریا! میرو مراٹی مونہہ وچوں نڑی تے دھوں اک ساہے کڈھدیاں آکھیا، دُتسیں ابادی ای وسوں توں بہوں دُرِیڈے آن کیتی اے۔ اُتوں ایس گل دی کیہ ضمانت اے جو ایہتھوں پانی مٹھا ای نکلسی؟“ میرو مراٹی دی ایہہ بہت پرانی عادت ہئی جو اوہ ”چودھری“ نوں ”چودھریا“ دے الا نال بولدے۔ ایہہ طعنے ورگی گل اوس باردی چودھراہٹ ورودھ، اپنے من وچ پال رکھی ہئی۔

گہنے خاں، میرو مراٹی نوں کوڑ نال ویکھیا تاں اوس اپنیاں نظراں جھگی نیڑے چردے اوٹھاں ال پھیر لیاں۔

”توں جاندا ایس میرو، مریاں ساڈے نال ہے تے سیالاں دیاں باہیں کڈھ کے اسیں دریا تے بنی وسوں وچ نہیں وس سکدے۔ حالے وی توں سندا تاں ہوئیں جو پوری جھنگوچی ساڈی لادھ وچ لگی اے۔“

”..... پر چودھری، ایہہ کیہ حیاتی ہوئی جو تسیں دریا دی من اُتے، نہ ای بیٹ وچ بہہ سکدے او تے نہ ای وسوں وچ وس سکدے او..... ایہہ تاں سدھا ساواں تہاڈی چودھراہٹ اُتے دھبا اے۔ مڑ ایہہ وی نہیں جو تسیں سارے بھرا اک تھاہرے رل بہوو۔ کوئی اٹھ کوہ اُبھے ول نوں پیا وسدا اے تے کوئی دو کوہ لمے ول.....“

میرو مراٹی کُھتی دا ایناں لما گھٹ بھریا جیویں ڈھول اُتے گھائیں دیندا ہووے۔ کُھتی دی نڑی وچوں گُرد گُرد دی اواز ہر پاسے گونج رہی گئی۔ سہرائی مٹی دے پکے ہوئے بھانڈے وچوں اُبلدیاں ہویاں گھگھدیاں صحنک وچ گھتیاں تے گُٹے ہوئے گُرد نوں اوہناں وچ رلا کے گہنے خاں تے میرو مراٹی اگے لیا رکھیاں۔

مریاں کڑی دے اک بروٹے پچھوں لُک کے اوہناں ول تکیا تے کھڑ کھڑ ہس پئی۔

”گدا اے ایہنوں بھکھ لگی اے۔“ گہنے خاں بولیا۔

”آ..... لگی پیسو بھکھ..... ایہہ ہین اوہ باہیں جیہناں دی لادھ وچ پھر دی پوری سیال وادسانوں ناساں دھونی دتی ہوئی اے۔ ساڈے وچ کوئی حیا شرم ہووے تاں آپ ای ایہنوں بنھ کے سیالاں تیک چھڈ آویے۔ نراسیاپا، کم دی نہ کاج دی..... اکھے ایہدے اُتے سایا اے۔ اکھے کرنوئی رہندی اے۔ اُنج دی اُنج اوتری نکھتری..... اکھے جتھے کدی مینہ وی نہ وے بھوئیں اُتے پُھٹے رُکھاں نوں لگراں تے بور آ جاندا اے پر ایہہ.....“

سہرائی اپنی گل ادھی چھڈ دتی پر سہرائی دیاں گلاں نے جیویں گہنے خاں دے سینے اُتے مُنگ دَل چھڈی ہووے۔ ماں ولوں اپنی ایس بے بھرمی اُتے گہنے خاں جیویں لہو دے گھٹ پی گیا ہووے۔ اوس اک اک کر کے گھگھنیاں نوں گُو نال رلاونا تے وکھرے کرنا شروع کردتا..... تے مریاں جو کری اولھے لگی پہلے ہسدی پئی ہائی، اکاں دے اک بوٹے نوں دوہاں ہتھاں دی پکڑ وچ لے کے جھوٹن لگ پئی تے نال ای ”اوتری نکھتری“ دا ورد کردی کردی بھوانٹیاں لین لگ پئی۔

گہنے خاں پہلوں مریاں ول تے مُو کے ماں سہرائی تے میرومراٹی ول تکیا تے نظراں نیویاں کر لیاں۔

رُکھاں دے پر چھاویں نیویں ہون لگ پئے ہائُن۔

سورج چپا کو تھ نال وناں دے رُکھاں اولھیوں واڑھے اُتے اپنی تیز دُھپ کھلا رہیا ہئی جو ہُن ہولے ہولے ٹھنڈی ہوندی جا رہی آہی۔ اوٹھ، ڈاچی تے ٹوڈا بیٹھے بیٹھے اُگالی کر رہے ہائُن۔

نواسیے رکھاں دیاں جڑھاں، چھلاں تے سروٹیاں دے کھبڑ وٹدی جھگی وچوں باہر نکلی۔ اوہ جھگی نوں آسرا دین والیاں کڑیاں تے چھتیراں نوں کھبڑ نال بنھدی ودی ہائی۔ جھگی دی مُڈھلی اُساری گہنے خاں کردا۔ اوہ وناں دیاں لکڑاں وڈھ کے ڈھانچہ بنا

دیندا تے اوہنوں کج، سانبھن تے سنوارن دا کم نواپے کردی۔ پہلے مریاں جدوں تیکر اپنے ہوش حواس وچ ہائی، نواپے نال کم وچ لگی راہندی۔ دوویں ای اک دوجی توں ودھ کم کرن دا جتن کردیاں۔ پر دوہاں دے من وچ اک دوجی دے ورودھ اک نفرت وی نسر دی پُھندی راہندی۔ نواپے نوں سہرائی اپنے کھسم دی برادری وچوں ویاہ کے لیائی ہائی جدوں کہ مریاں نال گہنے خاں نوں عشق ہو گیا ہئی۔ اوہ اپنے بھراواں نال جھنگ دے علاقے وچ کسے اجیہی تھاہر دی بھال وچ گیا آہا جتھے اوہ سارے رل مل حیاتی گزارن دا گوہ گوچرا کردے۔ جدوں دریا دے لاسے جھلار اُتے مریاں نوں پانی بھردیاں ویکھ گہنے خاں دیاں اکھاں اڈیاں رہ گئیاں۔ ہُن مریاں اگے اگے تے گہنے خاں اوہدے پچھے..... اوس تاں اتھائیں راہن دا متا پکا لیا آہا جدوں اوہدے بھرا عیسے خاں اوہنوں صلاح دتی جو رناں تاں عام لہہ جاندیاں نیں..... بھرا، بھینیں تے ماپے ہتھیں نہیں آوندے۔ بھاویں گہنے خاں کول بھین ہائی ای کوئی نہ تے بھراواں دا سبھا اوہ ویکھ چکيا آہا، مڑ وی اوس عیسے خاں دی من لئی تے منی وی اوس اودوں، جدوں اوس اوہنوں آکھیا ”جیکر تیار ہوندی ہئی تاں اوٹھ دے کچاوے اُتے بہالوس تے ہٹھاڑ نوں لیندا ہو۔“

اوہناں نوں کجھ سے لگا آہا ایہہ وٹکرا سوچن تے اوہدے اُتے عمل کرن وچ..... اخیر اوہ مریاں نوں لے کے چھوٹیاں آ لے پتن تے آن پجے ہاُن..... اوہ استھ آ تاں گئے پر ترلیاں تے اوکھیاں نال..... عیسے خاں اوہنوں چھوٹیاں آ لے پتن اُتے چھڑ دیاں نال ای داہ کوہ اُبھے ول نوں ٹر گیا آہا۔ اوہناں دناں بارے سوچدیاں گہنے خاں دے وجود وچ اک کنہی جیہی چھڑ گئی آہی۔



نواپے نک سک سنجھ کے جھونپڑی وچوں بہاری پھیر دی ہوئی ساہنے آلی تھوڑی جیہی تھاہر وچ ویہڑا بنا رہی آہی۔ اوس مُڈھلیاں راتاں دے چن ورگی اک لکیر کھچ

کے تھوڑے جیسے چھٹے پانی دے دتے۔ گہنے خاں نگہ پرتائی تاں اوس ویکھیا جو میر و مراٹی
کسے ڈونگھی سوچ وچ غرق آہا۔ تھی دی نڑی اوہدے مونہہ وچ ہائی۔
”کیسے خیالیں پیا ایں میرو؟“ گہنے خاں اوہنوں کچھیا۔

”میں سوچ رہیاں جو حیاتی وی کئی اوکھی کہانی اے جیہنوں توڑ اپڑاؤن لئی اسیں
ہر ایلے کسے نہ کسے جتن وچ ای رہندے آں۔“

”انج ای اے میرو، جنی دیر تیک جان اے، جہان دے رنگ ویکھنے ای پوندے
نیں۔ چنگے بھلے ازاد ساں اسیں۔ جتھے لپ پانی دی تے جنوراں لئی ہریالی ویکھی او تھے ای
کچاوے لاہ لئے۔ جیویں ای رُت پھری، ساڈے پیراں نال وی پینڈے بنھے گئے..... مُرد
اسیں رُتاں دے قیدی ہو گئے۔ ڈھیر سیالے تے ودھ اُنھالے سانوں جھونپڑیاں وچ رہن
دا عادی بنا دتا۔ ہُن جیکر اک تھاہرے رہن دے عادی ہو ای گئے واں تے پانی دی وی
تنگی تقدیر وچ لکھی گئی ہے۔ اُنج پانی دی گھلھ تے سوکھ تاں کدی وی نہیں رہی سانوں، پر
ایدکیں تاں اخیر ای ہو گئی اے۔“

”ٹھیک ای آکھدا ایں چودھری۔ بندا خانہ بدوش جمیا آہا۔ اوہنوں خانہ بدوش
ای رہنا چاہیدا آہا پر مُرد کے اوس راہن لئی ٹھکانا بنا لیا تے ذات برادری دیاں جھیلیاں وچ
پھس گیا۔“ میرو اپنے ولوں دانائی دی گل کیتی۔

”..... پر چودھری اک گل تاں دس، جدوں میں مونہہ وچ نڑی لے کے سوچدا
آہا تے ایہی سوچدا ہاوی جیکر میرے ڈھول دی ڈھمکار اُتے لوکائی اکٹھی ہووی جاندی تاں
اسیں کھوہ کڈھن لئی چک تھلے اپڑاؤندے کیویں؟“

”اللہ دیا بندیا، اوہ آوندے تاں سہی، تاں تھال کارہ بنا کے اپنے بھراواں نوں
سدّ لیندے۔“

ایں توں پہلے جو گہنے خاں کوئی ولدا دیندا، اتناں سبھرائی جنوراں اگے رکھاں

دیاں لگراں تے پتر پدھرے کردی اوہناں دے سر اُتے آن کھلوتی۔

”میں آکھ آکھ ہٹ گئی آں، گھوڑی دی مہار ہتھیں کرتے پندھ چیردا ہویا عیسے، ویسے تے ولّا را نوں اتھائیں چالیا تے کسے تھاہرے اکٹھے رل بہو۔ کیہ وکھ وکھ چنداں جتناں وچ گھستی ودے او۔ کلا بندہ تاں ککھ دا بھاروی نہیں سہندا۔ ترے باہیں رل جاسو تے کوئی ابادی وی کریسو..... اُنچ ہڑک ہڑک کے مر جاسو۔“

”ہلا! لتاں فجریں ٹر ویسوں۔ نوابیے نوں آکھ سفران دا مال اسباب جوڑ چھڈے۔“ اپنی گل کر گہنے خاں ہتھی ہتھیں لئی تے جنوراں نوں لکڑیں دے بنے واڑے ول ہاکن لگ پیا۔ اوس واڑے نوں چنگے چچ ورتب نال سوچ وچار کے بنایا آہا۔ اُوٹھاں، بھیداں تے گھوڑی لئی لاہے لاہے حصے کیتے گئے۔ اپنے ولوں تاں اوس بھوکیں دے ایس ٹوٹے نوں آباد کرن دامتا پکایا ہویا آہا پر مریاں دے جنون تے ماں سبھرائی دیاں روز دیہاڑ دیاں تانگھاں تے اودھر جو اوہنوں عیسے، ویسے تے ولّا را واسطے السائی رکھدی۔ اوس اوہدے جین وچ وی اوس ای الساہٹ دی کوڑ رلا چھڈی ہائی۔ اوہ اُٹھیا تے اُٹھ کے فجر دے پینڈے دی تیاری کرن لگ پیا۔ ہمیش وانگ اوہنوں نوابیے دے نال رل کے سفر دے سامان دا بندوبست کرنا پوے گا۔ نہیں تاں کوئی نہ کوئی شے لجانی رہ ای جاسی۔ اوہدا ایہہ وی خیال آہا جو اوہ میرو مرانی نوں وی اپنے پچھے ای بہا لوے۔ راہ اوکھیرڑی اے، بندہ اک واری گراہے پے گیا تے مُڑ کے اوہدا واسطے اجیہے کنڈیا لے رُکھاں، زہریلے جنوراں تے سپاں سلونگاں نال پوندا اے۔ بندہ بھاویں جنگل تاں پار کر ای جاندا اے پر اوہ گھوڑی دے وجود تے اوہدے اپنے جُستے نوں لہو لہان کر جاندا اے نیں۔ لیہناں زہریلے کنڈیاں دی وس دھا جاندا اے۔ جیہدے اُپالئی توڑ حکیم تیک جاونا پوندا اے..... مُڑ اوس دو دلیے جیہے ہو کے سوچیا اوہ میرو مرانی نوں اتھائیں ماں تے نوابیے کول ای چھڈ جاوے۔

”..... پر بندہ کمی کمین اے تے کیہ پتا؟“ اوس سوچیا۔

گھوڑی دے آتھر، کڑیا لے، اپنی بلم، پکڑی تے گھوڑی دے دوالے خرچین
وانگ و لھین لئی بنائے گئے بھگل نوں اک تھاں اکٹھا کرن لگ پیا۔ اوہدے حصے وچ
جیہڑی گھوڑی آئی آہی، عجیب ٹرڈی نسل دی گھوڑی ہائی جیہڑی کنڈتوں لے کے سینے تیک
جت ای جت ہائی۔ جیہڑی ایس ککر کنڈیا لڑے جنگل وچوں لنگھدیاں تھاؤں تھائیں اڑ
جاندی۔ اصیل گھوڑیاں عیسے تے ویسے خاں اپنے قابو وچ کر لیاں تے داندیاں دی جوگ
ولا رالے کے لاسے ہويا آہا۔ گہنے خاں وڈا ہون کر کے ہمیش قربانی دین والا، جیویں
ماپیاں آکھیا، من لیا تے سھرائی اوہدی ماں ہمیش اوہدے نال راہندی، لڑدی بولدی، اپنے
دوجیاں پُتراں دے دکھاں نوں روندی تے اوہدے دکھ اوہدے کول رہندیاں وی اوہنوں
نظریں نہ آوندے۔ سبھ توں وڈا دکھ تاں اولاد دا ای آہا جو نواسیے نال ویاہ تے مریاں نال
نکاح کیلتے۔ اٹھاں نوواں ورھیاں دے باوجود اوہنوں اولاد نہیں سی ہوئی۔ مریاں نال اوہدا
عشق آہا۔ ایہہ عشق ای آہا جو اوہ مریاں دیاں ایہناں بولیاں، حسیائیاں ہوئیاں حالتاں
نووں وی پیار نال ای ویکھدا تے رات دے اخیر لے سے جدوں رُکھاں وچکار لٹکے۔
جھولے وچ ہوندا، اک وجود اپنیاں السائیاں ہوئیاں پر چھائیاں نال اوہدے دوالے آکے
لپٹ جاندا، اوہنوں اپنے آپ نال لھیت لیندا۔ ایہہ وجود مریاں دا ہوندا۔ مریاں فجر
دے تارے دے دُبن تیک اوہدے نال سارے دن دی ہوئی بیتی کردی۔ اوہ گلاں جو
اتماں سھرائی نے کیتیاں ہوندیاں، جیہڑیاں اوہناں دکھ دیندیاں..... مُڑ کنج نواسیے اوہنوں
کھان لئی ساگ پات تے ڈیلھیاں داسلونا، پیلو تے کدی کدی من دیندی تے کھاندیاں
ہویاں اوہدیاں والاں وچ تے دھون اتے پیار نال ہتھ پھیردی رہندی۔ اوس ویلے
اوہدیاں اکھاں وچوں ہنجو کردے رہندے۔

اچنتے ای کسے خوف و جھوں گھوڑی ہنکی تے اوہدے کن کھڑو گئے۔ گہنے خاں ترٹھا۔

شاماں پے رہیاں ہائُن۔

اوہ اپنے سون والیاں تھاہراں نوں پرت رہے ہائُن۔

مریاں دے ہاسے دی واج اوہناں دیاں کنناں وچ گونجری۔ اتناں سبھرائی دُکھ

نال بولی ”اوتری نکھتری، کھسماں کھانی دی اہل جوانی ایویں اضائیں پئی جاندی اے۔“

.....

میر و مرانی بیٹھے بیٹھے ڈھول تے ہتھ نال گھائیں ماری۔

اک لمیری ہیک لائی۔

دُور ٹیہری دے بولن تے مریاں دے ہاسے دیاں واجاں رل مل گئیاں.....

.....

ہُمس آلی رات وچ گدڑاں دی چکاٹ، پکھیر وواں دیاں بولیاں تے شور جیہڑا

اوہ سارے دیہاڑ مگروں چوگ چکن پچھوں اپنے اپنے آ لھنیاں ول پرتدے ہوئے

گھتدے۔ چیک چکاڑا اک واری تے پورے جنگل وچ کھلر گیا آہا۔ بگھیاڑاں دیاں

چیرکاں جو چاننی رات وچ اوہ چن ول ویکھ کے اپنے بھٹکھے سینیاں وچوں کڈھدے،

گُر لاندیاں ہویاں۔

گہنے خاں، سبھرائی تے نواپے ایہناں واجاں دے عادی ہو گئے ہائُن۔ مریاں

اوہناں دا حصہ بن گئی ہائی.....

پر رات دی ایس آ سیبی کہانی وچ میر و مرانی دے آنے تاڑے لگے ہائُن۔ اوہ

اپنے ساہنے اُچے بوڑھ دے رُکھ اُتے لٹکدے ڈھول نوں ویکھ رہیا آہا۔ جو اوس کجھ ای

چر پہلوں او تھے لٹکایا آہا۔

”کیہڑا ویلا ہووے گا جدوں چودھری گہنے خاں دا چک بھوئیں وچ لہوے گا؟

کھوہ نکلے گا تے میں مُڑ کے جھنگ اپڑاں گا..... پر جیہڑی گل سیال سردار میرے ذمے

لائی اے، مریاں بارے..... اصلیت دا پتا کرن آلی..... تے اصلیت جو اوہدے ساہمنے
 آئی، اوہ دسں جوگ ہائی کوئی نہیں۔ مریاں دی تاں جو حالت اے اوہ مویاں توں وی بتر
 ہوئی پئی اے۔ کیہ سیال ایس حال وچ وی مریاں نوں موڑن دا جتن کرن گے..... پر اوہ
 تاں اُکا باہیں ای نہیں موڑ لیاونا چاہوندے، چنگا بھلا ویر لینا چاہوندے نیں..... ہوسکدا
 اے میں جدوں اوتھے اپڑ کے سردار سے خاں سیال ساہمنے حال حقیقت کراں تاں اوہناں
 دے من وچ بلدی بدلے دی اگ دا تاء کجھ گھٹ ای جاوے..... پر میں کیہ آکھ
 سکداں..... سرداراں دیاں سردار ای جانن۔ توڑ بادشاہاں دے دربار تیک تاں پہنچ ہے
 اوہناں دی تے ایہہ جانگی وچارے۔ نہ وڈی برادری کوئی، نہ اسلحہ بارود۔ ہور تے ہور
 وٹے وچ دین لئی چھوہروی کوئی نہیں ہے نیں۔ پر ایہہ سارا سوچ سوچ کے میں ای کیوں
 پتلا ہوندا رہواں..... سیال جانن تے چودھری..... میں رات دی نیندر کیوں کھوٹی
 کراں.....؟ ”میر و مرانی پاسا پر تیا۔ اوہدے سُفنے وچ ڈھول و جدا سی۔ کاریگر کھٹی ہوئی
 بھوئیں وچ چک مڑھ کے اوہنوں تھلے لے جا رہیا آہا۔ نال ای نال آوی وچ پکائیاں
 اٹاں نال کھوہ دی کندھ اُساری جا رہی ہئی..... مڑ کے گادھی گھتی گئی، بلد لیاندے گئے،
 مالھ تے لوٹے جمائے گئے۔ بلداں پچھے اوس مرے ہوئے گہنے خاں نوں ڈٹھا۔

پانی کڈھیا جا رہیا آہا۔ اینا جو ہر پاسے جل تھل ہو گئی۔

مٹھا پانی وگدا ای جاندا اے، وگدا ای جاندا اے۔

ساہمنے ہریاں بھریاں فصلاں..... مڑ کے کنک وڈھی جا رہی اے تے وڈھیندی

پئی کنک دے چاء وچ جھومری ہین جو جھمر پائی جا رہے نیں.....

جیویں کنک دے سٹے جھلسن، انج جھومری جھم ٹرن۔

میر و مرانی ڈھول تے گھائیں ماری..... نال ای اوہدی اکھ کھلھ گئی۔

ہمس نال بھرتیجی چاننی رات اے۔ اسمان دیاں راہاں جگدیاں نیں۔
 اسمان دیاں راہاں چدیاں جگدیاں نیں، جنگل دیاں راہاں اونیاں ای انھیریاں۔
 انج جیویں پر چھائیاں آپت وچ گلاں کر دیاں ہوون۔
 ایہہ پر چھائیاں گہنے خاں تے مریاں دیاں نیں۔
 ”سُدا اے توں کل چھوایاں آ لے پتن توں لنگھ کے اُتاڑ جاونا اے؟“

”آہو، اماں آہندی اے بھراواں نوں لے آواں تے اوہناں دی صلاح نال
 اتھے ابادی کرے یاں پیو ساہرے دی قبر دی تھاہر لہیے۔ سُدا اے ولا را نوں پیو دی قبر
 دی جادا پتا اے۔ اوہ جتھے رہندا اے، اوہدے نیڑے ای پیو دی قبر اے۔ اوس آپ بنوائی
 اے تے اتھے پانی وی مٹھا اے۔ پیو آکھیا آہا جو کیڑ رکھیاے، جتھے میں مریا، اتھے
 آبادی کر لینا۔ پانی اتھے مٹھا ہوسی۔ توں تاں جاندی ای ایں مریاں، پوری باروچ اوہ
 اک ای تاں آہا جس نوں دھرتی دی کنسو آہی۔ اوہ مٹی سُنکھ کے دس سکدا آہا جو لیہدے
 وچلا پانی کس طرح دا ہوسی۔ اتھے باروچ چنے وی کھوہ وگدے نیں، ادھیاں توں ودھ
 اوہدی دتی تھاہر تے ای لگے نیں۔“

”ایہہ“ چھوایاں آلا پتن کیوں سدیندا اے؟“ مریاں ہتھاں وچ لیا سروٹے دا
 تیل مروڑ دیاں آکھیا۔

”آکھدے نیں کجھ سورمیاں وچ چھوایاں دی لڑائی ہوئی آہی اتھے۔ ایس لئی
 ایہنوں ”چھوایاں آلا پتن“ آکھدے نیں۔

”ویکھن وچ بھاری تھاہر لگدی اے۔ اسیں پانی لے کے لنگھدیاں تے
 پر چھائیاں جیہیاں ہس دیاں سُنیدیاں نیں۔“

”مینوں وی ایہی لگدا اے۔“ گہنے خاں آکھیا۔

”مینوں اپنے آون والے بچے دیاں گُلکاریاں نال گونجر دی تھاہر ویکھن دی

سدھراے۔ میں ایس ای آس تے اپنی حیاتی لنگھا رہی آں..... او تھے اپڑن لئی..... پر
 میں اپڑ نہیں سکی۔ اپڑتاں نو ایسے وی نہیں سکی۔ کوئی تریجی کیویں اپڑے گی؟ میں اتھے آئی
 آہی تے گہنے خاں دیاں نہیں سگوں اپنے بالک دیاں نظراں نال آل دوالے نوں ویکھدی
 آہی۔ اوس کیویں جمن توں پہلاں اپنیاں اکھاں میریاں اکھاں نال بدل دتیاں ہاں۔ ہر
 ایلے اسمان اُتے کھردے تاریاں وچ گُلکدا ہویا۔ جیویں ای تئیں دریا دی من توں تھلے
 لتھدے او، اتھے آون لئی اک سُرنگ جیہی دسدی اے..... دریا دی من نیڑے جھلار
 کوئی..... اک روز اتھے ضرور ستی وسے گی، گھر بن گے، رُکھ جھاڑیاں تے لکروڈھے جان
 گے..... ماں آکھدی ہوندی ہئی جو ایس اُجاڑ بیابان وچ نہ جاویں۔ جتھے مرن والیاں
 دیاں روحاں قبریں وچ دیاں جان مگروں وی او تھے ای بھٹکدیاں رَہندیاں نیں۔ جنگل
 ایناں سنگھناں اے جو اوہناں نوں اگلی دنیا تیک جان لئی راہ نہیں لبھدی تے اوہ لیہناں
 جھاڑیاں چکڑاں تے کنڈلیاں رُکھاں وچ لہولہان ای بھٹکدے راہندے نیں۔ مُڑ کے
 لیہناں ای لہو دیاں لکیراں اُتے پیر میلدے ہوئے بگھیاڑ، جنگلی بِلے انسانی ماس لہ کے
 کھان وچ باولائے وتدے نیں..... تے توں، میں نوں اتھے اکلیاں ای چھڈ کے چھوٹیاں
 آلے پتن توں لنگھ اُتاڑ پیا جانا ایں۔ گہنے خاں، انج نہ کرتے میرے اُتے ترس کھا۔“
 روندی تے کبدی ہوئی مریاں اپنا سر اوہدے سینے اُتے دھرتا۔



2

مہکدا جیون

مریاں ڈسکدی دا ڈسکن تے واء وانگ اوہدے ساہاں دا سہکن اوہدے سینے
اُتے گونج وانگ گھمر رہیا آہی، جدوں گہنے خاں ڈونگھی نیندرے جاسُتا۔ اوس ادھ میٹیاں
اکھاں نال اک سُفنا ویکھیا جو واڑے دوالے خونی جنگلی جنور حملہ کرن لئی لمے لمے ساہ لے
رہے نیں تے اوہدی گھوڑی دے کن کھلوتے نیں۔ اوہ بھونیں اُتے پیر ماردی ہوئی کھر
کھرتے سر سردیاں اوازاں کڈھ رہی اے۔ ڈردے مارے اوہدی اکھ اُگھر گئی۔ اوس سُدیا
جو گھوڑی ناساں وچوں اوویں دیاں اوازاں کڈھ رہی آہی جیویں اوس سُفنے وچ سُدیاں
ہاں۔ انج سُفنے تے حقیقت دے رچ مچ جاون نال اوہ ڈور بھورا جیہا جھولے وچ ہتھ
مارن لگ پیا۔ مریاں اوہدے نال سُتی آہی پرہن نال ناہی..... اوہدے چڑھدے ول وی
جنڈ دے جھڑے ہوئے رُکھ اوہلے سرگھی دا تارا چمک رہیا آہی جیہدی لاٹ واء وچ
بلدے دیوے دی لاٹ وانگ ڈولدی پئی ہئی۔ اوس دور رُکھاں کچھے مریاں دے ہسن دی
آواز سُنی۔ ون دے بروٹے نیڑے جتھے اوہ مڑ مڑ جا لگدی ہئی۔

رُکھاں وچ پکھیر وواں دا شور جاگ پیا آہا۔ انج جویں کیتے جان والے نویں

سفر اں دی صلاح وچ رُجھے ہوں۔ اوہ اُٹھیا تے ماں سبھرائی دے لیاندے مٹی دے
 بھانڈے وچوں پانی گھت کے کروی کیتوس تے باقی دا پانی ڈیک لاکے اک ساہ وچ ای
 پی گیا۔ پانی وچوں ہمک پئی آوندی ہئی۔ اُنج وی دھوڑ مٹی وچوں پانی کو تھرا ہو یا پیا آہا۔
 ”پانی، جھلا رتوں روز دے روز لیاونا چاہیدا اے۔ ایہہ کم میں ای گھوڑی تے
 سوکھا کر سکداں۔ کیویں نواپے تے مریاں پانی ڈھو ڈھو کے ہف جانیاں نیں۔“ اوس
 اندر ای اندر سوچ کے دھون انج گھمائی جیویں اپنے آپ نال گل کردا ہووے..... گہنے
 خاں ہولی ہولی واڑے ول ودھیا۔ اوہدے من وچ اک سہم آہا۔ اوہ چاروں پاسے ویکھدا
 اگے ودھ رہیا آہا..... دوویں اصیل گتے جاگدے ہاں۔ اک جھگی توں تھوڑا دوریڈا ٹنگاں
 وچ سر دتی اوہدے ول ویکھدا رہیا تے دوجا اوہدے نال نال، جیویں ہر کم وچ اوہدا ساتھ
 دے رہیا ہووے۔ اونٹھاں، مجھاں تے بھیداں وانگ ایہہ اصیل گتے وی نسلان توں
 اوہناں دے نال لگے آوندے ہاں۔ اوہناں دے خاندان دے سنگی ساتھی۔

”ہر شے ای اصیل اے تے نسلان توں ساڈے نال نبھدی ہوئی، سوائے میری
 گھوڑی، ماں تے مریاں دے.....“ گہنے خاں ایہہ سوچدا واڑے وچ وڑیا تے کھرکنے
 نال گھوڑی دے وجود تے والاں نال چنبڑی مٹی تے وال صاف کرن لگ پیا۔ مُڑ کے
 اوس اپنے ہتھیں اُساری مٹی دی گھرلی وچ پئے جنوراں دے چارے نوں ہتھ نال پٹھ
 اُتے کر کے سواہریاں کیتا تے گھرلی دے مُنّے اُتے بہہ گیا۔ اوہ مریاں نوں اڈیکن لگ
 پیا۔ اوہنوں پوری آس ہائی جو مریاں آوے گی تاں اوہ گھوڑی تے آتھر گھت، نواپے توں
 لوڑیندی شیواں پھڑ، میرو مراٹی نوں کنڈ مگر بٹھا کے اپنے بھراواں دیاں وسائیاں باہکاں
 ول نوں ٹر پوے گا۔ اوہ ساریاں توں پہلے عیسے ول جاوے گا۔ اوہی اوہدے توں نیڑے
 آہا تے اوہدے نال ای اوہدی سُر رلدی آہی۔ اوہ دوویں بھرا رل کے دوجیاں دوویں
 بھراواں نال صلاح کرن گے، ماں دی اک ساہرے رہ کے رہن ون دی سدھر

بارے..... پر مریاں نہیں آئی..... اوس جھگی تے رُکھاں وچکار اک پر چھائیں ویکھی۔ اوہ نوالیے آہی، جو اوہدے سفر واسطے اسباب جوڑ جمع پئی کردی ہائی.....

”ساڈے کھان پین دا سمیان کجھ ڈھیر نہیں رہ گیا۔ اسیں جی ڈھیرواں تے اجیہی پیڑی تھاہر کوئی ملی نہیں جیہدے اُتے چکی دا پڑ دھر کے اوہنوں پیڑ لوئے۔ جتی دیر تیکر پڑ نہ پیڑیا گیا۔ ایہہ تھوڑ مگنی کائی نہیں۔“ اوس جیویں اپنے آپ نال گلاں کر دیاں آ کھیا پر نال ای جیویں گہنے خاں نوں سناوی رہی آہی.....

”ٹھیک آ کھدی ایں نوالیے۔ پر ایہہ چکی پیڑن دا کم تاں تہاڈا زنانیاں دا اے۔“

آہو، ساڈا زنانیاں دا ای اے پر آہر آسرا ہو جاوے، کوئی صلاح سنگت کر لوئے تھیں ٹھکانے دی۔ کدیں تسیں اپنے آپ نال حد بندیاں کردے او تے اپنے وچکار پاڑے تے وتھاں گھتدے او تے کدے مُڑ کے اکساہرے تے اک تھاہرے راہن وسن دیاں گلاں ہو رہیاں ہوندیاں نیں۔ جیون ایہناں گلاں وچ ای کوڑ پیا ہوندا اے۔ میں آ کھدی آں، کوئی سانجھ سلوک ہوونا چاہیدا۔ جیون وچ رنگ رس ہووے..... ایہہ کیہ ہر ویلے السائے، ستے ستائے۔ انج جیویں اک دوجے کولوں اُکے تھکے ہووے۔ صلاحواں توں ودھ جیون وچ اکساہر تا لیاون دی لوڑ اے۔ کنے کونیں ساہ حیاتی دے؟“ نوالیے دیاں گلاں توں انج لگدا آہا جیویں حالے اوہ نیندر وچ ای ہووے۔ ایہہ گلاں کسے تھکے ہوئے وجود دیاں نہیں سن ہو سکدیاں۔ ایہہ تاں نسل ہوئے، جاگدے تے بولدے وجود دیاں، جیویں آ لھنیاں وچوں نکل کے کھلی واء وچ پکھیر و گلاں کردے ہوون..... پر نوالیے دی ادھ اُگھلائی آواز نوں گہنے خاں انج نہیں گولیا جیویں نوالیے اوہنوں سناون لئی سہج سہج کے گل کیتی آہی۔ گہنے خاں آون والے سفر بارے تے مریاں بارے سوچ رہیا آہا پر نوالیے ولوں کیتی ہوئی اک گل جیویں اوہدے گلوں وچ ای اٹکدی رہ گئی آہی..... تے ایہ

گل آہی حد بندیاں دی تے اک تھاہرے تے اکساہرے وسن دی۔ اپنے طور تے گہنے
 خاں جاندا آہا جو اکساہرے ہو کے تے اک تھاہرے ہو کے رہن والی گل اپنی سوکھی
 ناہیں۔ اوہنوں اندروں یقین آہا جو اوہ بھاویں اک تھاہرے رہ کے وی ابادی کرن،
 جھبہ دے ای اوہ ویلا آ جاونا اے جو اوہناں نوں اپنے واڑے لاسے کرنے پونے تے
 آپس وچکار واڑاں لاونیاں تے بئے پاوے پونے نیں۔ مُڑ کے اپنے حصے دی کنک، اپنے
 حصے دے رُکھ، اپنے اپنے جنور تے اپنے اپنے حصے دا پانی..... مُڑ وی ماں سبھرائی دے
 آکھن تے اک واری سارے بھراواں نوں اکٹھیاں کر کے رل مل وسن دی گل سانجھی ضرور
 کر لینی چاہیدی اے۔ ”سیانے آہندے نیں جو سانجھے دُکھ دی تاں پیڑ وی گھٹ ہوندی
 اے۔“

اوہ جاندا آہا جو بھاویں رل پٹھن تے رل اباد ہوون دا سہانج بننا تاں کائی
 نہیں، مُڑ وی ایہہ جیہڑے روز دیہاڑے پینڈے وچ پیر ہوندن، اوہناں توں تاں جان
 چھٹسی تے جیہڑا ویلا اک دوجے دے آون جاون وچ گپک جاندا اے، اوہ بچ سی۔
 اندروں اوہ کپکے پیڈے طور تے ایہہ متاوی پکائی واندا آہا جو آپت وچ سانجھ نہ وی رلی
 تاں اوہ روز دیہاڑے ہتھیں کڑیالا کرناں تاں چھڈ دیسی تے ماں نوں وی صاف صاف
 دس دیسی جو اوہ اوہناں روز دیاں پینڈیاں توں اک تھک گیا اے۔ اوہناں نوں ایس گل
 دا وی احساس ہوونا چاہیدا اے جو مریاں وی کرنوئی رہندی اے۔ مریاں دی سوچ
 آوندیاں ای اوہنوں راتیں اوہدیاں کیتیاں گلاں وی چیتے آکھیاں تے اوہ من ای من
 وچ مُسکا پیا۔ خورے مریاں نوں کیوں وہم جیہیا ہو گیا آہا جو اوہ پانیاں وچ دُب مرے
 گی۔ نکلے لا، لاناں اکٹھیاں کردیاں اوہنوں گوہ نے وڈھ لیا اہا۔ نیڑے دے اک ٹھٹھے
 وچ حکیم توں لئے دارو نال اوہ بچ تاں گئی آہی پر حالے وی اوہدے اُتے غشی تے جنون
 دے دورے پوندے ہاں۔ اوہ جھلا رتوں پانی لین جاندی یاں چاننیاں راتاں وچ جدوں

جنگل ڈونگھی نیندرے سٹا ہٹکورے لے رہیا ہوندا، اوہدی حالت جنونیاں والی ہو جاندی.....

”لہندے ول جدوں سورج دی لالی چمک رہی ہوندی اے، شام دا جھٹپٹا رُکھاں اُتے پر چھائیاں وانگ زمین نال بھیت سانجھے کر رہیا ہوندا اے۔ اسمان بڈھے بندے دی کمان ورگی ڈُھہی وانگ لفیا ہوندا اے، مینوں لگدا اے جو اک اصیل ساوی گھوڑی اُتے اسوارتوں میرے ول اڈدا آوندا ایں۔ گہنے خاں، ایہہ سفنا نہیں، حقیقت وانگ ای ہوندا اے سارا۔“

اوہدیاں گلاں سُن کے اوہنوں لگدا جو اپنی بی بی تے سیانی اوہدی زنانی..... روز دیہاڑے اپنے نال کھلواڑ کیوں کردی رہندی اے..... تے ہُن جیہڑی چکی پیٹن دی گل نواپے نال ٹری اوس اوہنوں حیاتی گزارن دا ای پورا درس دے چھڈیا آہا۔ ایہہ اکلاپا اے یاں جنگل وچ ویرانی دا اثر؟ بھاویں ہر ویلے اوہ کے کارے لگیاں رہندیاں نیں پر لگدا اے جو ہتھاں پیراں دے نال نال اوہناں دا ڈماک وی پھر کی وانگ گھمدا ای رہندا اے۔

ایہناں سوچاں وچ ای گُمیا اوہ جھگی دی مگرلی لاہے اپڑیا جتھے میرومراٹی مونہہ ٹڈی گھراڑے پیالیندا آہا۔ اوس اوہنوں جگایا۔ اوہ اکھیں ملدا اُٹھجیا۔ دوہاں نواپے ولوں لیاندا بورا تے رات دے بچے ہوئے من اُتے مکھن دھر کے کھادا.....

”دو کو من پونے دے پلے وچ نال وی بنھ دیاں.....؟“ نواپے، گہنے خاں توں پچھیا۔

”لوڑ نہیں، جیویں راہ وچ گھوڑی چر لیا، اسیں وی کوئی سبب کر لواں گے۔“ گہنے خاں گل کردا کردا گھوڑی تے گتے آتھرنوں کھج کے پرکھیا کڑیا لے نوں تنک کے ویکھیا تے رکاب نال زور لا کے آکھیا۔

”نہیں چودھریا، پدھ لمیرڑا اے۔ بھین نواپے ٹھیک ای آکھدی اے۔ سانوں کجھ پلے بنھ لینا چاہیدا اے..... مینوں پتا اے جیویں میں بھکھا ترہیا تہاڑے تیک اپڑیاں۔ اک ہور تاکید کراں تینوں بھیناں، ایہہ میرے ڈھول دا خاص خیال رکھیں۔ ایہہ میں ای جانداں جو میں کس طرحاں جھنگ توں ویہیاں مُکا کے کاریگرتوں لیاندا اے..... نالے ڈھول و جے گا تاں ای تاں اسیں خلقت اکٹھی کر کے چک بھوئیں وچ لاه سکاں گے۔“ میرو ترلا لیا۔

”بنھ دیوس، لیہنوں.....“ گہنے خاں ہسدے ہسدے نواپے نوں آکھیا۔
گہنے خاں تے میرو مراٹی گھوڑی اُتے چڑھ کے پیڑ پٹن ای لگے ہائن جو لتاں سھرائی وی اپنے آپ نال گلاں کردی ہوئی جھگی وچوں باہر نکلی۔ گہنے خاں نوں پک آہی جو اوہ گہنے خاں دے اوکھے پینڈے پاروں نہیں سگوں مریاں دے بارے گلاں پئی کردی آہی۔

”ایس توں تاں چنگا اے جو اسیں دریا دی من اُتے بہہ جاییں۔ آپے ای سیال آکے لیہنوں موڑ لے جاؤن۔“ لتاں سھرائی دی گل گہنے خاں دے کنیں پئی۔ اوس دُکھی دل نال گھوڑی دیاں واگاں چھکیاں۔ گھوڑی کچیاں پکیاں راہاں اُتے ٹرن لگ پئی۔
مریاں وناں تے کڑیاں دے اوہلیوں اوہنوں تکیا تے ورلاپ کیتوس: ”نہ میرے کنیں بُندے، نہ سر مینڈھیاں، مینوں سولاں دے مونہہ گھت کے گھوڑی ٹور لئی آ تے بھرے پانیاں ول ٹر پیا ایں جتھوں عشق دے لنگھدے نی نگھال۔ ڈھاہاں لکیاں نی میرے وچ وجود دے جیویں ڈھاہ لگی دریا نوں.....“

مریاں بارے اپنے قبیلے وچ مشہور آہی جو اوہ بیت جوڑ دی آہی۔ اوہدے سیال قبیلے واسطے ایہی گل بہوں بے بھری والی آہی۔ اوہ جھبڈے ای اوہنوں کسے اگلے گھر ٹورن دی گل کر رہے ہائن۔ پر ایس ای ویلے گہنے خاں اپنے بھراواں نال اوہناں دی وستی

وچ گیا تے اوہ سنے اپنے بیتاں تے معشوقانا طبیعت دے اوہدے نال آ گئی۔ لوکاں وچ اوہ اُدھال مشہور ہو گئی تے لتاں سبھرائی وی اوہنوں ایہی ناں دتا..... بیت بناون والی ایہی معشوقانہ طبیعت ای آہی جو اوہنوں جنون وچ بندھی رکھدی تے اوہدی حالت وچ بدلاؤ نہ آ وندا۔



وناں تے کڑیاں دے اوہلیوں گہنے خاں دی گھوڑی دُکلی چلدی ہوئی لنگھی۔ اوہدے کچھے میرومراٹی نوں مریاں چنگی طرحاں پچھان سکدی آہی۔ اوہ ایس ای اڈیک وچ ہئی فجر اں ہوندے سار ای، جدوں اسمان دے تارے بجھ جاوَن گے تے پنکھ پکھیرو دانے دُکے دی بھال وچ جنگل وچوں نکل کے میدانی علاقیاں وچ اڈ جاوَن گے، گہنے خاں ایہتھوں لنگھے گا۔ اوہ ناہی جاندی جو اوہدے نال میرومراٹی وی ہووے گا پر اوہنوں یقین آہی جو گہنے خاں تاں ضرور بر ضرور جاوے گا۔ اوس جاوَن ای ہئی۔ ماں دے آکھن تے اپنے بھراواں ولے۔ پر ایہہ اوہدی گھوڑی کیویں اُچیاں نیویاں تھاہراں تے لہراندی جا رہی اے۔ ایہہ گھوڑی تاں انج کدے نہیں ٹُری آہی۔ انج جیویں واء رُکھاں وچوں لنگھدی ہوئی۔ اوہنوں لگا جیویں ہُنے کہ ہُنے گھوڑی اپنے اسواراں سنے بھونکیں اُتے ڈگے گی تے اپنے تے اپنے اسواراں دیاں دھوناں تے ٹنگاں تڑوا کے بہہ رہے گی.....!!



3

وناں تے کڑیاں دے اوہلے

مریاں وناں تے کڑیاں دے ڈونگھے رُکھاں اوہلے لگ جاندی اے۔ اُچی اُچی
 ہسدی ہوئی..... اوہدے ہسن دی اواز کِریاں، وناں، مکروٹیاں، گھاء، سرکنڈیاں تے سُکی
 بھوئیں اُتے اُگیاں کنڈیا لیاں جھاڑیاں وچ گواچ جاندی اے..... مُڑ کے اوہ اپنے آپ
 نال گلاں کرن لگ پوندی اے..... ”بار دا دیس سُجھا، جتھے شینہ چانگھر دے اُٹھ
 ارڈانگدے نیں ہر ویلے۔ میں کہیا سوہنا دیس چھڈ بے دیس ہوئی۔ ماں جدوں وی سُفنے
 وچ آوندی اے تاں ہمیش مینوں کجھ کھان لئی دیندی اے۔ نہوا دھوا کے نویاں پوشاکاں
 پویندی اے۔ میں آہندی واں ”مینوں بھکھ نہیں“ تاں اماں دلیلاں دیندی ہوئی آکھدی
 اے: ”توں کھا میرے دھیے..... تیرا پیو واہ گاہ کے ون سونیاں جنساں گھریں لیا وندا اے۔
 مُڑ وی گھٹ جاندا اے پر جیکر پاک رُوحاں دا ہتھ لگ جاوے تاں ایہدے وچ برکت پے
 جاندی اے۔ نہیں تے راہ وچ انج ٹاکیا جاندا اے جو کھاون والے نوں قونج پے جاندی
 اے۔ اُتوں ہر ویلے تاں تیرے پیو دے ڈیرے تے واہراں تے پرھیں لتھیاں رَہندیاں
 نیں۔ کدی مالیا اُگھیون تے کدی لاماں وچ لے جاوَن لئی سپاہی۔ کدی ساویاں تے

کدی نیلیاں گھوڑیاں دی طلب..... پر کرے وی تاں کیہ۔ سیانے آہندے نیں، ہاتھیاں نال یاریاں ہوون تاں دروازے نیویں نہیں رکھیندے ان۔ اُتوں ولایتی سرکار دیاں کاراں وکھریاں نیں زریاں۔ آہندے نیں ہُن تے ہر پاسے، ہر ویلے کھوہ کھٹیندے پئے نیں۔ واہی، بنائی، گاہی تے نیجی جاندی اے۔ نہراں پیاں نکلدیاں نیں، بارکاں پیاں پمدیاں نیں۔ ہر تھائیں چھاونیاں دیاں چھاونیاں فوج دیاں لہندیاں نیں۔ دنیا دے طور طریقے ای بدلے جاندے نیں۔ خلقت اپنی ہے تاں نہیں، مُڑ جیہڑا ایناں واہیا گاہیا جاند اے، کتھے غرق ہو جاند اے؟ آہدن، ایہہ جیہڑے ولایتی آئے نیں، اپنے مُلکھ نوں ٹور دیندے نیں۔ دُور سمندراں ولے دیس ہے ایہناں دا۔ مُڑ لاماں لگیاں رَہندیاں نیں ہر ویلے ساڈے آل دوالے۔ کھوہ دھروہ ای لگی اے..... کناں ای ایہناں معرکیاں وچ اضافہ جاند اے۔“

مریاں ہر ویلے یاد رہ جاون تے بھُل جاون والے سسے وچکار جاگدی تے سستی حقیقت وانگ سُننے ویکھدی رَہندی۔ سُننے جو اوہدی کچھلی حیاتی نال جُڑے ہاں۔ اوہدے پیو نوں اٹھ کھوہاں نال پیچ ہون والے مربع ڈھبے ہاں۔ جو چغتیاں توں گڈیندے آوندے ہاں۔ جیہناں نوں ہر ویلے کڈھے سنگھاں والے بلد تے ناہرے تے کھسی اوٹھ کھچدے۔ پانی ذخیریاں نوں جاندیاں نالیاں وچوں گھٹ ای سُکدا۔ کدی پٹھلے مربع دی تے کدی کوئی اُتلے مربع دی کوئی نہ کوئی ٹوٹی پیچدی ای رَہندی۔ اوہدا پیو تے بھرا کامیاں نال کمیں لگے رَہندے۔ اوہ گھاہ بوٹ تے ٹوئے جے پدھرے کر کے ہف گئے۔ ورھیاں مگروں جدوں بھوکیں پدھری ہوئی۔ اوہدے وچوں ڈھیر جنساں مالے تے لگان وچ ٹر جاندیاں۔ پر مُڑ وی سرکار دربار دے نال نال رعیت وی رَہتی رَہندی۔ رعیت جیہدے وچ ہُن اوہدا پیو وی رل گیا آہا۔ ہُن جیہدے حصے وچ رعیت وانگ ای ہر شے آوندی۔ پہلے اوہ اپنے علاقے دا سردار ہوندا آہا..... جیون وی اک خشبو وانگ اے جو

کڑیاں تے پھلا ہی تے کھڑے پھلاں وچوں آوندی اے۔ جھبڈے ای ایہہ خوشبو اک
 ڈوڈی دی صورت وچ بدل جاندی اے تے لیہڈے اندر بی پے جاند اے۔ جو پکدا اے
 تے پک کے اک نویں حیاتی دے کھڑن دا کارن بند اے..... میری حیاتی دی کروئیل
 اُتے ایہہ پھل کدوں کھڑے گا تے کدوں لیہڈے وچوں بی پھٹے گا..... مریاں ایہہ
 سوچدیاں جھگی ول نوں مہاڑ کیتی۔ اوہنوں لگا جیویں اوہدیاں آندراں لوہیاں جا رہیاں
 ہوں۔ اوہنوں بھکھ لگی آہی۔



گہنے خاں دیاں اپنیاں سوچاں ہاُن۔ اوہدا اک اکلا دم ہوندا تاں اوہ ایس ای
 اُجاڑ نوں وسوں وچ بدل لیندا تے ایس جنڈ، بھگاٹ، لیلھی تے دوجیاں پتھر بوٹیاں نال
 اپنے جنوراں نوں رجا چُجا کے اوہناں دی نسل ودھالیندا۔ بھوئیں نوں اکساہریاں کرن
 وچ لگا رہندا۔ وناں، کریراں، جنڈاں تے لکراں نوں وڈھ کے بالے تے چھتیر بنا کے
 جھگا چھت لیندا۔ پر اوہدے نال کنے ای ہور جی رلے ہاُن۔ اوہدی ماں آہی، دوزنایاں
 ہاُن تے اک طرحاں ہُن میر و مرانی وی اوہناں دے گھر دا جی ای گنیا جاون لگ پیا آہا۔
 اوہ میر و نوں مگر لدی ٹیر نوں پیر ٹپا ماردا کچی بھوئیں نوں جھاگدا جا رہیا آہا.....
 دور دراڈیوں کسے جنور دے ہاکن تے پکھیر وواں دے بولن دیاں اوازاں
 آندیاں پر اوہ چُپ ہاُن۔ ایس چُپ وچ کئی راز ہاُن، کئی خوف ہاُن۔

گہنے خاں من وچ ایہہ متاپکائی ٹُریا جاند آہی جو اوہ کیہڑا وار ہووے گا جو اوہ
 ایس اُچی نیویں، ان پدھری تے ٹویاں ٹبیاں والی بھوئیں نوں جھاگدا ہو یا اپنے بھراواں
 کول جاوے گا..... اوہدا بھراواں نوں ملن جان دا ایہہ فیصلہ اپنا نہیں آہی۔ اوہ تاں جتھے جا
 وسیا آہی، اوہ تھے اپنی پوری حیاتی دے یدھ وچ چُپا۔ پر لگدا انج آہا جو دھرتی دی کسے اُن
 ویکھی تھاہر تے اوہدے ہمیش ہمیش لئی رہن دی جُوت کسے رُمال وچ بدھے تویت وانگ

لھیٹی پئی آہی۔ دھرتی جو بنجر، پتھر پللی تے واہن وچ وی اوکھی ہوندی۔ اوہ او تھے ای وسیرا کر لیندا۔ پر اماں سبھرائی دے آکھن وانگ، کائی دھرتی اوہناں دے پیراں نوں پھڑدی ای نہیں پئی آہی۔ جویں اماں سبھرائی دے پیکیاں نوں دھرتی راس آئی، انج کسے دی تقدیر وچ گھٹ ای آہا۔ اکساہری، واہی، گاہی جاوَن والی..... تے اسیں جنگل واسی خلقت جیہڑی جنگلاں وچوں نکل کے آباد ہون توں ڈردی تے جیہدے وچ رہن والی بھوئیں نوں آباد کرن دی آسنگ وی گھٹ تے باہاں وی اینیاں ناہیں جو بھوئیں وچ کھی وگا سکن۔ لے دے کے اوہی بھوئیں رہ جاندی آہی جتھے اوہدا پیو و ساہرے خاں جا کے مر گیا آہا۔ قونج دی پیڑ نال باکردا، کرلاند اہویا۔ اوہدا بھرا و لا رادسدا ”گھروں تاں حکیم ال جان دی نیت نال نکلیا آہی پر اوہدے تیک اپڑن توں پہلاں ای اوس بھوئیں تے جا کے انج ڈگا جیویں آرا پھرن مگروں وڈے رُکھ دا تنا ڈگدا اے۔“ اوہنوں ڈگدے ہوئے نوں ویکھدی ہوئی اک جنگلین زنانی دسیا، اوہ جدوں تیک پانی لے کے اوہدے ول مڑی، اوہ ساہ دے چکیا آہا۔ پیو دی موت بارے دسدیاں ہویاں ہمیش و لا رادے نیر و بیہن لگ پوندے..... تے مرن والے دے اکھان موجب ایہی اوہ بھوئیں آہی جتھے اوہدیاں آون والیاں نسلاں نوں آباد ہوونا آہا۔ اوہدے چاروں پُتر تے چاروں پُتراں دیاں نسلاں اتھے آباد ہوندىاں تے اوہدی ماں دا ایہہ وہم وی مُک جاندا جو اوہناں دے پیراں تھلے انج تیک کوئی اجیہی بھوئیں نہیں آئی ہائی جو اوہناں دے پیراں نوں پھڑلیندی..... گہنے خاں کجھ ہور گلاں نال ایہہ گل وی جاندا آہا جو اخیر وچ انج ای ہووے گا۔ اوہدا پیو علاقے دا منیا پر منیا پارکھ آہا۔ بھوئیں دا پارکھ۔ خلقت اپنی زبان وچ اوہنوں ”سونگھا“ سدّ دی۔ لکڑی دی ڈسنگھی تے اک ساوی گھوڑی۔ چٹی لمی چادر دی بُکل ماری تھائیں تھائیں گھمد۔ کھوہ کھٹاون والے اوہدے کچھے کچھے ہوندے.....

اوہی زویں جتھے اوہدا پیو جا کے انج ڈگا آہا جیویں آرے نال وڈھے ہوئے

رُکھ دا تتا۔ اوہنوں اوہ زویں پُکار دی۔ رات دے پچھلے پہراں وچ ہو کر دی تے فجر اں ویلے مہکار دی ہوئی اوہ دے ول ودھدی۔ محبوب زنانی وانگ اوہ دے کناں وچ کنسویاں کر دی۔ سگوں مریاں وانگ..... اوہنوں یقین آہا جو اوہ او تھے ای جا کے مرے گا۔ اپنے باقی ترے بھراواں تے اوہناں دیاں اولاداں سنے او تھے اباد ہوون مگروں۔

”پر جیکر اوہ بھوئیں کسے دی ملکیت ہوئی تاں؟“

”اوہ بھوئیں کسے دی ملکیت ہوئی تاں اوہ اوہدی رعیت بن کے رہ لین گے“

اوہ اپنے سوالاں دا آپ ای جواب وی دیندا۔

”رہناں ای پوے گا۔ او تھے اوہناں دا پیو مریا اے تے ایہہ آون والے

زمانے دی وڈی نشانی اے جو او تھے اباد ہوون والے گستان وچ اوہناں دیاں قبر اں وی ہوون۔“

”چودھری، اگوں ٹبا آون والا اے، میر و مرانی نے جیویں اوہنوں کسے خوف

توں ورجدیاں آکھیا ہووے۔

”آہوتاں مُرکیہ اے؟“

اک جھاڑی اوہلیوں سیہڑ نکلیا تاں گھوڑی تر بھک گئی۔ گہنے خاں اوہدیاں

واگاں ڈھلیاں چھڈ دتیاں تے بے دھیانی نال میر و مرانی دی گل دا ولدا دتا۔ پر میر و مرانی

دا ڈراوہ دے چہرے اُتے اُبھر آیا۔ اوس آکھیا، ”اگوں ذخیرہ وی ہے جیہدے اُچے نیویں

میدان وچ روحاں، گھوڑیاں تے گڑیاں دے روپ وچ پھر دیاں وئیاں نیں۔ او تھوں

لنگھن والے مسافراں نوں بھٹکا کے ویران تھاواں تے لے جاندیاں نیں تے اوہناں دا

کلیجا اپنے ہتھ نال کڈھ کے کھا چبا جاندیاں نیں تے اوہناں دالہو سُرک جاندیاں نیں۔“

”گلاں بنیاں ہوئیاں نیں ساریاں۔ ایویں کملا جیہا نہ ہووے تے“ گہنے خاں

دے حوصلہ دین اُتے اوہ دے ساہ وچ ساہ آیا۔

”اوویں زویں ویکھن نوں تاں انج ای نروئی اے بی دوروں سینتاں ماردی اے۔ پر لیہنوں اباد کرن تے اتھے رہن لئی کسے اندر دل گردہ نہیں چودھری.....“ میرو مراٹی، گہنے خاں نال انج بنا ٹھنا کے گل کیتی جیویں اوہنوں اتھے آباد ہون لئی پریردا تے ہلا شیر دیندا ہووے۔

بھاویں ایہہ کائی عام گزر گاہ نہیں آہی، پر گہنے خاں اک دو واری ایٹھوں لنگھیا ضرور آہا تے اوس وی اتھے گھوڑیاں چردیاں تے گویاں نوں پانی دے ترے ترے چار چار بھاٹے سر اُتے دھریاں اُچی اُچی گلاں کردیاں تے ہسدیاں نوان ول گھاٹی نوں لہندیاں ضرور ویکھیا آہی۔ پر اوہنوں جرأت نہیں ہوئی آہی جو اوہ گھوڑیاں وچوں کسے گھوڑی اُتے بہہ جاوے یاں گویاں وچوں کسے نال ہس کے گل ای کر لوے۔ بھاویں گہنے خاں دے وڈکیاں دا بھوئیں لہہ کے کھوہ کھٹاون دے نال نال اتھریاں گھوڑیاں نوں سُدھارن، سکھاون داکم وی رہیا آہا۔

اوہ اپنیاں گلاں دے دھیانے ای لگے جاندے ہاں جو اوہناں دے ساہمنیوں اک چانگھردا ہویا بگھیاڑ لنگھیا۔ خونی اکھاں نال اوہناں ولوں تکتا ہویا۔ اک واری تے اوس اوہناں ساہمنے کھلو کے اوہناں نوں گھوریا جیویں ایس گل دا نتارا کردا ہووے جو اوہناں اُتے حملہ کرن دا نتیجہ کیہ نکل سکدا اے؟ مُڑ خورے کیہ سوچدا مونہہ پر تاندا اونی ای تیزی نال اگے نکل گیا، جی تیزی نال ساہمنے آیا آہا۔ اوہدا جُشہ راکھویں گُتے توں وی ادھا آہی پر پھرتی تے حملہ کرن دی طاقت تے جرأت گُتے توں دونی۔ میرو مراٹی تاں انج جیویں ٹیر تے گہنے خاں دے وجود نال سیپ ای ہو گیا ہووے۔

گھوڑی ترٹھی تے اک دو پچھاڑیاں انج ماریوس جو اسیل گھوڑی توں وی ودھ لگی۔

”ویکھیں چودھری، ٹیرنوں تے مینوں بچاویں۔“

”تے میں..... میں پچیا تے تہانوں بچاواں گاناں۔ اُلو دا کن نہ ہووے
 تاں.....! ابا بہشتی آہندا آہا جواک ٹیر تہانوں بچا کے لے جاسکدی اے۔ تہانوں ڈونگھے
 جنگل توں کڈھ کے لے جاسکدی اے۔ پر ایہہ گھوڑی دے فرض وچ شامل نہیں ہوندا جو
 تسیں بھوئیں اُتے ڈھے پووتے اوہ تہانوں چا کے کنڈ اُتے دھر لوے۔ گھوڑی دا کم تاں
 اُکا اینا ای کو اے میرو جو اوہ تہانوں او تھے تیکر اپڑا دیوے جتھے تیک تسیں اپڑنا اے تے
 او تھے اپڑ کے، نسل ہو کے گھوڑی نوں تھاپڑنا، اوہناں کھرکنا کرنا، اوہنوں پٹھا دتھا گھتتا
 تہاڈا کم اے۔“

”آخو، پر جیکر تسیں خیریں سلامتی اپڑ جاؤ تاں؟“

اوہ ایہہ گلاں کردے کچی پکی راہ توں نوان نوں لہہ رہے ہاں تے مڑ انج
 جیویں میرو چکیا ہووے۔ ”چودھری، واگاں کھچیں، چودھری“ چودھری دا تاں تراہ ای نکل
 گیا۔ پر اوہ گھوڑی دی کنڈ اُتے انج کھلو گیا جیویں کوئی بازی گر ہووے، تے نال ای ہتھ
 ودھا کے ہرے کچوک سوڑے نالوں گچھا سوڑیاں دا دھروہ لیوس، جیہدے وچ لیس دار
 کچے پکے سوڑے ہاں..... گہنے خاں نوں اوہدی ایہہ بے تگی حرکت چنگی تاں نہیں لگی پر اوہ
 چپ کر گیا۔ میرو دے وجود دی ایہہ لچک تے تیزی اوہنوں بھاوندی آہی۔ اوس تھوڑے
 سے پہلاں ای پورن ماشی دی اک رات جدوں اوہنوں ڈھول و جاوَن دا آکھیا تاں اوس
 اجیہے سوہنے چچ نال ڈھول و جایا، اپنے وجود نوں ڈھول دی اواز دے نال نال لچکاوندیاں،
 انج دا گاؤن گایا جو سے نوں جیویں اپنی گھائیں وچ بنھ دیتوس۔ اماں سبھرائی، نواسیہ،
 مریاں، گہنے خاں سنے جنور، پکھیرو، جنگل تے چن وی جیویں اوہنوں ڈھول دی گھمروچ
 گھمردے ہوئے نظریں آئے۔ اودوں دا ای گہنے خاں میرو مراٹی نوں منن لگ پیا آہا جو
 اوہ وڈا ڈھولی ضرور ہے۔ گلاں توں بھاویں نہیں لگدا۔

جنگل وچ اک شوکر گونجی۔ ایہہ تیز ہوا دی شوکر آہی، جیہڑی ہولی ہولی ودھدی ای جا رہی آہی۔ مُڑ ڈگے ڈھٹھے پتر تے رُکھاں دیاں کرونبلاں جھڑن لگ پیاں۔ اوہ ٹردے رہے۔ وادی شوکر ہور ودھی۔ ہُن نال دھوڑ وی آہی۔ مُڑ کے دھڑام نال اک وڈے رُکھ دا ٹاہن اوہناں دے ساہنے آ ڈھٹھا۔ جیکر اوہ تھوڑا جیہا وی اگے ہوندے تاں ایہہ ٹاہن اوہناں دے سر اُتے ای ڈھاندا.....

”چودھری، کوئی کروپی سر ساڈے آؤ، ہئی، جیکر پنج سکدا ایں تے پنج تے سانوں وی بچا۔ مینوں وی تے گھوڑی نوں وی۔“ میرو مراٹی تھڑ دلی نال بولیا۔
 اپنے چروچ چودھری گہنے خاں گھوڑی دیاں واگاں گھلیاں چھڈ کے اوہنوں کنڈ اُتے تھاپڑی دتی تے پچکار دیاں ہویاں روک لیا۔ پر اوہناں دوہاں دے گھوڑی توں لاہندیاں کردیاں ات گھپ انھیری اوہناں دے سراں نوں چڑھ آئی۔ گھوڑی گھابری، ہنکی، ترٹھی، شوکدی تے کڑیالا ہتھوں چھڈا نال ای رُکھاں دی اک جھنگی نوں جاوڑی۔ مگرے مگرے گہنے خاں تے میرو مراٹی۔

”کروپی آن پئی او چودھری“ واء وچ میرو مراٹی دی ڈولدی ہوئی اواز آئی۔
 ”کیہ کروپی کروپی لائی کھلا ایں۔ کوئی کھلو کے ساہ سُر لین تے قیاس کرن دے جو اگلا پینڈا کیویں نیڑ نا اے؟“ گہنے خاں دی کاوڑیجی ہوئی واج سُنن مگروں ڈھیر چرتیک چُپ چان جیہی رہی..... مُڑ کے جدوں انھیری دا زور گھٹدا تاں اوہناں وچوں ضرور کسے نہ کسے دی اواز آوندی۔ گہنے خاں تے میرو چپ وی ہوندے تاں گھوڑی دی خرخر دی واج ضرور سُنندی۔

”میں حالے کدائیں ٹک کے بھین نواسیے دے پکا کے دتے ہوئے مناں دے کھان بارے سوچ ای رہیا ہاوی..... پر میں آکھداں جو مُڑ وی چنگا ہويا، اسیں حالے انھیاں ڈالاں توں دُور ای آہے جو ایہہ انھیر آن لتھا اے۔“

”انھیاں ڈلاں.....؟“

”جو ذخیرے توں پہلاں آوندیاں نیں۔“

”اک ڈل ہے میرو، اک..... تے جیکر اوہدے اُتے پھر کڑی لا کے اگے اُٹھ جوئے جاوَن تاں چنگا بھلا پانی نکلا اے۔ صاف سُتھرا اُتے مٹھا.....!“ گہنے خاں، میرو نوں دسیا۔

”پر..... چودھری باوے آدم ویلے دیاں کڈھیاں ایہناں ڈلاں، ذخیرے وچ پھرن والیاں زنانیاں تے گھوڑیاں بارے کدیاں ای کہاوتاں مشہور ہن؟“

”اوہ کیہ؟“ گہنے خاں مونہہ اُتے منڈ اسا کسدیاں ہویاں میرو توں کچھیا۔

”آ کھدے نیں جو زمانیاں پہلے پکھی واساں دا ٹیرا ستھوں لنگھیا۔ اوہناں اتھے ہریالی تے گھاہ بوٹ ویکھ کے وسیرا کر لیا پر پین لئی پانی بہوں گھٹ ہانے۔ اوہناں ایہناں ڈلاں توں پانی پینا تے اپنے جنوراں نوں وی پیانا۔ سانجھ سویرے اوہناں دے بالکے ایہناں ڈلاں نیڑے جا چُجڈے جو حالے انھیاں ناہیں ہوئیاں۔ اوہ بالکے جان جان کے ایہناں ڈلاں وچ روڑے تے پتھر سُجڈے۔ پانی دی چھماک چھماک اواز سُندے تے بے عاتاں وانگ ہسدے تے کھلّوں کردے۔ اُتوں جا کے ڈل دیاں مُدیاں اُتے کھلو جاندے۔ اندر جو وسدیاں ہاَن روجاں۔ اک چاننی راتے اک کے باہر نکل آئیاں تے اوہناں پکھی واساں دا جیونا محال کر چھڈیو نیں۔ آہندے نیں جنگل وچوں باہر نکلے تے ہُن تاں پتا لگدا اے جو نویں شہر جیہڑے پئے وسدے نیں، او تھے پتھر تے روڑیاں ڈھوندے نیں۔ اوہناں شہراں بارے وی عجیب کہاوتاں نیں..... تے اسیں جیہناں زنانیاں نوں جو گناں، مرگ نبیاں سمجھدے آں، اصل وچ تاں ایہہ ٹونے ہاریاں نیں تے مُشک لھوئییاں انج دیاں جو کولوں لنگھ جاوَن تاں سو سو گرماں تیک خوشبو آوندی رہوے۔ میں تاں آہنداں جو ساڈے تے ایہہ انھیری اوہناں ای جھلوائی اے۔“ میرو مراٹی پُپ کر گیا تے

لیندا جیہا ہویا اک وڈے رُکھ دے تنے نوں مونہہ چا دتیوں۔ اپنی چرتیک واء دے ورو لے بندے آوندے تے اوہناں دے دوالیوں چانگھر دے ہوئے لنگھ جاندے۔ انج جیویں جنگل وچ کوئی یُدھ ہو رہیا ہووے۔ جنوراں دیاں ہا کراں تے پکھیر وواں دیاں چیرکاں تے گرلاٹاں..... گہنے خاں پہلے گھوڑی دے گل وچ رسا گھتیا تے مڑ کجھ سوچ کے کڈھ لیوں۔ جو کدھرے جس ڈاہن نال گھوڑی نوں بنھیا، کدھرے اوہی ٹُٹ گھوڑی اُتے آن پوے۔ نال ای بدلاں دی گرگڑا ہٹ انج گونجری جیویں پن چکیاں گھم رہیاں ہوون۔ نکے ہوندیاں گہنے خاں اک واری اپنے پیو نال اک وڈی نہرتوں لنگھیا آہا، جتھے اگے جا کے اک دوئیں ڈھارے ہاُن تے دور دور تیکر جنگل نوں پدھرا کر کے کھیت بیج لئے گئے ہاُن۔ او تھے اوس ایہہ چکیاں ویکھیاں ہاُن۔ ہولی ہولی چلدیاں جوئیں رُکیاں کہ رُکیاں تے آٹا کپڑے دی بجھکی وچوں انج کردا جیویں چکی دے پڑکنک دی اُگالی کر رہے ہوون۔ اوہ دے لئی ایہہ بڑی حیرانی والی گل آہی جو جیہی چکی نوں گیر گیر اوہی ماں پھہ جاندی، اوہ پیسے اتھے اپنے آپ ای گردے جا رہے ہاُن۔ اوہنوں ایہہ پڑگودے انج لگے جیویں ہُنے آپس وچ گلاں کردے کردے کھلو جاون گے۔ گہنے خاں اک پل لٹھے لئی سوچیا جیکر ایہہ انھیر اوہناں چکیاں کولوں وی لنگھے تاں اوہ انج ای تیزی نال رگون جیویں ایہہ انھیری پئی چلدی اے۔ اوہنوں قیامت دی ایس گھڑی وچ، جیہدے وچ رُکھاں دے ڈاہن نال اوہ کسے ویلے وی ڈھیری ہو سکدے ہاُن..... مریاں، نواپے، لتاں سمھرائی تے جنوراں دا خیال آیا..... خاص طور اُتے مریاں دا..... او تھوں وی انھیری انج ای لنگھ رہی ہووے گی یاں او تھے اپڑن والی ہووے گی“ اوہ اپنے اُتے جمی ہوئی دھوڑ نوں سردی چادر نال ہٹاندیاں ہویاں سوچ رہیا آہا..... اوہناں نوں انج ای لگ رہیا آہی جو تیز انھیری اوہناں نوں اپنے نال ای دھروندی لے جاوے گی۔ واء وچ اُڈیاں ٹاکیاں، لیڑیاں تے رُکھاں دے پتراں دا جھنگی وچ ڈھگ لگ گیا آہا تے کئے ای پکھیر و رُکھاں

وچ آ کے انج وجدے جیویں اوہناں اُتے کسے ہلا بول دتا ہووے۔ گہنے خاں تے میرو
مراٹی جس جھنگی وچ ہاُن اوہدے وچ آن کے ڈھٹھن والے پکھیرو رکھاں دے مُڈھاں
تے بھوکیں وچوں پنگر دیاں نویاں کروہلاں وچ اپنے آپ نوں انج لکا رہے ہاُن۔ جیویں
اپنے اُتے آئی آفت نوں ٹالن دا جتن کر رہے ہوون۔ اوہناں وچوں کنے ای پھٹڑ ہوئے
تے کنے ای ڈگدیاں نال پورے ہو گئے۔ انھیری دا زور حالے پوری طرحاں گھٹیاوی نہیں
آہا تے رکھاں وچ شوکر اوویں ای گونجی ہائی۔ جو رکھاں دے اُتے تے اوہناں دے
اولھے بھجدے بدلاں دے گھوڑے تے گھڑ اسوار ہر پاسے کھلر گئے۔ شروع وچ وڈیاں
وڈیاں کنیاں دا مینہ وسیا..... لگا تار، انج پھانڈا ماردا ہویا جو اوہنوں جھنگی وچ لگیاں گھلیاں
تے میرو مراٹی وچ کوئی فرق نہ دسیا۔ اوہنوں اپنی گھوڑی اُتے بہوں ترس آیا۔ اپنیاں
اکھاں اگے دی ہر شے انج لگدی جیویں ہُنے ہُنے دلداں وچوں نکلی ہووے تے کسے نے
اوہناں نوں دھوکے سکے پادتا ہووے۔

ورکھاوس کے تھم گئی۔ گہنے خاں آتھر جیہڑا اوس مینہ پین وچوں گھوڑی توں لاہ
کے اپنے تھلے رکھ لیا آہا، کڈھیا۔ اُتوں کپڑے لاہے کر کے گھوڑی دے جُسے اُتے زور زور
دی مار کے اوہنوں سکاون لگ پیا۔

”چودھری! میں منداں جو تہاڈے اپنے بھراواں ول اپڑنا بہوں لازم اے پر
مینہ سن نال راہ وچ نری تلھکن بازی ہو گئی اے۔ ہُن یاں تے گھوڑی دیاں واگاں پھڑ
ہولی ہولی ٹر پویے۔ جتھے راہ دسی، گھوڑی اُتے بہہ جاواں گے، نہیں تے چل سو چل.....
میں آہنداں روٹی ٹک وی ہُن جا عیسے خاں دے ڈیرے اُتے کراں گے۔ تھوڑا جیہا نسل
نول ہون مگروں.....“ میرو مراٹی اکساہے گل پوری کیتی۔

”تیری مثال تے اوہ اے میرو جو بارہاں کوہ دریا تے ستھن موڈھیاں
تے.....“ گہنے خاں وری کڈھیاں آکھیا۔

”مینوں لگدا اے نواپے دے دتے ہوئے من وی بھج کے بھگے آٹے وانگ
 بن گئے ہوسن۔“ میرو ایہہ گل کردیاں پونے وچوں روٹیاں کڈھن لگا۔ پر حیرانی والی گل
 ایہہ آہی جو من حالے اجیہی حالت وچ سن جو اوہناں نوں کھایا جاسکدا آہا..... اوہ ٹردے
 ٹردے بُرکی بُرکی بھن کھان لگے۔ مڑ انج جیویں میرو مراٹی دا گلا بند ہو گیا ہووے تے بُرکی
 اوہدے ہتھوں ڈگن لگ پئی ہووے۔ اوہدے پیراں وچ آ سنگ ای نہ رہی۔

”چودھری، میں سوچناں جو میرے ڈھول دا کیہ بنیا ہو سی۔ کجھ دس سکدا ایں؟“
 ایہہ گل سُندیاں گہنے خاں دا ہسدے ہسدے دا لک دوہرا ہو گیا تے میرو مراٹی
 انج جیویں وڈھوتے اندر رت ای نہیں.....



4

باروں پارسست رنگی پینگھ

”میں ماڑی پتن نیڑے عیسے خاں دی وسوں تے اپڑنا آہا تے اپنی ماں داسنیہا تے سدھر اوہنوں اپڑاونی آہی۔ میری ماں نوں یقین آہا جو اوہ صرف مینوں گھٹ کے ملے گا ای نہیں سگوں اپنی ماں تے بھرا دا آدر کردا ہويا اوہناں دے مشورے بارے ضرور سوچے گا۔“

گھوڑی دے اُتے اڈی تے اڈی مار دے گھنے خاں دا پیر ہُن اپنے آپ ای وج رہیا ہئی۔ اوہ دے نال میر و مرانی آہا جیہنوں بار دی وسوں موجب گاؤں تے ڈھولے تاں بے انت چھیتے ہاُن۔ اوہ دوہیں سُراں تے سداں مار سکدے ہاُن پر اوہ چپ رہے۔ چُپ ابس وجوں جو موسم چنگا ناہی۔ راہ تلکئی آہی۔

کدھرے کدھرے ٹوئے جے تے کھتان وی آ جان دے۔

کنڈیا لیاں جھاڑیاں توں اپنا آپ لاسے بچاونا پوندا پر اوہ چلدے رہے۔ رکے رکے..... اوہ پندھ جیہڑا ہُن تیک نبڑ جاندا، انھیری تے مینہ وجھوں جو کھم بن گیا آہا، ہُن تے گھنے خاں دا گلاں کرن نوں وی جی ناہی کر رہیا۔ اپنے نوں انھیری نال انھیرا جیہا چھا گیا ہئی جو ہر پاسے مینہ ہوون پاروں ہولی ہولی کھلرن لگ پیا آہا تے انج جیویں

رات مگروں سو جھلا ہوون لگدا اے، ایس سُنج مسان وچ دور دور تیکر پکھیر وواں دے بولن نال چُپ دے پھلاں نوں وی جیویں تریل تیکے جیسے پین لگ پئے۔

اوہ اوس رستے توں جیہڑا سدھا ذخیرے نوں جاندا اے حالے کجھ دُرِیڈے ہائَن۔ ایہہ وہم وی اپنی تھاہرے آہا جو کوئی مارو درندہ یاں کوئی چور لٹیرا اوہناں نوں کپ مارن لئی سر اُتے آن چڑھے۔ ایسے وچ اک ہاہا کار مچ گئی۔ ہا ہو، ہا ہو دیاں واجاں..... جیویں بندے تے زنانیاں رل مل چیک چھاڑا پارہے ہوون۔ نال ای نال چھمکاں تے ڈنڈیاں سوٹیاں دیاں اوازاں وی آ رہیاں ہائَن جیویں کوئی جھاڑیاں تے رُکھاں دیاں ٹانہیاں نوں جھنب رہیا ہووے۔ گہنے خاں پل چھن لئی کھلو گیا۔ اوس گھوڑی دیاں واگاں چھکیاں، گھوڑی رُکی، اوہدے کن آون والے خوف و جھوں تیر ہو گئے۔ میرو مراٹی دے پورے وجود اُتے اک سہم جیہا چھایا آہا۔ انج جویں کوئی قافلہ لٹ مار کردا ہو یا اگے ودھ رہیا ہووے۔ اوہناں نوں اگے کچھے، آسے پاسے ویکھن مُرن دا موقع وی نہیں ملیا۔ ہاہا کار مچاؤن والے سارے اوہناں دے ساہمنے ہائَن۔ ایہہ باگھے کے ہائَن۔ وڈیاں وڈیاں ڈانگاں موڈھیاں اُتے دھری، مارے ہوئے جنور اوہناں اُتے لٹکائی ہُن ہور جنوراں دی بھال وچ ہائَن۔ سوانیاں، بندے، چھواہر چھتر..... اتھرے کو تھرے، بھگے، پائے پرانے لیڑے اوہناں دے جُٹیاں اُتے لٹک رہے ہائَن۔ سارے ای پیروں واسنے ہائَن۔ پر ہمتی۔ اوہناں دے جُٹے، جیہناں اُتے وگی انھیری تے وسی ورکھا دی دھوڑ تے کنیاں حالے تر بکدیاں ہائَن۔ اوہ گہنے خاں تے میرو مراٹی نوں ویکھ کے تر بھکے ضرور پر نہ تے اوہناں دی ہاہا کار رُکی تے نہ ای پیراں دی ترکھ۔ اوہناں دا آہو ساہمنا انج ای ہو یا جیویں سُننے وچ دو لکیراں ملدیاں نیں۔ گہنے خاں کوئی گل کرن لئی اپنے ہونٹھ کھولن ای لگا آہا جو اوہ ڈونگھے رُکھاں نال بھرے سایاں نوں وڑ گئے۔ پر اوہناں دی اواز، نقش، چلکنے پنڈے تے موڈھے اُتے دھرے مرے ہوئے جنور، بلیاں، گُتے تے کچھو گُے

گہنے خاں دیاں اکھاں وچ نقش ہو گئے ہاُن۔ گہنے خاں اوہناں نوں روک کے اوہناں نال گل کرن لئی اک اک وجود اُتے نظر ماری پر کسے نے وی اوہدی اواز اُتے کن نہ دھریا۔ اوہنوں ماں دی باگھے کیاں بارے کیتی گل وی جھوٹی جاپی۔

”ایہہ گلوں گفتاروں چنگے ہوون یاں نہ ہوون..... کرداروں چنگے ہوندن..... پر ایہہ کرداروں وی خاک چنگے ہوندن۔ بے دو سے جنوراں نوں ڈنڈ کیاں، سوٹیاں نال مار مار کے اوہناں دیاں ہڈیاں پسلیاں اک کر چھڈ دے ہن.....“ گہنے خاں اپنی ہولی گل کیتی جو نیڑے ای کھلوتے میرو مرانی تے گھوڑی دے کناں تیک وی نہیں اپڑی۔ میرو لیہدا کوئی ولدا دیندا نہ دیندا، گھوڑی کنوتیاں ضروری ماردی۔

”چودھری، مینوں اُبت پئے آوندے جے۔ میرا ہانہہ گھا بردا پیا اے“ میرو مرانی ایہہ آکھدا ہویا کنڈیالی جھاڑی دے مُڈھ نوں مونہہ دے بہندا تے مُڑ اُٹھ کے ایدھر او دھر ٹرن لگ پوندا۔

”توں اجیہا کیہ کھا لیا اے جو تینوں اُبت پئے آوندے ہن۔ دیسی گھیو وچ پکیا من آہا، تینوں تاں نسل نرویا ہوونا ہاوی، بد دیا پُترا.....“

”ایہہ گل نہیں چودھری! مینوں ورھیاں پہلے دی اک گل چیتے آ گئی اے۔“

”تے گل چیتے آون نال تینوں اُبت آون لگ پئے نیں؟“

”آہو چودھری! اوہ گل وی باگھے کیاں دی اے۔“

”باگھے کے تاں ٹپ بارتوں گئے نیں تے توں اوہناں دی گل نوں کدھاڑیاں

اُتے چائی ودا ایں۔“

”بارنوں ٹپ جاون والے لیہناں باگھے کیاں دی نہیں، سگوں اوہ تاں جھنگ دا

علاقہ آہی۔ میں سرداراں دی جنج بھکتا کے ولدا پیا ہاموں۔ میرے ول آون والا پندھیڑو

گھوڑی دی مُہاڑ موڑ اپنے گھریں مُڑ گیا۔ مینوں اوہدے اکھوں پروکھے ہوون دا وی پتا

نہیں لگا۔ میں ویران بار وچ کلم کلا، دور دور تیک مینوں کجھ نظریں ای نہ آوے۔ دور
 کدھرے اک جھگی دسی۔ جیہدے آل دوالے اُچیاں کھرویاں جھاڑیاں دے سکے تنے
 دس رہے ہاں۔ اک لاسے کچی مٹی دیاں اٹاں نال اُسری کندھ دی مٹی تیز واء نال بھر
 رہی آہی تے اوہدے اولھیوں نمھانمھا دھواں پیا نکلے اسماناں نوں۔ میں ہولی ہولی گھائیں
 ماردا بنے اُتے گاؤندا جا رہیا آہا جواک دم میرا حلق سُک گیا۔ مینوں ترہہ لگی تے میری
 جان نکلن لگ پئی۔ میں گھائیں مارنا تے گاؤن گاؤنا بھُل گیا تے تیز تیز ٹریا۔ مینوں لگا جو
 میری ترہہ تے میرے حلق سُکن دا تعلق ضرور بر ضرور اوس واء وچ رلی باس نال ای ہے
 جو کندھ دے اولھیوں اُبھردے دھوں راہیں آ رہی اے۔ پانی دی طلب وچ انج لگے
 جیویں میرا ساہ مُکدا جاندا..... میں سوچیا کندھ اولھیوں دھوں دُھنچ رہیا اے تاں ضرور
 او تھے کوئی منکھ ہوسی تے جیکر او تھے کوئی انسان موجود اے تاں ضرور اوہدے کول پانی وی
 ہووے گا۔ بس ایہو سوچ کے میں اودھرنوں ٹریا۔ ٹردے ٹردے نیڑے اپڑیا تاں سگولیاں
 اوہ جیہاں اوازاں، جیہو جیہاں اج اسیں باگھے کیاں دے آون اُتے سُدیاں نیں۔ شور کجھ
 گھٹ آہا۔ پہلوں تاں میں یر کیا پر ترہہ تے ساہ ہتھوں مُکدی حیاتی صدقے اگے
 ودھیا۔ جیویں ای کندھ دے اولھے اپڑیا تاں کیہ ویکھداں، پورا دا پورا انساناں دا ایڑا جیسے
 ای جُٹیاں تے اوازاں آلا، اوہ کُنیاں، بلیاں تے کچھوکیاں نوں اگ اُتے سُٹی جاوَن،
 بھُنی جاوَن تے اُتوں اُتوں ای کھاندے جاوَن..... اوہ کھاون وچ انج رُجھے ہاں جو کجھ
 چرتیک تے اوہناں نوں میرے آون دا پتا ای نہیں لگاتے جدوں اک زبانی مینوں ویکھ لیا
 تاں اوس دوجیاں نوں دسیا تے اوہ سارے مل کے کھاون لئی مینوں اپنے ول سدن تے
 میں..... انج سمجھو بے ہوش ہوون دے نیڑے۔ اوہ دینہہ پیا جاندا ای چودھری تے اج دا
 پیا آوندا اے، میرے من وچ جیہڑی کچیان بھرتی اے، میں گوشت نوں ویہندا ای آں
 تے مینوں اُبت تے اُلٹیاں آون لگدیاں نیں۔ بھاویں ہانہہ وچ کجھ ہووے یاں میرا

ہانہ خالی ای کیوں نہ ہووے۔“ جدوں میرو مراٹی اپنی پٹا سنا رہیا آہا تاں اوہ ڈونگھے
 رُکھاں، جھاڑیاں تے بروٹیاں اُلانگھ کے اک چٹیل میدان وچ آن اپڑے ہائن۔ جتھے
 بھکھرے تے تھے دیاں ولاں انتاں دے حساب نال اُگیاں ہائن۔ کدھرے کدھرے
 جنگلی کیکس وی ہائن۔ مئے مئے ورکھا وچ نہاتے ہوئے..... پر اوہناں دیاں چوڑے
 پتراں تے لگراں توں جا پدا سی جو ڈھیر دناں تیکر ہمس سہن تے پانی نہ ملن وجہوں اوہناں
 دے ریشیاں وچ زردی کھل گئی آہی۔ تُمیاں دیاں بوٹیاں اُتے تھاؤں تھائیں تھے لگے
 ہائن۔ کنے ای تھے پک کے سُک جیسے گئے تے ہُن لگراں نالوں ٹٹ کے بھوئیں اُتے
 ڈھہن والے ہائن..... جتھے اوہ جا رہے ہائن اوہناں دے لہندے ول ”چھوٹیاں آلا پتن“
 تے اگوں دریا دی گنڈ آہی، ساہمنے کجھ پینڈے اُتے ذخیرہ..... جتھے ہریل میدان اُچا
 نیواں ہوندا دور تیک اپڑ جاندا آہا..... ”چھوٹیاں والے پتن“ ول سینت ماردیاں گہنے خاں
 نوں مریاں یاد آئی۔

اوہ مڑ کے گھوڑی اُتے اسوار ہائن۔

گھوڑی شتری چلدی ذخیرے ول نوں ودھدی جا رہی اے۔ گہنے خاں تے
 میرو مراٹی دوہیں ساہمنے آون والے واقعییاں بارے سوچدے ہین۔ خاص طور اُتے گہنے
 خاں نال تاں اچھا کدی وی نہیں ہویا آہا..... تیز انھیری، ورکھا، باگھے کیاں نال ٹاکراتے
 میرودے اُبت۔ اُنج میرو اُبتن دی نری گل ای کیتی، شکر اے اُبتیا نہیں۔ نہیں تے ہمس
 بھرے موسم وچ ڈھاندے ہانہ تے اُبتن دا اُپا ڈھیر اوکھا ہوندا۔ اوہ مروی سکدا آہا۔
 شاید ایہہ زویں اجیسے سہ جدوں انھیری جھلی ہوئی ہووے، مینہ ورہیا ہووے۔

اپنے اُتے تیز تیز اگاڑیاں پچھاڑیاں پین دی عادی ناہس۔ ہمس وچ ورکھا دی نمی رل کے
 ہر شے نوں مڑھکو مڑھکی کیتا ہویا آہا..... اوہ تُمیاں، بھکھڑیاں تے لیہاں بھریاں راہواں
 لنگھ کے اک پدھری راہ اُتے آن اپڑے۔ ساہمنے اسمان اُتے رنگ کھلے ہائن۔ ست

رنگی پینگھ اسمان اُتے لکیراں بناوندی ہوئی کمان وانگ نیوندی گئی آہی۔ اوہ اوس تھاہر آن
اپڑے ہائن جیہدے بارے اوہ راہ وچ گلاں کردے آئے ہائن۔ ٹونے ہار زانیاں تے
گھوڑیاں دی گزر گاہ۔ پر اوہناں نوں چلکدے موسم وچ کوئی اک ٹونے ہار نظریں نہیں
پئی۔ عام طور تے دور دور تیکر گھوڑیاں دے وگ چردے نظریں آوندے۔ اوہناں دوہاں
ویکھیا اُبھردے ول جدھرے ذخیرہ نوان وچ آہا، پھوگڑ بیریاں دے جھنڈ نیڑے اک
بھیان چردی آہی۔

.....

اوہ بھرا عیسے خاں دے ڈیرے توں تھوڑے ای دُریڈے ہائن۔ سورج جیہڑا
پاٹے ہوئے بدلاں اوہلے جھاتی مار رہیا آہا، اوہدے سُرخ ہوون توں پہلاں اوہ عیسے
خاں نال گل بات کرکتر کے مُڑوی سکدے ہائن۔

ایس آس اُتے جو بھرا عیسے خاں اوہناں نوں وسوں تے ٹکر پوسی تے اوہدی
بھرجائی تے بھتریا، بھترئی اوہناں نوں کھان پین دا آکھ کے ڈھیر جوکھن نہ کرن گے تے
رل رہن دی گل جوہن اوہدی ماں دے منوں لہنی اوکھی ہو گئی آہی، اوہدا وی لحاظ کر
گھنسن۔

☆☆☆

نوابیے، جنوراں دے واڑے وچ پانی ڈاہ کے نکلی آہی جواک بگھیاڑ چھال مار
کے واڑے وچ وڑیا۔ نوابیے مُڑ کے ویکھیا تاں اک واری تے ترہ گئی۔ بگھیاڑ اوہدے
ساہنے ای اک بھیڈ نوں مونہہ نال چایا۔ وڈھیا، اوہنوں بھرڑدا، دھروندا، چھکدا ہويا باہر
نکلن دا چارا کرن لگا۔ دوئے جنور ترہ کے پچھے ہٹ گئے تے پیر مارن لگ پئے۔ ناہرا
اوٹھ شوکدا اوہدے ول ودھدا پر اوہدے راہ وچ لکڑاں نال بنایا ڈکا آجاندا۔ بھیڈ اپنے
بچائی جتن وچ لگی رہی۔ گتے چڈیاں وچ مونہہ دھری پئے رہے۔ نوابیے گھاہری ہوئی حال

دھروئی دیندی۔ چھتیر وچوں بلم کڈھ کے اوہدے دل ودھی۔ جدوں اوس بگھیاڑ دیاں اکھاں وچ تکیا۔ اوہنوں اوہدے آہر کجھ چنگے نہ دے۔ پچھوں پرالی دا گڈا پھڑی لتاں سھرائی نکلی، اوس نواسیے نوں ورجیا ”ایہدے نیڑے نہ جاویں، خونی لگدا ای۔“

اپنے نوں اوہناں ویکھیا ڈردی سہمدی مریاں وی اوہناں دے پچھے آن کھلوتی۔ بار دے کنے ای حصے وچ لوکاں گاہنا، واہنا شروع کر دتا آہا۔ اباد کاری داکم ودھن پاروں اجیہے مارو جنور اوہناں حصیاں ال دھاون لگ پئے ہائن جدھر حالے جنگل موجود ہائن۔ لتاں سھرائی اپنے پیکیاں دی دتی وچ پیوتے بھراواں والے نسخے ہر اوس تھاہر اُتے ازماوندی آہی جتھے وی جا کے اوہ ٹھکانا کردے۔ خاص طور تے اوہ اپنے رہن والی تھاہر اُتے کنڈیا لیاں جھاڑیاں تے رُکھاں دی واڑھ ضرور سواہری کردے۔ جیہدے توں آون والا خونی جنگلی جنور ایہہ کنسو ضرور لے لیندا جو اتھے منکھ رہندے ہن۔ مُڑ کے اوہ پرالی اُتے لیس دار رُکھاں دیاں چھلاں نوں وٹ وٹ کے کھنڈ بنا لیندے، جیہناں نوں اوہ راتیں پھیرے بال دیندے۔ ایہہ اگ ساری رات دُھنڈی رہندی، جیہدے ڈر توں عام طور تے جنور ایدھر مونہ نہ کردے۔ پر ایہہ بگھیاڑاگ بلن توں پہلاں ای آن وڑیا آہا۔

اوہ بھید نوں واڑیوں کڈھ کے لجا تاں نہ سکیا پر اوس اوہنوں اپنا کو پھنڈ کر چھڈیا جو اوہنوں جس پاسیوں ہتھ لاندیاں اوہ دوجے پاسے ڈگ پوندی۔ بکا بکا کے اوس سارے جنگل نوں جگا چھڈیا آہا..... اوہ تریوے زنائیاں شکر پیاں کردیاں ہائن جو بھاویں بگھیاڑ دے مونہ نوں لہو لگ گیا آہا، اوہ اوہناں توں کنڈیتا تاں ہو گیا۔

.....

سورج لہندے ول نوں اُلا رکھا گیا آہا۔

لتاں سھرائی، مریاں نوں اپنے نیڑے سدیا، اوہنوں سینے نال لایوس، پیار

کیتوس، چمیوس تے اک گیت گایوس:

”چنا چیت گھنا، کنک گھنی وسا کھ

تیویں گھنی تاں جانیے

جے مُنڈا ہووے ڈھاک“

مُڑ اوس گھنے خاں دے ناں دا اک وین الایا تے روون لگ پئی۔ روندی روندی دی ہڈی بجھ گئی۔ نوابیے تے مریاں اوہنوں چُپ کرا کرا ہٹیاں پر اتماں دے تاں جیویں سینے وچ ہڑھ آ گیا ہووے۔ اخیر اوہ ہڈ کورے لیدی چپ ہوئی تاں اونے چرنوں مریاں تے نوابیے زار قطار پیاں روندیاں ہائُن۔ گیت دوہاں نوں جیویں لڑ گیا۔

”نوابیے تینوں تاں رب رنگ لاوے ہے فی، نموشیاں تاں اسیں دوویں واں“
اتماں سھرائی مریاں نوں سینے نال لائی لائی آ کھیا۔

”اج تک ایویں ای تسیہے دینی رہی واں تینوں مریاں، کہانی تاں ساڈی دوہاں دی اک ای اے۔ توں وی پیار وچ بدلیں کھٹیا، میں وی بھریا پروار، دھن دولت چھڈ وساہرے خاں دے لڑ لگ گئی۔ کنے ای دینہہ وساہرے خاں درویشی روپ وٹا ساڈی وستی وچ حکیم داراس رسائی بیٹھا رہیا تے اسیں دوویں دیورائیاں، جٹھانیاں اوہدے توں پڑیاں لین جاندیاں رہیاں۔ اوہ میری جٹھانی دا سکا بھرا آہا پر وچھڑیاں نوں ورھے بیت گئے ہائُن۔ زمانے نک نقشہ ای پرتا دتا۔ اُتوں مینوں غشیاں تے غشیاں کھسم میرا زمانے دا سورما، مار دھاڑ، لٹ گھٹ..... پوری بار وچ جتھے کوئی چنگی مجھ یاں گھوڑی دی دس پوندی، ایہہ سارے بھرا رل ہلا کر دے تے ایہہ جا، اوہ جا..... اوہ تاں اک واری مجھاں دے واڑے باہروں کنسو ہوئی تاں کھسم میرا باہر نکلیا۔ ایدوں پہلے جو اوہنوں کوئی سمجھ آوندی، جانگی اودھے اوہنوں بھڑ کے رکھ چھڈیا۔ اُلا، اُلا بھوئیں اُتے انج ماردا رہیا جو اوہ پوری طرحاں حال بوہ نہ گھت سکيا۔ اپنے ولوں تاں اوہ اوہنوں مار کے سٹ گیا۔ سو قتے جدوں

اسیں اپڑے تاں حالے ساہ ست ہاسو۔ دوا دارو جو اسیں کروا سکدے آہے، کروائے۔ مرنوں تاں بچ گیا پر ادھ مویاں ورگا۔ کوئی حصہ کم ای نہ کردا۔ نازک حصے تاں اُنچ ای..... اُتوں مینوں پر نیجی نوں سما ہویا کوئی نہ، ایدھروں وساہرے خاں آن بیٹھا۔ ساڈی سرکیہ رلی۔ اسیں اک اصیل گھوڑی کڈھ رات دینہہ پندھ مارو مار کردے وساہرے دے پنتاں نوں..... استھے اپڑ حالے نسل وی نہ ہوئی آہی جو مینوں آکھیوس ”لوہ لاہ دی گل کوئی نہیوں سبھریے۔ تیرے بھراواں ساڈے اُتے چڑھائی کیتی۔ میرے دو بھراواں نوں مار کے، میری اک بھین تے مال ڈنگر لے نکلے۔ سانوں جدوں تیک ہوش آوندی، لیہناں دا کوئی پتہ سرائی کائی ناہیں۔ میں تے ہُن تیک وس نال ای بھریا ورتاں۔ تینوں لیا کے میرا اک ویرتاں ملکیا۔ قتلماں دا بدلا حالے باقی رہندا.....“ تے میں جیہڑی ایہدے موہ وچ جگ چھڈ آئی، نموشی وکھ کھٹی، ڈوری بھوری اوہنوں ویکھی جاویں..... پر گل ایہہ اے جو وساہرے خاں اپنے بھراواں دا بدلا بھاویں نہ لے سکیا، بانہہ بلی جو کوئی ناہس، پر مینوں اوس حیاتی وچ مُرد کے تنگی کوئی نہ آون دتی۔ سانوں رنگ لگے۔ رب چار شینہاں ورگے پُتر دتے تے اگوں جو میں ویہنی آں..... اوہدے اُتے دل دُکھدا اے۔“

”دل ہولا نہ کر اٹماں! رب بھلیاں کرسی!“ نوابیہ انج جیویں اوہنوں تسلی دتی

ہووے۔

”ٹھیک آکھدی ایں: تے زنانی مرد دا میل قدرتی امر اے۔ مریاں تے گہنے دا

میل وی لیہناں دی تقدیر لکھیا آہا۔ اُتوں جدوں جوان خون ملن تاں میرا سوہرا آہندا آہا جو جنے دے سینے وچوں بھندی اگ تے زنانی دے کو لے پٹاں آپت وچ رلن دا کوئی اسباب تاں بناونا ای ہوندا اے۔“ اٹماں سبھرائی دی ایہہ گل سُن کے اوہ دوویں وی ہسیاں۔

مُرد کے اوہناں واڑے دوا لے کھبڑ وچھاوون دا کم شروع کیتا۔

ہوسکدا آ جو گہنے خاں تے میر و مرانی کو یلے مُردے۔ بار دیاں زنانیاں نوں
بار دے مرداں وانگ ای جین و سن دے رنگ سکھنے تے ورتنے پوندے نیں۔

.....

اسماناں دیاں پوڑیاں اُتے پگ دھردا پُیاں دا چن بار دے دُونگھے رُکھاں
اوہلیوں اُبھرن لگا۔

”چمکدے چن نوں ویکھ کے بگھیاڑ اوہدے ال مونہہ کر کے خورے کیوں
گُوکدے نیں۔“ اتناں سہرائی جو ورھیاں توں اجیہیاں راتاں وچ بگھیاڑاں نوں
چمکدے، کوکدے سُن دی آوندی آہی۔ اوہدے چیتے نوں اک ایس گنڈھ دے نال نال
خورے کنیاں ای گنڈھاں لگنیاں شروع ہو گئیاں۔ ایہہ تاں اوہدے چت چیتے وچ ای
نہیں آہی جو گہنے خاں، عیسے نوں ملن جاوے گا تے اپنی ڈھل کر آوے گا۔ اوہ ناہی
جاندی جو رُت جو اوہناں نوں بھنوالیاں دیندی رہی آہی، گہنے خاں نے میر و مرانی نال کیہ
ویہہ مکائی..... اوہ بھوکیں تھیں اُتا نہہ رُکھاں دے ٹانہیاں وچکار بنائے ہوئے پرالی تے
جُھلیاں دے بسترے وچ پئی پئی سوچدی رہی۔ اوس اک واری مُرد کے خدادی قدرت تے
بے پرواہی تے اپنی بے وسی نوں یاد کیتا۔ ”اسیں اسمان تھلے ساری بار چھان بیٹھے، سانوں
کوئی جوسی نہ ملیا، جو ساڈی تقدیر دا لکھیا سانوں جھولی پاوند.....“ پر و ساہرے خاں توں
ودھ کے کیہڑا کوئی جوسی، جوگی ہوسکدا آہا۔ جو سانوں تھان ٹھکانا دے سکدا۔ پر ساڈے
پُتر آپ ہُدرے ہوئے رہے..... ایہناں دے دلاں وچوں میرے مایاں دا خوف ای نہ
گیا۔ ہُن لاسے لاسے جا اباد ہوئے نیں۔ ایویں ای نہیں ہوندا رہیا میرے بھراواں نال
وی، جیویں ہُن میرے پُتر اں نال ہو رہیا اے۔ اک بھراسنھ لاون لئی تھاہر لبھن گیا نہیں
مُڑیا۔ تاں پچھلا آکھدا اے میں اوہنوں لبھن جانا اے..... اوہ اک دوجے توں اپنی دور رُ
جاندے جو اوہناں دے او تھے ای اباد ہو جاونا مُرن توں ڈھیر سوکھا ہوندا..... پتا نہیں

کدھرے گہنے خاں وی ایہی تاں نہیں سوچ رہیا۔

..... پر گہنے خاں اجیہا اُکا نہیں سوچ رہیا آہا۔

گھوڑی تے گھوڑی دے اسواراں دیاں اوازاں نیڑے ہور نیڑے آ رہیاں

ہاٹن۔

اوہ مُڑ آئے ہاٹن۔

اتماں سہرائی ایہہ سوچ کے جوگلاں ہُن سویرے ای ہون گیاں۔ کبھڑی اک

ادھی گل اے پوری حیاتی دا ویروا اے، لمی پئی رہی۔ نواپے اٹھی جی تے اوہناں نوں پانی

ٹنگ دین لگی۔ اوس ادھ سُتیاں اکھاں نال ای اوہناں نوں بگھیاڑ دے آ کے بھید نوں پاڑ

جاون دی گل دسی۔ گہنے خاں ٹکر کھاندا تے اوہدے ول گوہ نال ویہندا جاندا۔

”اوہدے مونہہ نوں لہو لگ گیا اے۔ اوہ مُڑ کے ضرور آوے گا تے اید کی جدوں

وی آوے گا، میرے ہتھوں اوہدی موت ہو جاوے گی۔“

”کیہ کُتیاں وی اوہدے نال کجھ نہیں کیتا؟“ گہنے خاں دے تَکھن تے نواپے

آکھیا۔

”پتہ نہیں اوس دینہہ تاں تیرے ایہناں اِصیل کُتیاں نوں کیہ ہو یا، لتاں وچ سر

ای گھت کے پئے رہے۔ جے توں نال ہوندا ایں تے تیرے اک اشارے اُتے پتال دی

مڑی وی کڈھ لیاندے نیں۔ تیز تر کھے سہیڑاں دا شکار کر لیندن، پر او دوں..... خورے

مونہہ سو جھلے توں نکل گیا ہاویں ایس پاروں انج کیتو نیں؟“

گہنے خاں، نواپے دیاں گلاں سُندا سُندا کُتیاں نوں وی تاڑدارہیا۔ اوہنوں وی

بگھیاڑ نال اوہناں دے نہ بھڑن دی وجہ سمجھ نہ آئی۔

.....

رات ہور ڈونگھی ہو گئی۔

باروچ کھلرن والیاں اوازاں ہور اُگھیاں، ہور صاف ہوندیاں گئیاں۔
 اسمان اُتے چاننی وچ بھسمدے تاریاں دا جال کھلر گیا۔ اوہ تاریاں دیاں
 نشانیاں راہیں، راہواں سنجانن دا جتن کردا اے۔ اوہدی نگاہ کھتیاں ول جاندی اے
 جیہدے اک پاسے چاننی دی لمی لکیر چھڈ دا تارا دسدا اے..... اوہ تاریاں دیاں نشانیاں
 نال اپنے بھراواں دے وسن والیاں تھاہراں دا گوڑ لاوند اے تے اک تارے اُتے
 اوہدیاں نگاہاں جم جاندیاں نیں، جیہڑا اوہنوں لگدا اے اوہدے پیو دی قبر دے عین اُپر
 اے.....

اوہ سوچدا اے جیکر اسیں ویلے سراک تھاہر رہن والا مُد عانہ مکایا تاں ہوسکدا
 اے سانوں بھکھیاں ای مرنا پوے۔ اوہناں نوں باگھے کیاں وانگ لنگوٹ کس کے جنگلاں
 وچ پھرنا پوے گا..... اللہ نہ کرے ایہہ دینہہ آوے۔

گہنے خاں، میرو مرانی نوں ڈھول دیاں تتیاں کسدیاں تے دھپھے مار کے
 وچاوندے نوں سندھیا ہویا نیندر دی ڈونگھی گپھا وچ جالتھا۔

.....

ادھ سُتیاں، ادھ جاگدیاں اوہنے سُدیاں۔ اتماں سمھرائی اُٹھن پٹھن تے کھاوَن
 پیوَن والی تھاہر اُتے بُہاری پھیری جاوے تے اک گاؤن وی الاوندی جاوے:

جنگل دی میں جھی جائی چندرے پور ویاہی
 ہتھ وچ گھرپا، موڈھے چادر، کلی گوڈن لائی
 گوڈ دی گوڈ دی پے گئے چھالے، شاماں نوں گھر آئی
 آوندی نوں سس دیوے گالھاں، گھاہ دی پنڈ لیائی

اتماں سمھرائی دے الا تے اوہدے الا وچ بھرے صدق نوں سرجدے اوہ
 اُٹھیون لگ پئے..... جنگل وچ سویرا نچ ہوئی جیویں سارا آل دوالا قدرت دی کاریگری دا

ورد کردا ہووے..... اوہ اک اک کر کے ماں دی بُھاری ہوئی تھاہر اُتے آن بیٹھے۔ میرو
مراٹی اگ بال کے حقہ بھخاون لگ پیا۔ اوس پیا لے وچ پانی لے کے نڑی دھوتی، اوہدے
اندر پانی گھتیوس تے مُڑ آن کے اوہناں وچ ای بہہ گیا۔ گہنے خاں اک گنڈھڑی کھول
کے عیسے خاں ولوں دتیاں ہوئیاں سوغاتاں کڈھن لگ پیا۔

”ایہہ تیرے پُتر گھلیاں نی خشخاش دیاں پنیاں، گُڑ تے تماکو..... ایہہ تمیاں دی
بنی دوائی تے آکسن دے بی ہے نی، تاں جو جنوراں نوں ہوون والیاں بیماریاں توں بچایا
جاسکے۔“

میرو مراٹی جو حقہ بھخاون لگا آہا، اگے ودھیا تے گہنے خاں دے لیاندے ہوئے
تماکونوں سُنکھ کے آہندا اے ”چنگا کوڑا لگدا اے“ تے نال ای اک ڈونگھی جیہی نچھ وی
مارپوس۔ لٹماں سبھرائی اوہنوں آہندی اے:

”میرو، چنگی طرحاں مروڑ کے صاف کر کے حقہ بھخا۔ اج میرے پُتر تماکو گھلیا
اے۔ نالے گہنے خاں میل کر آیا اے۔ ھتھ میں وی چھکساں۔“

”عیسے خاں بھوئیں تے کسے سردار دی گڈدا اے پر ڈھیر سکھیرا نہیں لگدا۔ او تھے
ویسے خاں وی آیا ہو یا آہا، روں دا بی لین۔ جوتیاں وچ ہوندا اے اج کل۔ آہندا اے جو
بھوئیں اسیں گڈدے آں۔ بھوئیں تے نہیں بئی شان اے اللہ دی۔ پانی فصلاں نوں راس
اے تے انج دا جو ایدھر بی بھوئیں وچ سُندے آں، اودھر پھٹدا ویکھدے واں۔ اُنج میں
ویسے خاں دیاں گلاں توں جاتا اے جو اوہ جوتے چھڈ کے کدھرے ہو رہا اباد ہوون دے
حق وچ نہیں..... عیسے خاں تیار آہا۔ اوس مینوں آکھیا اے جو میں جدوں وی ولّا را نوں
راضی کر لیا۔ اوس جتھے تے جیویں رہن نوں آکھیا رہ لوں گے۔ ہُن میں ولّا راول جاونا
اے تے میں تے آہندا واں لٹماں تُوں وی نال آجا..... دوویں رل کے اوہدے ال جا
ویے۔“

”ٹھیک اے پُتر۔“

”آہو، تے تینوں پتا اے ناں، ائماں دو اصیل گھوڑیاں اپنے حصے وچ کر لئیاں
ہائَن اوس۔ ویسے خاں، ہُن اک وچھیری ہوئی پیسو..... آہندا اے ایس ٹرڈی ٹیردی جان
چھڈ۔ میرے کولوں وچھیری لے۔ اک دینہہ گھوڑی والا ہوسیں۔ آہندا آہا چھواہر جوان
نیں، کسے دے ہتھیں اپڑا دیساں یاں توں آویں تے ست بسم اللہ۔“
”وکیہ ائماں! مینوں اصیل گھوڑی دا کنا چاء تے لوڑا اے۔ اوہ وی ہُن ویسے
خاں پوری کرو ہئی۔“ گہنے خاں دے گل کردیاں ہونٹھ کنب رہے ہائَن۔



5

کوئی پانی وے چنھاں دا

رُت اجیہی آہی جیہدے وچ بدل وی وسدے نیں بُکّا بُکّا تے ایہناں ای بدلاں وچوں کدھروں کدھروں سورج اپنا مکھ کڈھ کے دھرتی نوں نبھا کے دیکھن دا جتن کردا اے۔ خاص طور تے اوس حصے نوں جتھے گہنے خاں اپنی ماں سکھرائی، دوہاں زنانیاں تے کجھ ای دناں توں اوہناں نال آن رلن والے میرو مرانی نال وس رہیا آہا..... ماں اوہدی ہُن موت دی ہم عمری وچ ای جیوندی لگی واندی ہائی۔ اوہناں دی ہر لوڑ تھوڑ، نک سُک دا خیال کردی۔ ایدھر اودھروا ویلیاں ماردی، آوندی جاندی.....

کھلری ہوئی پرالی اُتے اوہدے ساہنے مریاں انج لمی پئی آہی جیویں کسے منکھ ان جاتیاں پران دے چھڈے ہوون۔ گہنے خاں اوہنوں تکیا تے کئی واریں مریاں دا ویکھیا ہویا جُسا پرایا پرایا جیہا لگا۔ کبھی گلھ اُتے کٹ دا نشان۔ اُپر لے ہونٹھ اُتے نک دی سیدھ توں ذرا جیہا چھڈ کے اک بے معلوما تِل جیہڑا اوہدے پتلے تے سانولے نک نقشے اُتے پھبدا.....

”ہمبڑے.....“ نیڑیوں ای اوہنوں نواپے دی واج آئی۔ جس پرالی دے

پولے وچ لکڑاں دا گٹھا بنھ کے آپوں ای موڈھیاں اُتے دھر لیا آہا۔ جیہنوں ہُن اوہ چھپر وچ رکھن پئی جاندی آہی..... مُڑ کے گہنے خاں دے دماغ وچ نواسیے دی ماں دا نک نقشہ اُبھریا۔ دُکھاں تے جھوریاں اگے ڈٹ جاوَن والی مردانی رن..... انخیری عمرے بیماری کیویں اوہنوں گھُن وانگ کھا گئی۔

”دینہہ ملاپ دے آون والے نیں“ ساہمنے جنڈ دے رُکھ اُتے بیٹھے کاں نال گلاں کردی مائی سھرائی بولی۔

”جُدائیاں دے دُکھ اکھیرڑے ای ہوندن، بھاویں ایہہ جدائیاں تسیں اپنی من مرضی تے منشا نال ای کیوں نہ سہیڑیاں ہوون..... پر ہُن دینہہ ملاپ دے آون والے نیں۔ کالیا کاواں..... توں ساڈے نال نال ای رہویں۔ تینوں گھيو وچ گنھیاں پُوریاں کھواواں گی۔“ ماں دیاں گلاں سُندیاں گہنے خاں ورسی جیہی کڈھی۔

ورکھا ورھی، واء گھلی تاں پوری بار انج جیویں نشیا جیہی گئی ہووے..... میرو ڈھول اُتے اک پاسے ہتھ تے دوجے پاسے چھمک ماردیاں گانویا:

”ہائے ڈھولنا! میری وینی چا مروڑی آ

ہائے ڈھولنا! ٹھنڈا پانی ہے پنھاں دا

چھلا تیرے ناں دا

ہائے ڈھولنا! میری وینی چا مروڑی آ۔“

گہنے خاں نوں یاد آیا جو ویاہ اُتے ایہی گاؤن گایا جا رہیا آہا۔ جدوں مریاں نوں اوہ جھنگ سیالوں کڈھ لیا یا آہا۔

.....

پینڈا بھاویں اینا دور دا نہیں آہا۔ سھرائی دا بُڈھے وارے گھوڑی اُتے بہہ کے ولا را دی ڈھاری توں ہو کے مُڑ آونا اوکھیرڑا ای لگدا آہا۔ پر اوہ چائیں چائیں گھوڑی تے

چڑھی ضرور جدوں اوہ مُڑ کے آوندی تاں اوہدے جُٹے اُتے گکھے پئے ہوندے۔ اُتوں سا دیہاڑی دا پندھ، اوہ وی بار دا، چنگے بھلے جنے نوں ہلا چھڈا اے۔ اڈھا راہ تے اوہی آہا جو اوس تے میرو رل کے کیتا آہا۔ ”چھوئیاں والے پتن“ تیک..... اگوں اوہناں چڑھدے نوں اُجاڑ ول جاندے رستے توں ہو کے ذخیرے نوں جاونا آہا۔ اگوں ”بوڑیاں دیاں جھکیاں“ لنگھیاں ای ولا را دی ڈھاری آ جاندی آہی۔ رستے وچ کدھرے کدھرے جی دار جانگی وسوں کیتی بیٹھے ہائن۔

اوہ فجر اں توں پہلاں ٹرے..... ٹور پیر دے ویلے۔ موسم بھاویں کجھ بے اعتبار جیہا آہا پر گہنے خاں گھوڑی اُتے پلاکی ماری تے مگر ماں نوں بہاویں تے دو نیلے ای منزلاں مار دے ہوئے ٹر وگے۔ راہ وچ جتھے سنگھناں جنگل آوندا آہا، جتھے سب سلونگ تے ہور جانگی جنور لومڑ، جنگلی بِلے، گدڑ تے بگھیاڑ تھیرے ہائن۔ بھاویں جانگی وسوں وچ روز دیہاڑ ہوون والی ابادی دے وادھے وجھوں جنگلی جنور ہولی ہولی گھٹدے جاندے ہائن تے بھوکیں وی اکساہری ہوندی جاندی آہی۔ مُڑ وی کئی وار ایہہ جنور جھاں گاواں تے کئی واری بندیاں دازیاں کر جاندے۔

اوہ اک سنگھنی تھاہروں نکلے، جتھے بیریاں، ملھاں، وناں، کریریاں، جنڈاں تے لکراں دیاں جھنکیاں آہن۔ ساہنے اوہناں نوں بہوں تعداد وچ خلقت دسی جو بھوکیں وچوں رُکھ تے جھاڑیاں پُٹ دھرو کے اکساہریاں کرن وچ لگی ہائی۔ زنانیاں مرداں دے ہتھیں کہیاں، گہاڑیاں، نیلچے تے ہور سند ہائن۔ جیہناں نال اوہ جھاڑ جھنکاڑ پُٹ کے بھوکیں وی پدھری کردے جاندے تے بھوکیں وچوں جھاڑیاں دے مُڈھاں وچ جیکر کوئی سب سلونگ، کرلا، کوڑھایاں ٹھونہواں نکلدا تاں اک چیک چکاڑا پاؤندا تے مُڑ کے اوہنوں مدھول دتا جاندے۔

ساہنے ای ٹالھی تھلے اک ککلی گھوڑی بدھی آہی۔ جیہدے اگے ساوا پیا آہا۔

جیہنوں اوہ کھاندی کھاندی مونہہ اُپر کر کے ایدھر اودھر ویکھدی وی جاندی۔ اوہدے نیڑے
ای بٹھ کے اک گھبراٹا بیٹھا آہا۔ جیہدے وجود تے بُت قد توں کسے سورے دا ای گمان
ہوندا۔

گہنے خاں تے مائی سھرائی اوہدے نیڑیوں دی لنگھن لگے تاں اوس نکا جیہا
کھنگھورا ماریا تے حال احوال کرن پچھوں بولیا: ”جوانا! کیویں کنڈیتا ہو کے لنگھیا جاناں
ایں۔ کوئی اپنے بارے دس، کجھ میرے بارے کُجھ۔ کتھے رہندا ایں؟ کتھے جا رہیا ایں؟“
گہنے خاں گھوڑی دیاں واگاں ڈھلیاں کیتیاں تے کھلے کھلوتے دسیوس ”گہنے
خاں میرا ناں اے۔ کچھ جھلار نیڑے ”چھوٹیاں والے پتن“ کول ابادی کرن دے جتن
وچ واں تے اگے جالھی نیڑے میرا بھرار ہندا اے..... ولّارا..... اوہدے ول ای پیا جاندا
آں۔“

”بار وچ ابادی پیا کرنا ایں۔ کنے کوہتھ نال ہے نی؟“
”کلا ای آں۔ کوئی بھراوی نال نہیں رلیا۔ ہُن ولّارا تے اک ہوہر بھرانال رل
کے کوئی صلاح صلہ کرن پیا جانداں۔“
مُورے فٹیا نے گہنے خاں دی گل سنی۔ اوہنوں حقہ پین تے بٹھا کے گل کرن لئی
بیٹھاں لہن لئی آکھیوس۔ مُڑ بولیا:

”انج ابادیاں نہیں ہوندیاں بھائیآ..... ایہہ ویکھدا پیا ایں، کنی خلقت لگی کھلی
اے۔ کچھ اُتاڑ ول دریا دی من توں ست کوکوہ اگانہہ ساڈی جدی پُشتی بھوئیں اے۔
ہین حالے وی جھاڑیاں جھوڑیاں پر واہ واہ کے بھوئیں نوں سوئے وانگ چا کیتا اے۔ پو
میرے توں تاں جو ہو یا سو ہو یا، میں پچھلے ویہہ ورھیاں توں بھوئیں وچوں پلجھی، دبھ،
مُنچ، خس، لانا، تُمے، پیلو، پنچو، جنڈ تے ہوہر بُجاک تے رُکھڑے پٹا پٹا کے پھ گیا آں۔
بھوئیں وچ کھر رلا رلا کے کھیلیاں بنائیاں نیں۔ دوئیں کھوہ کڈھائے نیں تے کھیلیاں

دے چوگرد نہماں، لکڑ، انب، برنے، سیو بیریاں، دھریکاں، ٹاہلیاں، شرینبہ، توت تے کدائیں کدائیں پیل تے بوڑھاں وی گڈیاں نیں..... نواں جیہڑا نظام پیا آوندا اے، اوہدے وچ لیہناں رُکھاں دی لکڑتوں بہوں لایجھ ہوسی..... کدی وڈے شہر گیا ایں؟ ہر پاسے لائناں وچھدیاں پیاں نیں۔ نہراں بن رہیاں نیں تے نہراں تے پُل اتے گڈی دیاں لائناں وچ ہر تھاہریں لکڑ ورتینی اے تے جتھے جتھے تھوڑی بہت آبادی ہے، اوہتھے سرکار و سن والیاں نوں گھرتے بھوکیں واناں نوں کھوہ کڈھوا کے دیندی پئی اے تے جو جو جنساں اتھے اُگدیاں نیں اوہناں وچ وادھا کرن لئی نویں نویں بیہہ تے وادھو پانی اپڑاون دا جتن پئی کردی اے..... نواں وسیب بن والا اے۔ نویاں سرداریاں تے لمبڑداریاں ڈھینیاں نیں۔ بھراواں نوں اکٹھیاں چا کرتے میرے نال مُکا کے کوئی لاہم مل لا، ڈھگے بندے میں تینوں دیساں..... سچ آہناں، تر جاسیں۔ ناں میرا ممورا فٹینا ہی تے ساری راوی تے وگدا ای۔ اُکا گلاں ای نہیں کردا ہاموں، عمل وی کر کے وکھانداں۔“

ممورا فٹینا کجھ کو چرلئی ساہ لین لئی کھلوتا تاں گہنے خاں نے سوچیا کیہو کیہو جیہے لوکی پے نیں بار اندر۔ اک اسیں ہائیں جواک لٹ مچن مگروں پتتاں اُتے آبادی کرنا ای چھڈ بیٹھے ہاؤں تے اک ممورے فٹینا نے ورگے لوکی نیں جو آون والے ویلے نوں وی اپنی کچھڑیں گھت کے لوریاں پے دیندن۔ سُنیا تاں ماڑا جیہا اوس وی نویں نظام بارے آہا پر اصلوں بندے بشر نال مُدتاں نہ میل ہوون پاروں اوہنوں اپنے تے اپنے بھراواں بارے ای پتا نہ لگدا.....

”کیہ قیاسیں پے گیا ایں گہنے خاں؟ کوئی ولدا جواب نہیں دیندا پیا ایں“
ممورے فٹینا نے اک واری مُڑ اوہنوں جیویں ڈونگھی نیندرتوں جگایا۔

”آ کھدا تاں ٹھیک ایں توں مموریا، پر جیکر میرے بھرا من جان تاں.....“

”اوہناں نوں میرے کول لیا۔“

”اسیں آپت وچ بڑی مشکل نال اکٹھے ہوندے ہائیں۔ گجا اکٹھے ہو کے تیرے کول اپڑیے..... پر تیری گل اوہناں نوں آکھساں ضرور۔ منن نہ منن، ایہہ اوہناں دی منشا۔“

”اوہ ضرور منسن۔ نہ منسن تے ڈانگ گلیاں اُتے رکھ کے میں منوا لیاں گی۔“ نیڑیوں اتماں سبھرائی بولی۔

”ہا، اتماں مینوں وی پک اے۔ اوہ ضرور من جاسن۔ بندے دامن پیڑا ہوونا چاہیدا اے۔“

مورے فٹیا نے اتماں سبھرائی دی گل نوں جیویں اک ہور تند لائی۔

.....

اوہ اگے جاوَن لئی اُتاو لے ہائَن۔ اوہ قدم پٹن ای والے ہائَن جو مورے فٹیا نے اپنے بارے ودھ ودھ دسنا شروع کر دتا:

”ایہہ میرا اک پاسا کم نہیں کردا۔ کسے بیماری وجہوں نہیں، ہتھوں اک واری میری اتھری گھوڑی تیز بھجیاں بھونیں اُتے وگاہ ماریا تے میرا ایہہ پاسا نستا جیہا ہو گیا۔ اخیر شیخوپورہ نیڑے منڈی ڈھاباں سنگھ دے اک سکھ سردار میرے توں اوہ گھوڑی مونہہ منگے مل لے لئی۔ پر اوس گھوڑی تے میرا ساتھ بڑا رہیا۔ کئی واری میں اوہدے اُتے اپنے ساتھیاں نال وکھ وکھ جائیں جا کے ڈاکے مارے، ٹھگیاں کیتیاں تے اگوں ویہرن والے بندیاں دے ساہ مکائے۔ گھوڑی کیہ سی، بھونیں اُتے سم ماردی تاں اگ کڈھدی۔ اوہدیاں اکھاں ہر ویلے گھمدیاں رہندیاں۔ خوف وجہوں نہیں، ہتھوں اوس دی بھال وچ جس نوں آہرن اُتے تیز کیتی ہوئی میری بلم دے پھل چیر دیندے..... ایہہ توں کیہ ٹیر پٹا لئی ودا ایں؟“ اوس گہنے خاں نوں جیویں مہنا ماریا..... ”بندا چون ساؤ لگدا ایں۔ اوس گھوڑی وچوں اک بی حالے میرے کول اے۔ دُعا کر کھل سردار من جاوے تے اپنے اکیل

نکڑے نال ٹکرن دیوے تاں اک وچھیری ایہدے وچوں تینوں دیساں۔ یاد رکھیں ایہہ
 موروے فٹیا نے دی کیتی ہوئی زبان ہئی تے تینوں اوس گھوڑی دی وچھیری دیون دا وعدا پیا
 کرداں..... جدوں اوس گھوڑی اُتے میں چڑھ بہندا تاں میرے بچن ویکھ کے دعا کردے
 ہین جو ویکھیے اج گھوڑی ہسھدی اے یاں مورا فٹیا نہ تے دشمن اندرو اندریں کنسویاں
 کردے، جواج دا دینہہ اخیر ہے موری تیرا..... تے اتاڑول جتھے ساڈی بھوئیں اے تے
 اوتھے اوتھے، جتھے میرا سنگ ساتھ، بچناپا تے ہلپا اے۔ اوتھے جد گل کسے مرد دی ہوندی
 تاں اوہناں دا اشارہ میرے ول ای ہوندا۔ میری اوس گھوڑی دا اُتلا ہوٹھ پاٹیا ہویا آہا۔
 اک واری میلے وچ کلے پٹن دا مقابلہ ہویا۔ شریکاں میرے کلے پٹھ تویت بنھ دتے،
 نالے کلا تریڈھا کر کے پوریا۔ میری بلم جیہڑی کہ دھرتی پٹھ موجود ہر پتھرنوں پاڑ کے نکل
 جاندی آہی، اوس دینہہ کلے پٹھ تویت ہون تے کلا تریڈھا پورن پاروں میری گھوڑی لفی
 تے لفدی ای گئی۔ میں وی ہلوان وچ بھرڑیا گیا۔ ڈھاہن دی گل تاں رہی اپنی تھاہرے،
 اپنی خلقت ساہنے جیہڑی نموشی ہوئی مینوں بھلی ہے نہ میری گھوڑی نوں۔ اگوں توں
 بھاویں سال پالی میدان میں تے میری اوہی گھوڑی جتدے رہے۔ اوتھے ای اوہدا اُتلا
 ہوٹھ وی پاٹ گیا آہا۔ اخیر پوری کھر لوکی اوس گھوڑی دے چچھے پے گئی۔ سردار نہال سنگھ،
 ڈھاہاں سنگھ والا بندہ بڑا چنگا آہا۔ میری مونہہ منگی رقم دے کے گھوڑی لے گیا تے دو سالاں
 دے وچ وچ ای مینوں اوہدی اک بھیان دے گیا۔ حالے اوہدے وچوں نسل پئی چلدی
 اے..... ہلائی گہنے خاں، گلاں تاں تیرے نال ہو گئیاں ہتھیریاں۔ ہُن تسمیں میرے نال
 مٹھا لونا کھاؤ، لسی پیوتاں جو تہاڈا ہانہہ کچی جاوے تے بار دا سفر جو ہویا اکھیرڑا..... پر گل
 میری پلے بنھ کے ٹریں۔ سُنیا اے جو ایتھوں نہر پئی نکلدی اے تے جنی کسے بھوئیں
 آباد کیتی اونی اوہدی مالکی وچ آجاسی۔ تے جیا جنت تے عزت بھرم ڈھیر ہو یوس تاں
 صاحبی تے سرداری وی اوہدے ای حصے وچ آجاسی..... میں سُنیا اے جو تیرے بھرا دی

لاہم دے جگدے کے کھراں دے سردار نتھو دا پتر ویہریا ودا اے..... گل تاں کوئی اکیل
گھوڑیاں دی ہوئی پر اوس متا پکا لیا اے تے لاہماں اکٹھیاں کردا ودا ہے جو انگریزاں دے
نال یدھ گھتسی۔ گل اوہدی گھوڑ ہے..... جتھے ہاتھی، توپاں تے توڑے ہوون..... ساڈیاں
بلماں، تیر تے تلوار کیہ کرسن۔ منیا جو گھوڑی ساؤ بندے نوں جانوں ودھ کے ہوندی ہے پر
خیر..... توں جا، اوہدا کیہ اے، اوہ تے آہندا اے میں انگریزاں نوں ایس لاہے پیر نہیں
دھرن دینا۔ جیہڑے گوگیرے کچھری لاندے نیں تے تھان تھان ڈاک بنگلے تے پلس
دے تھانے پئے بناوندے نیں، اوہناں اگے ایہہ گل نری وڈیائی اے، ہور کجھ وی نہیں۔“
مورے فٹیانے ایہہ گل جیویں اپنے آپ نال کیتی ہووے تے مُر گہنے خاں تے
مائی سہرائی نوں بھل کے جیویں ڈونگھے قیاسیں جا پڑیا۔

”چنگا بھراوا، ہُن اسیں رُدے آں۔ حقے پانی واسطے شکر گزار ہاہم۔ جیکر کوئی
صلاح بنی تاں ضرور تیرے کول اپڑسائیں۔ حالے تے کجھ آکھ نہیں سکدا۔ جدوں تیک
بھراواں دی نیت نہ پڑھ لواں۔“

رُکھ دی مڈھی اُتے کھلو کے گھوڑی چڑھدی سہرائی دا پیر پیڑ وچ رکھدیاں
مورے آکھیا، ”میں آہنداں، بندا ویلے نوں گھوڑی سمجھ کے اوہدے اُتے پلا کی مار کے
پیٹھن لئی تیار رہوے۔ ایہدے وچ ای مردانگی تے دنیاوی اے..... تے ایہہ گھوڑی ضرور
بدلیں۔ جھبڈے ای کوئی سبب بنیا تاں میں ای کوئی تینوں چنگی نسل دی دیساں چا۔“
مورے گہنے خاں نوں جیویں پک کیتی۔

اوتھوں چلے تاں راہ وچ ہور تھاہراں اُتے وی لوکی بار وچوں رُکھ تے جھاڑیاں
وڈھدے پئے دے اوہناں نوں۔

”انج ای ہئی گہنیا جو تقدیر مورے دی صورت وچ ساڈے اُتے مہربان ہوو
ہئی۔ ویلا نہ گھساویں تے تیرے بھراواں دے ترلے میں کریساں۔ اخیر اوہ میرے وی

پتر نیں۔“ لتاں سہرائی دی گل حالے پوری ناہس ہوئی جو تیر وانگ اُڈدی ہوئی اک بگھیاڑی اوہناں اتے حملہ کیتا۔ اوہ تاں اُچے ہون کر کے بچ گئے پر گھوڑی دے اگلے پٹ دا لڑ پھا لاہندی اوہ اگانہہ ہوئی۔ گہنے خاں بگھیاڑی دی وڈھی ہوئی تھاہر اُتے اپنی پگ ولھیٹ کے اوہنوں بنھن دا ہتھیرا جتن کیتا پر خون مُڑ وی نہیں رُکیا۔ اوہناں دی راہ اُتے انج جیویں کوئی جوں کھلار دا جاوے..... گھوڑی دا لہو ڈلھدا گیا۔

اوہ حالے ولا را دی ڈھاری اُتے بہہ کے پانی دھانی ای پئے کردے ہاں جو گھوڑی دی حالت ہو رہی ہو رہی ہو گئی۔ اوہ تاں انج جیویں ناہرا اُٹھ چنگھاڑے تے ہر شے چا، چا مارے..... مونہہ وچوں جھگ ای جھگ۔

”گہنیا! گھوڑی تیرے دے آہر مینوں چنگے نہیں دسدے۔ ایہہ تاں ہلکی ہوئی پئی ہئی تے جیہڑی شے لیہدے ساہنے آئی اوہنوں وڈھدی جاسی۔“
علیے ولا را اوہنوں ورجیا۔

”ایہنوں راہ وچ بگھیاڑی وڈھیا اے تے ضرور بر ضرور ایہہ ہلکی ہوسی..... ہُن اُپا لیہدا کیہ اے بھراوا؟“

”اُپا لیہدا اک ای اے“ علیا ایہہ آکھدا ہویا اندر گیا تے اندروں اک توڑے دار بندوق کڈھ لیا یا۔ اوہناں دو فار کیتوس۔ ایدھر گھوڑی بے دم ہو کے ڈھٹھی، اودھر عیسے خاں آوند اِسیا۔



6

فجر ول ٹردی رات

علی محمد جو علیے ولا را دے ناویں توں مشہور آہا۔ گھر بار وچ عام جیاں وانگ
 رہندیاں وی وکھرا وکھرا جیہا رہندا۔ اوہ گھر دے کسے جی تے نہ ای جنور نال ہلیا، انج
 ایہہ وکھریواں اوہدی ذات دا حصہ بن گیا۔ اوہ بھاویں ماں تے بھراواں نوں نہیں دس
 سکدا اہم جو اوہ کس وجھوں جھلار تے دریا دی من دے نیڑے واسیوں نہیں کر سکدا آہا.....
 بھاویں اوہنوں ایس گل دا وی یقین آہا جو بندے دے نال ڈھیر چرتیک کوئی شے وی نہیں
 رہندی۔ کوئی یاد وی، چاہے اوہ یاد چنگی ہووے یاں بھیڑی۔ چنگی یاد تاں بالکل وی نہیں۔
 پر ایہہ تاں اوہنوں اوہدے پیو ولوں سُنائی ہوئی اوہ وارتا آہی جو اوہدے پیو، پیو دے
 بھراواں تے دادے اُتے واپری آہی۔ اوہ جاندا آہا جو اوہ کیہ شے ہے جو اوہنوں ہر ویلے
 پیڑ دیندی اے۔ جو اوہنوں جاگدیاں چین نہیں لین دیندی تے ستیاں ڈراونیاں سُفیاں دا
 روپ دھار لیندی اے۔ جو بالپنے توں پیو وانگ اوہنوں کچھر چُکی کتھا کردی اے۔ سہکدی
 اے تے ہنچھو و ہاوندی اے۔

باہر رات نوں فجر ول ٹردیاں ویکھیا جاسکدا آہا۔

ٹپ ٹپ وسدی ورکھا دی واج ٹلھی تے شہتوت دے رُکھ اوہلیوں سنی جا
سکدی آہی۔

پکھیر وواں دے نویں سفر اُتے ٹرن لئی صلاح مشورے کرن دیاں اوازاں
دوروں نیڑیوں پیاں سُنندیاں۔
ولا را ڈونگھیاں سوچاں وچ آہا۔

گہنے خاں دے جھلار نیڑے وسن دی سدھرتے مُڑ کے مورے فٹیانے نال رل
کے بار اباد کرن وچ ایہناں دی اپنی ای کوئی لاجھ، ایہناں دا اپنا ای کوئی فائدہ مفاد
ہووے گا، نہیں تے ایہہ مینوں تے عیسے نوں نال رل کے بار اباد کرن بارے کدے وی نہ
آکھدے۔

ولا را دے وکھ رہن وچ شک کرن دی ایہہ بیماری وی رلی آہی تے ہر ویلے
سوچدیاں رہنا، عام تے خاص ہر طرحاں تے ہر ویلے سوچدیاں رہنا، ہر طرحاں دے
حالاتاں وچ۔ اوہ سوچدا تے مُڑ سوچدا ای رہندا..... اوہ جھلار نیڑے دریا دی من اُتے
کیوں نہیں وسنا چاہوندا آہا۔ اوہدی خاص وجہ آہی۔ اوہ لٹیریاں تے دھاڑویاں دی گزر گاہ
آہی۔ اوہنوں اک اک کر کے اپنے پیو دیاں سُنائیاں کہانیاں یاد آون لگ پیاں۔ پہلی
کہانی وچ رات دا سما آہا۔ اوہ اک گنڈ وچ وسدے ہائن۔ سیالڑے دی نگھی رات آہی۔
سوتے دا ویلا ہونا اے۔ اوہ پیو نیڑے سوت وچ انج ولٹجا ہویا آہا جیویں کوئی سپی
ہووے۔ اوہدا پیو کدی نگھی نیندرے نہ سُتا دسدا۔ ولا را دی اکھ جس ویلے وی گھلدی
اوہنوں اوہدا پیو جاگدا ای دسدا۔

”پُوا..... توں ہر ویلے جاگدا کیوں رہندا ایں؟“ اوس پُچھیا

”سوں جاون وچ بہوں زیادہ زیان دا ڈر ہوندا اے ولا راوا۔“

پیو اوس نوں ہمیش پُتری آکھ کے بُلاوندیاں پھیر کدے کدے اوس دے ناں

توں سدّ دا۔

”اوہ امرائے نیڑے رہندے ہائے۔ دریا دی من ایٹھوں ڈھیر دور آہی پر جس
تھاہر اُتے اوہناں کھوہ کھٹ کے رہنا شروع کیتا آہا۔ اوہ تھاہر خلقت دی وڈی گزرگاہ آہی
تے ایہہ گزرگاہ ای اوہناں دی بربادی دا کارن بنی۔ پر اوہ کبھی تھاہر آہی۔ جتناں
ورگی..... اوہ اوہنوں اصل گل ول لیاندا لیاندا کدے ہوو دے نکل گیا..... اوس اوہدے دو
بھراواں، اک بھین، ماں پیو سسھناں ایس بھوئیں نوں رہن گڈن لائق بناون لئی اپنے لہو
نوں مڑھکے وانگ وگایا۔ مڑ جا کے ایہہ بھوئیں فصل بیجن لائق بنی آہی۔ اوہدے بھراواں
پیو تے اوس بھوئیں اکساہری کیتی، ٹوئے بے پدھرے کیتے، ٹوٹیاں بنائیاں، وٹاں بدھیاں،
اپنے چپنے، چترے تے ساوے بلداں نال جو ترے لائے۔ چھپر تے ٹوبھے کڈھے۔ وادھو
وسیاں بارشاں دا پانی سنبھال لئی ندیاں، نالے تے جوہاں کھٹ کھٹ چھ گئے..... اوہناں
سال پیالی کنک، چری، جوار، جوں، مکئی تے رُوں گڈی تے مڑ فصلاں انج سریاں جو رہے
رب دا ناؤں۔ پکی ماڑی جتھے پیو دا ہمیش دا آون جاون آہا۔ اپنی ٹالھی، بیر تے مکردی
لکڑیں نال بنوائی گڈ اُتے۔ اوہ بلد جو لیندا تے ہووے لوکاں دیاں جنساں وی اُتے دھر
کے منڈی نوں ٹر جاندا۔ اوس کرائے وچ جنساں وچوں ای حصہ لے لینا۔ ایہہ وستاں توڑ
ولایت اپڑ دیاں۔ راوی وچ کھلوتیاں بیڑیاں ایہناں نوں سندھ دریا تیک اپڑاندیاں تے
او تھے کھلوتے جہاز لاہوری بندرتیکر ولایتی مسالے، رُوں، رُوں نوں رنگن لئی قدرتی رنگ
جیہڑے اتھے مڈھ لاتوں اُگدیاں بوٹیاں وچوں بندے آئے ہائے۔ نیل، کسنہڑا، مچھڑا،
کیسو، اکاس ویلاں تے مہندی دے ہائے پتر..... مکر دے رُکھ دی چھل توں بنے رنگ وی
انملے وکدے۔ ساڈی نیڑلی وستی دے لوکاں نوں ایہناں وچوں رنگ کڈھن تے ایہدے
نال کپڑے رنگن دی ڈھیر جاچ آہی۔ اتناں دس دی ہوندی ہائی جو کھیس تے دریاں رنگاون
لئی جاندی ہوندی آہی۔ ”جو کپڑے نوں رنگ دے گھول وچ پاوون توں پہلاں ایہنوں

”پاہ“ دیا کردے ہائن۔ تاں جواہرہ رنگ نوں پکے طور پھڑ لوے۔ ایس کم لئی اوہ پرانیاں زمانیاں توں پھٹکوی تے جھاؤر ورتدے۔ بھاویں رنگ بناون تے چڑھاون دے ایہہ ڈھنگ کجھ خاص لوکاں نوں ای پتا ہائن پر جیہناں نوں پتا آہا اوہ دوجے لوکاں نوں گھٹ ای دسدے۔ پر ولا روا؛ جو لوکی رنگ نہیں کڈھ سکدے ہائن۔ اوہناں دیاں گڑیاں سوتر، اُن، ریشم تے کڈھائی وچ ورتے جاون والے ہور سمیان دے مہنگے ہون پاروں اک دے پھنبھے اکٹھے کر کے اوہناں نوں ای پنج تئب کے قدرتی رنگاں نال رنگدیاں، اوہناں نال غلچے تے ہو رشیواں بنالیندیاں۔ اک جیہناں دیاں توں مائیاں اڈاندا وندا ایں، حکیم لوک تے ایہنوں سے دوائیاں وچ ورتدے نیں۔ پیو دسدا ہوندا آہا..... ”ولا روا، ساڈی اک ای بھین آہی تیری پھپی..... دانی، بنی تے گھر دی پردھان۔ سارا لیکھا جوکھا، بھوئیں بھانڈا، بی پٹھا، کھان پین دا حساب اوہی رکھدی۔ ویلھے ویلے امرائے دیاں ساریاں گڑیاں اوہدے نال آ کے بہہ جاون تے ترنجنیں بہہ کے کسیدے پیاں کڈھن..... جیہدیاں دُھاں دور دور تیکر دُھمیاں ہائن۔

”علاقے دی خلقت سکھ دا ساہ لیندی آہی۔ امرائے وچ ای جو ساڈے توں کجھ قدماں دی دوری اُتے موجود آہا۔ کاریگراں دا پورا طبقہ موجود آہا۔ جیہناں وچ لکڑ، لوہے، چمڑے، پتل، شورے، صقل دے کم توں وکھ سلائی کڈھائی تے کشیدہ کاری دا کم کرن والے لوکی رہندے ہائن..... لوہار، ترکھان، موچی، نائی، دھوبی، درزی، راج، سُنارے، قلعی گر، کمھیار، چوڑی گر، ٹھہیرے، پنچے، تیلی تے للاری۔ سبھو ساڈے چوگرد وسدے..... انج جو ساڈی ماں آہندی ہوندی آہی، ملکھ ماہی دا وسدا آہا، شاد آباد آہا۔ تے ایہہ مُلکھ ساڈی ڈھاری، ساڈی وستی تیک ای نہیں اباد آہا۔ ایہدا پپار تے کھلار تے دور دور تیک آہا.....

”ایس سبھو کجھ دے ہوندیاں سوندیاں چوری چکاری، یاری دشمنی، ٹھگی، ڈکیتی

تے مار دھاڑ ایس علاقے دی مردانگی گنی جاندی۔ ساڈی وستی دے لوکی بھاویں ایس سارے کچھ توں انجان ہائے۔ اوہناں تاں کدے لوہے دے ہتھیار وی نہیں بنائے ہائے، سوائے اوہناں اوزاراں دے جو بھوکیں بناون، سنوارن تے کم وچ ورتے جاندے۔ پر ساڈے آل دوالے وچ تے پوری بار دیاں وکھ وکھ لاہماں وچ رہن والے ہر منکھ دی اکھ دوجے دی دولت، عورت، اوہدیاں مجھاں، گھوڑیاں، اٹھیاں، بکریاں تے اوہدے مال اسباب اتے ہوندی۔ اوہ دوجے دی وست نوں اپنی ای شے جاندا۔ خاص طور اُتے دریا دی من اُتے قافلیاں دیاں گزر گاہواں تے اباد وستیاں تاں روز ای اُجڑ دیاں تے روز ای وسدیاں۔ جیہدے کول طاقت ہوندی، گھوڑیاں تے ہتھیار ہوندے، آوند، لُندا تے اگانہہ ہوندا۔ کوئی پچھ پریت، کوئی قانون قاعدہ نہ آہا۔ دور دور علاقیاں وچ تھانے تے ڈاک بنگلے بنے ہائے۔ کوتوال یاں سرکاری کارندیاں دے اپڑن توں وی پہلاں لٹن والا جاگنڈ وچ لگدا۔

”ایہی ای دیہاڑ ہائے“ اوہدے پیو نے اک ٹھنڈا ساہ بھر دیاں اکھیاں۔
 ”وسا کھی لنگھی آہی تے امرائے وچ میلان لگن والا آہا۔ جدوں اک رات ساڈے اُتے بڑی بھاری لتھی“ اوس ہنجواں نوں اپنی پگڑی دے پلو نال پونجھدے آکھیا۔
 ”اوس شام ساڈے اُتے ہونی ورت گئی، اوہ وی بار دے اک سردار قبیلے دے ہتھوں۔ اوہ گھوڑیاں اُتے آئے۔ اوہناں کول نیزے، برچھیاں، بلھماں تے گہاڑیاں ہائے“ وسا ہرے خاں اوہنوں کھول کے گل سناون لگ پیا۔

میرے دوئیں وڈے بھرا ڈنگراں واسطے گھاہ چارہ وڈھن لئی نیڑے جھنگی ول نوں گئے ہوئے ہائے۔ پوا، سبات وچ الانی منجی اُتے اُسیویں لے رہیا آہا تے میری بھین ڈھاری نیڑیوں لنگھدے نالے اُتے کپڑیاں نوں کھار وچ دھو کے اوہناں نوں نیل پئی لاوندی آہی..... آون والیاں کوئی خیر خیریت نہیں کچھی، حال احوال نہیں کیتا۔ آئے تے

آوندے سار ای آکھدے ہن ”کڈھو اوئے جو کوئی مال اسباب تہاڈے کول ہے؟“
 ”اوہ ست اٹھ بندے اُتوں پُج پُجا کے آئے ہوئے۔ اسیں گھاہر گئے۔ باروچ
 اجیہے واقعے واپردے عام سُنندے ہاُن پر ساڈے اُتے ایہہ کرو پی پہلی واری آئی۔ پُوا
 اُبھڑوا ہے اُٹھیا۔ اُتوں جو نیڑے ای مجھ چونڈی پئی آہی اوہ اوویں ای گڈوی ہتھیں لئی
 ہئی۔ میں ویکھیا جو دھار اوہدے ہتھوں نکلی تے بھوئیں اُتے لیکر پاوندی گئی تے ایہہ اوس
 مجھ دی اخیر لی دھار ہائی جو ساڈے حصے آلی بھوئیں اُتے ڈگی۔

”ڈنگر سارے اک ای رے نال بنھ لوو تے گھوڑیاں چھڈ کے جو دو بیلے ہن
 ہک ہک ہو جاوے۔“ اوہناں وچوں وڈیاں مچھاں والے تے تڑے والی پگڑی والا بولیا۔ پیو
 داتاں جیویں ساہ ای مُک گیا ہووے۔ میں اوہدی تیڑ دی پھڑی کنبدا ہو یا اوہدے چکھے
 لُک کے اوہناں نوں ویکھ رہیا آہا۔ اپنے نوں میری بھین راہاں اُتلے نال اپنے سنے ہتھ
 پونجھدی ہوئی آن وڑی۔ وڈیاں مچھاں آ لے راہاں نوں ویکھدیاں ای اکھاں وچ چمک
 لیاندی۔ اوہدے ہوٹھاں اُتے لالاں آ گئیاں۔

”ایس گڈوی نوں چُک کے میرے چکھے بٹھا دیو تے بابے دی پگ لاہ کے
 سانوں آپت وچ چنگی طرح بنھ دیو۔“

”ایہہ سُن دیاں سار ای دو گھوڑ سوار لتھے تے اوہناں بھین راہاں نوں پھرن دا
 جتن کیتا۔ اوہ بھیج کے پیو ول ہوئی۔ پر اوہناں اوس نوں گُت توں پھڑیا۔ ماں اوہنوں
 بچاون لئی اگے ودھی۔ اوہناں ماں نوں پہلوں گلاں مُڑ ہتھاں نال پچھانہ ہٹن دا آکھیا،
 ورجیا۔ اُتوں پہلاں کاوڑ نال تے مُڑ کے متاں ترلیاں نال بولی۔ اخیر جدوں اوس ویکھیا
 جو راہاں اوہدے ہتھوں گھسدی پئی اے تاں اوس اُچی اُچی بو بو گھتن تے حال پارھیا
 کرنی شروع کردتی۔

ایہہ حال بُو میریاں وڈیاں بھراواں تیکر اپڑ گئی۔ اوہ اوویں ای ننگے پنڈے

ہتھیں داتریاں لئی آن وڑے۔ ایس توں پہلاں کہ اوہ اندر سبات وچ جا کے ہتھیار پھڑدے، انج جیویں دھاڑ کرن آئے پہلوں توں ای تیار ہائن۔ اوہناں آوندیاں نوں ای نیزیاں، بلماں تے گہاڑیاں اُتے دھر لیا۔ میرے پیو تے بھراواں نوں تڑفا تڑفا کے مار گھتیا۔ میں تے میری ماں پنے نتانے جیہے کنے ای سمے بے ہوش رہے۔ اوس ویلے جدوں راسباں دیاں سہیلیاں امرائے توں اوہدے نال کسدا کڈھن لئی اپڑیاں، دھاڑوی گنڈ توں پار اُتاڑ نوں جالتھے ہائن۔ اسیں ہُن ڈھاریاں چھڈ کے امرائے والیاں نال رہن واسطے وستی آ گئے۔ اک گھر وچ رہن لئی سانوں تھاں ڈھئی۔ اوہی گھر والے ساڈی واہی نیچی کرن لگ پئے۔ ساڈا کھان پین، کپڑا لتا اوہناں دی جیویں ذمے واری بن گیا۔ پر میں اوس واقعے نوں منوں کدی نہ بھلا سکيا.....“ پیو وساہرے خاں نے ولا رانوں اپنی ہڈ بیتی سناوندیاں اک لمیرا ساہ بھریا۔

”مڑ کے میں امرائے دے اک منویں کھوجی نال رل گیا۔ اوہدے توں گھرا کڈھن دا ول سکھیا۔ اوہ کھوجی مٹھے پانیاں دی تھاہر لبھن وچ وی کامل آہا۔ اوہ پانی جیہدے نال کھوہ کڈھ کے بھوئیں نیچی جا سکے۔ میرے من وچ تاں اوہناں دھاڑویاں تیک اپڑنا تے اوہناں توں بدلا لینا آہا۔ اک سدھر من وچ بھین نوں ملن دی وی آہی تے دشمنان توں ویر لین دی وی۔ ایہدے واسطے اک لمی عمر تے پہاڑاں ورگے ورھے ہنڈھاوے پئے مینوں سرتے..... اخیر میں لبھ کھلا، اپنے شریکاں نوں تے لیہناں دیاں باہکاں نیڑے دھونی دھما کے بہہ گیا۔ جوگی فقیر دا روپ دھار کے نیڑے والیاں وستیاں وچوں خیر منگدا، کدی کدی لیہناں دیاں باہکاں تے وی جا نکلدا۔ میں رانجھے دے ہیر تے سہتی دے ملن دے چچ توں ول سکھیا۔ مینوں اوس سردار دی زنانی کھوہے اُتے پانی بھردی ٹکردی..... چون میل ملاپ ہوون لگ پیا۔ سردار ہر راتیں آہم لاہم دیاں تھاہریں جا لگدا جھگے بھندا تے ملکھیں دے مجھیں تے داند کڈھ لیاوندا۔ اوہدے نال ڈاکوواں دی

واہر ہوندی۔ میں ایس ڈرتوں ہر ویلے گھاہریا جو کدھرے کسے ویلے اوہدے نال ٹاکرا ای نہ ہو جاوے۔ اک دو واری مینوں بھین وی ملی۔ اوہ ہُن دھیاں پُتراں والی آہی۔ میں اوہنوں سیہان لیا، پر اوس مینوں سہاتا کوئی نہ۔ کیوں جو ساڈے وچکار عمراں دے پینڈیاں دی وتھ آہی..... اوہنوں ویکھ کے اندروں اندریں روندرا رہیا پر اوہنوں گل نہ لایا جو کدھرے اوہ ہبھو کجھ چھڈ چھڈا کے میرے نال ای نہ ٹر پوے..... اخیر ولّا روا میں سردار دی زنانی نوں اُدھال لیا، جیہڑی تہاڈی ماں بنی۔ آہندن جو راٹھ واسطے بھین توں ودھ اوہدی زنانی ہوندی اے جو اوہدی عزت، آبرو تے مان مریادا دی راکھی کر دی اے۔ زنانی ای مردنوں ڈھیر گھاٹ وی دیندی اے۔ ایہہ گل وی میرے ساہنے آہی۔ مُڑ مینوں پتا وی کوئی ناہیں لگا جو سردار دی کوئی بھین وی آہس..... میں تے سبھرائی اوہدے لگدیاں دے ڈرتوں بار دی اجیہی کیہڑی گنڈا اے جتھے جا کے نہ لگے ہووے۔ ناؤں نشان تے پہر پوا بدل کے۔ اُتوں تسیں جمن لگ پئے۔ تھاہر، ٹھکانا اسیں کوئی نہ بنا سکے۔ پر پُتر، اک گل یاد رکھیں تہاڈی ماں سبھرائی میرے نال چنگا سوہنا ورتی اے۔ جدوں دی میرے نال آئی اے اوس ہٹ کے پچھانہ نہیں ویکھیا۔ میں گھرے بچے چھڈ کے مٹھا پانی لہہ کے کھوہ کھٹن داکم مل لیا تے انج تہاڈا تے اپنے آپ دے جین، دنیا اُتے رہن دا سبب اسباب بنا لیا۔ پر ایہہ کوئی حیاتی نہیں پُتر ولّا روا، خانہ بدوشاں والی۔ میرے من وچ ایہہ سدھرتاں چروکئی آہی کسے اک تھاہرے اکٹھے رہ کے بھوکیں بھانڈا کر لیندے پر جو بیتی ساڈے اُتے، اوہدے مگروں تاں تہانوں نصیحت ایہو ای کریساں جو کدی دھاڑویاں دی راہ تے دریا دی من اُتے واسیوں نہ کرنا، کیوں جو تہاڈی ماں دے لگدے تہاتھوں ویرلینوں وی نہ مُڑ سن..... پر میں اخیر لے ویلے اپنے مرن دا بندوبست کر کے مرساں۔ تسیں میری لتھ دی سوہ وچ رہنا تے میری قبر دے نیڑے ای واسیوں کر لینا.....“

کھتیاں، پورب ولوں پچھم نوں پنہ کر آئیاں جدوں ولّا را پیو دیاں سُنایاں،

ہڈ ورتیاں دے کھہڑیوں نکلیا۔

ساری رات بے ارامی نال بولدیاں کُڈیاں، کُڈواں وچوں بانگی کُڈ بانگ دیونا شروع کردتی۔ وِلا رانوں اتناں سبھرائی دے بولن، کلمہ پڑھدیاں توبہ استغفار کردی دی آواز آئی۔ وِلا راجانیا جو اوہدے وانگ ای اتناں سبھرائی وی رات اکھاں وچ ای کڈھی اے.....

.....

اوہ سارے اُٹھج کے حاطے وچ کٹھے ہونا شروع ہو گئے۔ وِلا راگھڈی دا بوہا کھولیا۔ ڈنگراں تے واڑھے اُتے نظر ماریوس۔ اوہدی زنانی چائی وچ مدھانی پاون توں پہلاں ہتھ نال نکھار کے ساریاں واسطے بورا کڈھیا تے کانہہ دے ہتھ ہتھ لمے گلاساں وچ گھت کے اوہناں نوں دیون لگی۔



7

بھردی سامی وچ قید رُوحاں

ولّارا جاندا آہا، جو اوہدی ماں حُقہ چھکدی ہے۔ اوہ اُٹھئی کے حقہ بھخاون لگ
 پیا۔ اماں سھرائی چر تیک قیاسیں پئی رہی تے ولّارا دے مونہہ اے تھکدی رہی۔
 مُڑ اُٹھی جی، پیڑھی پکڑیوس تے ولّارا ول ودھن لگی۔ ولّارا، نیویاں اکھاں نال اپنی ماں نوں
 تکیا۔ اوہنوں لگا جو اوہدی ماں دی کنڈ نیوں گئی اے۔ اوہدیاں اکھاں وچ اوہ ویلا گھم گیا
 جدوں اوہدی ماں بھر جوان آہی۔ اوس اوہنوں ہمیش ایس جوانی دے روپ وچ ای تکیا۔
 اوہ اوہنوں بڈھیاں ناہیں ویکھنا چاہوندا۔

اماں سھرائی ولّارا دے نیڑے جا اپڑی۔ پیڑھی بھوئیں اُتے رکھوس تے ٹھہ
 کے اوہدے ساہمنے بہہ گئی۔ بھوئیں توں اک سُکا تیلھا پکڑیوس۔ اوہدے اُتوں دھوڑ مٹی
 جھاڑ دیاں تے اوہدے اُتے ودھیاں چُجھاں بھوردیاں بولی، ”پُتر! توں جاندا ایس ایس
 تیرے کول کیہ سوچ کے آئے آں۔ سیانے آہدے نیں کدھوں کنڈیتا تے پردیسیں وسدا
 اک برابر ہوندن..... تے توں تے خیری سلا وسدا ای پردیس ایں ساڈے بھانے۔ اُنچ
 دو جے دو بھراوی کیہڑے نیڑے ہوندن۔ میں آہندی آں ساریاں باہیاں رل کے بہو

تے تہاڈے رل پٹھن، رل وسن نال میں وی کوئی سکھ دا ساہ لواں۔ پُتر من لویں تے نانہ نہ آکھیں۔ تسیں سارے خیر نال جیے جنتے تے مال اسباب والے او۔ مال اسباب تے رب گہنے نوں وی ڈھیر دتا اے۔ پر جدوں اولاد ای نہ ہوئی تاں اوہدے کس کھاتے.....“ مائی سھرائی ایہہ آکھ کے ولا را دا مونہہ ویکھن لگ پئی۔ انج جیویں کوئی دریا دے کپر وچ ڈبدا کسے وسیلے دی آس وچ ہوندا اے.....“توں من لویں تے میں عیسے نوں وی ترلا گھتاں..... کسے سردار دی بھوکیں تے کم کردا اے۔ کتنا اوکھا ہوندا ہووے گا۔“ انج جیویں اخیر ی گل اوس اپنے آپ نال کیتی ہووے۔

چراں تیک چپ چان ای کھلری رہی۔ ولا را سوچ رہیا آہا.....“ماں نوں کیویں سمجھاواں؟ میں ایہناں ساریاں نوں کس طرحاں سمجھا سکدا آں۔ جیکر میرے ساہمنے گہنے خاں تے عیسے خاں ہوندے تے ایہو گل پچھدے تاں اوہناں نوں دس وی دیندا۔ مینوں بڈھی ماں دادل رکھنا پوسی۔“

اپنے وچ اتناں سھرائی گھابر کے پیڑھی توں اٹھ جی تے اٹھ کے دور ویران جیسے جنگل ول تکن لگ پئی۔ پورا سورج نہ نکلن پاروں جنگل حالے گھسمیلا جیہا دس رہیا آہا۔ چنگی تقدیروں پہلے گہنے خاں موڈھیاں اُتے دھرن والی چادر چھنڈا اپڑیا تے جھبڈے ای مگروں عیسے خاں وی۔ ہُن اوہ چاروں اوٹھے اکٹھے ہائن۔ چاروں اتھے اکٹھے ہوون والے مقصد توں چنگی طرحاں جانو ہائن۔ چاروں چپ ہائن۔ اوہ سارے ای ایہدے اُتے یقین کیتی بیٹھے ہائن۔ جو ولا را، ممورے فٹیا نے نال رل کے ابادی کرن تے بھاویں نہیں پر بھراواں نال رل کے رہن تے تاں ضرور بر ضرور راضی ہو جاسی۔

ولا را چپ آہا۔ اوہ اوس کہانی نوں ساریاں دے ساہمنے بیان ناہی کر سکدا۔ خاص طور تے اتناں دے ہوندیاں۔ کیوں جو اوہناں اُتے جو بیتی آہی اوہدے ذمے وار اوہدی ماں دا پہلا ساکیں تے اوہدے کارندے ہائن۔ اوہ سوچدا آہا جو اوہدے پو

وساہرے خاں ایہہ گل اپنی زنانی نال بھاویں لکھ واری کیتی ہووے، اوہ نہیں کر سکتا تے جدوں ولارا ویکھیا جو اٹماں سھرائی آپ دھیانے لگی ہے تاں اوس دوہاں بھراواں نوں کورا جواب سناوندیاں آکھیا:

”بھراوو! تسیں جنے مرضی اے چنناوند ہووو، تہانوں دُکھ لگے یاں میرے ولوں بدگمان ہو جاوو۔ میرا تہاڈے نال جاون اُکھیرا لگدا اے۔ ایہہ گل میں اٹماں ساہمنے نہیں کر سکتا۔ آس ہے تسیں میری مجبوری سمجھ لیسو۔“

”ایہدے وچ کوئی بدلاؤ ہو سکتا اے یاں اسیں لیہنوں تیرے ولوں لوہے اُتے لیک ای جانے؟“ عیسے خاں ترکھے لہجے وچ آکھیا۔

”بھراواں وچکار گلاں ہوندیاں رہندیاں نیں۔ اوہ گلاں نال لوہے اُتے لیکاں نہیں چھکدے۔ کدے کوئی سبب اجیہا بنیا یاں ویلا دُکھ آیا تاں میتھوں ودھ رل وسن دی خوشی ہوو کہنوں ہووے گی.....“ ولارا دے گل کردیاں کردیاں اٹماں سھرائی وی نیڑے آن کھلوتی آہی۔ گل اوہدے تے وی شیشہ ہو گئی آہی۔

”چنگا پترا، جیکر توں نہیوں مندا تے اسیں نیوں جاندے آں۔ توں کر لے اپنے من آئی..... پتر گہنے خاں! جاتے اپنا مال مُنی لے تے اتھے ای مُڑ آ۔ میں مُڑ کے ”چھوٹیاں والے پتن“ کوئی نہیں جاندی۔ وتاں او تھے جا کے میرا من پر تیج جاوے..... تے چنگے سبوں اج تریوے جُو گئے او تاں اک گل جیہڑی کجھ دیہاڑیاں توں میرے من وچ مُڑ آوندی اے تہانوں کر چھڈاں۔ ویسے خاں نوں وی سنیہا گھل چھڈو۔ میری معیاد ہُن بہوں گھٹ رہ گئی اے۔ میں اندروں کھاج جیہی گئی آں۔ اج کل دی مسافر آں۔ خورے کس ویلے میرا سمیان لدی جاونا اے۔ بس زرا بُت ای رہ گئی ہاہمیں۔ اک وعدہ تہاڈے ساریاں توں لینا چاہوندی آں، جو میرے مرن توں پہلاں میرے پکیاں نوں میرے مونہہ دھر مونہہ کر دیو تاں جو اوہنوں سارا حال حقیقت کر دیواں۔ جو میں نکلی تاں

وساہرے خاں دے نال اپنی مرضی نال آہی تے تسیں میرے پُتراں نال ویر دھکو زوری دا
بنائی ودے او۔ ذمے وار تاں لنگھ گیا گلے پتیں۔“
اتماں سہرائی دی ایہہ گل سُن کے تریوے بھرا ہکا بکا رہ گئے۔

.....

رات سمے.....

گھٹ ودھ اباد ہوئے جنگل وچ دور دور تیک ڈولدے اسمان اُپر بلدے بُجھدے
تارے.....

لگا تار بینڈیاں دیاں اوازاں۔

ویڑھے وچ سستے سبھ لوکاں دے چہریاں اُتے اُداسی تے مایوسی دیاں لکیراں۔
ولّا راتے اوہدی زنانی جاگدے نیں۔ سرکڑے نال اُسارے کدھلے پیٹھ منجیاں
ڈاہیاں ہوئیاں نیں جیہدے اُتے جنڈ، ککراں تے ہو رُکھاں دیاں لگراں نال بنی چھپری
اے۔

نال والی منجی توں اتماں سہرائی دی اواز آوندی اے:

”میں پیراں فقیراں توں رکھاں لکھوائیاں تے چاندی دیاں ڈھولنیاں وچ مڑھوا
کے اوہدے ڈولھیاں اُتے بنھ دتیاں۔ اوہ جھنگ سیالوں سرداراں دی دھی کڈھ لیا یا۔ میں
جیہنوں گل نال لا لیا۔ پر اوہدے لکھے لیکھ نہ پریتجے۔ اوہدے اُتے ربّ دی نہ مہر
ہوئی.....“ اوہ اک ٹھنڈا ساہ بھر کے چپ کر جاندی اے۔

.....

کچھ چر چپ مگروں ولّا را اپنی زنانی نوں پُچھدا اے:

”کرماں والیے، جاگدی ایں؟“

”ہاں، جاگدی آں۔“

”اتماں، گہنے خاں بارے گلاں پئی کردی اے..... ماں دی حالت ویکھاں تے جی آکھدا اے کہ ایہناں نال رل کے ٹر جاواں تے جتھے آہندن، او تھے ابادی کر لوں۔ ایہناں دی مرضی نال جیواں، ایہناں دی مرضی نال مراں۔“

ڈھیر دیر تیک چپ رہندی اے۔ مرنج جیویں گوہ نال نہیں سگوں سوچدی ہوئی بولدی ہووے۔

”چنگی گل اے۔ اتماں دی حالت ہُن ڈھیر ماڑی لگدی اے.....“ اوہدی زنانی او سے طرحاں کسے ہووے سوچ وچ گواچی ہوئی بولدی اے۔

”حیاتی دا اعتبار کوئی نہیں۔ جنگل وچ جاو تے گھپ پر چھائیاں ویکھ کے لگدا اے حیاتی کجھ ماڑیاں، کجھ پیڈیاں سُفیاں دیاں چھڑیاں نال بنایا ہو یا کوئی پنجرہ اے۔ اتماں نوں ویکھدی واں تے مینوں اوہدی روح کسے جیسے ای پنجرے وچ تڑی لگدی اے۔“

”ٹھیک ای آکھدی ایں کرماں والیے۔“

”ساڈے وجود وی تاں ایہناں پنجریاں وانگ ای ہے نیں ولا راوا.....“ اوہدی زنانی اپنی گل ٹوری رکھدی اے۔

”..... تے وجود دیاں ایہناں پنجریاں وچ اسیں اپنیاں سدھراں دے پکھیر وواں نوں ہمیش ہمیش لئی تاڑی رکھدے آں۔ جو ہمیش ڈرے سہے رہندن۔ کدی کجھ بولدے، کدی کجھ چچھاوندے ای نہیں۔ سگوں ساڈیاں ترٹھیاں ہونیاں روحاں وانگ جو اک روز بھردی سامی وچ قید ہو جاندیاں نیں۔ اسماناں اُپر جاو دی اڈیک وچ۔ اودوں تیک، جدوں تیک ساڈیاں ہڈیاں گھر گل کے مٹی وچ مٹی نہیں ہو جاندیاں۔“

مرنج جیویں مریض خیر لیاں گلاں کردا تھک کے سہکدا اے۔ ولا را دی زنانی وی تھک کے سہکن جیہی لگ پئی۔

رات دا اخیر لا پہر.....

چُپ دیاں ڈونگھیاں اوازاں وچ ولّا راتے اوہدی زنانی دیاں اوازاں اچنتے انج گواچ جاندیاں نیں جیویں استھے کوئی منکھ ہووے ای نہ۔ مُڑ کے کُتیاں دے بھونکن تے گدڑاں دے کوکن دیاں اوازاں اُتے ولّا را دی اکھ گھل دی اے۔ تاں اوہنوں لگدا اے جو نیڑے ای بُبیاں اوہلے جیویں کسے بندے نوں ماریا جا رہیا ہووے..... اوس ویکھیا جو اوہدی ماں اَلانی منجی اُتے لمی پئی اے۔ مُڑ کے اُٹھ دی اے تے اوہناں اوازاں ول ودھن لگ پیندی اے۔ ولّا را اپنی ماں نوں اودھر جاون توں روکیا تے کچھو س:

”انج نہیں لگدا اتناں جیویں کے بندے نوں ماریا جا رہیا ہووے تے پیڑ وجھوں اوہ روند اگر لاند اہووے؟“

”نہیں پُتر، اجیہی کائی گل نہیں۔ ضرور توں کوئی ڈراونا سُفنا ویکھیا ہونا اے۔ اصل وچ ایہہ تھاہر بھاری لگدی اے۔ اُتوں آون جاون والیاں دی گزرگاہ اے ایہہ۔ ایس لئی تھاہر تھاہر اُتے ٹھگاں تے دھاڑو یاں، خلقت نوں لُٹیا تے لُٹ لُٹ کے قتل پیا کیتا..... تے اوہ روجاں جیہناں توں اوہناں دا مال اسباب لُٹ لیا جاوے تے جیہناں نوں جیوندے جانیں مار دتا جاوے، اوہناں روجاں نوں سکون کتھوں آوندا اے؟ جدوں وی انھیری رات وچ چاروں پاسے چُپ گھپ ہو جاوے، ایہہ بے ارام روجاں باہر نکل آوندیاں نیں تے باہر نکلدیاں ساراں اوہناں نوں انج لگدا اے جیویں مُڑ کے اوہناں نوں ماریا جا رہیا ہووے۔ اوہناں توں اوہناں دا مال اسباب لُٹیا جا رہیا ہووے۔ ڈونگھی بچھ لاون نال لیہناں دیاں اوازاں سانوں وی آون لگ پیندیاں نیں۔ ایس اوہناں دیاں پر چھائیاں تاں نہیں ویکھ سکدے پر اوازاں سُن سکدے آں۔ کدی کدی پورن ماشی دیاں راتاں وچ انج لگدا اے جیویں ایہہ روجاں تہاڈے ہُنے ہُنے نیڑیوں لنگھ گئیاں ہوون.....“

ولّا را سوختے اُٹھیا تاں اوہدا جُٹہ مُڑھکو مُڑھکی آہاتے اوہنوں لگ رہیا آہا جیویں
 اوہدے سُنّے تے اپنی زنائی نال کیتیاں گلاں اک مک ہو کئیاں ہوون۔
 اوس اچتے اک فیصلہ کیتا۔ گہنے خاں، عیسے خاں، ائماں سہرائی تے اپنے جیے
 جنتے نوں اوہناں نال لے جاوَن تے اوہناں نال اباد ہوون دا.....

.....

وِیسے خاں تے اوہدا گھبراٹا پُتر ممورے فتیانے دی اباد کیتی جاوَن والی بارتیک
 توڑ اوہناں دے نال گئے۔ اک وڈی گڈ گہنے خاں دے سمیان دی بھرتج کے وی او تھے
 اپڑ گئی۔ وِیسے خاں ولوں اوہناں نوں دتی گھوڑی، وچھیری تے لوے تے نویں داندیاں دی
 جوگ، اوہناں اونٹھاں نال آن رلی آہی جیہناں ایس بھوکیں تے ہل واہنے ہائَن۔
 کجھ ای دناں مگروں نہال سنگھ ڈھاہاں والا وی اپنے مال ڈنگر تے جیے جنتے
 نال اوہناں نال آن رن آلا آہا۔ ایہہ گل اوہ سبھے بھرا ممورے فتیانے توں دو ترے واری
 سُن چکے ہائَن۔

.....

اوہ دبھ تے سرکڑا پُٹ پُٹ چھ گئے ہائَن جدوں اک گھر، گڈ اُتے اپنا مال
 اسباب لدی او تھوں لنگھیا۔ ممورے، ولّا را تے نہال سنگھ ہوراں نال حقہ چھکدے ہوئے گھر
 دے وڈیرے دسیا..... ”جو وگھ تے بہوں ماری بیٹھے او۔ پر جتھے آن بیٹھے او اتھے کھوہاں دا
 پانی ڈھیر ڈونگھیر اے۔ سانوں کسے دس گھتی ہے جو دکھن ول نوں تھوڑا دور جاویے تے
 اگے ذرخیز بیلا تے ڈھاہاں ہین جتھے دوروں دوروں سرکاری اسلحے نال مچھیاں تے
 مرغابیاں دا شکار کیتا جاندا اے۔ بھاویں ڈھاہے اُتے دور دور تیک دریائی پانی کوئی نہیں۔
 ستارھاں اٹھارھاں کوہاں تیک فصلاں برکھا دے پانی نال اُگائیاں جاندیاں نیں پر او تھے
 جاوَن والے بھکھے نہیں مر جاندا۔ میں وی اپنا جیا جتنا لے کے او تھے ای چلیاں تاں جو

اسیں اتھے بھکھے ای نہ مر جاپیے۔ بھکھ تان مُڑ وی سہاری جاسکدی اے پر پانی توں ترہائے.....“ اتھے آ کے اوس گل انج مُکا دتی جو سُنن والے ترہہ دا احساس آپے ای کر لین۔

..... بندا اُنج تان دانا پینا لگدا ہا پر اوہدیاں گلاں توں اوہناں نوں ڈھیر مایوسی ہوئی..... خاص طور تے تریوے بھراواں نوں جیہناں نوں جھبڈے ای احساس ہوون لگ پیا آہا جو مور افتیانہ اوہناں نوں جوٹی دا حصے دار نہیں سگوں اپنے دو جیاں کیاں وانگ کمی کمین ای سمجھ کے کم لیندا اے۔ ایس گل دا احساس نہال سنگھ نوں وی ہوون لگ پیا آہا۔ اوس اک دو واری مورے فٹیانے نوں ایس گلوں ورجیا وی پر اوہدے اُپر اُلٹا ای اثر ہويا۔ مور افتیانہ جاندا آہا جو نہال سنگھ نرا اوہدے سچاپے ہتھوں مجبور ہو کے اوہدے نال آن رلیا آہا۔ اُنج نہال سنگھ دی اپنی وی سرکار دربار وچ چنگی بھلی سنی جاندی آہی تے اوہدی وجہ سردار نہال سنگھ کول گھوڑیاں دی نسل دا اوہ روڈا آہا جیہڑا رنجیت سنگھ دے زمانے توں سرکاری فوج تے دربار وچ عام مشہور ہائن۔ خورے ایسے گلوں مور افتیانہ اوہدا لحاظ ملاحظا کردا آہا۔ اوہنوں اک آس ایہہ وی آہی جو سردار نہال سنگھ کوئی اک ادھ گھوڑی، وچھیری اوہنوں وی دے دیوے گا۔

”بھوکیں اباد ہو لین دے سردار نہال سنگھ..... ادھو ادھ ساڈے ناویں تے وجے گی۔ ناویں کوں چاڑھنی اے، میں انگریز افسر نال پہلاں ای گل کر چکیا واں۔ ایہہ تریوے بھرا چنگے مخنتی ہین۔ بھوکیں تے جنوراں دی پرکھ رکھدے نیں۔ لیہناں دی سانوں ڈھیر لوڑ اے۔ حالے لیہناں اُتے ایہہ بھیت کھولن دی کوئی لوڑ کائی نہیں۔ ویلا آ لین دے۔ ایہہ ساڈے کمی کمین بن اُتے مجبور ہو جاسن.....“ اخیر اک دیہاڑے مورے فٹیانے، سردار نہال سنگھ اُتے اپنے اندر دی ساری کھول چھڈی۔

سردار نہال سنگھ کجھ نہیں بولیا۔ اوہ چُپ چپتا رہیا۔ جدوں مورے فٹیانے جاتا جو

کدھرے نہال سنگھ ساری گل تتوں بھراواں نوں ای نہ کر دیوے تاں اک دیہاڑے اوس گہنے خاں نوں اعتماد وچ لے کے آکھیا:

”سردار نہال سنگھ مینوں ایس گل اُتے مجبور کر رہیا آہا جو ساری بھوکیں اسیں دوہاں دے ناں لگوا چھڈیے۔ اوہ ورھے دو ورھیاں مگروں انگریزی فوج نوں اسواری کان گھوڑیاں سوغات وچ دیندا اے۔ ایس وجھوں اوہدی بڑی مانتا اے۔ ہُن تسیں آپ سوچ لوو تہا نوں کیہ کرنا چاہیدا اے۔“

ساری خرابی ایٹھوں ای، ایس ای گل توں شروع ہوئی۔ داندیاں دیاں پنجالیاں تڑن لگ پیاں۔ چنگے بھلے ہل واہندے بلد سیہاڑاں وچوں نکل کے ایدھر اودھر مونہہ کر کے ٹرن لگ پئے۔ ٹوئے ٹبیاں نوں اکساہر کردے کراہے اپنے پھلاں سننے اپڑ بھوکیں وچ پھس جاندے۔ بھوکیں اُتے کم کرن والے منکھ قولنج، ڈاہ تے سول دیاں پیڑاں نال ڈھڈ پھڑ کے بہہ گئے۔ دور دور وید حکیم نہ لبھدے۔ سُنڈھ تے جوائن نال علاج ہوندا..... بندیاں تے پشتواں دوہاں دا۔ بھوکیں وچوں نکلیں والے سپ سلونگ، زہر بھرے کیڑے تے اٹھونہے اوہناں دے رہن سہن تے سوون والیاں تھاہراں اُتے گر بل گر بل کردے وتدے۔ بارشاں تے ڈیکاں وچوں نالیاں کڈھ کے بھاٹڈے بھر بھر لیاں دے پانیاں وچ کوڑ پھر گئی۔

مُڑ اک دیہاڑ اک ہور انہونی ہو گئی۔ جیہدے بارے ایس اباد ہور ہی وستی دے وسنیکاں کدی سوچیا وی نہیں ہئی۔ اک انگریز لارڈ ایس اباد ہوندى وستی دا معائنہ کرن آیا۔ اوس کچھری لائی جیہدے وچ ایٹھوں دے وسنیک اوہدی ہر گل اُتے جھک جھک کے سلاہنا کردے۔ انج کرن لئی اوہناں نوں ممورے خٹیا نے تاکید کیتی آہی..... پر ایہہ کجھ کردیاں ولا را دا پتر تے عیسے خاں دا پتر اندروں سڑج رہے ہاں۔ بھاویں نیوندیاں دی کھی کھی سُن کے انگریز لاٹ اوہناں نوں بڑا نجھا کے ویکھدار رہیا۔

مورے فتیانے ست گھوڑیاں تے اپنے کامیاں وچوں چُن کے کجھ جوان
 اوہنوں پیش کیے۔ گھوڑیاں نوں انگریزی مہر لا کے کچھ دتا گیا۔ جواناں نوں نمبر الاٹ
 کردتے گئے جیہدے مگروں ایہ سارے ہُن انگریز سرکار دے رنگروٹ بھرتی ہوون والے
 جنے ہاُن تے جیہناں برطانیہ سرکار دی کار خدمت کرنی آہی۔ کسے وی شکل وچ۔

ولارا دے پتر نور محمد تے عیسے خاں دے پتر ولی محمد دوہاں اپنے بیو، چاچے،
 تائے تے سردار نہال سنگھ ساہنے قسم کھادی..... ”اوہ مورے فتیانے ولوں انگریز نوں دتی
 بخشیش طور تے ناواں لکھواون توں پہلاں موت قبول لیسن“ اوہناں ترکھیاں کیتیاں
 ہونیاں چھوئیاں تے لکویاں دی چھاں پٹھ اک نویں سفر دا ارادہ کیتا۔

دو وڈیاں گڈاں وساہرے خاں دی ملی ہوئی بھوئیں ول نوں جا رہیاں ہاُن۔
 اک گڈاں پر اُمتاں سبھرائی انج گچ مچ ہوئی پئی آہی جیویں ہڈیاں دا کوئی پنجر ہووے۔ اُچے
 نیویں بار دے پینڈے نوں سردار نہال سنگھ دی زنانی ستوننت کور انج سانہ سنبھال کے
 ٹوردی جا رہی آہی جیویں اک دانا زنانی نوں سانہنا سنبھالنا چاہیدا اے۔



8

ڈونگھی نیندر وچ موت

پینڈا نہڑنا تاں کیہ آہا، حالے اوہدی شروعات ای آہی جو ستوننت کور، اٹماں
 سمھرائی دے جُٹے نوں ٹولدی ہوئی بولی۔ اوہدی اواز وچ وہم تے گھابر آہی جیہدی وجہوں
 اوہدی اواز کنب رہی آہی۔ اوس اٹماں سمھرائی دے پُتر اں نوں ہوکا دتا:

”بھرا گہنے خاں! بھراو لا را!! ویکھوتاں اٹماں دی حالت چنگی نہیں لگدی۔“

اٹماں سمھرائی دے نیڑے گہنے خاں آیا۔ دو جے دوہیں پُتر گڈ اُتے سوار ہائُن۔
 گہنے خاں بھج کے اوہدے سرے آن پُجیا۔ گہنے خاں ای آہا جو ہمیش اپنی ماں دے نال
 رہیا تے ماں اوہدے نال۔ اوہ اوہدے وجود، اوہدی ہستی توں اوویں ای جانو آہا جو یں
 آپوں اٹماں سمھرائی۔ اوس اٹماں اُتے بھر جوانی وی ویکھی تے اوہدے اُتے ہولے ہولے
 پر چھائیں کردا بڈھپیا وی۔ پر جو حالت اوہدی ہُن آہی، اوہ اوس کدے ناہیں ویکھی۔ نہ
 ای اوہ ویکھ سکدا آہا۔ اٹماں سمھرائی دیاں اکھاں ڈور بھوریاں جیہیاں ہائُن۔ اوہ اکھاں
 جھپک نہیں رہی آہی..... اوس اپنا ہتھ گہنے خاں دے مکھڑے اُتے پھیرنا شروع کیتا، گہنے
 خاں دے اندر اک ہول جیہا گھم گیا۔ اٹماں سمھرائی دی موت دا ہول..... اوہنوں لگا

جیویں لتاں سہرائی نوں کجھ نظر نہیں آ رہیا تے اوہ انھیاں وانگ اوہدے مُکھ اُتے ہتھ پھیری جا رہی اے۔ اوہ بولن لگی تاں اوہدی اواز کنب جیہی گئی۔

”پُتر گہنے خاں! مینوں نہیں لگدا جو تسیں میری موت توں پہلے میرے پہلے کھسم نوں مینوں ملا سکو۔ پر مینوں وساہرے خاں تیک ضرور اپڑا دینا۔ جیویں وی ہو سکے اپنے پیو وساہرے خاں دی قبر دیاں لتاں ولے اپڑا دیونا۔ میرا ساہ سکون نال نکل جاسی۔“

ستونت کور جیہدی گہنے خاں دے آون وجھوں اوہدی پواندی ول ہو گئی آہی، لتاں سہرائی دی گل سُن کے انج جیویں اوہنوں بُج و جی ہووے۔

”ایہہ کیہ پئی آہندی ایں لتاں سہرائی۔ اپنے پہلے کھسم نوں ملاون دی..... تے اوہ وی اپنے وڈو ڈیرے پُتر نوں۔ ایہہ کیویں ہو سکدا اے؟“

اوہ وی بار دے ایس علاقے دی رہن والی آہی۔ بھاویں اوہنوں ایتھے آئی نوں ڈھیر سمانا ہی ہو یا پر اوہدا وی علاقہ تاں اکوای آہا تے اوہ ایتھوں دے ریتی رواج توں چنگی طرحاں جانو آہی۔ اوہ جاندی آہی جو کوئی جانگی زنانی اپنے کھسم توں دکھ کسے ہور بندے نال کیویں رل کے رہ سکدی آہی۔ ایہہ اُکا انہونی گل آہی۔ اوہ اپنی وستی دی اک سردار زنانی نوں جاندی آہی جو کسے ہور منکھ نال رل گئی پر اوس ادھی حیاتی توں ودھ اپنے کھسم تے ہور لگدے لیدیاں نوں پتا ناہیں لگن دتا۔ مکر تے فریب ای کردی رہی۔ پر جدوں اوہدے کھسم نوں ایس گل دا پتا لگا تاں اوہدے وجود اُتے اک زردی جیہی کھنڈر گئی تے اوہدا سارا وجود ایس زردی نال پیلا پیلا جیہا ہو گیا..... بیماری اوہنوں انج نستیاں کر چھڈیا جو ہُن ہر ویلے اوہناں وچکار دنگا فساد رہن لگ پیا۔ گل ایتھوں تیک اپڑ گئی جو اوہدا وس نہ چلدا جو اوہنوں مار دینا یاں آپ مر جاندا۔ اوہنوں تاں ایس وجھوں ناہیں مار سکدا جو اوہدی زنانی دے شینہاں ورگے چار جوان بھرا ہُن تے اوہ کلم کلا.....“ پر ایہہ میں کیہ مرن والی دے ساہنے عجیب قیاسے پے گئی آں.....

اینے نوں عیسے خاں تے ولّا راوی اپڑ آئے۔ اوہناں جدوں ماں دی ایہہ حالت دیکھی تاں اوہناں دے ہتھوں پیروں نکل گئی۔ اوہ دوویں اک دوجے دا مونہہ دیکھن، اودوں تر لے لین۔ اینے نوں نوابیے نوں چنگی سمجھی۔ اوس گڈ اُتے ہور سمیان دے نال نال اک گجا کھٹی لسی داوی رکھ لیا آہا۔ اوس اوہ گجا پھڑیا تے اک چھوٹی لیا کے لسی اتماں سھرائی دے پیراں دیاں تلیاں اُتے ملنا شروع کردتی تے نال ای ہولی ہولی چھوٹی نال اوہدے پیراں دیاں تلیاں نوں جھسن لگ پئی۔ اینے چر نوں اتماں سھرائی دی ساری آل اولاد اک تھاہری اکٹھی ہو گئی۔ گڈاں نوں سردار نہال سنگھ تے عیسے خاں دا پتر ٹوری جا رہے ہاں۔

نوابیے دا اتماں سھرائی نوں تلیاں تے لسی ملن دا سون اک ہکاین ثابت ہویا۔ اوہدے اندر انج جیویں ٹھنڈ پے گئی ہووے۔ اوہ ڈونگھی نیندر سوں گئی۔ پر ایس ڈونگھی نیندر سُنیاں ای اوہدے ساہ اُکھرن لگ پئے۔

ایدھروں اوہ وساہرے خاں دی قبر نیڑے اپڑے.....

اودھروں اتماں سھرائی پران چھڈ دتے.....



9

ٹوبھیاں وچوں اُچھلدا پانی

ہُن، میرو مرانی دے ڈھول دی ڈھمکار ہر پاسے سنیدی آہی۔ بھاویں ”چھوٹیاں آلے پتن“ نیڑے گہنے خاں دی ملی ہوئی تھاہرے ایہہ ڈھمکار اُکا پکھیرو اُڈارن دے ای کم آوندی۔ ایس ڈھک تے جیہنوں خلقت ذخیرہ آکھدی ہائی تے جیہدے آسے پاسے کنڈیا لیاں جھاڑیاں دا سنگھناں جنگل آہا، جتھوں بعضے ویلے گھڑ اسواراں نوں لنگھناں وی اوکھا ہو جاندا۔

اوہ ہبھو کائی استھے آن وی تے ذخیرے سنے آل دوالے دی بھوئیں بناون وچ جٹ گئی۔

سردار نہال سنگھ دی وی میرو مرانی نال واہوا سرت رل گئی آہی۔ ہر روز ادھے لوکی بھوئیں واہ بنا کے پھس جاندا تے دوئے ادھے میرو مرانی نوں ڈھول سنے چوترے تے بہا لیندے۔ اوہ راء نال گان گاونداتے نسل نزوئے گبھرو جھمر ماردے۔ چانگیاں راتاں ادھیاں توں ودھ ایس گاؤں وچ ای لنگھ جاندیاں۔

سردار نہال سنگھ، میرو مرانی تے ویسے خاں دے پتر نوں منڈی ڈھاہاں گھلیا۔

اوہ اوہدے لگدیاں توں دو تازی گھوڑیاں لے آئے۔ جیہناں بارے میر و مرانی دا آکھناں آہا، جو گھوڑیاں ٹور کیتھڑ دیاں نیں، حد کر دیاں نیں، ٹردیاں ایہناں دیاں سُنباں انج لاٹاں چھڈ دیاں نیں جیویں آہرن اُتے ودان وجدے ہوون۔

اوتھوں ای ڈھکیاں دیاں دوئیں جوگاں وی آن رلیاں۔ سردار نہال سنگھ دے ہوندیاں اوہ جاندے ہاں جو اوہناں نوں ایہہ وکھت کڈھ دیاں تے جفر جال دیاں راہنے نیں تے ایہہ وی جو ایہہ کم ڈھیر لمیرا تے اوکھیرا ہے۔ ایس پاروں مکن وچ جھبڈے آوناں کوئی نہیں۔ ایس توں اوہ تڑکے ساراں جاگو مٹی حالت وچ اُٹھدے، ہولی ہولی آسمان دے تارے خورے کپھڑیاں گھندراں وچ جا لک رہے ہوندے جدوں اوہ اپنیاں اپنیاں جوگاں دیاں پنجالیاں وچ اریاں گھت لیندے۔ کہیاں کہاڑیاں چلدیاں رہندیاں..... دُور بوڑھاں تے پپلاں دیاں رُکھاں تے پکھیر و انج جیویں گاؤں چھوہی رکھدے۔ ایویں کیویں بنیاں چھپراں ساہنے زانیاں اُٹھ کے چکیاں وچ دانے پیہن لگ پوندیاں، کجھ مدھانیاں وچ ریڑکے پالیندیاں۔

حیاتی انج ای اپنے دُھرے تے چڑھی گڑدی جا رہی آہی۔ واہی وانی کرن والیاں دے مناں وچ نہال سنگھ دا جگایا اُدم ہر روز ای نویں سورج آنگ جاگدا۔

روز نویں سیہاڑ نکلدے، پاڑے میلے جاندے۔ کم مُکدیاں نال بڑی مونجھ نال جوگاں نوں گھر لیاں ال ہک دتا جاندا۔ جتھے اوہناں دے کھان آسٹے ساوا سکا پیا ہوندا۔ ذخیرے وچ رُکھ گھنیرے ہاں۔ حیاتی پریم دی گھوکر وچ مست اگے جا رہی آہی۔ سستی سٹائی، مٹھی چال چلدی۔

گہنے خاں، ولا راتے وپسے خاں رُکھاں دی اوس جھنگی نیڑے اپنے راہن آسٹے ٹھور ٹھکانا بنایا جدھر اوہناں دے پیو و ساہرے خاں تے ماں سہرائی دیاں قبریں ہاں۔ اوہ اوتھے جمعرات دی جمعرات دعا منکن جاندے تے دیوے بالدے۔

نیڑے ای ”بوڑیاں دیاں جھکیاں“ وچ اک بندے نکی جیہی ہٹ بنائی ہوئی
 آہی۔ جیہدے وچ عام ورتوں دی نک سک بھری رہندی، ایہہ وی اپنیاں لوڑ دیاں
 وستاں ایستھوں ای لیندے۔ بار، ہر ایلے شاد اباد ہوندی۔ وڈے رُکھاں دیاں مڈھاں وچ
 توتیاں مگھورے بنائے ہاں۔ جھنکیاں وچ تتر، مور تلور بولدے۔ چکی راواں تے کمھیاں
 دیاں واجاں گونجر دیاں۔

ٹاہلیاں، ٹوتاں، لکراں، بیراں تے جنڈاں دے رُکھ ٹہکدے، بہتیرے رُکھ تے
 جھاڑیاں اوہ وڈھی واہی جاندے۔ بھوئیں اکساہری ہون نال ای ابادی وی ودھن لگ
 پئی۔ ہر کسب جانن آ لے لوکی اتھے جڑن لگ پئے۔

ڈھیر دناں توں سینوندا آہا جو نیڑیوں ای نہر نکلیں آلی ہے۔ جیہڑی دیوتاں
 آ لے موڑ توں سدھی تیرایدھری آوسی۔ گہنے خاں تے نہال سنگھ دی سوچ ایہہ آہی جو
 بھاویں نہر نکل وی آوے اوہناں دی سستی وچ اک کھوہ لازم ہے۔ آہم لاہم وچ جتھے
 ابادی ہو رہی آہی، کھوہاں دے کھٹن دیاں عام گلاں ہوندیاں۔

مُڑ اک دیہاڑ کھوہ کھٹن آ لے اوہناں دی لاہے وی آن نکلے۔ میرو مرانی
 اپنیاں بانہاں تے تیل ملناں شروع کردتا۔ ڈھول دیاں نتیاں کس لیاں تے گھائیں ڈھول
 دیاں نتیاں وچوں کڈھ لیاں۔ ہر وگدی گھائیں تے گھبرو جٹیاں دا لہوتا تے تیز ہوندا۔
 اوہناں دے پیر دھر کدے تے ہوٹھاں اُپر جُھمراں دے بول تھر کدے۔

کھوہ دی تھاہر وساہرے خاں تے لتاں سھرائی دیاں قبریں دی سرہاندی ال سو
 گز چھڈ کے، گھن چھاویں بوڑھ تے ٹاہلی دے رُکھاں وچ کار ملی گئی۔

کھوہ لاون لئی کاریگر تے ٹوبھے سستی وچ آن اپڑے ہاں۔ سونگھا پہلے توں
 موجود آہا جیہدا آ کھنا ایہہ آہا ست ست مربعیاں دی وتھ تے جتھے مرضی کھوہ کھٹ لوو۔
 پانی مٹھا، ستھرا تے اُچا ہوسی۔ ایہہ ایس تھاہر دی چنگیائی ہے۔

وساہرے خاں دے پُتراں نوں اپنے پیو دیاں دانائی بھریاں گلاں یاد آ کنیاں۔
 گہنے خاں دیاں تاں اکھاں گلیاں ہو گئیاں ہائُن۔
 ”وساہرے خاں آ کھیا آہا، میں جتھے جا کے مریا، اوتھے آبادی کر لیناں۔
 اوتھے تہانوں ڈھیر جفر نہ جانے پوسن۔ تہانوں پانی اُچیرا لہ پوسی۔“
 اج ایہہ گل حقیقت ہوئی پئی آہی۔

کھوہ آسٹے متھی ہوئی تھاہر اُتے دہ فٹاں دا گول دائرہ واہ دتا گیا۔ کاریگر پُرانی
 ٹاہلی دے ٹوٹے لیاندے۔ جیہناں دے پاسے گول ہائُن۔ اوہناں دے باہر و باہر نکلے دند
 اک دو جے وچ پھسدا تے گئے۔ ایہناں دا گھیر وی فٹاں دے حسابیں آہا۔ اوس ایہناں
 ٹوٹیاں نوں واسے گئے گول دائرے وچ فٹ کر دتا۔ ہُن چک تیار آہا مُڑ کے اوس ایہدا
 لیول تے گولائی ویکھی چاکھی تے انج نشان آلی تھاہر تے گول شکل وچ کھدائی شروع ہو
 گئی۔

کاریگر، گھدائی کرن آلیاں دے سراں تے کھلوتا آہا۔ وار وار آکھدا: ”اللہ
 دے بندو! خیال رکھیا جے، مٹی کسے پاسیوں ڈھہہ نہ جاوے۔“
 کھدائی پانی دی پدھر تیک اپڑ گئی۔

کھوہ کھٹنا بند کر دتا گیا چک نوں تھلے لاہون دی تیاری شروع ہو گئی۔
 گہنے خاں، نہال سنگھ، ویسے خاں، ولّا راتے ویسے خاں دا گھبراٹا چھوہر چک
 دے دوالے کھلو گئے۔ کجھناں چک لاہے بدھیاں رسیاں نوں پھڑیا تے کجھناں اوہنوں
 اُتّا نہہ چھک لیا۔ مُڑ کے اک نعرہ وجاتے اک ای ہلے نال چک نوں کھسکاونا شروع کر دتا
 گیا۔ اوہناں چک نوں پٹے ہوئے گول دائرے تے رکھیا تے اک بھاری چادر گھت
 چھڈی، مُڑ کے اک اک کر کے رستے ڈھلے چھڈ دتے۔ چک تھلے لہنا شروع ہويا۔ تاں
 اوہدے وچوں انج وچوں انج نکلی جیویں کسے بلد نوں کوہ رہے ہوون۔ ارڑاٹ جیہی ارگی واج۔

لکڑ دا ایہہ بے جان چک وی دنیا توں اوہلے ہون لگیاں جیویں وین الاندا ہووے۔ چک جدوں تھلویں پدھر تے اپڑ گیا تاں کاریگر لہہ کے اوہدیاں پدھراں منیاں، جاجیاں تے مڑ اوس اُتانہہ دسیا جو چک ٹھیک لتھا ہے۔ گہنے خاں، میر و مراٹی نوں سینت ماری، اوس ڈھول تے گھائیں دتی۔

سارے اکساہرے ہو گئے۔

گھائیں نال گھائیں۔ اک اک ہتھ کن تے دھر کے سُر نال سُر، تے پیر نال پیر لن لگ پئے۔ پیر اکساہرے پدیاں ساریاں ہُشکر ماری۔

جھومریں، جھم ٹرے ہائیں۔

وستی وچ مٹھے پانی دا کھوہ کھینچ گیا آہا۔

مڑ کے ہبھا کائی کھوہ نیڑے آن کھلوتی۔

دعا منگی گئی تے گڑ وٹیا گیا۔

کھوہ دی چٹائی شروع ہوئی۔ اُکا پندرھاں ویہہ ردے اٹاں دے لائے گئے۔

نال ای نال کندھ دی گولائی تے پدھروی ویکھدے گئے۔ تاں جو ساری کندھ دی اُساری پدھری رہوے۔ کجھ اُچے ردے لا کے چٹائی روک چھڈیوئیں۔ ہُن ٹوبھے نوں سدّیا گیا۔

ٹوبھا وی انتاں دا کاریگر آہا۔ اوہ چک دے تھلیوں تے کھوہ دے وچکاروں

ہولی ہولی مٹی بھرے گارے نوں بالٹیاں نال باہر کڈھن لگ پیا۔ جیویں جیویں ٹوبھا مٹی

گھر چدا، چک پیٹھاں لہندا جاندا۔ جدوں پانی اوہدی دُھنی توں اُتانہہ اپڑ آیا تاں اوہ مٹی

پٹن آسٹے ٹپی مارن لگا۔ انج لگدا جو اوہ کھوہ پٹھلی دُنیا دا بہوں وڈا جانو ہے اوہ پانی وچ دُبا

رہندا..... جدوں کھوہ دیاں مُدیاں تے کھلوتے ایہہ سمجھدے جو اوہ کھوہ وچ بناں کندھیاں

دی گھار وچ بُد گیا ہے اوہ مٹی دی ٹوکری لئی پانی توں باہر آ جاندا۔ ایستھوں تیک جو پانی اٹھ

اٹھ فٹ اُتانہہ آ گیا تے تھلیوں پیڈی بھوئیں نکل آئی..... اوہ اپنے ننگے جُستے، کسے ہوئے

لنگوٹے تے گار کڈھن آلی ٹوکری سنے باہر آ گیا۔

نکلدے سار اوہنوں دیسی گھیو وچ نچڑدا حلوا کھوایا گیا۔ اخیر اُتلی اُساری داٹھ
 بجھ گیا۔ لکڑ دی گادھی مٹی دیاں ٹنڈاں، بیڑ تے رسیاں دی مالا، گیر، گُتا، بیڑ نال لایا گیا۔
 دو جے ای دیہاڑ گادھی اگے گہنے خاں دے بلد جوئے گئے۔ جیہناں دیاں
 اکھاں تے کھوپے چڑھے ہاں۔ گادھی اُتے بیٹھا نہال سنگھ ڈھکیاں نوں ہک رہیا آہا۔ گُتا،
 ہک دندے توں دو جے دندے تے وجن لگ پیا۔

پانی دا پہلا لوٹا باہر آن نسا روچ ڈگا، مڑ دو جا، مڑ ترجیا، میر و مراٹی، ڈھول تے
 گھائیں ماری، ڈھم، ڈھم، ڈھما ڈھم۔

شاماں تیک بلد، بدل بدل کے کھوہ واہیا گیا۔ پانی اوہناں دے آپنے تے
 جنوراں دے واسطے بنائے ٹوبھیاں توں اُچھل اُچھل واہناں تے ان واہیاں، واہیاں وچ
 ترکھے ناگ آنگ لہراؤندا تر و گیا۔

اک ورھے پچھوں، خلقت تکیا، او تھے توریا، کنک، جو، جوار، باجرہ تے آوندے
 سے کپاہ تے کماند نسن لگ پئے۔

پہلوں وستی دے کجھ گھر بنے، مڑ کے اک پوری بھینی بن گئی، مڑ دوجی بھینی، مڑ
 تربجی۔ چودھرواد اُتلے پاسے تے کیاں دی بھینی پٹھلے پاسے۔

وستی دے لہندیوں لنگھدی نہر کنڈھے مُصلیاں دا ویڑھا اُسریا۔..... ابادی گھٹ
 آہی پر جی آہی، اپنے اپنے کسب تے ہنر وچ ماہر تے کاریگر۔

..... نہال سنگھ، کلراٹھی تے رتی سُوہی بھوئیں وچ جانگی لکر لوانے شروع کر
 دتے۔ تاں جو ویلے نال اوہ وی واہن گاہن جوگی ہو جاوے۔

.....

علاقہ جھنگ توں اک سُنیا را اپنے کاریگر پُتر تے سوئے ورگی زانی نال وستی

آن وسیا آہا۔ زنانیاں تے نڈھیاں دے کئیں بُندے تے والیاں چمکن لگ پیاں تے
 پیراں وچ پزیاں وی چھکن لگ پیاں۔ جمن، مرن، وسنت، بہار تے وساکھی جیسے تہواراں
 تے گڑیاں چڑیاں بن سنورن لگ پیاں۔ سنیا را اپناں ہنر وکھاون لئی وکھ وکھ طرحاں دے
 گہنے گھرن لگ پیا تے چُجدے سردے گھراں آ لے گھڑا ون لگ پئے۔ پہلوں نہال سنگھ
 ستونت واسطے چھاپاں، چھلے، مندیریاں، جھمکے، ڈنڈیاں، گلے دے ہار تے گلو بند
 گھڑوائے۔ مُرد کے گہنے خاں مریاں تے نوابیے لئی میخلا، سینہ بند، پُوڑے، ہنسل، پزیاں،
 جھانجھراں، گوکھڑو، بازو بند، نتھان، کوکے تے پنجاگلے بنوائے۔ ایس سنیا رے دے کر کے
 نیڑے تیڑے دیاں ابادیاں توں وی لوکی کم کراون لئی آوندے۔

وِتی اک سار تانال اک لیہہ اُتے حیاتی نوں دھرکی ٹری لئی جاندی آہی تے
 وِتی دے وسنیک وی نال نال ٹرے جاندے ہائُن۔ انج جیویں چاننیاں وچ پرچھائیاں
 پینڈا کر دیاں ہوون۔

رات دیاں پرچھائیاں لہندے ال نوں لپھدیاں جاندیاں ہائُن۔ انج جیویں کوئی
 ترپڑ کھا دھی کندھ نیوندی جاوے۔

ویڑھے وچ ڈٹھیاں منجیاں اُتے مریاں مودھی پئی، اپنے ہتھ نال دوجی بانہہ دا
 چوڑا چھنکاؤندی جا رہی آہی..... گہنے خاں، ڈونگھیاں سوچاں وچ ڈُبیا آہا۔ اوہدیاں
 سوچاں انج دیاں ای ہائُن جیویں دل دی بھوکیں اُتے پٹھ اُتے دُھپ پین نال ترپڑاں پے
 جاندیاں ہن۔ اوہ سوچدا پیا آہا۔ اوہناں دناں بارے جدوں اوہ اتھھے نویں آئے ہائُن۔
 اوہناں نوں مینہاں وچ وسن آلا پانی ٹوبھیاں وچ ڈک کے پیناں پوند آہا۔ اوہ پانی جو
 تلاواں وچ کھلوتا کھلوتا مُس جاند، جیہدے وچ جنور نہاوندے تے اوہنوں پیوندے وی۔
 جیکر دُھپاں ہوندیاں تے برکھانہ ورھدی۔ فصلاں سُکن سرن لگ پوندیاں، تاں کھیلیاں
 بنا کے ایہو پانی اوہ فصلاں تیک وی اپڑاوندے۔ جیکر بارشاں واہواول ہو جاندیاں تے اوہ

اگیتری، کچھیتری ہر طرحاں دی فصل بیجدے۔ کس طرحاں اوہناں بھونیں وچوں بھکھڑا،
لہا، ٹمے، اک، کریاں، پھوگ گھٹائے تے تھاؤں تھائیں جنگلی کمر گڈے۔

سیہاں، سپاں، گوہاں، ٹھونہیاں، کرلیاں تے ہورس زہریلے کیڑیاں دے
مونہاں اُتے پیر دھر کے اوہناں بھونیں بنائی۔

گہنے خاں نوں انج جیویں ماں سبھرائی دی واج کنیں پئی۔

”پُتر، او تھے ذخیرے وچ جا کے اباد ہو جاوے۔ او تھے، جتھے اسمان نیلا دسدا
ہے..... ہو سکدا ہے حیاتی او تھے اپنی پوری شکل صورت وچ ہووے تے سبھ توں ودھ میں
او تھے اوس رُکھ دیاں کرونبلاں پھٹدیاں ویکھدی آں۔ جیہدے اُپر جیون دی آس اُمید
حیاتی وچ رنگ بھر دیندی اے، تے دُکھاں، غماں تے صدمیاں نوں جرن جوگ بنا دیندی
ہے.....“

مُرد کے اک ہور آواز آوندی، ایہہ آواز وی سگوائیں اوہدی ماں دی ہوندی۔
”آخو، پُتر تیرے آسٹے اجیہی زویں لازم ہے جو زرخیز ہووے۔ توں تے
عمروں پہلے ای بڈھا ہو رہیا ایں تے تیرے گھر اولاد دی آس وی دور دور تیک نہیں۔“
مُرد انج جیویں اوہ گوڈیاں اُتے ہتھ دھر کے اٹھدی ہے تے اٹھن ایلے اوہدیاں
ہڈیاں کڑکن دی واج آوندی ہے۔

.....

گہنے خاں نوں لگدا ہے جیویں اوہ اپنے حواس وچ ای نہ ہووے۔ انج جیویں
ایہہ سارا کچھ ادھ سٹے ادھ جاگدے وچ ہو یا واپریا ہووے۔ اک اجیہے سفنے آنگ جو
حقیقت دے تانے بانے نال جُڑیا ہووے..... جدوں کہ حقیقت تاں ایہہ آہی جو اوہنوں
شامیں بھٹھی توں دانے بھنوا کے مُردی ستوننت کور نے کیتی آہی۔

”مبارکھ ہووی بھرا گہنے خاں، سنیا ہے بھین مریاں دا، پیر بھارا ہو گیا ہے.....“
 شام کچے دُده نال سُرک کے تندور دی روٹی کھاندیاں گہنے خاں نوں پتا لگا آہا
 جواج کل وچ ای نہال سنگھ دے گھریں وی اولاد ہوون والی ہے۔“
 وستی دی اکواک دائی مائی زیناں بھانے بھانے دوہاں گھراں وچ پھیرے
 پاوندی دسدی۔



10

چنے بد تے اصیل گھوڑیاں

ویلے دے نال نال مریاں دے سبھا وچ اک سہتا آ گئی۔ اوہ ہُن گھر نوں
 سنہرن، سنبھالن وچ نواپئے دا پورا ہتھ وڈاندی۔ ایہدا اک کارن جتھے لتاں سہرائی دی
 موت آہی۔ او تھے اوہدا آپناں اُمید نال ہوونا وی آہا۔ اوس بھاویں لتاں سہرائی نوں
 کدے اپنے نیڑے ناہس جاتا۔ مڑوی اوہ اوہدے اندر دا سارا حال احوال جان جاندی۔
 کدی کدی لتاں سہرائی پیار نال اوہنوں اپنی جھولی وچ لٹا کے اوہدے والاں وچ اُنکلاں
 پھیردی۔ پوری پوری رات جاگن آلی تے پوری پوری رات جاگ کے جنگل بار دے
 پکھوواں نال راز سانجھے کرن آلی مریاں، لتاں سہرائی دی جھولی وچ ای گوڑھی نیندر
 سوں جاندی..... رات ایلے روٹی ٹک کر کے نواپئے تے گہنے خاں حالے پشوآں نوں
 واڑے وچ ڈھو کے منجیاں تے آن بیٹھے ای ہائن۔ جدوں اوہناں نوں اک الانی منجی تے
 اکواسے پئی مریاں دے گون دی واج آئی۔ اوہ الاناں گوں رہی آہی۔

”جنگل سٹے، پہاڑ سٹے، سٹے سبھ دریا

کا کا میرا بے وی جاگے، فی نیندرے ویہلیے آ

چلھے دے وچ اگ وی سستی، ستے چن تے تارے
 سستی ہوئی تو دے دے اُتے، نیندر سینتاں مارے

گہنے خاں تے نواپئے اک دوئے الوں ہس کے ویکھیا۔ نواپئے دے مکھ تے
 حیا دی سُرخ کھلر گئی۔ انج جیویں بال مریاں نوں نہیں، نواپئے نوں ہون آلا ہووے۔
 گہنے خاں ہولی ہولی مریاں دی منجی ال ودھیا، مریاں کسے دے آون داحسوس
 کر کے اپناں مکھ پرتایا۔ اوہدا مکھ انج جیویں تے سورج دی لالی آنگ تپدا ہووے۔ اوہ
 منجی توں اٹھسی کے بہہ گئی تے گہنے خاں نوں پٹھن دی تھاہر دتوس۔ گہنے خاں اوہدے
 ساہنے بہہ جاندا ہے۔ اوہدیاں اکھاں وچ ویکھدا ہويا آ کھدا ہے:

”مریاں اج ڈھیر سوئی وی لگ رہی ایں تے تھوڑی تھوڑی جھلی وی میں
 آ کھناں تیرے جھل پئے وچ ای تیرا حُسن لکيا ہے۔“

تے اوہدی ایہہ گل سُن کے اوہ ہڈوں وی جھکدی، شرماءندی نہیں، سگوں ایہہ
 آ کھدی ہوئی: اوہ تے میں ہاں۔ ہسن لگ پوندی ہے۔ گہنے خاں اوہدی پوری گل سمجھ نہیں
 سکدا جو کیہ اوس ایہہ آ کھیا ہے جو اوہ سوئی ہے یاں جھلی یاں پھیر اپنے جھل پئے وچ لگے
 حسن دامن کے ہسی ہے..... اوہدا ہاسا انج رُکيا جیویں چرتیک ویرٹھے وچ سکدے رستے
 اُتے وانال کپڑا ڈولدا رہیا ہووے۔

”اج کل مینوں جاگدیاں ہوياں وی آل دوالے پر چھاویں ٹردے پھر دے
 نظریں آوندے نیں۔“ اوس روندے ہوئے لہجے وچ دسیا۔

نواپئے تے گہنے خاں دوہاں ای گھاہر کے اوہدے ال ویکھیا۔ اوہ اوہناں نوں
 آپ وی اک پر چھائیں ای لگی۔

وستی دے موسم کجھ انج دے ای ہاں۔ کدی کدی تے پانی باجھ بروٹیاں،
 بروٹوے تے فصلاں سبھے سک جاندياں تے کدی کدی پانیاں دے ویہن ای لگ

پوندے جیویں جھلاراں وگ رہیاں ہون تے ایہدے مگروں جھبڈے ای ہر پاسے
 ہریالی، رُکھاں تے لگراں تے جنگلی جئی دے نال نال اوہناں دیاں گڈیاں فصلاں کھڑ
 پوندیاں تے عام طور تے ایہہ ساون مانہہ ای ہوندا۔ جھڑیاں ہر پاسیوں گرمی جھاڑ
 سُندیاں۔ چھپڑاں ٹوبھیاں تے ندی نالیاں وچ ہڑھ جیہا آ جاندا۔ ہر پاسے دھائیں چری،
 مکئی تے سبزیاں نوں لالی چڑھی دسدی تے ایس ای موسم وچ کھیراں رجھدیاں، پوڑے
 پکدے، گڑیاں رکھاں دیاں ٹاہناں تے سردے کھبراں نال وٹیاں پینگھاں جھونڈیاں۔ ہر
 پاسے گدھے تے ککلی مچدی تے اسماناں تے کھلریاں کالیاں گھٹاں پٹھ گھرو وی پڑ پا
 لیندے۔ ہولے ہولے ایہہ وستی، اک ابادی وچ بدل رہی آہی تے ایس تبدیلی دا احساس
 وی ساون دے سوہلے گاوندے ای ہوندا۔

ساون مانہہ ناؤں سی ایس وستی وچ حیاتی اُپر آئی جوانی دا۔ سردار نہال سنگھ نے
 ولارا نال صلاح مشورہ کر کے اک نکی جیہی کھوہی لکراں دی جھنگلی پٹھ کھٹائی۔ جتھے وستی
 دے لوکی نہاوندے، زنانیاں کپڑے دھوندیاں۔ ہتھی گیڑ کے پانی دے بوکے بھر بھرنسار
 وچ پائے جاندے۔ ایہہ پانی چونچے وچ تے اگوں نالیاں وچ نکل جاندا۔ لوکی لوڑ
 موجب پانی ورتدے۔ اتھے صفائی ستھرائی دا دوجا سمیان وی دھریا ہوندا جیویں صبون،
 دانتاں تے مسواکاں۔

ایہہ حیاتی اوہناں دے خیالاں توں ودھ کے لگدی جیہڑی جنت دے ٹکڑے
 اُتے لنگھدی جا پدی۔

ستوارے وچ اک دو دیہاڑاں دیاں فجراں اتھے لوڈھیاں تے ٹیاراں نوں
 نہاوندیاں، دھوندیاں تے مساک ملیندیاں وی تکیاں۔ ساون اپنے پورے جوہن تے ہوندا۔
 ویسے تے ولارا دے پُتر چون لوڈھے ہو گئے ہاُن تے وستی دے ہورس
 گھبراٹیاں نال واہی نیجی وچ ہتھ پلا مروان لگ پئے ہاُن..... چوری یاری تے ٹھگی ماری

وچ وڑیاں اوہناں نوں ڈھیر ویلا تاں نہیں ہويا آہا پر ہُن تیک اک چیناں بلد دو اصل
نقریاں گھوڑیاں، دو کھوتیاں تے کجھ مجھاں وتی دیاں وکھ وکھ باہکاں دیاں گلیاں تے ہنہ
چکے ہاُن۔ جنور ول لیاونا ایڈا وڈا کسب تے مسئلہ ناہس، جناں ایہہ تھوہ لاوناں جو کتھوں
کس ایلے تے کہو جیسے جنور چھڈے جاسکدے نیں۔ ایس مسئلے نوں وتی دی لہندی
نکڑے آن و سہ پکھی واساں دے قبیلے سوکھالا کردتا آہا۔ اوہناں دیاں سوانیاں، رنگ
برنگیاں جھلیاں سیندیاں۔ سُکے میویاں تے رُکھاں دے چھلڑاں نال شراب کڈھدیاں۔
آپوں وی پیندیاں، تے اپنے مرداں نوں وی پیاندیاں۔ اوہناں دے مرد کدھاڑیاں تے
جھولے لٹکائی ہتھیں بیناں پھڑی، پچھیاں وچ سپ لے..... مُندریاں دے نگ تے ہور
قسم قسم دے چھلے لئی راہیاں نوں ٹھگدے۔ اوہناں دے تھان ٹھکانیاں دا پتا کردے۔ مال
مولشی بارے پچھدے تے مگروں ویسے خاں تے ولا را دے پتر نور محمد نوں نال رلا کے
موقعے تے جا پڑدے۔

انج ای ٹر رہی آہی حیاتی۔

ویسے خاں تے ولا را دے پتر پرہیں وچ اپنی کسے نویں کیتی چوری بارے
سناوندے ہوئے ہسدے ہسدے مودھے ہوندے۔ کئی واریں تاں اسیں لگن جا رہے
ہوندے آں تاں اُجاڑ راہاں وچ سانوں کسے ہور تھاہرے لگن لئی جاوندے ہوئے اوہ
لوک ملدے، جیہناں دے گھر اسیں جا کے چوری کرنی ہوندی۔

چوری، جیون دا اک لازم حصہ آہا، جیہدے توں وساہرے خاں دے پتر ہُن
تیک ولاوندے آئے ہاُن۔ جیہنوں اوہدے پوتریاں اک ربی امر جان کے مل لیا آہا۔
چوری ہور کماں آنگ اک کم آہا۔ ایہنوں معیوب نہیں سمجھیا جاندا آہا۔ بار، اجیہی تھاؤں ہائی
جتھے ہر کوئی دو جے دی زنانی، مجھ، گاں، تے کھان پین آلیاں شیواں تے اپنا حق جتاوندے۔
لٹ مار کردا، قتل کردا تے اگانہ ہوندا۔ پلس بے وس ویہندی رہ جاندی۔ ایہہ لوک گنڈاں

وچ جا لگدے تے کدی کدار بھل چک کے پلس آوی جاندی تاں او تھوں دیاں زنانیاں
 اٹاں، ڈانگاں، سوٹیاں تے کہاڑیاں نال اوہناں دے پاسے لاه دیندیاں۔ ایس معاملے
 وچ پکھی واساں دیاں زنانیاں انتاں دیاں جی دار ہائن تے وستی دیاں زنانیاں وچ وی
 جرأت دی جوت ایہناں ای پکھی واسناں وجھوں جاگی..... ایہہ آپوں وی تاں مُڈھ وچ
 پکھی واسناں ای رہیاں ہائن۔

اک واریں ایہناں دے کماں تے گلاں بارے سُن کے نواپئے تے ستوننت کور
 اوہناں دیاں پکھیاں تے جا اپڑیاں تے ہورس گلاں نال ایہہ سُن کے کناں نوں ہتھ
 لاوندیاں تے تووا تووا کردیاں ای مُڑیاں۔ جدوں اوہناں شراب کڈھن تے پیون بارے
 دسدیاں آکھیا، ”ماپے تاں سانوں اک واریں دنیا تے لیاوندے نیں، شراب تے گوشت
 سانوں روزنویاں کر کے جگ وچ راہن جوگا کردے نیں۔“

.....

پچھلے کنیں ای دناں توں وقفیاں نال ساؤن وس رہیا آہا تے ساؤن دیاں
 پانیاں ہر جی دے اندر مردی تانگھ جیویں نو بر نو کردتی آہی۔ پانی نال ڈھاہاں تے چھڑنکو
 نک ہوئے ہائن۔ ہر پاسے مجھاں نہاوندیاں تے مجھاں دے پوچھلاں نوں پھڑی مُنڈے
 گھنڈے ترناں سکھدے۔ کجھ مخولے گھڑیاں تے ڈھڈ رکھ کے تردے تے بولدے ہوئے
 ڈڈواں دیاں نقلان لاہندے۔ کھٹے رنگ دے ایہہ ڈڈو مینہ نال ایدھر اودھر چھڑاں وچ،
 ٹوبیاں وچ سڑکاں تے فصلاں وچ عام راہاں تے کھلے ہوندے۔ زور نال بولدے۔
 جیہدے نال اوہناں دے ساہاں دیاں نالیاں تے رگاں بھکانیاں آنگ کھلر جاندیاں۔
 ایہہ ڈڈو خورے مینہ وچ پانی دے نال ای زویں تے ڈگدے۔ جیٹھ ہاڑھ وچ جدوں
 دھپاں پین نال پانی سُک جاندے۔ تاں ایہہ ڈڈو وی پتا نہیں کتھے گواچ جاندے۔ پانی گھٹ
 جاندے تے چھڑ دیاں کنڈھیاں تے پانی دی پدھر تے ساوی کائی جم جاندی۔ مجھاں، جس

نوں مونہہ نال ہٹا کے تے نتار کے پانی پندیاں۔

اودوں تیک جدوں حالے وستی وچ کھوہ نہیں لگا آہا تے پانی دا چنگا وسیلہ لیہناں
چھپڑاں دے پانیاں توں وکھ کوئی ناہس، پانی دے لیہناں چھپڑاں تے مچھر دے جتھے
گونج دے تے راتاں نوں سُتے لوکاں نوں وڈھ وڈھ ہپھا مار دے۔ انج کوئی ملیرے نال
تے کوئی مچھراں دے نک تے کن وچ وڑ جاون نال اکیا ستیا وندا..... پر وستی وچ لگے
کھوہ نے حیاتی بدل چھڈی آہی۔ جیہدے وچ وستی دے لوک نہال ہوئے پھر دے۔

ورھے بھروچ کجھ رُتاں ملن تے وصال دیاں بن کے آوندیاں تے آون والے
ہر نویں سے ہر گھر کسے نہ کسے گود، کسے نہ کسے جھولی وچ کوئی اسمانی فرشتا کلکاریاں بھردا آوندا
تے اوس گھر وچ رونقاں ہوو وددہ جاندیاں۔ اوویں ای جیویں گہنے خاں دے گھر ورھیاں
مگروں جمن آ لے پُتر تے سردار نہال سنگھ دے گھر جمن آلی دھی نال وددہ گئیاں ہائں۔
چاننی رات آہی۔

ساون دا بدل شرلاٹے بھردا ہویا انج جیویں ساہ لیندا ہووے۔ ہولی ہولی
رُکھاں، لگراں، راہاں، گھراں تے پانیاں اُتے کدے کدار کوئی اک ادھ بوند ترپ کر کے
ڈگدی تاں چھپڑ وچ سوتی قمیصاں تے شلوراں سنے نہاوندیاں ہونیاں زنانیاں دے دل
دھک دھک کر دے۔ ”کتے کوئی آیا..... ہُنے کوئی آیا۔“ ایسے نوں ویسے خاں دا پُتر وںجھلی
تے کوئی سُر کڈھ دیندا یاں میرومراٹی دے ڈھول و جاون یاں گون دی واج آوندی تے
اوہ جھب ای اک ٹُھی مار، کے باہر نکل آوندیاں۔

میرومراٹی انج جیویں پچھلا سارا کجھ بھُل کے ایستھوں دا ای ہو کے رہ گیا آہا۔
پچھے اوہ دے کوئی جیا جتنا آہیا یا کوئی ناہیا، کوئی کجھ نہیں جاند آہا۔ کدے کدے اوہ گہنے
خاں نوں راز بھرے انداز وچ ایہہ ضرور آکھدا، ”کوئی میرے ہان دی، غریبی، نمائی
جیہی چھوہر لہجہ کے مڑھ دے۔ ہُن ایستھوں دا سردار تاں توں ای ایں۔ تیری گل تے کوئی

وی نہیں موڑدا؟“

ایہناں ای دناں وچ اتھے جوپواں دا اک گھر آن ویا۔ تے ایس گھر دی گڑی مستو جوپن جیہڑی ہر ایلے نلیاں دے کھیڑے راہندی۔ اک دینہہ نلی وندی وندی دی دھاگے توں نظر ہٹی تاں ساہنے میرو مراٹی نوں کھلوتیاں ویکھیوس۔ انج جیویں جادوگری جیہی ہوگئی ہووے۔ انج جیویں چن، چن دے ساہنے آ گیا ہووے۔ گل اگے ٹر پئی تے میرو مراٹی دی ڈھول و جاون آلی چھمک انج جیویں اوہدی انگل بن گئی ہووے۔ اوہدے وجود ا حصہ۔ لہو تے ناڑاں نال رچی مچی..... ایہی چھمک ہُن نلیاں وندی مستو، واسطے اک سنیہا بن گئی۔

وستی دے لوک ساون دے ایہی مست دیہاڑے مان رہے ہاُن، جدوں او تھے پیرو تے پرلی دو ٹھگ بھراواں دی گل ہُلی۔ اوہ بار تے نال لگدے علاقے وچ ٹھگیاں کرن آ لے اک ٹولے دا حصہ ہاُن۔ انگریز راج وچ تھاہر، تھاہر تے بنگلے تے تھانے بن جیہوں پیرو تے پرلی داکم کچھ گھٹ گیا تاں ٹولے دے ہورس بندے نال رل کے ایہناں بھراواں تروڑ دے دناں وچ اک انگریز افسرنوں ای لٹ کے رومال نال ماردتا..... اخیر پھرتج گئے۔ وطنوں توں دور اوہناں نوں سر سے دی جیل وچ ڈھک دتا گیا۔ کیہیاں نوں کالے پانیاں دی سزا بول گئی تے انگریز افسر بندوق تان کے اک دیہاڑ جیل دے اندر ای پیرو کولوں پرلی نوں رُمال گل وچ گھتا کے اُنج ای گھوٹو نال مروا دتا، جیویں اوس انگریز لاٹ نوں ماریا آہا۔ اوہناں نوں وی پھاہی دا حکم دے دتا گیا، ایس تو پہلاں کہ اوہناں نوں پھاہے لا دتا جاندا اوہ کچھ ہور نابراں نال جیل دی کندھ تھلیوں مورا کر کے نکل گیا۔

اوہ وستی وچ بنائی گئی کچی مٹی دی مسیت وچ ای رہ رہیا آہا۔ روٹی ٹک اوہنوں گہنے خاں تے نہال سنگھ دے گھروں جا رہیا آہا..... رات شرینہہ دے رُکھ بیٹھ جی چوپال وچ نکے وڈے ہُن اوہدی اڈیک وچ ای بیٹھے ہوندے، تاں جو اوہدے توں ٹھگی، قید تے

جیل تروڑ کے نکلن دیاں گلاں سُنن۔

نماز پڑھن وچ اوہ رُجھا آہا۔

پُرے دی چلدی واء وچ اک دم اک جنے دی واج اُبھری۔ ”سپ“ ہبھا کائی نے اپنے پیر بھوئیں توں چا کے منجیاں اُتے دھر لئے۔ اوہناں دیاں واجاں تے اکھاں سپ بھالن وچ لکیاں ہاں۔ پر سپ کدائیں ہوندا تاں دسدا۔ ایسے نوں مستو جوپن دا پیونھو جوپو، بولیا، ”اللہ دے بندو! اوہ سپ تھوڑا آہا۔ اوہ تاں جن آہا۔ جس اپنا جھلکارا دتا تے غائب ہو گیا۔ ہُن تسیں ویکھناں جھبہ دے ای وستی دا کوئی گھرویاں ٹیار اوہدی پکڑ وچ آیا کہ آیا۔“

ولا را دا گھبراٹا پُتر نور محمد، بھاویں دور دراڑے تیک لُگدا آہا۔ پر اوہنوں اک گل دا احساس ہمیش راہندا۔ جیویں کوئی پر چھائیں ہر ایلے اوہدے نال نال راہندی ہے۔ اُنج تاں اوس کئی ای واری سپ وی ویکھے جو اوہدے ساہمیوں اک جھلک دے کے غائب ہو جاندے۔ اوہنوں نھو جو پودی گل سچ ای لگی۔ ”ایویں لوکی جو پواں بارے کہانیاں بناوندے نیں تے اوہناں نوں کم عقلے سمجھدے نیں۔“ اوس سوچیا۔

ایسے نوں پیرو چوپال وچ وڑ آیا۔ اُچا لماں، داڑھی تے مینڈھیاں آلا ادھکڑ بندہ جیہدیاں اکھاں وچ لال ڈورے تردے۔ حال احوال کرن مگروں جدوں اوہنوں چوپال وچ سپ دے آون دا پتا لگا تاں اوس ایہہ آکھ کے گل ای مُکا دتی۔ ”جو ساڈے ارگے جی داراں نوں اجیہے بے ضرر کیڑیاں توں ڈرن دی لوڑ نہیں سگوں ہن تاں سانوں حاکماں دے زہر بھرے ڈنگاں توں بچناں پوسی۔ پورے مُلکھ وچ انگریز سرکار ورودھ نابری دی واء پئی وگدی ہے۔ اج کل دی گل ہے جو تہاڈی بار تے انگریزاں دی کروپی وسن آلی ہے۔ اوس ویلے نوں ساہمنے رکھو تے ہتھل نہ رہو۔“

نور محمد، جاتا جو لگدا ہے آپ پیرو دے اندر انگریز ورودھ زہر بھریا ہویا ہے۔ جدوں ایہہ بولدا ہے تاں ایہندی واج ڈولدی ہے کمزوری وجہوں۔ ایہہ کمزوری اوہدے

اندر انگریز جیلر دے حکم تے اپنے بھرانوں رومال نال گھوٹو دین وجہوں آئی آہی۔
 نر محمد سوچدا آہا جو، ”اوہنوں پیرو نال تعلق دی گنڈھ پیڈھی گھتتی پوسی۔ جیکر بار
 اندر چار دینہہ عزت نال جیوناں ہے۔“

وٹی دی چوپال ہن ہر روز آباد ہوون لگ پئی آہی۔ پیرو دے وٹی دے وچ
 آون مگروں۔ اک اگلی ای فجرے دوئیں گھڑ اسوار جیہناں دیاں گھوڑیاں دے کن لمے،
 گھر پتلے تے پوچھلاں کالیاں ہان۔ چوپال وچ آن تھے۔ ایہہ ونگارے ہان احمد خاں
 کھرل الوں، جیہڑا بار دی لوکائی دی عزت آبرو دا تھم بنیا آہا۔ اوہناں وٹی آلیاں نوں
 آکھیا، ”تاں جو ساڈے اُتے انگریز دے قہر دا بدل نہ کڑکے، ساڈے چوباریاں دے چھتے
 ٹہکدے رہن۔ جتھے اسیں گوڑھیاں نیندراں پئے مانیے تے ساڈے ال کوئی دھاڑوی
 مونہہ نہ کرے۔ ایہہ سدا ہے ساری خلقت نوں، کوئی اتھے آوے تاں ساڈیاں بلماں،
 چھوہیاں تے کرپاناں اوہناں دے آر پار ہو جاون۔ ساڈیاں بانہاں، ساڈیاں لوتھیاں دیاں
 راکھیاں کرن۔“ ایہہ گلاں ہان گھڑ اسواراں دیاں جو اوہ چوپال وچ کر کے کجھ کھادے
 پیتے ہناں ای اگانہہ ٹر گئے۔

گہنے خاں، ولا را، ویسے خاں، نور محمد، نہال سنگھ تے ہورس سبھناں ایہناں
 اسواراں دی گل تے لبیک آکھیا تے اوہ ہتھیار جوڑ جمع کرن لگ پئے۔

پیرو، نور محمد دی گل تے ای نہیں پیا ادا آہا۔ اوہ اُبھے دی کرے تاں اوہ لمے
 دی۔ اوہ اوہدے توں حیاتی دا پچھے تاں اوہ اوہنوں موت مگروں دیاں کہانیاں سناوے.....
 نور محمد جان چکيا آہا جو ٹھگی وچ ڈھیر روپیے اکٹھے ہو سکدے نیں۔ تسیں علاقے وچ وڈی
 طاقت تے ناں بنا سکدے او، مڑ لیہدے وچ اپنے پلیوں کجھ نہیں لاوناں پوندا۔ ایہو
 کارن آہا جو اوہ پیرو توں ٹھگی دے سارے داء پیچ جانناں چاہوندا آہا۔ داء پیچ جانن توں
 وی ودھ اوہ اوہدی شاگردی وچ آوناں چاہوندا آہا۔ پر نور محمد، جاتا جو پیرو ایڈا سدھا سادہ

بندہ نہیں سگوں ول فریب نال اُنی ہوئی رسی آنگ ہے۔ مُڑ کے جدوں پیرونوں یقین ہو گیا جو نُور محمد اوہدے نال کوئی چرتر نہیں کردا پیا اوہ سدھا سدھا تھگی سکھنا چاہوندا ہے تاں اوس اوہنوں اپنے نکے بھرا پرلی توں سُنی ہوئی اک گل سنائی۔ پرلی جو عمروں تاں پیرونوں نکا آہیا پر فنکار وڈا آہا۔ ایس گل سناون دا مڈھلا مقصد ایہہ آہا جو ایس پیشے وچ آون مگروں ڈھڈوں کوئی پریشانی نہ رہوے جدوں نُور محمد ٹھگی دے راہ تے ٹرے تاں۔

اوس اوہنوں دسیا، ”اساں ٹھگاں دا وی اپنا مذہب تے اپنا دین ایمان ہوندا ہے۔ ایس بھاویں کسے مذہب نال تعلق رکھدے ہوویے جدوں آپت وچ رل جاویے تاں ایس دیوی بھوانی دے سائے تھلے آ جاندا آں، مُڑ کے اوہی ساڈی راکھی کردی ہے تے اوہی سانوں اپنے کم وچ نویں نویں چج دس دی ہے۔“

”پر، ٹھگاں تے ٹھگی نال کسے دیوی دا تعلق کیہ؟“

”بہوں ڈونگھا تعلق ہے، تے جیکر توں سُنتاں چاہوندا ایں تاں سُن، پیرو منجی اُتے دواہرنوں سواہریاں کردیاں تے نُور محمد نوں اپنے ساہمنے پٹھن دا اشارہ کردیاں بولیا:

”پرانیاں زمانیاں دی گل ہے اک بھوت دا قبضہ پوری دنیا تے ہو گیا ہُن جو انسان وی جمدا، اوہ اوہنوں ہڑپ جاندا۔ جیہدی وجہوں دنیا دی ابادی گھٹن لگ پئی۔ اخیر کالی دیوی دنیا نوں بچاون لئی ساہمنے آ گئی۔ اوس بھوت تے حملہ کر کے ایہدے ٹکڑے کر دتے پر ہويا ایہہ جو ایہدے خون دے ہر قطرے وچوں اک اک بھوت ہو رہا۔ دیوی ایہناں نوں ماردی رہی پر ایہناں دے خون راہیں بھوتاں دی کیئتری ودھدی گئی۔ ایہتھوں تیک جو پوری دنیا وچ ایہی نظریں آوندے، دیوی نے سوچیا جو ایہناں نوں قتل کرن دا کوئی اجیہا طریقہ لہناں چاہیدا ہے جیہدے راہیں ایہناں دا خون نہ وگے۔ انج اوس ایہہ کم دو منکھاں دے ذمے لایا۔ ایہناں دوہاں نوں اوس رومال دتے جو ایہناں بھوتاں نوں گل گھٹ کے ماردین تاں جو اوہناں دا لہو نہ وگے۔ اوہدے حکم موجب اوہناں ایہناں نوں

گل گھٹ کے مار دتا۔ کم مکن مگروں دوہاں اپنے رومال دیوی نوں موڑناں چاہے پر دیوی نے رومال نہ لے تے اوہناں نوں آکھیا، ”تسیں ایہہ رومال میرے ولوں انعام دے طور تے اپنے کول رکھو سگوں ایہناں نوں ورت کے ٹھگی دا کم سنبھالو۔ لیہدے نال تہا نوں تے تہاڈیاں آوندیاں نسلاں نوں فائدہ ہووے گا.....“ دیوی نے اوہناں نوں ویہل دتی جو اوہ انساناں نوں وی انج مار سکدے نیں جیویں اوہناں بھوتاں نوں قتل کیتا۔“

”ایہد امطلب ہے جو تسیں ٹھگی وی کرو، بندے وی مارو تے مڑ وی بخشے بخشائے۔“ ٹور محمد لئی ایہہ گل بہوں حیران کر دین والی آہی۔

”توں ہُن تیک کنے لوکاں نال ٹھگی کیتی تے کنے لوکاں نوں گل گھوٹو دے کے مار دتا۔“ ٹور محمد پیرو توں پچھیا۔

پیرو اپنا رومال ڈب وچوں کڈھ دیاں ہویاں اوہدیاں اکھاں ساہمنے لہراوندے ہوئے اوہنوں دسیا۔

”سیکڑیاں دی گینتری وچ تے ہون گے۔“

”سیکڑیاں؟“

”آخو..... تے جو ساڈے گروہ دیاں بندیاں لاہے لاہے مارے اوہ تاں

ہزارں ہون گے۔“

”ایس رومال نال؟“

”آخو، بندے دا دھیان اگے ہوندا ہے تے ساڈا پھرتی بھریا ہتھ رومال سنے

اوہدے گلے تے..... اک جھٹکاتے بس سبھ مُکت۔“

اوہ دوویں چُپ سن جیویں پیرو ہُنے ہُنے اوہدے ساہمنے کسے دا گل گھٹ چھڈیا

ہووے۔



11

وستی دی واڑ

ڈھیر ورھے ناہن ہوئے۔ اوہ دکھ دکھ رنگاں تے ذلیقیاں دیاں پیلواں نوں
اپنی زبان نال چکھدے۔ ڈھیر ورھے پُرانی گل نہیں آہی۔ اوہ کنک دے سٹیاں، کنک
دیاں دانیاں توں جانو نہیں ہائے۔ اوہ جوں، دھائیں، جوار، کما، سرہیوں، کپاہ تے چھولیاں
نوں اُگان دیاں صرف گلاں ای کردے ہوندے۔ مٹر کے توریا، باجرا، جوار تے مکئی نوں
پکھیر وواں تے سیہاں توں بچاون لئی اوہناں نوں گلیاں تے کھھانیاں بنانیاں پیاں۔
اوہ کنگنی، مسر، جوی، شتاہلے، سن کلڑے نوں مٹر کے بیج لئی اوہدا بی خاص طریقے نال
صاف کر کے رکھدے تاں جوا گلے ورھے اوہنوں اُگا سکے۔

منڈی وستی توں ڈھیر دور آہی۔ پرمُل لین آ لے ڈھیر دور نہیں ہائے۔ اوہ گڈاں
لے کے ہر ایلے ڈھکے راہندے..... اوہ آپ ای لاوے، آپ ای واڈھے، آپ ای عیالی
تے آپ ای واہی وان ہائے..... نکے وڈے پیشیاں آ لے لوکی اوہناں دی وستی دی
زرخیزی ویکھ کے دور، نیڑے توں آؤندے تے او تھے وس جاندے۔

اوہناں اک سانجھی حویلی اُساری۔ جیہدے اندر چوپال لگدی تے ستھاں

بہندیاں.....

اوہناں جھاڑ بوٹ پٹی تے اوتھے جانگی ککر لائے تاں جو کجھ ورہیاں مگروں
 ایتھے فصل گڈن تاں بھوئیں وچوں کلر کیری کھاج جاوے۔ اوہناں پال و پال رُکھ لائے
 تے ایہناں پالیاں پٹھ جنوراں دی واسیوں کیتو نیں۔ ایہناں رُکھاں دیاں پالاں پٹھ ای
 منھے تے چھیریاں اُساریاں۔ ایتھے ای بے فکری بھریاں اوہناں دیاں سویراں، دوپہراں
 تے شاماں لنگھ دیاں۔ ایتھے ای مائیاں گھر دا نکا وڈا کم مُکا۔ ہر شے گنج سانجھ کے چرنے
 ڈاہندیاں۔ ایتھے ای مٹیاراں کسیدے کڈھ دیاں، ترنجن آباد ہوندا تے ان ویکھیاں
 صورتاں تے ان ملے میلیاں واسطے منوں بنائے ہجر وچھوڑے دے گاؤں گاؤں جاندے۔
 وستی آلیاں، وستی نوں پچلاں، شریںہاں، ٹاہلیاں، ککراں تے نماں نال ای نہیں
 بھردتا آہا سگوں ہُن ایتھے بیراں، برنیاں، لسوڑھیاں، کھجیاں، شہتوتاں، پھلایاں، وناں،
 جنڈاں تے کریراں توں وکھ امباں، اناراں، انگوراں، جامنواں، نبواں، آڑوواں تے
 امروداں دے رُکھ دسدے..... کجھ نویاں وں آلیاں اپنے گھراں دے ویرھیاں وچ
 مہندیاں، وانساں، نریاں، کاہیاں، لانے تے سرکڑیاں نوں گڈ چھڈیا۔ اوہ ورتے جان
 آلے پانی دیاں نالیاں دا مہاڑ اوہناں ول کر دیندے۔ اوہ آپ ای اسر دے نسر دے
 راہندے۔ کیویں تے کس طرحاں، ایس گل دا کوئی گھٹ ای خیال رکھدا..... اک حکیم جیہڑا
 پکی ماڑی توں اُٹھ کے ایتھے آن و سیا، اوس وکھ وکھ جڑیاں بوٹیاں دے نال نال، کانے،
 اک، موتیا، چمبیلی، موگرے تے گلاب دے پھل اُگا کے اپنے دواخانے نوں سنگھنی واڑ
 نال ول لیا آہا۔ اوہدی جوان دھی جونویں آون وجہوں سنگدی، شرماوندی ترنجنیں تاں نہیں
 جاوندی آہی، آنے بھانے اوس واڑ اوہلے کھلو کے ویکھ رہی ہوندی۔ جتھوں ٹور محمد، کدی
 اکلیاں تے کدی پیروٹھگ نال لنگھدا ہوندا۔

بھاویں بار اباد تھی گئی آہی تے بھاویں ہُن بار دا وسیبا جنگل آلا کائی نہیں رہ گیا

آہا۔ فصلاں تے نویاں نویاں رُکھاں منکھی حیاتی وچ ہریالی دی مہک کھلار دتی آہی۔ مُو وی بار وچ پھر دیاں مریاں، تاریاں، رُکھاں، پکھیر وواں، جنوراں تے گستان دیاں روحاں نال گلاں کردی راہندی۔ اُتوں گستان وچ روحاں ہین ای کنیاں سن۔ اک وساہرے خاں، اک لٹاں سھرائی تے اک وتی دے کھاراں دی جوان گوی۔ جو ہر ایلے چاک تے بیٹھی بھانڈے بناوندی راہندی۔ مُو اک دیہاڑ آوی تاندی نوں زہری ناگ لڑیا تے اوہ جیویں آہندن اوہنوں ”پانی وی نہ منگن دتیس۔“ ایہہ گستان ایہناں تریوے میتاں دا آہا۔ گہنے خاں، ولا را، عیسے خاں تے اوہناں دا جیا جتنا اتھے آوندے، دعا درود پڑھدے، تلاوت کردے، تاں جو اوہناں دے ماپے بخشے جاون۔ پر گمھار، کڑی دے گھروں کوئی گھٹ ای آوندا۔ ایہہ اوہدے واسطے وی فاتحہ کر جاندا۔..... گستان وچ ہور کوئی آوندا یا نہ آوندا، مریاں ضرور آوندی، تے انج جیویں کوئی پر چھائیں قبریں نیڑیوں اُٹھ کے اوہدے نال ٹر پوندی۔ ایہہ پر چھائی اوہدے نال کوئی گل کردی نہ ای سانجھ سُر ت رلاوندی۔ چُپ چُپ راہندی۔ حالاں وتی دے پشو، بار دے جنور، سپ، نیولے، گالھر، کاں، چڑیاں، لالڑیاں، گھکیاں، کبوتر تے سُنج چڑیاں دیاں ڈاراں اوہدے نال گلاں سانجھیاں کردے راہندے پر ایہہ پر چھائیں۔ کیہو جیہی ہے ایہہ پر چھائیں، کجھ بولدی ہے نہ کچھدی ہے؟“ مریاں سوچدی۔

اخیر اک سویر ایس پر چھائیں اوہدے اُتے اپنا آپ کھول ای دتا۔ ایہہ پر چھائیں، راول جوگی دی آہی۔ اک فقیر، اک درویش، راول جوگی، جو کوئی وہم، سایہ یاں پر چھائیں نہیں آہی۔ اوہ تاں حقی سچی دا اک منکھ آہا۔ آکھدا: ”میں وساہرے خاں دا ہانی، اوہدا جگری یار آہا۔ جدوں اوہدے نال اوہدا کوئی پُتر، پوتر نہیں ہوندا آہا۔ میں ہوندا۔ اوہدے جیندیاں وی، اوہدے مرن مگروں وی۔

راول جوگی۔ عجیب من موہنی صورت آلا ایہہ منکھ، وکھرا ای پہراوا کیتی رکھدا ہر

ایلے، سرخ و سفید رنگت، وڈے قد بُت تے سوہنے نین نقش والا راول جوگی، کدے تے بھر جوان لگدا، کدی پکی عمر دا تے کدی بزرگ..... شروع شروع وچ جدوں مریاں وستی اپڑ کے اوہدے بارے گہنے خاں نوں دسیا، تاں اوس لیہنوں مریاں دا وہم ای جانیاء، مُڑ، اک روز اوہ آپوں وستی آن وڑیا۔ شاماں پے رہیاں ہاں۔ اوہ سدھا حویلی اپڑیا۔ پرہیا وچ بیٹھا رہیا۔ حقہ پانی کیتوس تے جاندے جاندے وستی آلیاں نوں اوہناں اُپر بیتن آلی ان ہونی بارے دسیوس۔ آپدا کھونڈا پھڑیوس تے اوٹھوں نکل گیا۔

راول جوگی دی کہانی کجھ دن وستی وچ ہلکی رہی۔ پر مُڑ کے اوہناں اوہدی کہانی نوں کہانی ای جاتا تے اپنے اپنے کماں وچ جُپ گئے۔

.....

گرم رُتاں دا سورج حالے رُکھاں دیاں ٹیسیاں تے نہیں اپڑیا آہا۔ جدوں مریاں گستان اپڑ کے راول جوگی اگے جا بیٹھی۔ اوہ اک گنجھل وچ پھسی آہی تے اوہنوں پورا یقین آہا جو راول جوگی اوہنوں ایس گنجھل وچوں کڈھے گا۔ جدوں اوہ نٹھ کے راول جوگی ساہنے بہہ گئی تاں راول جوگی اوہدے الوں انج تکیا جیویں اوہدے توں چچھدا ہووے جو ”دس کیہ گل ہے؟“

”تسیں فقیر جوگی او، دلاں دے بھیت وی جاندے او، اک گل مینوں اندرو اندریں کھادی جاندی ہے کوئی اوہدا اُپا وی ہے تہاڈے کول؟“ مریاں پچھیا۔

”گل دا اُپا تاں گل وچ ای ہوندا ہے مریاں، لیہدے لئی وڈی حکمت تے دانائی دی لوڑ کافی نہیں ہوندی۔ تُوں دس اجیہی کیہڑی گل ہے جیہڑی تینوں سیونک آنگ کھائی جاندی ہے۔“

”گہنے نال میرے ویاہ نوں ورھے بیت گئے نیں، انج ای جیویں نواپئے نوں..... نہ تے نواپئے نوں بال ہو یا نہ اک ورھا پہلوں تیک مینوں کافی آس آہی۔ اک

چاننی رات، میں بار، دی اک جھنگی وچ سو گئی۔ سُتی سُتی سفناں ویکھیا جواک الھر، بھر
 جوان گبھرو اک گھوڑی توں لہندا ہے، میرے ول آوندا ہے۔ میں اوہنوں پہلے کدی وی
 نہیں ویکھیا ہوندا پر انج لگدا ہے جیویں اوہ ورھیاں توں میرا جانو ہووے تے میں اوہدی
 ای اڈیک وچ ہوواں..... کلراٹھی بھوئیں جیہدے اُتے میں سُتی ہوندی آں اوہ اک
 شنگھاری ہوئی بیج بن ویندی ہے۔ اسیں ملدے آں..... سُفنے مگروں جیہدے ای وستی دی
 دائی مینوں دس دی ہے۔ میرا پیر بھارا ہو گیا ہے۔“ ہُن تسیں دسو جو سفناں جیہڑا مینوں کدی
 حقیقت تے کدی سفناں لگدا ہے اصل وچ سفناں ہے یاں حقیقت.....؟“ ایہہ گل کر کے
 مریاں چُپ ہو جاندی ہے تے راول جوگی دے مونہہ الوں تگن لگ پوندی ہے جیہڑا ایس
 سُفنے تے حقیقت آلی گل بارے ڈھیر چرتیک نہیں سوچدا سگوں جیویں ای مریاں چُپ کردی
 ہے اوہ پانی مکاوند ا ہویا مٹی دا پیالا بھوئیں اُتے تے اپنا سجا ہتھ مریاں دے سر تے
 رکھیاں آکھدا ہے۔“

”ایہہ حقیقت نہیں سُفناں ای ہے، مریاں توں اپنے من وچوں وہم دے ایس
 نسر دے بُٹے نوں پٹ دے تے سُن میرے نال وی انج ای ہتی آہی۔ ساڈا جدی پُشتی
 کم ہے سوداگری، پیو دادے لا دا، میری شادی نوں وی کنے ای ورھے لنگھ گئے ہاُن
 ساڈے گھر بال کوئی نہ ہویا میں دیس دیس گھمدا پھر دا ساں۔ ہر رنگ، ہر روپ، دے
 لوکاں نال ملدا۔ اک سیانے نوں ہتھ وکھایا تاں اوس دسیا جو میرے لیکھاں وچ اولاد ہے
 ای کاٹی نہ۔ جیہدے ای لمے سفر اں توں مُڈیا تاں پتہ لگا جو میری گھر دی اُمید نال ہے۔
 میرے تاں انج جیویں تن بدن وچ اک لگ گئی ہووے..... ایس توں پہلے جو میں اوہنوں
 وڈھ ٹک چھڈ دا، کجھ سے اپنے آپ توں ای سوچن لئی منگ لیا۔ تاجر آہا، رنگ رنگ دی
 دنیا ویکھی بیٹھا آہا۔ ایس لئی ہر کم، ہر گل توں پہلاں سوچدا آہا۔ اپنے آپ توں منگے سے
 وچ سوچن مگروں اوہدے پیونوں بلایا تے کوئی پردہ پائے بنا اوہنوں ساری حال حقیقت کر

دتی۔ اوہدے واسطے وی بڑی نموشی والی گل آہی۔ اوہ اپنی دھی نوں لے کے اپنے بوہے تے جا بیٹھا۔ ہر جلیوں، بہانیوں اوس اوہدے توں کچھ لیا۔ اوس آکھیا میں بے قصور آں تے میرے تے رب دا کپڑ پوے جیکر میں ہتھ تے کیہ لاوناں، اکھ نال کسے نوں ویکھن دی بے ایمانی وی کہیتی ہووے۔ لیہدے مگروں اوہ مُڑ کے میرے گھر آ گئی، پر میں اندروں صاف کوئی ناہس۔ میں اوہنوں مُڑ کے امتحان وچ گھٹن دا سوچیا۔ میں آکھیا: ”رنے! تیرے تے رب دی رحمت تے کپر دا پتہ جھبڈے ای لگ جاندا ہے۔ ویڑھے وچ وگدی کھوہی وچوں جے توں سوتر دے دھاگے نال بوکا بنھ کے پانی کڈھ لوں تاں توں میری پہلے آنگ ای نوہر نو زنائی..... تے توں نہیں جاندی ایں مریاں، اوس سوتر نال بوکا بنھ کے پانی کڈھ لیا۔ پر میرے اندروں بدگمانی حالے کائی نہ مُکی آہی۔ سو، میں اوہنوں دو جے امتحان وچ گھٹ دتا، میں آکھیا: توں اگ تے بہہ کے روٹی پکادے، جیکر توں بے قصور ہوئیوں تاں اگ تینوں کیوں ساڑے گی..... اوس اگے نالوں وی چنگی روٹی پکائی تے اوویں ای نوہر نو۔ مُڑ وی جدوں میں شک دی اگ وچوں نہیں نکلیا تاں میں اوہنوں اگ وچ بٹھا کے امتحان لین دا متا پکایا۔ سُن مریاں! اوہ چر، تیک بلدی اگ دی چخا وچ بیٹھی رہی تے اوہنوں کجھ وی نہ ہویا..... ایس لئی مریاں توں وی سفنے نوں سفناں جان کے بھل جاتے حقیقت نوں حقیقت سمجھ۔“

ایس توں پہلے جو راول جوگی اپناں گھنڈا پھڑ نعرہ ماردا اوتھوں ٹر وگدا، مریاں اوہدیاں نگاہاں وچ نجھا کے تکیا تے آکھیا: ”پر، راولا! ایہہ ساریاں گلاں تے میں جھنگ اک اکھاڑے وچ نکی ہوندی ویکھ، سُن چکی آں، جیہدے وچ ایہہ سارا کجھ راجا رسالودا اک وزیر مہتا، اپنی زنائی قولاں نال کردا ہے۔ جیکر ایہہ کہانی مہتا تے قولوں دی ہے تاں مُڑ تیری کیوں ہو گئی؟“

”مریاں، اک گل یاد رکھیں، حیاتی دے ایس اکھاڑے وچ ایس سارے ای

مہتے تے قولوں دا کردار نبھا رہے آں زمانہ بدلدا راہندا ہے زمانے دے طور طریقے تے رسماں، ریتاں اوہی راہندیاں نیں۔“ ایہہ آکھ راول جوگی بار، نوں تے مریاں وستی ول نوں جاوڑی، پر حقّی گل ایہہ ہے جو مریاں دے پلے، جوگی دی گل پئی نہیں۔

.....

مُور افغانہ، انگریز لاٹ تے اوہدے نال رلے گھڑ اسواریاں نال وستی ول نوں آ رہیا آہا۔ گھڑ اسوار جیہناں دے ہتھیں رائفلاں، برچھیاں تے ٹکڑے ہائیں..... مریاں، راول جوگی ولے جا رہی آہی، ایہناں نوں ویکھ کے کریاں دی اک جھنگی اوہلے لُک کے بہہ گئی۔ پہلے اوہدا چت کیتا، مُڑ کے وستی جاوے تے ساری گل گہنے خاں نوں دسے۔ اوہ مُڑی نہیں تے اگے قبرستان ال ای ٹُردی گئی۔ ترکھی ترکھی..... اوس ایہناں گھوڑیاں آلیاں بارے راول جوگی نوں دسیا۔

”جیویں جوان جتے مار مار کے اباد کیتیاں زمیناں تے گھراں دیاں کندھاں دا ویری کلر ہو جاندا ہے اُنج ای پکیاں فصلاں تے سانجھے سنہرے، پشواں تے مال اسباب دے ویری ایہہ دھاڑوی ہوندن۔ مریاں دھیئے..... میں وستی آلیاں نوں ورجیا آہا ایہناں ولوں۔ پر اوہ شاید میری گل نوں سمجھ نہیں سکے۔ میں ویکھداں جیویں ڈھاہ لگے دریا دی کندھی تے اباد موت دیاں ڈھیریاں لکیاں ہوندیاں نیں۔ اُنج ایہناں دے بُتاں دیاں ڈھیریاں دسدیاں نیں مینوں..... مینوں تے اوہناں ایہہ آکھ کے اپنے آپ نوں یاں شاید مینوں ای تسلی دتی جو، اسیں ورھیاں توں گستان توں کھیتاں تیک بنے مدان وچ نیزہ بازی تے کلہ پٹن دا چچ ایس وجوں نہیں سکھدے رہے جو ایہہ نرا ساڈا شوق یا کھیڈ آہی سگوں ایس لئی کھیڈ دے رہے ہائیں جو آون والے دھاڑویاں دا مقابلہ کر سکے۔ پر میں ویکھداں جو ولا رادے سارے تگادے اوس ایلے مُک جاسن جدوں اوس انگریز لاٹ نال اپنے کسے دیسی سجن نوں وستی دا گھیرا گھتیاں ویکھیا۔“ اُنج جیویں راول جوگی اپنے آپ

نال گلاں کردا ہووے..... تے مریاں، جیویں اوہدیاں رمزاں نوں اُکا سمجھ ای نہ سکی ہووے۔ اوہدے بھانے راول دیاں رمزاں، رمزاں ای رہیاں۔

مڑ کے وستی وچ واہراں آن لتھیاں۔

تتیاں دُھپاں دیاں سویراں دا سورج حالے بوڑھ دے رُکھ وچوں رشناں کھلارن ای لگا آہا جو حویلی گھوڑیاں دے سُمباں نال دھمکن لگ پئی، انج جیویں جنگ دے گھمسان وچ فوج دیاں ٹاپاں آن گونج دیاں نیں..... حویلی وچ بیٹھے لوکی آون والی ہر کروپی تے ان ہونی نال نبرن آسٹے تیار بیٹھے ہاُن۔ پر آون والے بہوں ودھ ہاُن گینتری وچ تے اونے ای ودھ اوہناں کول ہتھیار ہاُن..... انگریز لاٹ دے مگر گمراہی آہا مموراختیانہ۔ ایہہ انگریز لاٹ کمپنی دیاں اوہناں بندیاں وچوں آہا جو کمپنی دے نال ای اتھھے اپڑیا۔ اوہدے ذمے پنجاب دیاں باراں دا علاقہ آہا، اوہ ایٹھوں دیاں بولیاں تے لوکاں توں ڈھیر جانو آہا۔ حویلی وچ اپڑ کے گھوڑے کچھ چرتیک ٹپدے رہے۔ اک تھاہرے نہیں کھلوتے۔ اوہ سارے ایس طریقے نال چوپھیرے قطار وچ کھلوتے جو حویلی وچ بیٹھے لوکاں وچوں کسے نوں گسکن دا موقع وی نہیں لبھا۔

”اے جانگی لوک! میں سُنیا تسیں کھل نال رل کے انگریز سرکار خلاف لڑن دی تیاری کر رہے او۔ اوس سرکار دے خلاف جو تہاڈی بہتری لئی کم کر رہی ہے۔ جو تہاڈیاں زمیناں وچوں نہراں کڈھ کے باراں اباد کرن وچ لگی ہے..... کن کھول کے سُن لوو، اسیں اپنے وفادار لوکاں نال رل کے تہانوں انج مار دیاں گے جیویں سپ مار دتے جاندن۔ یاد رکھو! ایہہ زمین جو تسیں ممورے فنیانے دی ہدایت تے مدد نال اباد کیتی ہے۔ ایہہ مالک ساڈیاں نظراں وچ مموراختیانہ ای ہے۔ اوہ اپنیاں زمیناں تے اُگائیاں فصلوں دا مالیہ تاردا ہے تے تاج برطانیہ دا وفادار ہے..... سن لوو! اوہدے توں بغاوت انگریز سرکار توں بغاوت ہووے گی۔ ہُن تسیں فیصلہ کر لوو، جو تسیں کھل نال رل کے ساڈے نال

لڑناں ہے یاں اوہنوں مارن لئی ساڈا ساتھ دیناں ہے۔ تہاڈے کول بہت گھٹ ویلا ہے۔ یاد رکھو! تسیں جھبڈے ای برطانوی سرکار دی عمل داری وچ آون والے او..... تہاڈے ورگے اوہ باغی جو ساڈے ورودھ جنگ لڑدے نیں اوہناں بارے سخت فیصلے کیجے جاون گے۔ پہلے ای ایہہ گل میرے علم وچ آئی ہے جو تسیں اک ٹھگ جیہڈے اُتے اک انگریز بہادر دے قتل دا الزام ہے تے جو جیل تروڑ کے بھجیا ہے، اوہ تہاڈی پناہ وچ ہے..... انج تسیں کھرل نال رل کے اپنے گناہاں وچ وادھا نہ کرو۔“

ایس توں پہلے جو، کوئی بولدا، انگریز لاٹ اگے اگے تے باقی لوکی اوہڈے چھپے چھپے ٹر پئے۔ ٹور محمد، جو اُٹھ کے اپنا کوئی فیصلہ دیونا چاہوندا آہا، نہال سنگھ اوہدا ہتھ پھڑ کے اوہنوں بٹھا دتا، تے پیرو ٹھگ جو چوپال وچوں اُٹھ کے جاون لگا آہا۔ اوہنوں ٹور محمد، پھڑ کے اپنے نال بٹھاندیاں آکھیا، ”بہہ جا پیرو، توں ہُن ساڈے جین مرن دا ساتھی ایں۔ اسیں ایس مہینے مہینے فٹیا نے تے اوہڈے انگریز لاٹ دا فیصلہ کوئی نہیں منناں۔“ ٹور محمد دے ایس فیصلے نوں ہلا شیر دی دیندیاں سبھ لوکاں اپنیاں برچھیاں، تے ٹکڑے ہوا وچ لہرائے، جو اوہناں دیاں منجیاں اُتے دھریاں سوتاں پیٹھ پئے ہائُن۔

منڈا سے بنھ کے جیہڈے دو بندے احمد خاں کھرل ول گئے اوہ پیرو تے ٹور محمد ای آہن۔ ”وستی تاں ساڈی حالے ہُنے ای اباد ہوئی ہے۔ اجیہے جنے جیہڈے جی دار نیں، جوان گبھرو نیں، تے اپنے سر لو تھان توں وکھ ہوون پاروں جیہناں نوں کوئی منکھ نہ ہوسی اوہناں دی گنتی وی گھٹ ہے، پر احمد خاں، اوہ ہین تیرے نال ای ساڈے سنے۔“ ٹور محمد آکھیا۔

اوہناں دے ایس فیصلے نال احمد خاں کھرل تے اوہڈے سنگیاں نوں تاں کوئی ہمت آسرا ہو یا نہیں پر ایہہ گل مہینے فٹیا نے راہیں انگریز لاٹ تیک ضرور اپڑ گئی..... ڈونگھی، انھیری رات دا سماں آہا۔ اجیہی رات جیہڈے وچ وجود دی اکھ اپنے

حصے دے ہتھ نوں نہیں ویکھ سکدی آہی۔ پکے آٹے نال بنے ہوئے سرہیوں دے تیل نال بلدے دیوے وی اخیر لے دماں تے ہاں۔ گستان نیڑے اک پرچھائیں انگریزی سپاہیاں نوں وستی ول جاندیاں تکیا۔ راول جوگی نوں یقین آہا جو وستی آ لے اوس طرحاں دی تیاری نہیں کر سکے ہون گے جیویں دی تیاری اوہناں نوں کرنی چاہیدی آہی.....

رات انھیری وچ توڑے دار بندوقاں دے فارگوئے، مڑ کے کچھ چرے آسٹے ڈانگاں، برچھیاں تے گنڈا سے وی چلدے رہے..... پرکئی دیر تیک.....

کمایاں وچوں کوئی لڑن لئی حویلی وچ نہیں آیا۔ اوہ لڑن دا وچ ای نہیں جاندے ہاں، تے نہ ای اوہناں وچ ایناں وڈا جگرا آہا..... ممورے فتیانے دس اچھے بندیاں بارے دسیا آہا جو اوہناں واسطے خطرناک ثابت ہو سکدے ہاں..... انگریزی سپاہی جیہناں پھڑو تے نستے لوکاں نوں بنھ کے اپنے نال بنگلے لے گئے۔ اوہناں وچ نور محمد تے پیرو نہیں ہاں۔ اوہناں جدوں ویکھیا اسیں گھیرے وچ آ گئے واں تے پھڑے جاواں گے..... اوہ اوہناں دی اکھاں وچ دھوڑ گھٹ کے نس گئے۔ انگریز لاٹ وار وار ممورے فتیانے نوں ورج رہیا آہا جو ”سارے لوکاں تے نظر رکھو تے کسے نوں نس کے نہ جاوے دیو۔“

بنگلے اپڑ کے پھڑے ہوئے لوکاں نال ای انگریز لاٹ ممورے فتیانے دے وی ہتھ ایہہ آکھ کے بنھوا دتے جو اوس دس بندیاں دی دس گھتی آہی جدوں کہ ایہہ اٹھ بندے ہاں تے اک گولی دا فارٹھس ہون مگروں اک گولی وادھورہ گئی آہی جو نور محمد یاں پیرو ٹھگ دی تھاہرے ممورے فتیانے دے سینے وچوں لنگھا دتی گئی.....

ممورے فتیانے دی حدوں ودھ وفاداری وی اوہدے کم نہیں آئی۔ ”اسیں جھوٹے تے باغی دوہاں نوں آپناں دشمن جاندے واں۔“ فارکرن لگیاں انگریز افسر آکھیا۔

باردی جنگل ارگی دھرتی اُتے امن تے محبت نال اُسری وستی وچ خون پینی ڈائن پھیرا پا گئی آہی۔ ولا را، ساری حیاتی جس ہونی توں ڈردا رہیا آہا۔ جیہدے توں اپنے

لگدے لیںیاں نوں ورجدا رہیا آہا۔ اوہ ہونی اوہناں اُتے ورت گئی آہی۔ وستی وچ بندیاں
دا کال پے گیا آہا۔ آکھن نوں کجھ ساہ ست لیندے بندے اباد ہاُن پر اوہناں سبھ اسیل
مردانیاں نوں اک چتو ممورے فنیانے نوں نال رلا کے انگریز، بنگلے لجا کے فائر کردتا آہا۔

بار، دی جنگل ارگی دھرتی اُتے ترے پر چھائیاں، کتے کھلو کے صلاح کردیاں،
کتے ٹوئیاں، ٹمپیاں نوں اُلا نگھدیاں ممورے فنیانے دی وستی ال نوں جا رہیاں ہاُن۔ مُڑ
کے اُتر، نوں نکلدے رستے کولوں اک پر چھائیں نکھر گئی..... ایہہ راول جوگی آہا۔ اگے لنگھ
جاون آلیاں پر چھائیاں ممورے فنیانے دی وستی نیڑے نویں بنے بنگلے کول اک بوڑھ دے
وڈے رُکھ تے جائیاں ہاُن..... استھہ انگریز لاٹ کچھری لاوندا آہا تے ہروج ہوئے
واقعیان بارے کیتے فیصلیاں دے حکم نامے تیار کر کے علاقے تے برطانیہ وچ متعلقہ
محکمیاں نوں گھل دیندا آہا.....

رستہ جو تھلے لمک رہیا آہا۔ اوہ پیرو ٹھگ دے ہتھیں آہا تے اک چھوی نُور محمد
دے ہتھیں.....

انگریز لاٹ دے تھلیوں لنگھدے سارای رستہ اوہدے گلے دوالے آہا۔ پیرو
ٹھگ اوہدے منکے نوں انج جھٹکا ماریا جیویں اوہ رومال نوں ماردا آہا۔ مُڑ کے نُور محمد دی
چھوی اوہدی دھون نوں لوتھ توں وکھریاں کر چھڈیا..... اوہ اوہدی گھوڑی تے اسوار وستی
ول نوں مُڑے، جتھے اُجڑیاں چُجڑیاں تے لٹیاں ماریاں رناں دے وین اسمان ول نوں
اُبھر دے ہاُن۔

پھلاں باجھ نہ سوہندیاں ٹاہناں

بھاویں ستر باغیں ہریاں

بھائیاں باجھ نہ سوہندیاں بھیناں

پنڈ اڈیکن کھڑیاں

پُتر اں باجھ نہ سوہندیاں ماواں
 بھاویں ستر دولت بھریاں
 کونتاں باجھ نہ سوہندیاں ناراں
 بھاویں ستر حوراں پریاں۔



12

اک ہور اُچالا

ہر سینے وچ ویرتے بدلے دی اک دیاں چنگاں بھج پیاں۔

ہر بندہ ازادی دے اوہ موسم ماننا چاہوندا آہا جو بار وچ رہندیاں اوہدے کول
ہائُن۔ بار جتھے جین دے وسیلے اپنے وجود دی رت وگا کے پُگائے جاندے ہائُن پر اوہ بھلے
ہائُن اوہناں اندر اک ان ڈٹھاسکھ لگیا آہا۔ جیہنوں ہُن انگریز لٹ کھوہ کے اوہناں نوں
آپ ہتھل کرناں چاہوندا آہا۔

ایہدامڈھ جوئیاں دے قبیلے توں بدھا جیہناں پاک پتن وچ مالیہ وصول کرن
آئے افسراں نوں پھنڈ چاڑھ چھڈی۔ مُد کے انگریز اوہناں نوں پھڑ پھڑ گوگیرہ جیل بھر
دتی۔ احمد خاں کھرل جیل اپڑیا تے قیدیاں نوں اپنے نال رل کے انگریز ورودھ لڑن تے
پریریا۔ اوہناں جیل بھن چھڈی تے ایہدے مگروں اک کنہنی جیہی چھڑ گئی پوری بار، نوں۔
نور محمد تے پیرو، کھرل نال رل کے انگریز نال دو دو ہتھ کرن واسطے اُتاو لے
ہائُن، پرستی توں گڈ تے چاڑھ کے زنانیاں تے دوئے جیے جنتے نوں جوتیاں تیک اپڑاونا
پہلا کم آہا..... مُد، مریاں تے ستوننت دے کچھڑیں نکے نکے بال ہائُن۔ پچھلے تن دناں

توں پیٹھ اُتے وسدے مینہ پاروں راہاں کھو بھے بنیاں ہوئیاں ہائُن۔ جیہناں وچ گڈاں پھس پھس جاندیاں۔ جیہناں نوں زنانیاں تے ایہہ دوویں جنے بھہڑے مار مار کے اگانہہ ٹور، رہے ہائُن۔ اُتوں انگریز دستے دا ڈر لاہے، جیہڑا انگریز لاٹ نوں گل رسہ گھت کے مارن آلیاں دی بھال وچ پھر دا آہا..... بھاویں ٹور محمد تے پیرو بہروپ بدلی ودے ہائُن۔ پر انج وی نہیں آہا جو اوہناں دی سیہان ای نہ کیتی جاسکدی۔

کمیاں دیاں ڈھیر برادریاں آباد کیتی کتری وستی نوں چھڈ کے اُچالے تے تیار نہیں ہائُن۔ اوہناں آسٹے سردار گھنے خاں ہوندا، نہال سنگھ یاں کوئی دوجا ترجیا اوہناں نال جیونا آہا۔ ایہہ جیون بھاویں انگریز دی عملداری وچ ای کیوں نہ گزردا۔

میر و مرانی، جدوں دا جوتیاں ایچ ٹور محمد تے پیرو دے آون داسنیہا اپڑا کے آیا آہا، اوہدی اودوں دی کائی خیر، خبر ناہی۔ پہلوں وی اوہ مستو جوپن دی مستی وچ مست آہا، اوہ اوہنوں ڈھول تے گاؤن سنا کے ای خوش راہندا۔ اوس ویلے جدوں ایہہ لوکی اچل کے جوتیاں نوں جا رہے ہائُن میر و مرانی گھوڑیاں آسٹے بنائے طیلے وچ کانیاں دے کدھلے کچھے مستو نوں ڈھول و جا کے مٹھی و اج وچ سہی دے بول سنا رہیا آہا، تے اوہ تانی تنن وانگ ہتھ تے سر ہلا رہی آہی۔ کدی کدی گاؤن دے بولاں وچ اوہ وی اُچی وانی بول کے اوہدا ساتھ دیندی..... ایس گاؤن و جاؤن ویلے دوہاں دا خیال خلقت دے ایہتھوں اُچل کے ٹر، جاؤن ول نہیں آہا۔ جیہناں مگروں ایہہ وستی ویران ہو گئی لگدی۔

وساہرے خاں تے اتماں سہرائی دیاں قبریں تے وی ہو دا عالم آہا۔ اج جتھے مریاں اپڑی تے نہ راول۔

ٹور محمد تے پیرو اپنے نال آئیاں زنانیاں تے بالکاں نوں جوتیاں وچ ٹھہا کے بٹھا وی ناہن سکے جو اوہناں تیک احمد خاں کھرل دی شہادت داسنیہا اپڑیا۔ ”نورے دی ڈل“ تے ایہہ ہونی ہتی۔ ٹور محمد تے پیرو، دی کھرل نال رل کے انگریز ورودھ لڑن دی

تالگھ تاں نہ توڑ پکچی، پر اوہناں دا اوہ جنون نہ گھٹ سکيا جو نور محمد دے اپنے پیو، چاچیاں، نہال سنگھ تے ہورس لوکاں نوں مارن وجہوں اوہناں دی رت وچ دھاگیا آہا۔ پیرو واسطے ایہہ صدمہ نور محمد نالوں وی ودھ کے آہا۔ اوہ ہمیش رو مال نوں ہتھاں وچ رکھ کے وٹ چاڑھدا تے ڈونگھیاں سوچاں وچ گواچیا لگدا۔ جدوں اوہ سارا کجھ چاچے ویسے خاں دے حوالے کر کے اوس جتھے وچ رن لئی ٹرے جو احمد خاں کھرل دی شہادت دا بدلہ لیناں چاہندا آہا۔ تاں ویسے خاں دے پتراں نجابت خاں تے صلابت خاں وی منڈا سے ول کے ہتھیار، ہتھیں کر لے، تے اپنیاں اکیل گھوڑیاں تیار کر کے وڑھے ساہمنے امب دے رُکھ تھلے آن کھلوتے۔

”پُتر، تہانوں تیاری دا حکم ایس وجہوں دتا ہے جو تہاڈا پتریر ایہہ نہ سمجھ لوے، جدوں اوہ میرے بھراواں دا ویر لین لئی ٹریا تاں اوہدی کنڈ سکھنی آہی۔“ ویسے خاں نجابت خاں دی گھوڑی دے مونہوں کڑیالا تھوڑا کو ہٹا کے اوہنوں دیسی گھیو دی جی کھواندیاں آکھیا۔

تواریخ ایہہ نہیں دسدی جو دریا دی بیٹ وچ ”کاہواں آ لے ڈبے“ وچ ممورے فنیانے دی برادری دے مراد فنیانے نے جدوں برکلے نوں نیزے وچ پرویا تاں اوس ایلے کنے ای سردار اوہدے کدھاڑیاں نال کھلے ہائن، آخو اکا مروانے، فنیانے، ترہانے، بھدرو، قریشی، وٹو تے ویہنی وال ای اوہدے نال نہیں کھلوتے ہائن۔ نور محمد ولا را دا، نجابت خاں، صلابت خاں تے پیرو، وی احمد خاں کھرل دا ویر لین آلیاں وچ رلے ہائن۔ صلابت خاں نوں شہادت ڈھمی۔ نجابت خاں، نور محمد تے پیرو، ماڑی پتن نیڑیوں باہلک وٹو دیاں جھگیاں کولوں ہوندے ہوئے جھامرے ول نوں جاندے راہ تے لگ گئے، تے انگریز دیاں فوجاں تے واہراں نوں تروڑ تروڑ کے مار دے رہے۔

نجابت خاں گھوڑی تے اسوار گنڈ وچوں ہوندا جوتیاں ول جاندے راہ تے آہا،

جدوں گھمدا گھماندا راول جوگی اوہدے ساہنے آن نکلیا۔ اوس دو بھر جوان وچھیاں دیاں
نتھاں اوہدے ہتھیں ویکھیاں، حال احوال کیتوس تے اوہنوں دسیوس، ”میں کل ای
جوتیاں وچوں نکلیاواں۔ وستی تے رب دی مہر پئی وسدی ہے، پر تیرے دوئے دوہانی کتھے
ہے نی؟“

”اساں ساریاں ایہہ دو وچھے کل گنڈ چیری وچوں کڈھ کے نکلے ہائیں اوہ
اگے ہورس مال دی بھال وچ نکل گئے نیں۔ میں ایہناں نوں جوتیاں تیک اپڑاؤن چلیاں
تے توں کتھے چلیا ایں؟“

”میں سوچیا تیرے دادے وساہرے خاں دی گورتوں ای ہو آواں، بہوں دینہہ
لگھ گئے۔ من اُداسیا جیہا گیا تاں نکل آیاہم۔ پر پُتری تسیں ایہہ کیہ کار پھڑی ہے ایہہ کسب
چنگا نہیں۔ لیہدا انت کدے بھلا نہیں ہویا۔ خیر، جیہناں تقویٰ رب دا اوہی مردمان۔“
”چنگا راول ساکیں.....“ نجابت ایہہ آکھ کے نکلن لگا تاں مُڑ کے اوس
اوہنوں جیویں ورجیا۔

”پُتر نُر محمد، تے پیرو تینوں ملن تاں اوہناں تیک میرا ایہہ سنیہا ضرور اپڑاویں
جو اپنے دیس جاو سو، اتھے دھرتی اوہناں دی اڈیک وچ ہے، مختاں کرسن تے تر جاسن،
رب امن امان قائم کرے تہاڈے سراں تے۔“ ایہہ اخیرلی گل اوس جیویں اپنے آپ نال
کیتی ہووے۔

”آخو، توں آکھدا تاں ٹھیک ایں راول بابا، پر کیہڑی دھرتی تے کبھی اڈیک؟
دادے پڑدادے توں ہن تیک کس دھرتی سانوں اپنا جاتا ہے؟..... رہ گئے جوتے تاں جوتیاں
وچ سرداری لمبڑداری تاں کسے ہورس دی ہے، جی گُرس تاں رکھی رکھے۔ جی نہ گُرس تاں
کڈھ چھڈے۔ نجابت خاں وی انج جیویں اپنے آپ نال گل کیتی ہووے..... مُڑ کے اوہ
دوویں اک دو جے نوں جاندیاں نگاہاں نال تیکدے اپنیاں اپنیاں راہاں نوں ٹرو گے۔

چار ورھیاں مگروں:

اوہناں بھاویں آ لے دوالے دی مُلکھی وچ وجدے سردار اروڑے خاں دے
 طیلے گھوڑیاں نال تے واڑے بلداں، وچھیاں تے مجھاں نال بھر دتے، پر اوہناں دی
 حیثیت ہمیش کامیاں آلی ای رہی۔

اوہدے پشو جدوں ذخیرے ال نوں جاندے تاں اک لمی قطار لگ جاندی،
 جیہناں دے پیراں دی دھوڑ جوتیاں دے سارے گھراں تیک اپڑدی تے اوٹھوں دے
 وایں سمجھ جاندے جو سردار اروڑے خاں دا مال مُنی روہی ال نوں پیا جاندا ہے۔

اوس شام وی اوہ واں جوتیاں دی نکلے رہ گئی اخیر لی جھنگلی وچوں جھانگڑے
 تے جھاڑیاں پُٹ کے سُنج مسان تھاہر نوں گاہن واہن جوگ بنا کے اپنے گھراں وچ
 اپڑے ای ہائں جو کمی آن کے سدا دتا جو راتیں سردار دی حویلی وچ پرہیں بہنی ہے۔
 ضروری گل بات ہوونی ہے کائی۔ ایس لئی ہر گھر دا اک جی ضرور بر ضرور اوٹھے اپڑ
 جاوے..... ایہہ سدا سُن کے ویسے خاں دے اندر انج جیویں رُگ جیہا بھریون لگ پیا۔
 حالاں ہمیش توں اکٹھ ہوندے آئے ہائں۔ اجیہا وہم تے ایس وہم اُتے دل دا انج
 دھڑکیوں اوس کدی وی نہیں جاتا آہا۔

”ہئی، کوئی انہونی ہوون والی، ویسے خاں.....!“ اوس اپنے آپ نوں آکھیا۔
 اسمان صاف دِسا آہا۔ شام نال ای وستی دے چوکیدار دے ہشیار، خبردار،
 جاگدے راہناں جیہے ہوکے آون لگ پئے.....

سردار اروڑے خاں، دی حویلی وچ مجلس ڈھیر چر تیک لگی رہی۔ ایدھر اودھر
 دیاں گلاں ہوون لگ پیاں۔ سردار انج جیویں ویسے خاں، نُور محمد، پیرو تے نجابت نوں
 گول ای نہ رہیا ہووے۔ اوہ اپنے دادے، پڑدادے دے بار، وچ لُٹ مچاون توں لے

کے آپدے پیو تے اپنے، انگریز سرکار نال تعلقات، اوہناں تیک اپنی پہنچ تے اوہناں
 الوں کیتی جاوَن آلیاں مہربانیاں دے قصے سناوَن وچ لگا آہا۔ اچنتے اوس اپنی گل پرتائی
 تے ویسے خاں نوں آکھیوس: ”ویسے خاں، توں تے تیرے پُتر اں میرے نال چنگے ورھے
 لنگھائے، پر کجھ ورھیاں توں مینوں پتہ لگ رہیا آہا جو تیرا بھتریا تے پُتر، پیرو نال رل کے
 ساڈی سرکار خلاف کم پئے کردے نیں۔ میں چُپ رہیا ہم جو آپے مر مٹک جاسن یاں اخیر
 ویکھ کے کھلو جاسن، پر اجیہی کوئی گل ہوئی نہیں، ہُن تاں سُنیا ہے جو اج کل وچ میرے
 ناں تے وی پروانہ آون والا ہے، جو میں سرکار دے باغیاں نوں اپنی راکھی وچ رکھی
 بیٹھاں، تسیں نہیں جاندے او جو ایہدی سزا کیہ ہوسکدی ہے..... ہُن دو ای کم ہوسکدے
 نیں جو میں تیرا مونہہ ملاحظہ رکھاں تے نرے ایس مونہہ ملاحظے کچھے اپنے وڈکیاں دی
 صدیاں توں بنائی عزت تے ناویں نوں کھیہ وچ رلا دیواں۔ تہاڈے نال رل کے تہاڈے
 جیہا ہو جاواں یا تہانوں انگریز سرکار دے حوالے کر کے ہور نامناں کھٹاں؟“

سردار اروڑے خاں اپنی گل کر کے چُپ کر گیا تے ویسے خاں الوں ویکھن لگ
 پیا جو اوہ کوئی ولدا دیوے..... پر ویسے خاں چُپ آہا، مُڑ نُور محمد ولّا را دا بولیا، ”توں اپنی مان
 مریدا اساں جیسے بے مُلیاں تے نابراں آسٹے کیوں مکاوندا ایں سردار اروڑے خاں.....
 اسیں ہُنے ای کوئی فیصلہ کر کے اٹھاں گے، پر تیرے من وچ ہور جو کوئی گل ہووی تاں اج
 ای کر لے، تاں جو کوئی منکھ نہ رہ جاوے۔“

اروڑے خاں ٹوں نُور محمد دی گل تے گل کرن دے سبھا وچ کاوڑ دسی۔ پر اوہ
 اوس کاوڑ نوں پی گیا۔ ڈھیر چر چُپ رہیا، مُڑ بولیا: ”میں ایہہ فیصلہ کیتا ہے جو فجر چڑھن
 توں پہلاں جوتیاں دی حد لنگھ جاوے۔ اک سردار ہونڈیاں تے اک سردار دا پنچایتی مان کیہ
 ہوندا ہے اوہنوں سمجھدیاں میں ایس نتیجے تے اپڑیاں، ایہدے وچ ای تہاڈی تے میری،
 دوہاں دی بھلیائی ہے۔“

ڈھیر چر چُپ رہی تے ایس چُپ مگروں رات دی کُکھ نے انھیرے دی بُکل
وچ راول نوں واں جوتیاں وچ وڑ دیاں ویکھیا۔

اک قافلہ جوتیاں وچوں نکلیا، جیہدے وچ دو زنانیاں دے ہتھاں نال پنچ، پنچ
ورھیاں دے بالاں دیاں انگلاں ہاں۔ مریاں دے ہتھیں ویسے خاں تے ستونت کور دے
ہتھیں من پریت کور۔ جاندیاں وٹ تے چڑھدے سار ای ستونت کور اپنے سائیں نہال
سنگھ نوں سدّ ماریا، سردار اروڑے خاں نوں بد دعا دتوس، ہمیش دے ایس اُچالے تے اک
وین کیتوس۔ مریاں، نواپئے تے ویسے خاں دی زنانی اوہنوں چُپ کراندیاں کراندیاں آپ
روون لگ پیاں۔ ستونت کور، دے ویناں، اوہناں دے روون نوں ہٹکوریں چ بدل دتا۔
”راہاں وچ روون نموشی دی نشانی ہوندا ہے بی بیو، اسیں راہ ای نہ بھل
جاویے، نہ روو۔“ راول اوہناں نوں جیویں حوصلہ تے نصیحت کردیاں آ کھیا۔

اوہ راول جوگی دے کچھے کچھے سیّد آلے دے کولوں لنگھدے ہوئے اک
ساو لے میدان وچ آن رُکے۔ نواپئے، مریاں تے نور محمد نوں لگا جیویں اوہ مُڑ کے
وساہرے خاں دی دسی وستی دے نیڑے ای آن کھلوتے ہوون پر ایہہ وستی تاں کوئی ہور
آہی..... وساہرے خاں دی دسی ہوئی وستی ورگی اک ہور وستی۔ وچوں وچوں پویے تاں اُکا
ویہہ کوہاں تے آہی وساہرے خاں دی گورایتھوں۔

”اج مینوں ولا را دیاں گلاں اک اک کر کے ساریاں یاد آ وندیاں نیں، اوہ
بھرا ساڈا آہا ملکھوں ودھ دانا، پرانج ہوندا ہے ناں جو اسیں اپنے بجن، لگدے لیندے دی
کسے حکمت نال بھری گل نوں نہیں گولدے، تے لاہم دا بھاویں کوئی کھچ وی پیا مارے،
اوہدے وچوں نقطے لبھدے وتدے ہائیں۔“ ویسے خاں، اپنے نال نال لگے جاندے نور
محمد دے موڈھے تے ہتھ دھردیاں آ کھیا:

”کیہ گل اجیہی پیودی چیتے آ گئی چاچا تینوں؟“

”اوہ ایس حق وچ کدی وی ناہس جو اسیں کسے ہورس دی بھونیں گڈیے یاں کسے نال رل کے۔ ممورے فٹیانے تے سردار اروڑے خاں نال رہ کے سانوں ولا را دیاں گلاں یاد تاں آوندیاں ہائن پر اسیں چُپاں وٹیاں تے اللہ آسرے کم تے لگے رہے۔ ممورے فٹیانے نوں تاں چھڈواک پاسے، اروڑے خاں نال تے میری اڈھی توں ودھ حیاتی گزر گئی تے اوس صلہ کیہ دتا؟..... مینوں یاد آوندا ہے جو پیو مرن مگروں نکھرن ایلے سانوں ساریاں نوں سناوندیاں ہوئیاں ولا را، گہنے خاں نوں اک گل کیتی آہی،.....“ گہنے خاں، جیکر بار دے کسے حصے نوں وکھتاں نال تسیں اباد کروں لوو گے تے کوئی نہ کوئی سردار، دھاڑوی یاں انگریز دا کوئی بٹھو اپنے نال ہتھیار، گھوڑیاں تے بندے لیا کے اوہدے تے قبضہ کر لوے گا۔ اوہنوں بنی بنائی زویں مل جاوے گی تے تسیں وکھت کر کے وی سکھنے ای رہ جاوے گے۔ جیکر بندہ اصلوں کوئی کمینہ ہو یا، تاں ہو سکدا ہے تہانوں ایہہ آکھ کے جو تہانوں پکان، کھوان لئی اک ای زنانی بڑی ہے۔ اوہ تہاڈیاں زنانیاں وی بنھ لوے!“

”آہندا تاں پیو ٹھیک ای آہا، مُر تقدیر تہاڈے تے ساڈے تے ورتی وی تاں اُنج ای۔“ تُو ر محمد جیویں ویسے دی گل وچ اک ہور گنڈھ بنھ دتی ہووے۔

”ایہہ تقدیر آلی گل وی توں چنگی کیتی۔ اماں سھرائی جدوں کسے ہونی مگروں آکھدی جو ساڈے تے تقدیر ورت گئی تاں پتا ای تیرا پیو کیہ آکھدا؟“

”ہونہہ.....؟“ تُو ر محمد جیویں کچھن لئی آکھدا ہے۔

”اوہ آکھدا، اماں توں آہندی ایں تقدیر ورت گئی جو کجھ ساڈے اُتے ورتدا ہے اوہ تقدیر نہیں، لوکاں دی سوچی سمجھی چال ہوندی ہے۔ جو ساڈے تے ازمانی جاندی ہے، جیہنوں اسیں تقدیر سمجھ لیندے آں.....!“ ویسے خاں اک واریں اپنی گل مُکا کے مُر جیویں اپنے آپ نال گل کردا ہووے۔

”آخو، تقدیر ایہہ تاں نہیں آہندی جو مینوں اپنے آپ اُتے ورت لوو، سگوں

تقدیر تاں جوتیاں نیڑے راہندے رجبے ڈوگر اُتے ورتی جو انتاں دانٹا نچی آہا، شاہ اسوار
تے شکاری آہا۔ اک واریں ایویں شکار دی حرص کردیاں انھی ڈل وچ جا ڈھٹھا۔ ڈل
جیہدے اُتے نریاں جھاڑیاں اُگیاں ہاں تے پتاناہس لگدا جواگے ڈل ہے اوہدا شکاری
گنتا تے اوہ گھوڑے سنے انھی ڈل وچ جا ڈھٹھے تے سیہڑ جیہدے پچھے اوہ لگا ہویا آہا وہ
ڈل اُتے اُگیاں جھاڑیاں وچ ای پھس گیا۔ اوس جتھے چھال ماری آہی او تھے ڈل دا گھیر
وی گھٹ آہا، اُتوں علاقہ ایہو جیہا جتھے پانی وی تریہہ تریہہ ہتھ نیواں.....

”ایتھے پانی نیڑے ای لہہ پوسی!“ راول جوگی، نور محمد تے ویسے خاں نوں انج
دسیا جیویں اوہ نویں ستی وچ پانی ملن یاں نہ ملن بارے گل کر رہے ہوں۔

”میں جمن لا، توں ہُن تاکیں دو ای سفنے ویکھدا آیاں، بار، دے ہرے
بھرے رُکھاں تے ایہدے وچ اباد ازاد جانگلیاں دے تے بھونکیں وچوں بہوں نیڑیوں
نکل آون والے پانیاں دے۔ پانی جو حیاتی دا وڈا سومانیں۔ منکھی آسٹے، پکھیر وواں
جنوراں تے دھرتی آسٹے۔ میں ویکھداں جو دھرتی مینوں واجاں ماردی ہے۔ تریہائی، تسی
دھرتی۔ انج جیویں پانی منگدی ہووے۔

کھلا، بے انت، بے شمار پانی

کھوہ گڑدے راہن

دریا تے ندی نالے وگدے راہن

تے، مینہ وسدے راہن.....

دھرتی دی کُکھ پانیاں نال بھری رہوے

دھرتی ہری، بھری رہوے



13

چکل گھمدا جاندا ہے

چکل گھمدا جاندا ہے تے نال ای کمھار دا پیر تے ہتھ وی۔ پیر جو چکل نوں حرکت وچ رکھدا ہے تے ہتھ جو مٹی دی اک ڈھیری نوں ون پونیاں شکلاں دیندے جاندن۔ جیویں بھانڈا بندا ہے اوہدا ہتھ تیز دھاگے نال باقی دی گوئی ہوئی چیکنی مٹی لاہے کر دیندا ہے مڑ کے بھانڈے نوں سکُن لئی اک پاسے رکھ دیندا ہے۔ رمتے کمھار دی وڈی دھی آپ بڑی کسی آہی، ویاہ مگروں چھاں ٹُر گئی، تے ہُن اوہنوں سارا کم آپ کرنا پوند، پر کجھ نگا وڈا، اوہدی نکلی دھی پر پو وی کر دیندی۔ ہن وی اوہدی دھی پر پو ڈنگلی، سوڑا، پنے وٹ تے گچی باہر لیا دھری۔ اوہ باہر ڈنگلی نال مٹی نوں چھاندی ہوئی اپنی ماں دا ہتھ وٹا رہی آہی تے چکل توں لتھے ہوئے بھانڈے وی چُک کے سکُن لئی باہر دھری جا رہی آہی۔ مٹی چھانن مگروں اوہدی ماں گارا بناوندی ہے۔ جیہدے وچ نیڑے ای دھری ہوئی تھوڑی جیہی دریائی ریت وی رلا دیندی ہے۔ ایہہ ریت آوی وچ سکُن تے پکن مگروں بھانڈے تے انج چمکدی ہے۔ جیویں پانی وچ تیز دھپ دیاں رشاں۔

رمتا کمھار، حقے دے پھلاں، پانی بھرن آ لے گھڑے تے گھڑیاں، کٹیاں تے

کھڈو نے بناون دے نال نال پر یو، دے رُکھاں دیاں چھلاں نال بنائے رنگ نال، پھل بوٹے وی اُلکدا جاندا ہے..... وستی وچ نویں آئے قبیلے دی بچی تے بچے نوں وی ویکھ لیندا ہے جو ساہمنے کھلوتے اوہنوں کم کر دیاں انج حیران نگاہاں نال تیکدے نیں جیویں اوہ کوئی جادو آلا کم کر رہیا ہووے..... رمتے دی ایس قبیلے نال حالے ڈھیر سانجھ سیہان نہیں بئی..... اوہدے سُنن وچ تاں ایہہ آیا آہا جو ایس نویں آون والے قبیلے آلیاں چودھری ٹکے خاں نوں دو بلد دے کے دو مربع بھوئیں لے لئی ہے۔ اک مربع وستی دے نال ای لگدا تے دو جا کجھ دوریڈڑا، روہی وچ، ایہنوں روہی آلا مربع آکھیا جاندا..... اوہ ایس بھوئیں نوں اکساہرا کرن وچ لگے ہائُن..... پتا نہیں رمتے نوں کدی کدی کیوں لگدا جو بابا جیہنوں سارے ”راول“ آکھدے ہائُن۔ اوہنوں اوہ پہلے توں ای جاندا ہے تے کسے تھاہرے بڑی واری ویکھ چکیا ہے اوہنوں۔

رمتا، ایس قبیلے بارے کدی وی نہ سوچدا جیکر ایہہ بچے اوہنوں آکے نہ ویکھ رہے ہوندے۔ اوہ ہر ایلے بھانڈے بناون دے کم وچ لگا رہندا۔ اوہنوں آل دوال اباد ہو رہیاں وستییاں سنے اپنی وستی دے لوکاں دیاں لوڑاں تھوڑاں واسطے بھانڈے بناون پوندے۔ جیہڑے ٹُندے بھج دے وی راہندے، مُر پورا سال بھانڈیاں دی تیاری دا موسم وی کد ہوندا۔ اوہ ایہہ کم تیز ڈھپاں وچ کردا ہے تے کدی کدی تپدیاں گرمیاں وچ..... اکثر ای ایہہ گڑی منڈا ہتھاں وچ ہتھ گھستی اوہدے ساہمنے آن کھلوندا۔ اوہنوں بھانڈے بناؤندیاں نوں ویکھن۔ کجھ بولدے چال دے نہیں۔ اوہ وی چُپ چاپ اپنے کمیں لگا راہندا ہے۔ پر یو، جیہڑی عمروں اوہناں نالوں ڈھیر وڈیرڑی نہیں۔ اوہ وی گم سم ای راہندی ہے۔ اک اوہدی ماں ہے۔ جو کدی اوہناں نال کوئی گل بات کر لیندی ہے۔ ایس گل بات راہیں ای اوہنوں پتا لگا ہے جو اوہ دوویں بھین بھرا نہیں ہین۔ اک داناؤں ولے خاں ہے جیہڑا مریاں دا پُتر ہے۔ گڑی داناؤں من پریت کور ہے۔ جو ستونٹ کور دی دھی ہے۔ پیو دوہاں

دے نہیں جیوندے، ایس وجوں دوہاں نوں اوہناں دیاں ماواں دے ناواں نال سدّیا جاندا ہے..... رمتے کمھار دی زنانی ایہہ گل نہیں سمجھ سکدی جواک ای ٹبر وچ ولے خاں تے من پریت کور، کیویں رہ سکدے نیں۔ اخیر دین مذہب، رسوئی، چُلھا چوگا، جمن مرن، ہر کم نال اک ریت جُوی ہے، اوہ سوچدی ہے جو اوہ کسے دینہ روہی آ لے مربعے جا کے ایس ٹبر بارے پتا ضرور کرے گی۔ پر سوچدی سوچدی نوں ای اٹھ، نو ورھے لنگھ گئے، اخیر اوس ٹبر دی پیپی وی اوہناں نوں مل گئی..... ہُن ستونت کور، مریاں تے کدے کدے نو ایسے وی اوہناں کولوں بھانڈے لین آون لگ پیاں۔ انج حال احوال کرن، گل بات ہوون نال اوہدے اُپر پوری نہیں پر کجھ نہ کجھ گل کھلی جو ایہہ اک ٹبر نہیں، ٹبراں دا لہڑ رلیا ہویا ہے۔ نُور محمد، نجابت خاں، ویسے خاں ہور، پیرو ہور، ستونت کور ہور تے راول ہور..... سارے اپنے اپنے ٹبروں تھڑے ٹھٹھے لوک نیں۔ جیہڑے حیاتی دی آوی وچ دکھ دکھ بھانڈیاں آنگ اک ای اگ نال پکے نیں۔ آخو، ایہہ اگ ای تاں ہے جو بھانڈے نوں بھانڈا تے بندے نوں بندہ بناوندی ہے۔“ ایہہ گل سوچ کے رمتے کمھار دی زنانی اک وار ایناں اُچا ہسی جو رمتے کمھار نوں لگا جو ہووے نہ اوہدی زنانی تے بھوت پریت دا سایہ ہو گیا ہے۔

چودھری ٹکے خاں اپنے قد بُت الوں ای سوہنا سنکھاتے اُچا لما ناہس اپنے کماں الوں وی ڈھیر وڈا بندہ آہا۔ اوہدی وستی جتھے راول، ویسے خاں، نُور محمد تے پیرو نوں تے اوہدے نال لیائے لوکاں نوں وسایا آہا۔ اوہ اک اجیہی وستی آہی۔ جس نوں بار وچ اک پوری وستی آکھیا جاسکدا آہا۔ آپوں چودھری ٹکے خاں نوں لوکی بھاویں گلاں دا گالھڑ، نشئی، سٹے باز تے کھڈاری، شکاری آکھ کے سدے، پراندروں اوہدے وفادار ہائُن۔ اوہ وستی دے عام خاصاں وچ فرق نہ رکھدا۔ انج جیویں اوہنوں تیر، میر آوندی ای نہ ہووے۔ اوہ اپنی وستی دے لوکاں دے دُکھاں وچ ای نہیں۔ ہاسے مخول دیاں مجلساں وچ اوہناں نال رل بہندا۔ لوکاں نال مخول کردا تے لوکی اوہدے نال مخول کردے۔ ایہو ای

کارن آہا جو سستی دا ہر بندہ اوہدے نال نکلی توں نکلی گل وی سانجھی کر لیندا تے اوہ اوہنوں اپنیاں دُکھ تکلیف جان کے مکاون دا حیلہ کردا۔ ایہناں لوکاں نال رل کے ای اوس ایہہ سستی اباد کیتی۔ اوہدی دانائی تے کرماں موجب ای لوکاں اوہنوں اپنا سردار من لیا، تے اوس اوہناں نوں چودھری بن کے دکھایا وی۔ سستی وچ آن، سن تے راہن آلیاں وچوں جیہنوں جس وی پیشے تے ہنر نال جڑت تے موہ آہا اوس اوہنوں اپنیا تے سستی دے لوکاں نوں اپنے اوس ہنر نال نگھیاں تے سٹکھالیاں کر چھڈیا۔

آہدن، چودھری ٹکے خاں دی ذات وچ کجھ عیب وی ہائن، جوانی سے اوہنوں جو زنانی وی مونہہ متھے لگدی، توڑ اخیر تائیں اوہدا پچھا کردا، پر چودھرائی نیا متے جیہنوں اوس ”کرملی کے پتن“ تیک مگرا کر کے موہیا تے اخیر اپنی گھوڑی اُپر لے دو بیلوا ”برالا جوگیاں“ مڑیا۔۔۔۔۔ نیا متے آپ وڈی ذات برادری دی دھی آہی پر راتاں نوں گھوڑی تے اسوار ہو کے دریا دی من تے جا اپڑدی۔ کوئی پشو، جنور ہتھیں آوندس تاں چھڈ لیندی تے لیا ڈیرے تے بندھدی۔ پہلے پہلے اوہدے پیو اوہنوں ٹھاکیا، پر اخیر اوہنوں اپنا پنجواں پتر جان کے چُپ کر گیا۔ مڑ اوہدا ایہہ پنجواں پتر کسے دی اکھ دا نشانہ بن گیا تے گھوڑی تے چڑھ کے ہٹھاڑ نوں چھڈ اُتار وچ آن وی۔ انج اوہدے پیو نوں وی چائن ہو گیا جو اوہ اوہدا پتر نہیں دھی ای آہی۔۔۔۔۔ نیا متے توں کجھ ہورتاں نبڑی یاں نہ جدوں دی چودھری ٹکے خاں دی گھر آئی اوس کسے زنانی ال اکھ بھر کے نہیں تکیا۔۔۔۔۔ دو جا عیب چودھری دی ذات وچ ایہہ آہا جو اوہ اپنے علاقے دا منیا پر منیا رے گیر آہا۔ نیا متے مگروں ایہہ کم وی اوہنوں کجھ ڈھیر جچیا نہیں۔ سگوں ایہہ آکھنا چاہیدا اے جو چُپ چپتے ایہہ کم وی اوس ہورناں دے ذمے لا دتا۔۔۔۔۔ اوہ بلد تے گھوڑے رکھدا سہاگا پھیرن، خراس گیرن تے گھوڑیاں دی دوڑ تے کلے پٹن دے مقابلے کرواندا راہندا۔ اوہ آپ وی ایہناں مقابلیاں تے پیسے لاوندا تے ہورناں توں وی لواوندا۔

اک عیب اوہدے وچ نشئی ہوون دا ودھ آہاتے نشئی وی ایناں کو جو وستی دے
 ہر بنے، ہرنالی تے اوس بھنگ گڈی ہوندی۔ وستی دا ہر زویں دار تے کا مایہنوں حکم حاکم
 سمجھ کے گڈدا، اُنج وی ہُن تیک ہر گھر وچ اک بھنگی جم پیا آہا۔ وستی، آہے لایہ
 ”بھنگیاں دی وستی“ دے ناویں نال وجدی آہی..... مُڑ اک دیہاڑ چودھری دے خورے
 کیہ خیال پیا جو اوس ساری بھنگ وڈھوا کے اک تھاہرے اکٹھی کروائی تے جدوں سُک گئی
 تاں اوہنوں اگ چا لوائیس۔ چودھری دی بھنگ وڈھوا کے سڑواون دی وی اک خاص وجہ
 آہی..... اوس زمانے وچ جدوں رُت ہوا بہار دی ہوندی اوہ ویڑھے وچ سوں رہے
 ہوندے تاں ہولی ہولی چودھرائی گورھی نیندریں جاون لگ پوندی۔ شروع شروع وچ اوہ
 سویرا یلے تیک سُستی راہندی۔ مُڑ کے دوپہر پین لگ پئی۔ اخیر چودھرائی سُستیاں سُستیاں شاماں
 گھت چھڈ دی..... گل ایٹھوں تیک ودھ گئی جو مُڑ کے اوہ دو، دو راتاں تے دو، دو دینہہ
 سون لگ پئی تاں چودھری اوہنوں نیڑلی وستی وچ حکیم کول لے گیا۔ پر اوہی دوائی نال
 نیندر گھٹنی تاں کیہ آہی دون سوائی ہو گئی۔ مُڑ کے اوہ جدوں حکیم ال گئے تاں اوس اوہناں
 نوں آکھیا، ”جدوں تیک تُسیں اپنی وستی وچوں بھنگ مڈھوں نہیں پٹوا دیندے چودھرائی دی
 نیندر ودھدی ای جاوے گی۔“

ایہہ کجھ کردیاں کتر دیاں چودھری دے گھر دھی جم پئی جیہڑی جمن نال ای سون
 دی ایہہ عادت ماں توں وی ودھ لے کے آئی۔ اوہ بالاں نال یسو، پنہو، ہار، کبوتر ڈولی
 کھیڈ دی کھیڈ دی سوں جاندی۔ عمر دے نال نال اوہ سون تے گجھ گئی۔ اک واری اوہ
 ہنالے اجیہی سُستی جو اگلے چندرما تیک سُستی رہی۔ وستی دیاں زنانیاں آپت وچ کنسویاں
 کردیاں جو، ایویں منجی تے ڈولا چاڑھ کے بیٹھے نیں۔ گوریں گھت آون، مری پئی اے!“
 پر ایہہ گلاں حالے گلیاں بازاراں وچ پوری طرحاں ہلیاں وی نہیں ہان تے جو نکی چودھرائی
 جاگ پئی۔ وستی دے ہر گھر دے اک اک جی چودھری ٹکے خاں نوں گھر جا کے مبارکھ دتی۔

”برالا جوگیاں“ دی ایہہ ٹیار، ایہہ نہیں کہ جتے الوں وتی دیاں دوجیاں گویاں
توں لمیرڑی تے بھریرڑی آہی۔ اوہدے نین نقش اوہنوں دوجیاں گویاں توں وکھریاں
کردے ہائن۔ اُتوں اوہدی ماں چنگی رتجھ نال زیور بنا کے اوہنوں پوائے تے مُڑ کے نہیں
لاہے۔ اوہ اُنج ای اپنے گل وچ ہسیاں، ہتھیں چھاپاں چھلے، کنیں سنہری والیاں پا، اپنیاں
میڈھیاں کھول گلیاں وچ مٹکاوندی وتدی۔ وتی دے چھیل گبھرواں دیاں سینیاں تے
کٹاراں ای چلدیاں راہندیاں..... اوہ اک اجیہی بکری آنگ بھردی جیہنوں کسے بگھیاڑ دا
ڈر خوف نہ ہووے۔ رُکھاں دیاں جھنکیاں اوہلے کھلو کے اوہنوں تگن، مٹی پُٹ پُٹ مگدر
کھیڈن آلیاں، سراں تے والاں دے پٹے رکھ کے پھرن آلے جانگلیاں، آپنیاں ڈولیاں
تے کندیاں آلے تویت بنھ کے پھرن آلیاں تے محبتاں دے سرہیوں رنگے پھل کیرن
آلیاں نوں ہرایلے رانی دی ای چینک لگی راہندی۔ اخیر اوہ سارے سینے پھڑ کے بہہ گئے۔
ایس سپنی ورگی گت آلی رانی نوں نُور محمد ماندری بن کے کیل لیا تے اوہ اجیہی کیلی گئی جو
ورھیاں وچ نہیں دناں وچ اوس اپنے مایاں توں منوا لیا تے نُور محمد دے دماں دی ساتھی
بن کے اوہدے گھریں ٹُر گئی سگوں آکھنا چاہیدا ہے جو نُور محمد اوس دے گھریں ٹُر آیا۔

ہُن ہرایلے ڈیرا ہوندا، کامے ہوندے تے صلاحاں ہوندیاں.....

نُور محمد، اک اجیہے قبیلے دا جوان آہا۔ جس بار دی دھرتی نوں ماں آنگ جان
کے اوہدی ماننا کیتی آہی، اوس زمین تے جنوراں دا کار و بہار سارا سنبھال کے ولے خاں،
نجات تے پیرو دے حوالے کیتا۔ گھر دی سنبھال ورھیاں توں ستونت کور تے نواپئے
کردیاں آئیاں ہائن۔ حیاتی اک نویں راہے لگ ٹری آہی..... آکھناں چاہیدا ہے جو
پتری ویکھن آلے جوسی ”برالا جوگیاں“ دے واسیاں آسٹے امن تے پیار ای دسدے۔

روہی الے اک کھوہ ہو رکھٹ لیا گیا، جتھے جتے بلداں چکھے ولے خاں چھمک

لے کے بیٹھا اوہناں نوں ہاکدا دسدا.....

چودھری ٹکے خاں مُڑ کے اپنے اک کائے نوں پٹھلے کَلے وچ بھنگ گڈن دا آکھیا، ”کرمو، تھکے دا تمباکھو تے گُڑ بھاویں جنے وی کوڑے ہوون بھنگ دا توڑ نہیں ہو سکدے، ہُن تے نیامتے تے رانی نوں وی ستے خیراں نیں۔“

نُور محمد تے رانی دے ویاہ نوں پندرہاں ورھے بیت گئے، اوہناں نوں کوئی دھی پتر نہیں ہويا۔ رانی دی کنگھ خالی رہی تے رانی دے ماپے ایس ای دُکھوں گوریں جاپے۔ من پریت کور، انج آکھناں چاہیدا اے جو بھر جوان تاں نہیں رہ گئی آہی۔ اوہدی جوانی ڈھلکدی جاوندی آہی۔ ستونت اپنی دھی دی ڈھلدی جوانی دے وہم تے ہول وچ ہولی پیندی جا رہی آہی۔ اخیر اوس امرت سرنیڑے پاک کھوہاں دا پھیرا کٹن دا ارادہ کیتا۔ جیہدے بارے اوہدی ماں تے مُڑ کے نہال سنگھ اکثر گلاں کردا ہوندا آہا۔ جتھے نکلیاں ہوندیاں اوہ اک واریں گئی وی آہی۔ اوس سوچیا، ”خورے لیہناں پاک کھوہاں دے پھیرے کٹن تے ای من پریت دا کوئی جوڑ بن جاوے۔“ بُرالا جوگیاں، ”وچ تاں کوئی سکھ پروار نہیں راہندا آہا۔ منڈی، اوہ جانیہیں سکدی آہی، تے ایس گل دی اوہنوں زبان نہیں ویہل دیندی آہی جو اوہ نُور محمد یاں پیرو وچوں کسے نوں من پریت واسطے ور لہن دا آکھے..... آل دوال اوہ آپ وی بہوں بھال چُکی آہی.....“

ستونت ایس گھر دے لوکاں نال عجیب ای رشتے وچ پُرتی گئی آہی۔ اوہ ولّ را تے اوہدی اولاد دا دیناں ناہس دے سکدی، نجابت، نُور محمد تے ولے خاں اوہنوں سکیاں پھپھیاں توں وی ودھ جاندے تے من پریت کور دا آدرسکیاں بھیناں توں ودھ کردے۔ ولّ را دی بیوی جناں چرتیک جیوندی رہی، من پریت کور نوں اوس ہانہہ نال ای لا کے رکھیا..... ولے خاں تے من پریت کور نوں اپنا بچپن اک دو جے دا پرچھاواں لگدا۔

پتا نہیں ایہہ ولے دی کوئی کار آہی یاں ستی بُرالا جوگیاں، دی مٹی دا سجاتے تاثیر، کیوں جو ایس ستی بارے مشہور آہا جو لیہنوں فقیر تے درویش جوگیاں اباد کیتا۔ آہے

لاہے سن آ لے ایس وتی وچ آ کے سُنکھناں سُنکھدے، ون تے بوڑھاں تے رُکھ کالیاں، رتیاں تے ساویاں ٹاکیاں نال بھرے راہندے، ایہہ لوکاں دیاں منتاں دیاں ٹاکیاں ہوندیاں، مریاں وی کدی ایس ون تے پُرانے بوڑھ تے اپنی چُنتی دیاں ٹاکیاں پاڑ کے بنھدی راہندی۔ نُور محمد، دا اندروی ایس گل تے ضرور ہنھلدا، جو راول جوگی دے اوہناں نوں اتھے لیا کے وساؤن وچ کائی رمزتاں ضرور لکھی ہے۔ راول جوگی، رب الوں اوہناں نوں دان ہوئی سوغات آنگ آہا۔ اوہ ایہناں نوں اتھے وسا کے آپ بار، دی رُکھاں نال بھری ڈوگھی حیاتی وچ گواچ گیا آہا۔ نُور محمد دے من وچوں انج جیویں حالاتان نے چوری تے ٹھگی دامادہ گھرچ کے کڈھ دتا ہووے، پر پیرو ٹھگ دے من وچ ضرور کدی کدی اُبال اُٹھیندا۔ ایہو کارن آہا جو اک روز اوس نوں راوی دی من تے ممریز کے کھوہ، نیڑے متیریاں دیاں ولاں دا پتلا لگاتاں اوس چار جنیاں نوں کھوتیاں تے چھٹیاں سنے تیار کر لیا آہا۔

نُور محمد دا من اصلوں بدل چکیا آہا۔ ایہدے کئی کارن ہو سکدے ہاں۔ نُور محمد ایہنوں اپنے اندر آئی تبدیلی آکھدا، ”بُرا لا جوگیاں“ وچ سوائے نیامتے دے جیہنوں آپ چودھری کڈھ لیا آہا۔ اُدھالے دا کوئی واقعہ نہیں ہویا آہا۔ پر ہیں پنچایت ہون وچوں نُور محمد ہُن اپنے آپ نوں راوی دے اوہناں ستھیاں آنگ جانن لگ پیا آہا جیہناں داناں تے انصاف پوری راوی تے مشہور آہا۔ ہولی ہولی اوہدا بھار ماڑیاں تے لسیاں ال نیوندا جا رہیا آہا۔ اوس وسوں وچ ہون آلیاں اوہناں تبدیلیاں نوں وی وتی تے وتی دے وسنیکاں دی بہتری آسٹے نہ چاہوندیاں وی من لیا آہا جو انگریز سرکار الوں پیاں ہوندیاں ہاں، پر اودوں اوہدے من وچ ڈھیر کرو دھ بھریا گیا جدوں انگریز افسر، بیل دارنوں حکم دتا جو ”بُرا لا جوگیاں“ دے راہن آلیاں نوں پانی دی ڈھیر لوڑ کائی نہیں۔ اتھے نہر دا موگھا، نکا ای رکھیا جاوے۔ جدوں تیک آ لے دوالے دیاں وستیاں توں ودھ کے معاملہ تے مالیہ، ”بُرا لا جوگیاں“ توں آونا شروع نہیں ہوندا۔ ساڈے ایس حکم تے عمل کیتا جاوے۔



14

چمکدی رات وچ چمکدا جُشہ

شعبان دیاں وچکارلیاں راتاں دا پورا چن، اسمان تے انج چمکدا آہا، جیویں
چڑھدی سویر وچ دریا موجاں ماندا ہووے۔ ویڑھے وچ کھلوتی رانی نوں ویکھ کے نور محمد
دیاں اکھاں وچ ملوکڑی جیہی پیار دی لذت جاگی..... ایہہ اوہدا پر چھاواں ہے، اوہدے
وجود تے پھہار آنگ پے رہی چاننی۔ اوہدے اُتے پر چھاواں کیتی کھڑے پھلای دے
رُکھ دیاں لگراں وچوں انج لنگھ رہی آہی جیویں تو بنے نال تنیدی رُوں۔

مُڑ کے اوہ اوہنوں نواڑی پلنگھ ساہمنے کھلوتی دسی..... اوہ اوہدے توں پندرہاں
ویہہ قدم دور بوہے نیڑے، کندھ اتے لگے شیشے ساہمنے اپنے آپ نوں شنگھار رہی
آہی.....

اوس اوہنوں تکیا، اوہ مُڑ کے ہسی۔ نور محمد نوں جاپیا جو اوہ رانی دا پر چھاواں
نہیں۔ سگوں آپ رانی ہے.....

اوہ چن الوں ویکھ کے ہسی، مُڑی تے مُڑ اوہدے الوں ویکھ کے ہسی.....
اوہنوں لگا جو ہسدے ایلے اوہدے گل وچ پائیاں ہسیاں وچکاروں ناڑاں انج اُبھریاں

جیویں انت لذتاں دیاں ٹیسیاں تے اپڑ کے رگاں اُبھر دیاں نیں۔ اوہنوں وہم جیہا ہو گیا۔ اوہ اوہنوں اک ای ویلے وچ اپنی سوتنی تے مُڑ کے ڈری ڈری جیہی کیوں لگی؟ اوہ ایس گل نوں کدی وی نہیں جان سکیا۔ پر اوہ جاندا آہی، وتی وچ گلاں بنیاں ہوئیاں نیں جو رانی وتی دیاں کڑیاں آنگ عام کڑی نہیں۔ رانی تے انج ہے جیویں کسے پرانی روح وچ جان پے گئی ہووے..... اوہ اوہنوں ہُن روز نویں توں نواں روپ وٹاوندی جا پدی۔

نور محمد، چن دی چاننی وچ چمکدے اوہدے وجود دی پھہار وچ نھاوناں چاہوندا آہا پر جدوں اوہ اوہدے ال ٹری تاں اوہدے پیراں وچ انج جیویں جھانجھراں دی چھنکار ہوئی ہووے تے نور محمد دا دل سینے وچ جھانجھراں دی چھنکار آنگ چھنکن لگ پیا۔ مُڑ اوس سوچیا: ”جھانجھراں تے رانی کدی پائیاں وی نہیں، اوہنوں ایہہ چھنکار کتھوں آئی؟“

پیرو ٹھگ، جدوں مشرے ڈھلیرے دے لیاندے ہوئے متیرے نوں ٹک لا کے کھادا تاں اوہدا ذائقہ انج جیویں اوہدیاں رگاں وچ رل گیا۔ اوس سمے، سنتے اُجلے تے وتی دے کجھ ہورس جواناں نال صلاح بنائی جو ہووے نہ تے کھوہ ممریز کے کھرلاں تے اپڑیے تے اک دو چھٹیاں متیریاں دیاں تروڑ لیا یے، کھوہ تے اپڑن دی صلاح رات دی بنی کہ راتاں چاننیاں نیں تے رات نوں ای چلاں گے۔ کھوہ ممریز کا، دریا دی بڈھ وچ آہا، جتھے لئی، کانہہ تے سردیاں جھاڑیاں ہانن۔ جتھوں لنگھناں ہر عامی سامی داکم نہیں آہس۔ اوہناں کھوتیاں تے آتھر گتے، اُتے چھٹیاں رکھونیں تے ٹرو گے۔ وتی وچ نور محمد، سنے کسے نوں وی اُگھ سگھ نہ لگن دتوس۔ چنگی تقدیروں رات چاننی آہی، اوہ متیریاں دے واڑے وچ پھر کے اپنی مرضی دے متیرے تروڑ کے چھٹیاں بھر دے رہے..... مشرا، سنتا تے شماں حالے او تھے ای ہدوانے تروڑ کے کھا رہے ہانن جدوں کہ پیرو ٹھگ، کھوتیاں لے ٹرن لگا۔ ایس ایلے ای واڑے دی راکھی تے بیٹھا ماہنی مصلیٰ آن اپڑیا۔ اوس علیک سلیک پچھوں پچھیا: ”تسیں اتھے کیہ پئے کردے او؟“ تاں ایہہ بولے، ”ساڈا، ڈھگا

چوری ہو گیا اے، اوہنوں لبھدے وڈے ہائیں؟“

”ڈھگا، کدائیں ایڈا ای نکا آہا جیہڑا ہدوانیاں دیاں ولاء وچ لگ گیا ہے، نالے لبھدے تسیں ڈھگا وڈے او تے واڑا میرے ہدوانیاں دا اُجڑیا پیا ہے؟“ ماہنی کاوڑتج کے بولیا۔

اگوں ایہہ بولے، ”جیکر چار، چھ ہدوانے تروڑ لئے نیں تاں کیہ حرج ہو گیا ہے۔ اسیں تے حالے ہور وی پٹنے نیں۔“

ماہنی مصلیٰ، تاں انج جیویں بھانہڑ بن گیا ہووے۔ ”ہلا، تہاڈے پیو، دا جو واڑا ہويا، چھٹیاں بھری وڈے او تے حالے آہدے او ہو ر پٹنے نیں!“ اوہ کھروا بولیا تے ایہہ اوہدے توں وڈھ.....

ماہنی مصلیٰ دا جُشہ آہا ساہناں ورگا، ہتھیں پتل دے کناریاں آلی ڈانگ، تیل نال لشکدی ہوئی۔ ایہہ جو اوہنوں مارن آسٹے اگانہہ وڈھے تاں اوس پباں بھار ہو کے ڈانگ ماری جو سُنٹے اُجلے دی مجال تے جا لگی۔ تے ”ہائے او ملکھو“ دا ہاڑا گھتدا اوہ بھوئیں تے۔ سنٹے اُجلے دے بھوئیں تے ڈھاہندیاں نال ای ایہہ اوہنوں پئے گئے تے ماہنی مصلیٰ نوں مار مار کے ادھ مویاں کر چھڈ پونیں۔ مُر سنٹے اُجلے نوں کھوتی تے بٹھا کے ٹرو گے۔ ماہنی مصلیٰ دی حال پاہریا سُن کے ماہنی دے گھر والے آن اپڑے تے اوہنوں چا کے مریز کے کھوہ دے رائے عبدالحق کول لے اپڑے۔ شماں تے مشرا ماہنی نال گھول کر دے پچھانہہ رہ گئے ہائَن۔ جدوں کہ پیرو، سنٹے نوں لے کے وستی ول نوں دھسی گیا۔ مشرا تے شماں گنڈ وچ اجیہے رُ لے جو مُر کے مریز کے کھوہ تے اپڑ گئے۔ ماہنی مصلیٰ او تھے پہلے توں ای اپڑیا ہويا آہا۔ اوس ایہناں نوں سیہان لیا تے منجی تے لمے پئے پئے عبدالحق نوں دسیوس: ”ایہی ہائَن رائے صاحب، ہُن تیرے ساہمنے آپنے آپ نوں بے دوسیاں دسن آئے نیں۔“ ماہنی مصلیٰ دی ایہہ گل سُن دیاں ای عبدالحق بولیا: ”پھڑ لوو اے

ایہناں نوں تے پھڑ کے بنھ دیو۔“ ایہہ سندیاں ای ڈیرے تے بیٹھے بندے اُٹھجے۔ مشرا
تے شماں اوتھوں انج بھجے جو اوہ ہرن جیہناں کچھے شکاری گتے لگے ہوون، اوہ وی کیہ
بھجدے ہوون گے..... راہ وچ جھاڑیاں نال اڑ کے مشرے دی تریڑ دی گھل گئی، اوس
اونوں چھکیا تاں سہی پر پچھوں آوندی واہر دے خوف توں اوہدے ہتھیں اک ٹاکی ای
آئی، اوس مُڑ کے نہیں ویکھیا۔

مشرا، جدوں وتی اپڑیا تاں اوہدے سارے گھر دے ویڑھے وچ سُتے ہاُن۔
ایہہ لیندا منجیاں تھلے وڑ گیا۔ گھر آ لے گھوکی پئے ہاُن پر اوہدی بھر جائی کھڑک سن کے
جاگ پئی تے ایہہ سوچ کے کوئی کتابلا آیا ہوناں ایں ہُشکر دی رہی۔ مُڑ اوس جدوں منجیاں
بیٹھ جھاتی ماری تاں اوہدے آنے تاڑے لگ گئے، تے حُلق سُک گیوس، سہم کے بولی:
”چو..... ر..... اگوں مشرے لمیاں پے کے ٹوٹری کڈھی تے آ کھیوس: میں، چور نہیں
مشرا، آں۔ مینوں کوئی چادر دے تھلیوں ننگواں۔“

اوہدی بھر جائی دے ساہ وچ ساہ آیا تے اوس مونہہ پرانہہ کر کے اپنا اُتلا امانتی
جیہی اونوں پھڑا دتا۔

آوندی سویر جدوں ایہہ ہدوانے حالے وتی وچ ونڈے وی نہیں گئے ہاُن۔ اوہ
مُصلی تے عبدالحالق کھل اک وڈی پرہیا لے ”بُرا لا جوگیاں“ وچ آن اپڑیا۔ نُور محمد، دی
حویلی وچ پرہیا بیٹھی تاں ایہہ منن کائی نہ..... پر نُور محمد، اندروں ہسے کیوں جو اونوں تاں
پیرو، رات دی وارتا سُنا چکیا آہا۔

مندے بھاگوں اینے وچ سنتا اُجلا وی آن اپڑیا، جس سر تے پگ بدھی ہوئی
آہی۔ ماہی مُصلی اونوں آوندیاں سیہان لیا تے آ کھیوس: ایہی بندہ ہے جیہنوں میں
ڈانگ ماری آہی تے پھڑ ہو کے ڈھہہ پیا آہا۔ لیہنوں آکھواپنے سرتوں پگڑ لاہوے۔“
سنتے اُجلے آکھیا: ”ایہہ ایویں کوڑ پیا ماردا ہے مینوں تے سرتے کھگی لگی ہے

نکراں دی سالھ بناوندیاں۔“

پرہیا دے آکھن تے جدوں سنتے اُجلے پگڑی لاہی تاں اوہدا کھوپر کھلیا ہویا آہا۔ گل ساریاں تے گھل گئی۔ پرہیا، وچ دوہاں دھراں وچکار سے چرتیک رپھڑ پیا رہیا اخیر گل ایس نیاں تے مُکی جواگانہ توں ”بُرا لا جوگیاں“ تے ممریز کے کھوہ وچکار کوئی اجیہا واقعیہ نہ ہوسی۔ گل پنچایت وچ ای توڑ چڑھ گئی۔ سرکار تیک نہ اپڑی۔ اُنج وی دوہیں دھراں سرکار توں ودھ اپنی پرہیں پنچایت نوں سمجھدے ہاُن۔ مُز کے ”ممریز کے کھوہ“ دے کھراں تے ”بُرا لا جوگیاں“ دے چودھریاں وچکار بنی سانجھ ورہیاں تیک چلدی رہی۔

”بندہ کچھے رہ جاندا ہے ویلا اگے نکل جاندا ہے“ ایہہ گل راجوں کاٹھیے دی چھیڑ بن گئی آہی۔ جیہنوں تھوڑا سماں ای ہویا آہا ”پکی ماڑی“ توں اُتھج کے ”بُرا لا جوگیاں“ آن وسیا آہا۔ اوہ تھوڑی جیہی بھوئیں وچ ڈھیر فصلاں تے سبزیاں اُگاؤن دا ماہر آہا۔ نُور محمد اوہنوں روہی آ لے مربع دے سرے تے کجھ ککے بھوئیں دے دتی۔ جتھے اُگائیاں ہوئیاں اوہدیاں سبزیاں، ساری وستی ورتدی تے گڈ بھرتج کے منڈی وی جاندی..... اوہ اپنی گھردی تے دھی نوں وی کے کارے لائی رکھدا۔ کدی کدائیں جیکر وستی وچ آوند تاں چوپال جا بہندا تے ایدھر اودھر دیاں ہتھیریاں گلاں کردا تے گلاں کردیاں ایہہ ضرور آکھدا: ”بندہ کچھے رہ جاندا ہے ویلا اگے نکل جاندا ہے۔“

اوہدی ایس گل دا وستی دے چھوہراں ٹھٹھا بنایا ہویا آہا۔ نُور محمد جدوں کدی اکلیاں بیٹھے ہوياں ایس گل تے گوہ کردا تاں اوہنوں لیہدے وچ حیاتی دی رمزگی دسدی۔

پکی ماڑی دے اک ہندو پنپے ہتھوں اپنی زویں، مال ڈنگر تے بھوئیں بھاٹا اوہ بیاج وچ رکھوا آیا آہا۔ بیاج دا ایہہ چکر اوہدی ہٹی توں لون مرچ لیندیاں شروع ہویا۔ اکو

راحمو کاٹھیا ای نہیں کنے ای نکے وڈے زویں دار اوس بنیے ہتھوں لیج گئے ہان جوہن اپنی
حیاتی اوویں گزارن تے مجبور ہان جیویں راحمو کاٹھیا۔

انج جوتیاں توں آئے ہوئے لوکاں وچوں جبکر کسے بدلایا ہویا منکھ ویکھناں
ہووے آہا تاں اوہ نور محمد نوں ویکھ سکدا آہا۔ اوہدے اندر اپنی وڈی تبدیلی آ گئی اوہدا
کارن اوہ آپ وی نہ جان سکیا۔ کہے تاں سڑدی بلدی اگ دا انگار بنیا رہیا تے انگریزاں
خلاف لڑدا رہیا، کہے ہن ہر ایلے ایس ای قیاس تے گمان وچ دسدا، جو کیویں اوہ سرکار
دے خزانے وچ ڈھیر توں ڈھیر مالیہ اگراہ کے جمع کراوے، ایہہ اوہدی اپنی ذات دی
تبدیلی آہی یاں ایس وتی دی مٹی وچ کجھ اجیہی تاثیر آہی۔ یاں راول جوگی دی ذات دا
کوئی کرشمہ آہا جو اوہناں نوں استھے اباد کر کے آپوں وسدی بار وچ کھڑتج گیا یاں پھیر
رانی نال ویاہ دا نتیجہ آہا۔ گزرے ویلے دیاں یاداں ہان جو سہن جوگ نہیں ہان تے
اوہنوں نابری توں ڈکی کھلوتیاں ہان۔ یاں پھیر وتی آلیاں دی دھیمی چال چلدی حیاتی
نوں اوہ اوویں ای چلدیاں راہن دیوناں چاہوندا آہا..... پیرو ٹھگ اوہنوں کئی واریں
چکھلیاں گلاں یاد کرواندا، اوہنوں ولا را، عیسے خاں، گہنے خاں، نجابت، سردار نہال سنگھ تے
دو جے بے دو سے لوکاں دے خون دا واسطہ گھنندا، پر اوہ تاں ہن اوہنوں پہلاں والا نور محمد
ای نہ لگدا، جس انگریز لاٹ نوں رکھ تے چھہ کے اوہدیاں کدھاڑیاں تے پلاکی مار کے ڈوہ
ڈکرے کر چھڈیا آہا..... اوہدے ایس سبھا توں عاجز آ کے ای تاں پیر وٹھگ، مشرے،
شمے تے سنتے نوں ممریز کے کھوہ لے وڑیا سی، تے بار، دے ایہناں جی داراں نوں ایہہ
متیرے بہوں مہنگے پئے ہان۔ مہنی مصلی ہتھوں نموشی منے ہوئی۔

گل تاں راحمو کاٹھیے دی وی نور محمد تے بار وچ وسدیاں ہووے ڈھیر قبیلیاں نال
کجھ رلدی ملدی آہی۔ اوس راتیں راحمو کاٹھیے کیویں ٹھٹھا بنا کے اپنی ہڈ ورتی سنائی،
چوپال وچ بیٹھے ہر بندے انج سنی جیویں اوہناں نوں سب سنگھ گیا ہووے۔ آکھدے

ہائِن جو، چوپال وچ بیٹھیاں بندیاں نوں کئی واری سڀ سنگھ جانداتے اوہناں نوں پتا وی نہ لگدا۔

راحمو سُنایا: اسیں تے بار توں وی پار دے لوکی ہوئے، راجستھان وچوں ہوندے ہواندے پکی ماڑی نیڑے جا آباد ہوئے۔ اوتھے پہلوں توں ای اوکھ، گل تے پڈھیار پئے راہندے ہائِن۔ جنگل بار وچ ای راہناں بہناں کیتا۔ ساڈے کول اُٹھ، مجھیں گائیں، بھیدیاں، بکریاں، گھوڑے تے کھوتے ہائِن، جو اسیں بڑیاں مختاں نال بنائے۔ اُتوں راج انگریز دا آ گیا پر سانوں نہ تے اک روپیہ دے فارم تے مربعا بھوئیں ڈھبجی نہ انگریز دی مخالفت تے نہ ای اوہدے حق وچ تلوار چلن تے..... گھروچ دسیا جاند ا جو میرے دادے پڑدادے تے اوہناں دے بھرا اپنے جنوراں اُپر انگریز دے فوجی ساز سمیان نوں اک تھاہروں چُک کے دوجی تھاہریں ڈھوون داکم کردے۔ کئی واریں تے ایہہ پینڈ ابھوں لمیرا ہوندا تے کئی کئی مہینے اوہ باہرای راہندے۔ ایہہ کم اسیں ای نہیں کردے ساں سگوں دوجیاں برادریاں دے لوک وی کردے ہائِن۔ اوہ ساڈے وڈکیاں نال جنگ دی رسد ڈھوون واسطے سروان بن کے راہندے۔ ایس بار برداری دے کم توں خوش ہو کے ای ساڈے وڈکیاں نوں بھوئیں دتی گئی۔ بھاویں ساڈا قبیلہ آہا خانہ بدوشاں دا پر مختی بڑا آہا۔ تہانوں پتا ہے.....

راحمو کاٹھیے تھے داگھٹ بھرن تے ساہ لین لئی چوپال وچ بیٹھے لوکاں نوں جیویں اپنی گل نال سہمت کرن لئی آکھیا:

”ایہہ بھوئیں جیہڑی دتی گئی آہی، غیر آباد آہی، ٹوئے بے تے ٹلے ہائِن، اُچاناں، نواناں تے جھاڑیاں بوٹیاں نال بھری ہوئی ہر تھاہر۔ وڈکیاں دی تاں جوانی ایہنوں پدھریاں کرن وچ ای لنگھ گئی۔ جنگل نوں وڈھناں کیہڑا کوئی سوکھا کم آہا۔ ایہنوں وڈھن آسٹے لائل پور دے اک دوریڈڑے قصبے تاندلے توں لوہے دا سمیان لے کے

آؤندے ساں۔ اخیر لے دناں وچ میں جدوں حالے نکڑا جیہا آہا، کدی کدی گڈتے بہہ تے نال ٹر جاندا۔ ریل دیاں لائنیں پیاں وچھردیاں ہاں۔ جھنگ تے گوگیرے آلیاں نہراں وچ پانی گھت کے آہے لاسے۔ وسائیاں جھوکاں دیاں زمیناں نوں دتا جا رہیا آہا۔ وڈے وڈے رُکھاں دیاں لکڑیں وڈھ کے تے سُکا کے گڈاں اُتے دھر کے توڑ ریلوے لائنیں تے انگریز لاٹاں آسٹے بندیاں بنگلیاں، تھانیاں، کچھریاں، تے سراواں تیک اپڑائیاں جاندیاں..... اسیں تے انج جیویں انگریز سرکار دے خاص کارندے آہے پر خرابی ساری ساڈے اک وڈے کاٹھے چاگھتی..... مُڑ کے ساڈی ہر شے چپت ہو گئی تے اسیں نکلے ٹوکری ہو گئے۔ راہی کرن لگ پئے پر انج کدوں پوری پوندی ہے۔ جو کماوندے ہٹ وائیاں کھوہ کھس لیندا۔ مختاں ترلیاں نال بنائی تھوڑی جیہی بھوکیں آہی اوہ وی اوہدے اگے گروی پئی اے۔ اوہ تاں بھلا ہووے بُرالا جوگیاں دے تہاڈے پردھاناں تے چودھری ٹور محمد جیہے ساؤ بندے دا جس مینوں پنے نتانے جی نوں اتھے تھہر ٹکانا دے چھڈیا..... حالے وی برادری دے ڈھیر لوکی تاں اودھراں ای پئے وسدے ہین کئی تاں اوہناں وچوں بڑے پرہیا دے تے سدّ چکھیندے نیں۔

ٹور محمد، راجو کاٹھے دی گل چیتے کردا آہا۔ ادھی رات دا ویلا آہا۔ اوہ سوچدا آہا جو دیس باروچ راہن آ لے لوکاں دیاں حیاتیاں نکلے وڈے فرق نال اکو جیہیاں ای تاں ہین۔ ایہناں نوں بدن دی لوڑ ہے۔ اوس سوچیا تے پاسا پر ت کے رانی دے ساہاں دی تتی ہواڑ وچ ڈکو ڈو لے کھاؤن لگ پیا۔

ستونت، دی کہانی بھلے رشتیاں تے گواچ گئے پیاراں دی کہانی آہی۔ جیہنوں اوس اپنی دھی من پریت دی صورت ڈھا کے چا کے وڈیاں کرن دا جتن کیتا آہا تے اوہدے وچ اوہ سچھل رہی آہی۔ ایہہ سچھلتا اوہنوں من پریت دے امریندر نال ویاہ دی صورت وچ ڈھمبی۔ من پریت دے ویاہ اُتے ستونت کور دا حال ویکھ کے من پریت دا ماں دے

اتم تے خالص پیار بارے صدق ہو روی ودھ گیا۔ ستونت مقدس تے پوتر تھاہراں دی ہو
وی قدر دان ہو گئی..... ستونت نکی ہوندی دی ماں نے اک واریں چھیہر لے، چھیویں
بادشاہی دے گردوارے چھ ماہلاں آ لے کھوہ تے جا کے اشناں کرن دی سدھر ظاہر کیتی
آہی۔ اخیر اوکھی سوکھی ہو کے ستونت اوہنوں لے وی گئی تے ہُن آپوں من پریت نال
ایتھے اپڑ گئی۔ ایتھے اپڑ دیاں نال ای ستونت دے من دی آس وی پوری ہو گئی۔ امرت سر
راہندے جیت کور تے اوہدے گھبرائے پتر امریندر سنگھ نال اوہناں دا میل ہو یا۔ جیت کور
اوہنوں کجھ دیہاڑے اوہدے گھر راہن تے گردوارہ صاحب متھا ٹیکن دا آکھیا۔ دو تن
دناں وچکار ای من پریت تے امریندر دی گل وی پکی ہو گئی تے جھبڈے ای اوہ لوک
گڈاں تے گھوڑیاں اُتے بارات لے کے اپڑ گئے۔ ”بُرا لا جوگیاں“ دے سارے
وسنیکاں اپنی ایس دھی من پریت کور داویاہ رتجھاں نال کیتا۔ انج جو امرتسروں آئے جانجی
تعریفاں کر کے ہٹ گئے۔ ستونت، نُر محمد نوں من پریت دے سر تے ہتھ رکھ کے ڈولی
بٹھاوندیاں آکھیا:

”نور محمد، پترا، توں مینوں میرے جوائی ساہنے تے اوہدے جانجیاں ساہنے
وڈیا، میری گور آں اگے بنیتی اے جو اوہ تینوں کامیابیاں دین تے تینوں ربّ الوں ددھ
پُت سنے کسے شے دی گھاٹ نہ رہوے۔“

اوہدی دعا پوری ہوئی تے اگلے ای ورھے نور محمد تے رانی دے گھر وریام جمیا.....
آوندیاں ٹھنڈاں وچ ستونت نوں سرسام ہوئی۔ امریندر تے من پریت امرت
سروں بھج اپڑے، پروڈی عمر تے کمزوری وجہوں کسے حکیم دے کسے دوا دارو کم نہ کیتا نہ ہر
ایلے اوہدے منجے دوالے بلدیاں تھا پیاں دی اگ داسیک ای اوہنوں بچا سکیا تے نہ ای
چنچمی دے میلے چھ ماہلاں آ لے کھوہ توں لیاندا پانی۔ ستونت نے اپنے ساہ دے دتے.....
نور محمد دے آکھن تے امریندر تے من پریت ”بُرا لا جوگیاں“ وچ ای اباد ہو

گئے۔ نور محمد ورھیاں توں بنی آ رہی اپنے پُرکھاں دی سانجھ نوں توڑ چاڑھن لئی ایہہ جتن کر رہیا آہا.....

اگلے ای ورھے من پریت تے امریندر دے گھر دھی جی، جیہدا ناؤں امرتا کور رکھیا گیا۔ امرتا، وریام توں اک ورھانگی آہی..... نور محمد، من پریت تے رانی نوں مبارکھ دیندیاں آکھیا: ”رب دی مہر ہوئی گھر وچ دھی آ گئی۔ ہُن ایہہ گھراک پرپوار بن گیا ہے۔“



15

موت اک مریلا جنور

پر جیکر مہر نہ ہوئی تے اک گہنے خاں دے ٹبر تے، مریاں تے نوابی تے مہر نہ ہوئی۔ گھر بھائیں اک ای آہا پر بڈھپے دی عمر نوں ہتھ لاندیاں ایہہ زنانیاں جیہناں اپنے ہتھاں نال بار اُساری۔ اوہناں دے جٹیاں دی مٹی وچ تاں کوئی لگر پھٹی وی تاں سکے سانس ڈھنگر آنگ کڑنگ ہوئی..... ولے خاں اک سکے ڈھنگر آنگ ای تاں آہا۔ کڑنگ ہويا۔ جیہنے ”جوتیاں“ توں لے کے ”برالا جوگیاں“ تیک دی دھرتی نوں اپنے مڑھکے دے نال وتر کیتا اپنے لہو نال واہیا، اپنی ہمت نال گاہیا۔

”کائی اجیہی ورکھا وے، جو سانوں اندروں باہروں نہال کر جاوے۔ حیاتی جیہدے پانیاں نوں ورتے ہنڈھائے بناں، پانیاں تے بنے پل توں لنگھ جان آنگ ہے۔ پل تھلیوں لنگھدے پانیاں دی تریہہ میرے توں وکھ میرے پتر علیے نوں وی تاں ہووے گی۔ اوہدے وجود وچ وی تاں سدھراں دا جہان اباد ہووے گا۔ جیہڑا ہولے ہولے گُستان بندا جاندا ہووے گا۔ اوہ سوچدی، نہ تے اوہ ماں پتر تے نہ ای گہنے خاں اُنج حیاتی مان سکے جیویں ماننی چاہیدی ہے۔ سگوں گہنے خاں تاں جیویں مُردے مُردے ای حیاتی

لنگھا دتی۔ تھکے ٹرے۔ ہُن اوویں ای میں وی ٹردی ٹردی تھک گئی آں۔ ترٹ گئی تے
چھاواں بھال دی ودی آں۔ جدوں میں وی بہہ گئی تاں میرے ولے خاں دا کیہ بنے گا؟“

مریاں نوں جدوں پتا لگا بُرا لے وچ اک نواں سنیا را آیا ہے تے جھنگ آ لے
علاقے دا ای سدّ چُکھیندا ہے۔ اج کل ٹور محمد دے پتر، اوہدی زنانی تے امرتا آ سٹے
ڈھولنے، مُندریاں تے گہنے بنا رہیا ہے تاں اوہدے سینے وچ اپنے پتر ولے نوں پرناون
تے اپنی نو نہ دیاں ٹومباں گھڑاون دی سدھر جاگ پئی۔ بھاویں ولے دی عمر ہُن ویاہ
شادی آ لے جھیلیاں توں لنگھ گئی آہی۔

مریاں نوں جھنگ یاد آیا۔ اوہنوں یاد آیا جو کیویں اوہدے پیواک کارگر سنیا رے
نوں اپنی وتی لیا وسایا آہا تے اپنی حویلی دے نال ای اک پٹھکڑی بنا کے دتیوس۔ جتھے اوہ
مریاں تے اوہدی ماں دے گہنے گھڑن لگ پیا۔ کدی کدائیں مریاں نوں اوہدی ماں بندیاں
پیہیاں ٹومباں وکھاون لئی اپنے نال ای سنیا رے ال لے جاندی۔ مُڑ کے مریاں، حویلی دی
کدھ وچوں بنائی باری وچوں ٹپ کے آپ ای او تھے آون جاون لگ پئی۔ اوہ سلیمے سنیا رے
نوں ٹومباں تے گہنے گھڑ دیاں ویکھدی راہندی تے سلیماسنیا را اوہنوں۔

”کئی اسانی نال توں اینیاں سوہنیاں ٹومباں گھڑ لیناں ایں؟“

مریاں اوہنوں آکھیا تاں سلیمے اوہنوں ویکھ دیاں کئی سہتا نال ولدا دتا:

”میں جناں وی سوہناں سوہناں گھڑ لواں، قدرت دے گھڑے گہنیاں توں

سوہنیاں نہیں گھڑ سکدا۔“

ایہہ گل مریاں دے پلے نہ پئی۔ اوس جدوں اپنی اک بیلانی سدّ و چُکھین نوں

دسیا تاں اوہ تاں مچل گئی۔

پتا ہی اوس قدرت دا گھڑیا گہنا کیہنوں آکھیا ہے؟“

”نہیں؟“

”نی اڑیے! تینوں ای تاں آکھیا پسو، ذرا خیال کریں تے سمھل کے رہویں۔
 سونناں گھڑن آ لے تاں اکھ وچوں سُر مہ وی کڈھ لین تاں تہانوں پتا نہ لگے۔“ سدو چھین
 دی ایہہ گل وی اوہدے پلے نہ پئی مُڑ جدوں گل کجھ کجھ اوہدی سمجھ وچ آون لگی تاں
 اونے چر وچ اوہدے پیو، سلیمے سنیا رے واسطے وتی دی اک نکڑ تے نویں بیٹھک اُسار دتی
 آہی جتھے سلیمہ، اپنی ماں نال راہن لگ پیا۔ پر اوس مریاں آسٹے کبھیاں سونہیاں ٹومباں
 گھڑیاں ہائن۔ جیکر اوہ گہنے خاں نال آوندیاں پلے بنھ لیوندی تاں کیدیاں چچیاں،
 جدوں اوہ پاؤندی۔ ”پتہ نہیں کس اوتر جانی دے کم آئیاں ہوسن اوہ کھٹمالا، کینٹھے، مالا،
 حمیلاں کانٹے، جھمر والیاں، مُندریاں، کنگن، چوڑیاں، پنجیاں تے باکاں، کیہ کیہ نہیں بنوایا
 آہا میرے پیو، میرے آسٹے، مُڑ ہر شے دو، دو واریں بنوائی۔ جیکر لے آوندی تاں کائی
 اک تاں میری ہوون آلی نونہہ دے وجود تے پھب جاندی۔“ ایہی سوچدیاں جدوں
 سُنیا رے دی دکان اگوں دی لنگھی تاں نہ چاہوندیاں وی اوہدے پیر اندرنوں وڑ گئے۔ اوہ
 ویکھ کے حیران رہ گئی۔ گلانی آلی بھٹھی وچ پئے کولیاں نوں پھوکنی نال بھکھا وندا ہویا
 اوہنوں سگوائیں دا سگواں سلیمہاں سنیا ر دسیا۔ پر مُڑ اوس سوچیا: ”رب خیر کرے شکلاں
 جیہیاں شکلاں سے۔ اوہنوں تاں ویکھے نوں وی ہُن ان گین ورھے لنگھ گئے۔“ اوہ پرتن لگی
 پر مُڑ پیر پچھانہہ ہٹاپوس تے نبھا کے اوہنوں ویکھیوس۔ اوہ زیوراں تے اوزاراں وچ اُنج
 ای رُجھا آہا جیویں سلیمہاں دسدا۔ اوس سوچیا۔ ”کیہو جیہی اڑچن آ گئی ہے، ہُن ویلا نہیں پر
 ویلا کڈھ کے میں ایس گل داویوا کرن اک واریں مُڑ آواں گی ضرور۔“

امینے سنیا رے سوتر دی وٹ نال بنائے ہوئے ڈیوے دی وٹ نوں اگ لائی
 تے پھوکنی نال واء دین لگا۔ اوہنوں لگا جیویں بوہے اپوں کوئی اندر وڑیا ہے۔ اوس اک
 لختے لئی اکھاں چُک کے تکیا۔ نُور محمد تے پیر و ہائن۔

نور محمد، یاں تے نکے وڈے مسئلے نیڑن لئی چوپال وچ بیٹھا راہندا، واہی نیچی تے فصلاں ویکھن ٹر پوندا۔ یاں پھیر جدوں دا اینا سنیا را بُرا لے وچ آیا آہا تاں کجھ ویلا اوہدے کول لنگھا وندا، اوہنوں کم کردیاں ویکھن وچ اوہنوں لطف آ وندا، کدی کدائیں وچ اک ادھی گل وی ہو جاندی، جیہنوں اینا اپنی پدھر تے لیا کے سوئے تے اپنی کاریگری اُپر ای لیا کے مکا وندا۔

اج وی اینا جدوں بھٹھی تا کے بیٹھا آہا۔ اوہدے ساہمنے تار بناون آلی مشین، سنھی، کیترا تے چیونٹی دھرے ہان، نور محمد تے پیرو امانتی جیسے اوہدے نیڑے آن کے بہہ گئے۔ اوہ گلانی آلی بھٹھی وچ گھٹ کے سوئے نوں گالدا، مُڑ رولر مشین وچ پا کے پتری تیار کردا۔ کٹائی کردیاں کُتراں اڈ جاندیاں۔ ریزے بھر جاندے۔ اوہناں نوں مُڑ کٹھالی وچ گھٹا تے گال لیندا۔ تار نوں ڈیزائن آلی ڈائی تے چاڑھ کے پتری نوں سنھی نال پھڑی رکھدا تے کیترے نال ڈیزائن مطابق پتری نوں کُتردا جاند..... اوہ چُپ چپتے اپنے کے لگا رہیا، آہرن اُتے وجدے ہتھوڑے دی واج دور دور تیک جا وندی رہی۔

سوئے دے گہنے بناون وچ اوہدی تے اوہدے پیو سیلے دی دُھم پوری مُلکھی وچ آہی۔ نور محمد اوہنوں آکھیا آہا جو گہنے انج دے بناویں جو مُلکھ ویہندا رہوے۔ ایس ای گلوں اوہ ہُن وی اپنے کم وچ انج ای لگا آہا جو اوہناں نوں اندازہ ہووے جو کئی محنت پیا کردا ہے۔ ڈائی وچ رکھ کے ڈیزائن بنا وندا، تار چھکدا، اوہنوں کٹدا، گندھک دے تیزاب، قلمی شورے، تے ابرق تے نظر پھیردا، سوئے تے چڑھاون لئی رکھے سہاگے نوں ویکھدا، مُڑ کے اوس تار نال جو، جالی تیار کیتی ہاسو، اوس نوں کیترے نال کٹ کے چونڈھی پھڑ کے جدوں ابرق اُتے رکھدا تاں اک سوہنا ڈیزائن تیار ہوندا۔ مُڑ کے اوس لیہناں وکھ وکھ حصیاں نوں ٹانکا لایا..... اوہ رانی، وریام تے امرتا واسطے گہنے پیا بنا وندا آہا، وڈیاں تے بچیاں آ لے..... نور محمد تے پیرو پئے ویکھدے ہان..... اوس چینی دے برتن وچ رکھے

تیزاب تے قلمی شورے نوں اُبالیا۔ اُبالا دے کے تیار کیتیاں ہوئیاں شیواں نوں اک جھٹکا دیتوس، مُڑ کے بُرشی آلی مشین تے رگڑیوس، صفائی کیتوس، تے اک نکا جیہا جھٹکا ہوو لایوس۔ سونّاں انج چمک پیا، جیویں سونّاں چمکدا ہے۔

”امیدیا، کاریگر ایس بئی توں، کاریگر، بہوں اُچا سُچا۔“ پیرو اوہدی تعریف کیتی۔
 ”ٹور محمد بولیا،“ ہر بندہ اپنے کسب وِچ ہنری ہوندا ہے۔ اک ویلے میں وی رہیاں پرہن نہیں۔ اصل وِچ تسیں اپنے کسب نال جُورے رہوتاں ای گل بندی ہے۔“ پیرو بولیا تاں اوہدے لہجے وِچ اُداسی تے منکھ آہا..... امینے جدوں اپنی تعریف سنی تاں سوچیوس: ”ہُنن ای ویلا ہے اپنے کسب تے ہنرنوں ایہناں ساہنے بنا ٹھنّا کے دس دا۔“ اُنج وی اکلاگ کم کرن تے تھکے ہون وجہوں تے کجھ پہراں توں بند زبان کھولن لئی اوہ کسے بندے دی اڈیک وِچ آہا..... ٹور محمد جیہڑا پیراں بھارا ای بیٹھا آہا۔ تھلا مار کے بہہ گیا۔ اکھے، ”ہُنن ایہی آسنگ وی نہیں رہی جو پب، جُٹے دا بھارا ای چاسکن۔“

امینے ایہہ قیاس کر کے جو ٹور محمد، دا مونہہ اوہدے ال نہیں ہے پیرو نال ای گل ٹوری۔

”پیرو بھراوا! ایہہ ٹومب، گہناں بناون وی کوئی کم ہے آپ ای تے توں دسدا ایں جو تہاڈے آسٹے کسے بندے دا گاٹا مروڑناں وڈی گل ای نہیں، تہاڈا کم تے صرف رومال نوں بندے دے گائے تیک اپڑاوناں ای ہوندا آہا۔ اگلا کم تہاڈیاں اُنگلیاں تے رومال اپنے آپ ای کر لیندن۔ میں وی ہوش لا، توں ایس کے پے گیا ہاموں۔ کجھ پیو دے ہنری ہون کر کے تے کجھ اپنے چچوں سوئے دا اجیہا پارکھ بنیا تے اجیہا کسب میرے ہتھیں آیا جو میرے بنائے ہوئے گہنیاں لئی ورتی سواہ تے کوڑے وچوں کدی کسے نہاریے نوں کجھ ہتھ نہیں آیا۔ نہاریے میرے گھروں تانپے بھر بھر کے سواہ لجاندا رہے، اخیر اک تھک کے بہہ رہے۔“

”اوہ کیویں؟“ نور محمد پچھیا۔

”اوہ انج چودھری جو گھنے تیار کرن لکیاں اک چنگا سنیا را سونناں، چاندی، پتل، لوہا، سکھ، سلور ایہہ ساریاں دھاتاں ورتدا ہے تے ایہناں ساریاں دھاتاں دیاں گتراں ایس سواہ تے کوڑے وچ رلیاں ہوندیاں نیں۔ نہاریے کردے انج جو ایس کوڑے نوں لجا کے اوہدے وچ ادھ سیر سکھ رلا دیندے تے بھٹھی وچ گھت کے لیہنوں پکاون لئی اٹھ گھنٹیاں تیک ایہدے تھلے لکڑ دیاں ڈکیاں دی اک بالدے۔ ایہناں اٹھاں گھنٹیاں اندر ساریاں دھاتاں نوں ایہہ سکھ گال چھڈدا، سوائے سوئے تے چاندی دے۔ باقی سارا کجھ بھٹھی دیاں کنڈھیاں نال لگ جاندا۔ لیہنوں کڈھ کے کٹھالی وچ گھت کے چرخ دے چھڈی، تے تھوڑا کو اُچا لجا کے پانی وچ سٹ دتا۔ انج ایہدے نکے نکے ذرے جیسے بن جاندے۔ جیہناں نوں کڈھ کے باٹی وچ گھت کے شورے دا تیزاب رلا کے اک تے دھر دتا۔ چاندی تیزاب وچ گھل کے پانی وچوں باہر آ جاندی اے تے سونناں پٹھاں بہہ جاندا ہے۔ لیہنوں اک واریں مُڑ پانی نال دھو کے، سُکا کے کٹھالی وچ گھت چھڈیے۔ بھٹھی وچ گال لیے۔ ایہہ سوئے دے ذرے جو کوڑے وچوں نکلے ہین خالص سوئے آنگ ای ہون گے۔ نہاریے دینہہ بر رات ایس ای کم لگے راہندن، پر اصل گل ایہہ ہے جو میں نوں لوکاں جو سونناں، ٹومباں، گھنے بناون لئی دتا۔ میں اوہدے وچوں کدے اک ذرہ وی لیہناں نہاریاں تیک نہیں جاون دتا۔“

”تیرے کول کیہ خاص چج ہے ایہدے آسٹے؟“ پیرو پچھیا، انج جیویں سوئے بارے ساریاں باریکیاں نوں جانناں چاہوندا ہووے۔

”آ، ایہہ ہوئی ناں گل.....!“ اوس نسبی نوں ٹانکا لاوندیاں چھڈ دتا۔ تھلا مار کے اک لت پٹھاں، اک لت اُتانہہ رکھ کے بہہ گیا۔

”لوکاں کول نسلاں توں گھنے اگے توں اگے ٹرے آوندن، نویں سریوں نویں

ڈیزائناں آلے زیور بناون لئی اوہ ایہناں نوں ساڈے کول لے آوندے نیں۔ اسیں جاندے آں۔ اوہناں وچ وی جوٹا نکے تے ملاوٹ ہوندی ہے اوہ اک تولا سوئے وچ دو تولے چاندی دی ہوندی ہے۔ جدوں کٹھالی وچ گھت کے گلانی کیتی چاندی اے۔ قلمی شورا، چاندی نوں اپنے وچ رلا ملا لیندا ہے۔ انج سونیاں تھلے بہہ جاندی ہے۔ پانی نال صاف کر کے نویں سریوں کڈھ لیا جاندی ہے۔ اوہدے تھلے تانبا دھر، لیا جاندی ہے، تانبے اُتے چاندی انج بھندی ہے جیویں مقناطیس نال لوہیا لگدا ہے..... پانی وچوں کڈھ کے کٹھالی وچ پگھراون نال چاندی ثابت رہ جاندی ہے۔ سونیاں وکھ ہو جاندی ہے۔“

”بندہ بہوں کسی ہے ایہدے نال رہ کے سونیاں نرا بچایا ای نہیں جاسکدا بنایا وی جاسکدا ہے۔“ پیرو سوچیا۔

اینا اپنی گل مکاون لئی ترکھا ترکھا بولی جا رہیا آہا۔

”.....نہاریے جیہڑی گلوں پندے، میں کردا صرف ایہہ آہا کہ دھلائی وچ اوہ وچ ورتدا جو وچ میرے وڈکیاں راہیں میرے پیوتے میرے پیوتوں میرے تیک اپڑیا آہا۔ اُنج اوہدے وچ میں وی کجھ وادھا کیتا۔ سوئے نوں اضائعیں جاون توں بچاون لئی میں جو بھٹھی سواہ نال بنی ہوئی ہوندی اوہدے وچ سکھ تے کوڑے وچوں نکلیاں ہوئیاں دو جیاں دھاتاں جیویں سونیاں، چاندی، پتل، تانبہ، لوہیا جو کجھ وی رلیا ہوندا جتھے دو جے سنیاں اک تولے سوئے وچ پنچ تولے چاندی گھتدے جیہدے کارن سوئے دیاں پنچاں جیہڑیاں لاہاں تے لگ جاندیاں ہاں بچیاں راہندیاں۔ جدوں کہ میں اک تولے سوئے وچ پنچھی تولے چاندی پاؤندا۔ جیہدے کارن میرے نال اوہ کجھ ناہس ہوندا جو دو جیاں نال ہوندا تے اصل گل وی وچوں ایہی آہی جو میرے توں لے کے گئے کوڑے وچوں نہاریاں دے ہتھ کجھ وی نہ آؤندا۔ ڈھیر توں ڈھیر ماسے دا پنچواں حصہ حد ڈوڈھرتی ضائع جاندی۔ جدوں دو جیاں سنیاں داہر، آریں اک تولے وچوں اک ماسا نہاریاں

دے ہتھیں آؤندا۔“

”ایہدا مطلب ہے جو توں ساڈے گہنیاں وچ وی ڈھیر گھاٹ نہیں پون دیویں
گا؟“ نور محمد ایہہ آکھ کے اٹھ بیٹھا۔

”ہشکے بئی تیرے.....!“ پیرو، نور محمد دی گل تے بولیا۔

مرد کے نور محمد تے پیرو، دے پیراں دی دھمک ہولی ہولی امینے دے آہرن اُتے
مارے ہتھوڑے دی واج وچ گواچدی گئی

.....

سے داڑیل گھوڑا خورے کنے ای چیترا اپنے پیراں دے پنکھڑ وچ گھستی اگے ای
ای اگے لنگھدا گیا، پر نواپئے، مریاں، من پریت تے برالا جوگیاں دیاں ایہناں ارگیاں
ہور زنانیاں او تھے دیاں او تھے تے اُنج دیاں اُنج ای رہیاں۔ ایہناں لئی کوئی وی چیترا اپنے
چت وچ کدی کوئی رنگاں بھری بہار لے کے نہ اپڑیا۔ ہمیش کوئی صدمہ کوئی بھیڑا سنیہا ای
لے کے اپڑیا ایہناں تیک۔

نواپئے اپنے ساہمنے اینیاں کو تبدیلیاں اینیاں کو موتاں ویکھ چکی آہی، اینیاں کو
موتاں دے صدمے تے دُکھ بھگتا چکی آہی جوہن اوہدے من اندر گونجدے ویناں،
ویناں دے بولاں تے ایہناں بولاں دے بنیریاں تے بیٹھے پکھیرو، وی اڈ پڈ گئے ہاُن۔
تھوڑے دینہہ ہوئے اوس نور محمد نوں موہر کھے تاپ وچ نچر دے منجی تے پئے پئے نوں
ویکھ کے رانی نوں آکھیا آہا: ”موت اک لمی چپ دی کھڈ وچ وڑ جاوُن لئی پہلا پیر ہے۔
ایہہ پیر پٹن مگروں بندے نوں کنے وی خوفناک تے مریلے جنوراں دا ساہمنا کرنا پوے اوہ
اک پیر، وی پچھانہہ نہیں پرتا سکدا کیوں جو موت سبھ جنوراں توں مریلا جنور ہے۔“

رانی جیہدیاں نیندراں اوہدیاں ماں دے مرن مگروں اُگھڑ گئیاں ہاُن، نور محمد
نوں اجیہی حالت وچ ویکھ کے کوئی وی داء کوئی پُرا پٹھلے کلیاں وچ گڈی بھنگ وچوں

گوڑھی نیندر دی گھوکی لے کے اوہدے تیک نہ اپڑدا۔ ہُن جدوں اوہ ڈوگھی نیندر سوناں
چاہندی آہی۔

”وریام، سہ دی پوڑھی تے پیر دھردا ہویا کڈا گبھرو جوان نکلیا ہے پوری وستی،
وستی دے جواناں وچوں لاہے ای سیاپدا ہے پر اوہدی ایہہ وکھری پچھان وی سانوں اپنی
طاقت تے ہمت نہیں دے رہی کہ اسیں ایہی جان سکے، اوہدے بارے وستی دیاں
مُٹیاں کیکہ گلاں کر دیاں، کیکہ سوچدیاں نیں۔“ رانی ایہی سوچدی، نور محمد دی سرہاندی بیٹھی
ہر ایلے اوہدا جُشہ گھنڈی راہندی۔



16

باگے دا بوہا کوئی نہ

اوہی چٹی روڑ چاننی جو ہر مہینے بار وچ آن لہندی۔ بھادرو دا اخیر لا ادھ شروع ہون آلا ہے۔ باردی ڈونگھی چُپ وچ کتے کوئی بینڈاوی چیکدا نہیں سنیدا۔ مریاں منجی تے مودھی پئی اے۔ اپنے آپ نال گلاں کردی جا رہی ہے۔ اوہدی واج سلور دے بھانڈے ڈگن آنگ ویرھے وچ دور دور تیک کھلر جاندی ہے۔

”میری ثابت سالم ہستی نوں ادھ وچکاروں تروڑ کے سٹ گلیوں گہنے خاں، مینوں ستھر جوگی کر گلیوں، ہر ایلے سولاں دے مونہہ آئی رہنی آں۔ میں کیہ کھٹیا بار وچ آ کے گہنے خاں۔ تیرے چار دناں دے عشق دے وگدے نگال وچ ترن توں وکھ۔ مڑ کے تاں انج جیویں حیاتی جھلا راں دے اوہڑ کھاہڑ ویہناں وچ ای پھس گئی۔ جیکر توں پرت کے آسکدوں تے ویکھدوں مریاں جیہنوں توں ہمیش ہانہہ نال لائی رکھدا ہاویں زمانے نوں اوہدی کائی پرواہ نہیں، تے نہ ای لکھیں ہتھ آئے تیرے ولے خاں دی۔ بھوئیں دی راکھی کردیاں مٹی نال مٹی ای تاں ہو گیا ہے۔ زمانہ کیہ مُل دیندا ہے مٹی دا۔“

مریاں بُت دی ڈھیری آنگ انج اپنے آپ نال گلاں کردی راہندی۔ آل

دوالے دے لوکی آکھدے: ”مرا کیا ہو گیا پسو۔ ایس عمرے بندہ زنانی انج دے ای ہو جاندن۔“

نواپے اوہنوں سنبھال دی، سہارا دیندی۔ حالاں ہُن اوہدے وچ اپنی آسنگ ناہی۔ اوہ بیتے ویلیاں دیاں گلاں کر کے اوہدامن پرچاوندی۔ پر کجھ ای دناں مگروں اوہدی حالت مُر کے اوہی ہوندی۔ جیویں اج ہاسو۔ اج وی اوس پہلوں آنگ اک لماں سُفناں ویکھیا۔ حالے تھوڑے ای دیہاڑے ہوئے ہاُن اوہناں دی وستی وچ جو پواں آیاں نوں۔ سبھ توں پہلاں نواپے تے مریاں ای ہاُن جیہناں اپنے گھر وچ تانیا تیا، پاولیاں دی سوانی آ کے اوہناں دے گھریں پانجے گئے ہاُن۔ پانجے گن کے اوہناں نوں دسیا ہاسو جو ایہناں نال کنے کوکھیں بن سکدے نیں۔ مُر کے اوہناں دے ویڑھے وچ پانجے گنبدے رہے، تے موٹے کھدر دے کپڑے، چادران، تہداں، جھگے، صافے، لنگوٹے تے کینچ تیار ہوندے رہے تے ایہہ تیار کپڑے وستی دے وکھ وکھ گھراں نوں دان ہوندے رہے۔ کنے ای چرتیک تاں مریاں چرخیاں دی گھوکر ای سُندی رہی۔ اوہنوں پتا ناہس لگدا جو اوہ پرانے ویلے بارے قیاس پئی کردی ہے یاں اوس سفنے وچ گواچی ہے۔ جیہدے وچ اوہ حیاتی دی مری ہوئی لاش تے وین کردی اپڑی ہے۔

پینجے کولوں تیار کیتی ہوئی روں گھر آئی پئی ہے، جتھے اوہ پٹھیاں چرنے اُتے پونیاں تیار کردیاں اک ہتھ چرنے دی مُٹھ تے، دو جاتر کلتے چڑھی پونی وچوں ویندے دھاگے اگے ہوندا۔ چرنے دی شوکر ودھدی گھدی راہندی۔ پونیاں، چھلیاں بندیاں جاندیاں۔ چھلیاں کھچی دے اُنے چھکو وچ دھریاں جاندیاں، چھکو بھرتج جاندا تاں چرنے دی گھوکر اُتے مریاں تے نواپے سنے ہور زنانیاں دے ہوٹھاں اُپر تھرکدے گاوناں دے بول وی رُک جاندے۔ مُر دوجی دوپہر رُکھاں دی اوس ای جھنگی پٹھ چرنے ڈاہ لئے جاندے، تے مُر کے چرنے دے مُنے، مُنیاں، لٹھاں، ماہلاں چرنے دی گھوکر تے اوہی

سوانیاں دے گاوناں دے بول۔ گاوناں جیہڑے کسے ویاہ، گھروں نوکری تے گئے پردیسی دے وچھوڑے تے کدی کدی مرگاں تے وین دی صورت وی گاویں جاندے..... چھکو وچ جُویاں چھلیاں نوں ائیرن تے رکھ کے لچھاتیار کیتا جاند۔ لچھیاں نوں لکڑ دیاں بنیاں اوریاں اُتے چاڑھیا جاند، ایہہ سواسو، ڈوڈھ سوکانیاں دیاں لائناں دیاں اوریاں، جیہناں وچ فٹ ڈوڈھ فٹ دا وقفہ رکھیا جاند۔ ایہناں اُتے لچھیاں تے چاڑھیا سوتر ٹوریا جاند۔ اخیر لے سرے تے وی اک کانا ٹنگ دتا جاند، جو ساریاں کانیاں اُتے لچھے دا میل کرواند۔ بازاراں وچ اوریاں تے چڑھے ہوئے لچھیاں دا تانا تیا جاند۔

”ایس ای تانے دے پانچے کنن آئی آہی مستو پاوے لانی، پر اوہ اکل نہیں آہی۔ اوہ گھوڑی تے میر و مرانی نال اسوار آہی۔ اوہ دوہیلوا ہان تے غنگر تے گوی بنے ہوئے ہان۔ گھوڑی داوی ہار شنگھار ہويا آہا۔

”مریاں، میں ایہہ تانا لے کے جھنگ پئی جاندی آں۔ میر و دے نال تیرے بابل سردار سے خاں سیال دی جھو کے۔ جتھے میں ایس سوتر دیاں دوہراں تے کھیس بنا کے اپنی بیج دے پلنگھ تے وچھاو نے نیں۔“ مستو جوپن ایہہ گل کر کے گھوڑی اُتے پائی خرچین وچ تانا گھت لیندی ہے۔ مریاں دے اندر بابل نوں ملن دی ورھیاں توں سستی تانگھ تے حُب جاگ پوندی ہے۔ اوہ اُٹھ کے اوہناں مگر بھجدی ہے۔ ”ہاڑا ہئی او، مستور، مینوں وی گھوڑی تے چڑھا لوں۔“ پر انج جیویں اوہ اوہدی واج ای نہیں سندی۔ گھوڑی، دُر کی چلدی رُکھاں اوہلیوں ہو کے جھنگ دی راہ اُتے تڑپدی ہے۔“

فجراں ایلے نولپئے، مریاں دی سُنجی منجی دیکھ کے ایدھر اودھر اوہنوں بھال دی ہے۔ سوچدی ہے۔ ”مڑ کے ڈونگھے رُکھاں تے اُجاڑ جنگل نوں نکل گئی ہووے گی۔ جیویں ”چھویاں آ لے پتن“ تے کردی آہی۔

پر ورھیاں تے ورھے لنگھ گئے اوہ نہ مڑی نہ جھنگ اپڑی۔ ولے خاں نوں

تپدیاں دوپہراں وچ کدی کدی انج لگدا جیویں مریاں دوروں اوہدا ناؤں لے لے کے
پُکار دی ہووے۔ ولے خاں..... وے ولے خاں، چھاویں آکے دو گھڑیاں بہہ جا، وے
پُترا!“

.....

امریندر سنگھ دے من وچ پچھلے کنے ای سہ توں امرتسر جاؤن دی تانگھ ہئی۔ پر
بھوئیں بناؤن دے رجھیویں تے ہورس حالات اہنوں ڈکی رکھیا۔ ”چڑھدی وسا کھی تاں
اوہ ضرور بر ضرور امرتسر ای مناوناں چاہوندا آہا۔ من پریت تے امرتا نال۔ ایس پاروں
اوس ساریاں آسٹے نویں لیڈے سولے ہائے۔ جاؤن ایلے من پریت نے آکھیا، ”ساڈی
امرتا جوان جہان گڈی ہے۔ آپاں ایس نوں کتھے کچھی پھراں گے۔ اپنے توں ودھ ایس دا
خیال رکھناں پوے گا۔ تے ہر تھاہر گھرارگی تاں نہیں ہوندی۔“

ایہہ سُن امریندر تے امرتا اک دو جے الوں ویکھدے چُپ ای تاں کر گئے۔
کچھ چیر تیک اوہ کچھ نہیں بولے۔ اخیر جدوں امرتا نے وی ماں دی ہاں وی ہاں رلا دتی،
تاں اوہ دوہیں تیار ہو گئے۔ نواپئے لوڑیندا سَمیان تے تھہا کو دعاواں وی اوہناں دے پلے
بُھ دتیاں۔ من پریت لئی تاں برالا جوگیاں توں اٹھ کوہ دور وچھی ریلوے لائن تیک دا پینڈا
وی اپنے پیریں ٹُر کے مکاوناں بہوں من پرچاواں ہوندا۔ پر اُج جدوں وریام دے آکھن
تے پیرو تے اک ہور کامے دو گھوڑیاں پیڑ لیئیاں، تاں جو اوہناں نوں لاگلے ریلوے
اسٹیشن تیک اپڑا آون، تاں انج جیویں من پریت دی اپنے پیریں پینڈا کرن دی سدھرم
جیہی گئی۔

پہلے آری ویکھن توں ہُن تیک، ریل گڈی آسٹے، من پریت لئی اک عجیب
جیہی کچھ ہوندی۔ اوہ ایس گل نوں کدی وی نہ سمجھ سکی۔ پیلے رنگ اُتے وکھ وکھ لائناں تے
اُلے سدھے اکھراں نال سچی ایکی ریل اوہدے سفنیاں وچ وی دھوڑ تے دھوں ای

اڈاوندی آؤندی۔ جیہدے نال اوہداتے اوہدے سفنیاں دا ساہ گھٹیا جاندے۔ جیہدی کوک توڑ اوہدی روح تیک اپڑدی۔ ڈبیاں اندر پیڑے، سانولے بھاہ مار دے رنگ دے بابو، جو دیسی تے ولایتی بولی بولدے۔ ٹکٹ چیک کردے۔ اپنے سراں تے چوڑے ہیٹ رکھی۔ انج لگدا جو ہننے کچھ وچوں دونالی بندوق کڈھ کے شکار اُتے تان لین گے..... کئی واریں انگریز زنانیاں وی لکڑ دے بنے پھٹیاں اُتے گدے رکھ کے پٹھیاں ہوندیاں، بریک ملل دے بانے پائی۔ ہمیش جیہناں نوں ویکھ کے اوہنوں ندامت تے الکت جیہی ہوندی۔ ایناں نیگج۔ پر اوہ ریل گڈی تے کیتے سفر بارے ہمیش امریندر نال گلاں کردی۔ کدی کدی اوہ اوہنوں بس ایویں ای ٹکٹ کٹا کے نال دے کسے اسٹیشن اُتے لا دیندا۔ مُڑ دوویں اوہ ریل تے مُڑ آوندے۔ گڈی دی چھک چھک تے روح نوں ٹنبن آلی کوک سندے۔

اج وی اوہدے وجود تے روح وچ ریل گڈی نوں ویکھن تے واجاں سُنن تے اوہناں نوں مانن داسرور رلیا آہا۔ پر اک ای دم خورے اوہنوں کیوں لگا۔ ایس سفر وچ جبکہ امرتا وی اوہناں دے نال ہوندی تاں کناں سواد آوندے۔ امرتا ہوندی تاں میرے آنگ ایہہ سارا کجھ اوہ وی ویکھ لیندی۔ شاید میرے توں ودھ کے ویکھدی اوہ سارا کجھ۔

وسا کھی دادیہاڑ آہا۔

ملکھ وچ لگی اگ تے بغاوت دی لہرتوں ان سوہے کنے ای لوکی امرتسروچ آن وڑے۔ کجھ اجیہے وی ہائن جو اتھے باغ وچ ہو رہے جلسے وچ ہون آلیاں تقریراں سُنن آئے..... امرتسردے اک بازار وچ انگریز زنانی مس شیروڈ نال ہوئے واقعے نے انگریز افسراں نوں اندروں اگ دے انگلیاریاں آنگ بھکھایا ہو یا آہا۔

حقّی گل ایہہ ہے جو امریندر تے من پریت کور نہ تے انگریزاں ورودھ ہو رہے جلسے وچ رلن لئی جلیانوالہ باغ وچ اپڑے ہائن تے نہ ای تقریراں سُنن۔ اوہ تے کنے ای

ہورس لوکاں آنگ و ساکھی مناون آئے تے اوہناں ہزاراں لوکاں نوں تگن لئی اندر آن وڑے۔ ”جو دیکھے تاں لوکی رنگ برنگے بانیاں وچ کیویں گدے نیں تے اسیں اوہناں وچ کیویں دسدے واں.....“ پر اوہتھے تاں آکھدے نیں سولہاں سو راونڈ مارے ڈائر نیں۔ لوکاں نوں باہر نکلن دا رستہ نہیں ملیا۔ رش ہتھیرا آہا، تے باغ دیاں کندھاں ڈھیر اُچیریاں۔ ڈائر دی وحشت، منکھی لہو دی صورت وچ کئے ای چرتیک جلیانوالہ باغ دی دھرتی نوں، تر کردی رہی۔ ایس لہو نال رنگی دھرتی تے ای تاں کسے نے آن کے ہاک ماری:

بارھیں برسیں کھٹن گیا تے کھٹ کے لیاندا چلھا

امر تر دیاں گلیاں وچ، پنجابیاں دا لہو ڈلھا

.....

انگریزی سرکار نوں حکمران نہ منن، ٹیکس نہ دیون، سرکاری نوکریاں چھڈن تے بھرتی نہ ہون۔ سرکاری سکولاں، کالجاں دے بائیکاٹ تے ولایتی کپڑے دی تھاہرے کھڈی دا کپڑا پاون جیہیاں لہراں نویاں ناہن۔ بار، دی خلقت تاں اودوں ای بغاوت کر چھڈی آہی جدوں مال افسر ایٹھوں دیاں وسدیکاں اُتے رُکھاں تے پشواں نوں ٹیکس لاون آئے ہائن۔ بھاویں اوہناں آسٹے ایس سرکار نال یدھ ڈانگ سوٹے نال پلتھا کھیڈن توں ودھ نہیں آہا..... پر جو کجھ جلیانوالہ باغ وچ ہویا آہا، اوہدے بارے سوچ وی نہیں سن سکدے۔ فائرنگ ہوئی اوہدے وچ لوکی مارے گئے۔ ایہہ سارا کجھ تاں ہویا ای پر جو ایہناں شہیداں دیاں لاشاں لین آئے۔ اوہناں نال جو سلوک کیتا جا رہیا آہا..... تسیں ایٹھے آوو تے رڑھدے رینگدے ہوئے آوو، تے رڑھدے رینگدے ہوئے جاوو۔ ایہہ حکم آہا، جیہنوں نہ منن آلے تے اوہ ایلے فائر کردتا جاندا تے ایس ای حکم داسن کے نور محمد ایس سٹے تے اپڑیا جو نہ تے اوہ آپ تے نہ ای برالا جوگیاں دا کوئی ہور انسان، انسان ہوندیاں اپنے نال ایہہ کار کرواون آسٹے اوہتھے جاوے گا، اُنچ اوہ امرتا

الوں بہوں نادم آہا۔

ازادی دی لہر نال جُڑے نابراں انگریز سرکار داساہ دھونی کیتا ہویا آہا۔ امرتسر تے اوہدے نیڑے تیرے دے شہراں وچ بغاوت کھمبیاں آنگ پھٹ رہی آہی، لائل پور، لاہور، گوجرانوالہ، گرداسپور سنے وزیر آباد، اکال گڑھ، حافظ آباد، رام نگر، شیخوپورہ، چوہڑکانہ تے سانگلہ، ہر تھاہرے سرکاری تھاہراں ریلوے لائنیں، تار گھرتے ریلوے دیاں پٹریاں نوں اکھیڑیا گیا۔ جیہدے نتیجے وچ امرتسر، لاہور، گوجرانوالہ تے گجرات وچ مارشل لاء لادتا گیا۔

نور محمد، اٹھوں پہر منجی تے پیا راہندا تے منجی تے پیا پیا ایہی سوچدا راہندا: ”جدوں امرتا، اوہدے توں اپنے مایاں بارے کچھے گی، تاں اوہ کیہ جواب دیوے گا۔“ اوہ جاندا آہا جو کجھ امریندر تے من پریت اُپر ہیتی۔ اوہدے بارے امرتا سمجھ جاندی۔ جدوں کدی امرتا اوہدے ساہمنے آ، جاندی اوہ اکھاں نیویاں کر لیندا..... اوس امرتا نال ایس واقعے بارے کدی گل نہ کیتی۔ کیوں؟“

ایہہ اوہ آپ وی نہیں جاندا آہا۔

کنے ای دنیں تیک نور محمد چوپال وچ وریام، نجابت خاں، اوہدے پتر مراد تے بیرونال صلاح مشورے وچ رہیا۔ راجموکاٹھیا تے امینے سنیاہرے توں بھائی اوس کائی راء ناہی لئی پر مڑ وی اک شام راجموکاٹھی، مونہہ اچوں حقے دی نڑی کڈھیاں، داناں بندیاں آنگ اک ہنگیارا بھریامڑ چرتیک چپ کیتی رہیا۔ جدوں پوری پرہیا دے کن تے اکھاں اوس اپنے ال لا، لیاں تاں بولیا، ”چودھری صاحب! کرنی تاں تسیں اپنے من آئی ای ہے۔ تہاڈی صحت نوں ویکھدیاں ہوئیاں میں تاں ایہو ای آکھساں، حالات تے اکھ رکھو، تے چپ رہو۔ انگریز سرکار تاں انج ای کلمے ہاتھی آنگ انھی ہوئی ودی ہے۔ ایہہ تاں ساریاں کنیں سُنیاں گلاں نیں۔ پر مومورے فتیانے دے پتر، اروڑے خاں دے

پُتر اں تے دوہتریاں نال جو انگریز اں کیتی ہے۔ دس لکیاں وی بڑی نموشی ہوندی ہے۔ گل وچ رے گھت کے بازاراں وچ پرٹ کر واندے رہے نیں تے ویکھیا کیہناں لوکا؟ اوہی کمی کمین جیہڑے کل تیک اوہناں دے اشارے تے جان دیون لئی تیار ہوندے ہاں۔ آہدن، ممورے فٹیا نے دے پُتر تاں انگریز افسر دے مونہہ تے تھک دتا۔ اوہدے مگروں تاں ویڑھے دے مصلیاں توں اوہنوں لٹر پولا وی کروایا گیا۔ جاندیاں انگریز افسر کھوہ آ لے چوک وچ اوہنوں پھاہے چڑھوا چھڈیا۔ اُتوں سرداری تے لمبڑداری باہروں آئے دھاڑویاں نوں دان کر گیا۔ جیہناں بارے سُنیا ہے وڈی جنگ وچ انگریز پاسیوں لڑدے رہے..... جھنگ وچ آکھدن سردار سے خاں سیال دی اولاد نال ایویں ہوئی ہے۔ میں آہناں ایہہ تے اوہ راٹھ ہاں جیہناں انگریز اں اگے نیوں کے بھوئی آں ناویں پچیاں چڑھائیاں تے تہاڈے نال انگریز کیہ کر سکہے نیں تسیں آپ جاندے ہو سو، میں کیہ زبان کھولاں..... ایس ایلے تاں چُپ ہزار بہتر اے۔“ راجو کاٹھیے دے مگروں انج جیویں ساریاں نوں سڀ سُنکھ گیا ہووے۔

نور محمد، کجھ چرتیک اپنا کمزور ہتھ ہوا وچ ماردار ہیا مُڑ کے اوہدا ہتھ بے جان ہو کے منجی تے ڈگ پیا۔ اوس وریام نوں اپنے نیڑے سدیا، تے آکھیوس، ”پُتر، میں گھڑی دو گھڑی دا مسافر آں۔ امریندر، من پریت تے اوہناں لوکاں نال جو ہیتی..... جو میں سُنی ہے۔ ہانہہ پاٹ گیا ہے میرا..... امرتا، ہُن تیرے تے اللہ دے سپرد ہے۔ اُنج ای جیویں حالاتاں نوں اسیں اپنے موافق بنا کے رکھیا ہے تے سہ دے جبر نوں اپنے اُتے نہیں گزرن دتا۔ تُساں وی اوویں ای کرناں ہے۔ اوویں ای ریت نبھاوئی اے۔ ایہہ ساڈے لہو وچ ہے۔ اسیں چُپ کائی نہیں رہناں، اج نہیں تے کل نیاں کرنا ضرور ہے۔“

نور محمد حالے ہو، وی گلاں کرناں چاہوندا آہا پر بولدے بولدے دی واج رک گئی انج جیویں آسنگ ای نہ رہ گئی ہووے:

کوئی وی نیاں ہوون توں پہلاں تُو محمد اپنے دادے و ساہرے خاں دے نال
جاء رلیا۔ ایس قبیلے دیاں گوراں و دھدیاں ای جا رہیاں ہاں۔

”بُرا لا جوگیاں“ دے ہوڑ لوکاں لئی تاں میرو مرانی بھاویں ان سونہاں ای
ہوندا۔ پر نواپئے تاں اوہنوں بھینی دا موڑ مڑ دیاں ای سیہان لیا آہا۔ اوہ سگواں اُنج دا اُنج
ای آہا۔ اوہدی دیہہ بھاویں تھوڑی کوہنڈھی ورتی لگدی..... نواپئے جھدے ای وریام نوں
سد کے دسیا: ”ایہہ جیہڑا اک دو بندیاں نال وستی وچ آیا ہے ایہو ای میرو مرانی ہئی.....
جیہدے ہتھیں بکسا ہے، بھلا پتا تاں کراہیہ اتھے کرن کیہ آیا ہے؟“ تے وریام جیہڑا اپنے
پیوتوں میرو مرانی بارے کنی واری سُن چکیا آہا..... کنسو، لین لئی باہر نکلیا۔ کھوہ دے
نیڑے چھپر، پٹھ پورا مجمع لگا ہویا آہا۔

پچھلے کجھ سہ توں بار دیاں وکھ وکھ ابادیاں وچ طرح طرح دیاں بیماریاں لگ
رہیاں ہاں۔ اوہناں وچوں اک موذی مرض ملیرے دی آہی، تے کیلیاں وستیوں وچ
تاں طاعون دی بیماری عام کھل گئی آہی..... ولایتی تے دیسی طرح دیاں دوائیاں لے کے
جیہڑا حکیم بُرا لا جوگیاں وچ آیا آہا اوہدا آکھنا آہا جو ایہہ بیماریاں ایہتھوں دے و سنیکاں
وچ ورہیاں توں ہین۔ جدوں کہ خلقت دا آکھناں آہا۔ جدوں دیاں نہراں باراں وچوں
لنگھائیاں گئیاں نیں۔ پانی راہیں آون آ لے زہریلے کیڑیاں تے چھپر و جھوں ایہہ سارا
کجھ ودھ رہیا ہے۔ ”بُرا لا جوگیاں“ نہر دی حد توں تھوڑا کو دور ہوون و جھوں ایہناں
بماریاں توں بچیا آوندا آہا۔ پر ویرھے مصلیاں دی اک بالڑی نوں طاعون ہو گئی آہی
جیہدی و جھوں ہُن ساری وستی وکھتاں نوں پھڑی ہوئی آہی۔

میرو مرانی نوں پتا لگ گیا آہا جو وریام و لا را دا پوتا ہے تے ایس ناتیاں اوہ
گہنے خاں دا وی پوتا ای لگا۔ اوس وریام اُپر ایہہ ظاہر کیتے بناں جو اوہدا واسطہ وریام دے
وڈکیاں نال رہیا ہے وریام نوں دسیا، ”ورھے ہو گئے اوہ انگریزاں دی خدمت گاری وچ

رُجھا ہے۔ ایس خدمت خاطر وجہوں اوہدے پُتر اں نوں بھوکیں وی الاٹ ہو گئی ہے۔ اوہ آپ ای واہی نیچی توں بھجدا ہے۔ ایہہ اک ترےجا بندہ جو سانوں گھوڑیاں تے لئی ودا ہے۔ ممورے فنیانے دا پوترا ہے۔ ساڈے ارگے جلیاں نوں لیہناں راٹھاں دی نوکری وچ ہوونا چاہیدا آہا۔ ویلا ویکھو کیہ آ گیا ہے ایہہ سانوں اسوار کرا کے تھاؤں تھائیں اپڑا وندا ہے..... مڈ انج جیویں میرو مرانی وریام نال کائی راز سانجھا کردیاں ہویاں بولیا، ”ویکھن نوں تے میں ڈاکٹر نال دوائیاں دا بکس لے کے تڑدا ودا آں۔ پر اصل گل ایہہ ہے جو سرکار توں لوکاں بارے ساری خیر خبر میرے راہیں ای اپڑدی ہے۔ اوہ انگریز سرکار بارے کیہ سوچدے، کیہ گلاں کردے۔ کیہ ارادے رکھدے نیں۔ ایہتھوں تیک جو سرکار دے خلاف کسے لڑائی دی تیاری تاں نہیں کر رہے۔“

میرو مرانی ہُن جیہدیاں ہڈیاں وی کڑکدیاں تاں انج لگدا جیویں کسے پُرانے سکے رُکھ دی کائی ٹھنی ترٹ رہی ہووے۔ اوہ انگریزاں دا کار خاص بنیا ودا آہا۔ وریام نوں میرو دیاں گلاں سُن کے کاوڑتاں بہوں چڑھی پر جدوں اوس ممورے فنیانے، سسے خاں سیال دے پوتریاں نال ہوئی کار، بارے سوچیا۔ جدوں امریندر تے من پریت نال جلیانوالہ باغ وچ ہوئے دھروہ بارے سوچیا تاں چپ کر کے بہہ گیا۔ کچھی وٹیوس تے اپنے ای لہودے دو گھٹ بھریوس..... وریام سوچدا آہا جیویں اوہدے پیو نور محمد آکھیا آہا انگریز نال اک اخیر لاییدھ ہووناں تے بر ضرور ہے پر کدوں؟ ایہدے بارے اوہ کجھ ناہس جاندا..... مڈ کے اوہنوں میرو مرانی دی ممورے فنیانے دے پوترے بارے دسی گل چیتے آ گئی۔ او دو دلیلا جیہا ہوندا رہیا۔ میرو اوہنوں دسیا آہا۔

”کجھ ورھے پہلوں جدوں برکھانہ ہوون پاروں منجی دی فصل تباہ ہو گئی تاں ایہی ممورے فنیانے دا پوترا احمافنیانہ تے کنے ای ہورس زویں دار نہ تے مالیہ ای تار سکے نہ ای اوہناں دے اپنیاں گھراں وچ کجھ کھان نوں آہا..... تاں محکمہ مال آلیاں لیہناں

نوں ماملہ تارن دا آکھیا..... اوہناں آکھیا، ”اوہ تاں آپ پائی پائی دے متھاج نیں، ایس واریں اوہناں توں ماملہ نہ لیا جاوے۔ پر تحصیل دار دا حکم آہا جو اوہناں نوں ہر صورت وچ ماملہ تارناں پوے گا۔ ایہہ جمت کردے رہے اوہ منگدا رہیا۔ گل جدوں انگریز بہادر تیک اپڑی تاں اوہ آپوں سپاہی لے کے اوٹھے اپڑ گیا۔ ہتھ بندھ دتے تے دُھپے لجا کے ایہناں نوں جھکا چھڈ یوس تے ایہناں دیاں پٹھناں تے بھارے پتھر رکھوا چھڈ یوس۔ ایہہ پیروں واسے، سڑدی بلدی روڑاں آلی بھوئیں تے کلپدے۔ ایہہ سزا ایہناں نوں کنے ای دنیاں تیک دتی جاوندی رہی..... شام نوں ایہناں نوں اپنے اپنے کماں تے گھلیا جاندا۔ گل اتھے ای نہیں مکی ایہناں نوں سرکار الوں نوٹس اپڑے ایہناں دی بھوئیں قرتی ہو گئی تے جو سلوک ایہناں دیاں زنانیاں نال کیتا جاندا اوہ تاں دن جوگ ای نہیں۔ اوہناں دے سینیاں وچ شکنجے جڑ دتے جاندے، پٹھناں تے بیت دیاں سوٹیاں ماریاں جاندیاں۔ جدوں اوہ پیڑ وچوں کلپدیاں تاں ایہہ ساہمنے کھلوتے کھڑ کھڑ ہسدے..... اک گل ہور ہے میں تے جتھے جتھے جاؤنا، لوکاں دی بھلیائی لئی اوہناں نوں سرکار دا وفادار راہن دا ای آکھناں..... میری عمر لنگھ گئی ہے، ویکھدیاں جو ایٹھوں دیاں بندیاں نال ایہہ کردے نیں۔ اوہدے مگروں اوہناں نوں نموشی نال مرای جاونا چاہیدا ہے۔“ اوس ایہہ گل اوہدے ہور نیڑے ہو کے کیتی: ”ملکہ نے دیس تے قبضہ کرن لئی گھٹ ودھ پنچ لکھ بندے مار دین دا حکم دے دتا ہے.....“

پر ایہہ وی حقیقت ہے بندے مارن آلی گل اوئی نہیں ہئی آہی جنی ہر وجے، ہر پاسے جوکاں لاون لئی آون والیاں دی گل ہئی ودی آہی اوہناں دا آکھناں آہا جو بندے دے وجود وچوں بماریاں دا جن کڈھن آسٹے اوہناں نوں جوکاں لا کے گندا لہو کڈھناں ضروری ہے۔“



17

پانی کیکر بھراں

وستی دے وچکار اُسرے کھوہ دے چار مئے ہائَن تے ایہناں چاروں مُدیاں تے چار
 چرخیوں لگیاں ہوئیاں ہائَن۔ جیہڑیاں وستی دے چاروں بازاراں دے آہنے ساہنے ہائَن۔
 شام دا ویلا ہے، راجمو کاٹھیے دی دھی پانی بھرن آ لے بھانڈے گچدی جاندی
 ہے تے نمھی نمھی وانج وچ اک گاؤن وی گاؤندی جاندی ہے۔ وستی وچ ہوئی ڈھلیریاں دی
 گڑی دے ویاہ وچ گانویا ایہہ گاؤن اج کل ہر مٹیار دے ہوٹھاں تے چڑھیا آہا۔
 ”پانی کیکر بھراں“

ہریاں ہریاں ونگاں، سلیٹی میری بانہہ

پانی کیکر بھراں

بھج گلیاں ونگاں، مروڑی میری بانہہ

پانی کیکر بھراں

شوہدا میرا چودھری، چودھری توں ڈراں

پانی کیکر بھراں

جیٹھ جمعدار، اوہدیاں فوجاں توں ڈراں

پانی کیکر بھراں

ہتھ اوہدے غلیل تے غلیلیاں توں ڈراں

پانی کیکر بھراں،

امرتا، ڈھاکاں توں بھانڈے لاہندی ہوئی، ”ہائے امروئے، آکھدی ہے،
 راجموکاٹھیے دی دھی گھابر کے چُپ کر جاندی ہے۔ امرتا، بھانڈے گچن لگ پوندی ہے، تے
 راجموکاٹھیے دی دھی لاں سنے بوکا، کھوہ وچ سُدی ہے۔ بوکے دے پانی تے جا کے وجن
 دی واج توڑ اوہناں تیک اپڑدی ہے۔ اوہ اپنے چاروں بھانڈے بھر کے امرتا نوں چکوان
 دا آکھدی ہے۔ ترے بھانڈے سر، اُپر جدوں کہ اک کچھ وچ ماردی کھوہ دی پدھرتے
 کھلے پانی توں بچدی۔ لک مٹکاوندی ہوئی گھراں نوں تُر جاندی ہے۔ اک اک کر کے
 مٹیاں کھوہ تے اکٹھیاں ہون لگ پوندیاں نیں۔ بھانڈے لتھن، گچن، لاواں کچھن تے
 پانی بھریون دیاں واجاں دے نال نال مٹیاں دیاں آپت دیاں گلاں دی مٹھی مٹھی گونج
 اُبھردی ہے۔ ایہدے وچ امرتا کور دی واج نہیں۔ اوہدی واج کہتے اوہدے وجود اندر ای
 سہم کے گھٹی ہوئی لگدی ہے۔

کچھ گبھرو جیہناں دے دل کھوہے تے آئیاں مٹیاں نوں ویکھ کے دھڑکدے
 نیں۔ بودے واہ کے، لاچے پا کے، تے کھسے چکاندے ہوئے نیڑیوں تریڑیوں لنگھن دا
 جتن کردے نیں..... ایسے نوں ہرے بانے وچ ہتھیں کھوٹا، پیریں کھڑاواں تے گوڈیاں
 توں پلایاں تیک لوہے دیاں کڑیاں وچ پُر تا اک بزرگ آؤندا ہے۔ اک مٹیاں دے اگے
 لپ ڈاہندا ہے۔ ایہہ مٹیاں امرتا ہے اوہ ٹھنڈے، مٹھے پانی دا بوکا بھر کے اوس بزرگ نوں
 پانی پواندی ہے۔ بچیا ہويا پانی اوہ بزرگ آپنے ہتھاں، مونہہ تے پیراں تے سدا، دعاواں
 دیندا ہويا اگا نہہرُ جاند ا ہے.....

بُرا لا جوگیاں، وی کبھی عجیب وستی ہے۔ لیہدے وچ آون تے آکے اباد ہوں
 آلے لوکاں دی تقدیر مُڈھ قدیم توں سُکی سڑی ول آنگ ہوندی ہے۔ جوگھٹ ای ہری
 بھری ہوندی ہے۔ تقدیر لوکاں نال ہمیش اک نواں کھلواڑ، اک نویں کھیڑ رچاون لئی
 ایہناں نوں اتھے اکٹھیاں کردی ہے۔ مُڑ کے کدی طوفاناں تے ہنھیریاں بن کے تے
 کدی مارو جنوراں کدی دھاڑویاں دی صورت وچ کدی چودھریاں تے حاکماں راہیں،
 کدی قانون تے قاعدیاں دیاں جمع بندی بن کے تے قتلّاں تے اُچالیاں دے روپ
 وچ ایہناں اُتے ورت جاندی ہے۔

بُرا لا جوگیاں، دی وستی شام دے گوڑھے انھیرے دے تھاہ شوہ وچ گواچ
 جاؤندی تاں اوہناں دیاں کیتیاں گلاں، کنسویاں آنگ، ویڑھیاں تے کھگھوریاں نال
 اباد چوپالاں وچ ہلن لگ پمدیاں۔

بُرا لا جوگیاں، جوگیاں دی اباد کیتی ہوئی وستی ہے جوگی لیہنوں اباد تے کر گئے پر
 اتھے ٹک کے رہے کدی نہ، پر ہمیش لیہدی راکھی کسے جوگی دے ذمے ای ہوندی۔ ہُن
 لیہدار اکھا راول جوگی ہے۔ شامیں کھوہے تے آکے امرتا توں بُک وچ پانی بھر کے پین آلا
 راول جوگی ای تاں آہا۔ بھاویں راول دھاڑویاں دے ورودھ جانگلیاں دے نال ہے وستی
 وستی پھر دا ہے تے اوہناں اُپر واپرن آلی کروپی تے ہونی بارے اوہناں نوں آکے پہلاں
 ای دس دیندا ہے۔ اوہ فصلاں، رُکھاں، جنوراں تے منکھی سُکھ ساند، صحت، ہماری تے
 علاج کرن آلیاں جڑیاں بوٹیاں بارے جاندا ہے۔ لوکاں نوں سفنیاں تے حقیقت وچ آ
 کے اوکڑاں وچوں نکلن دیاں راہاں دسدا راہندا ہے۔ اوہ بارے بارے بنیاں پرانیاں
 دھرانیاں کہانیاں دا جانو ہے۔ لوکاں نوں کہانیاں سناوندا ہے۔ اوہناں دامن پرچاوندہ ہے
 تے بھلے ہوئے راہیاں نوں سدھے پدھرے رستے تے لاوندا ہے۔ اوہ قسمتیاں دا حال
 جانن آلا جو سی تے کھرتے سفنیاں نوں بھالن آلا کھوجی ہے پر اُج شامیں اوہ وستی ٹھہریا

کیوں نہیں؟ اوس ایستھوں کجھ کھادا پیتا کیوں نہیں۔ اوس کوئی کہانی کیوں نہیں سنائی؟“

اوس صرف کھو ہے دا ای پانی کیوں پیتا ہے؟

کیہ اوہدا پانی پیون کسے آون آ لے ویلے وچ کسے ہونی دی علامت ہے؟ تے

اوہ وی کھوہ دا.....؟ جدوں کہ نہرتاں وتی دے لہندے ال ای وگ رہی ہے۔ اوہ نہر دی پٹری تے لگ کے بار وچ کیوں نہیں وڑ گیا۔

.....

پہلوں کھنڈی دی واج گلیارے وچ اُبھردی ہے مُڑ کے اوہ برانڈے وچ

آؤندی ہے۔ امرتا، جاندی ہے۔ ایہہ نواپے ہے۔ چٹے سفید والاں، چٹے سفید مکھڑے

اُتے چٹے ای رنگ دی چادر۔ تھلے ہمیش آنگ کالے رنگ وچ رنگیا ہويا کھدر دا باناں۔

نواپے دا ویڑھے وچ موجود راہناں، اوہنوں انج لگدا ہے جیویں کوئی نیک روح تُردی ودی

ہووے۔ گھرتے باہر ساریاں آسٹے خیر تے برکت وٹدی ودی۔ پر کجھ دناں توں اوہدی

ڈھہی ہو رنیوندی جاندی آہی۔ امرتا، نواپے نوں اپنے ساہمنے ورھیاں دیاں پوڑھیاں توں

تھلے لتھدیاں ویکھیا آہا۔ آخو، اک عمر آؤندی ہے جدوں تسیں اک ای ویلے وچ پوڑھیاں

چڑھ وی رہے ہوندے او تے لتھ وی.....

امرتا، اپنی ماں توں سنیا آہا۔ جو دائی محبت رواجاں تے یاداں واسٹے نروے پانی

آنگ ہوندی ہے۔ جو محبت دے رُکھڑے نوں ہریاں بھریاں تے ساوا کچوک رکھدی ہے

پر اتھھے بُرا لا جوگیاں وچ تاں اچہا کوئی نہیں دسدا جیہنوں اسیں محبت دا، ہریا بھریا رُکھ

آکھ سکے۔ اسیں تے انج جیویں ہر اوس شے نوں بھل رہے آں۔ جو ساڈے وجود، ساڈی

ہوند نوں ثابت سالم رکھ سکے۔ ثابت سالم رکھ سکدی ہے۔ نواپے نے وی انج جیویں امرتا

دی سوچ نوں پڑھ لیا ہووے تے سوچ دا جواب سوچ نال ای دیوناں چا ہوندی ہووے،

اوس کجھ ای دن پہلوں امینے سُنیارے توں اپنیاں کناں دیاں والیاں آنگ ای وڈیاں

وڈیاں والیاں امرتا آسٹے بنوائیاں۔ چلدی پھردی، گلاں کردی، کم کردی امرتا دیاں ایہہ والیاں ہلدیاں تاں جنج نواپئے دی روح وچ تانگھ دے پھُل کھرن لگ پمدے۔ ”کوئی چنگا جیہا سکھ گھر ویکھ کے امرتا نوں اوہدے گھر ٹور دیاں۔“ وریام، آسٹے، ویسے خاں دی پوتری نوں اپنے ویڑھے لے آواں۔“ اوس امرتا دے ہون آ لے بندے آسٹے چاندی دے ڈھولنے، رکھاں تے مندریاں خالص سوئے دیاں مڑھواوی لیاں ہاں مڑ کے کھونڈی دی واج آنگ ای اک واج ویڑھے وچ گونجی۔ ”امرتا دھیے! ایدھرتاں آ، میرے نیڑے۔“ امرتا نیڑے آئی تاں نواپئے اوہدے کن دیاں والیاں نوں چھوہندیاں ہویاں آکھیا، ”دھیے، ویلا تیرے ویاہ دا ہے میں ایہہ شگن اپنے ہتھیں پورے کر کے جاوناں چاہندی آں۔“ انج جیویں ایہہ گل کردیاں اوہدے ہوٹھ کمب رہے ہوں۔

”نہیں ائماں بڈھیے۔“ امرتا ہمیش آنگ پیار بھرے سجاوچ اوہنوں آکھیا۔

”نہیں کیوں؟ ویاہ دی گل وچ نہیں بدشگونی ہوندی ہے۔“

”ائماں بڈھیے، میں جلیانوالہ باغ وچ ہوئے دھروہ تے اوہدے مگروں اٹھن والی نابری دی لہرنال ویاہی گئی آں تے تیرے شگناں دے چاء میں ہُن ہور طرح پورے کراں گی۔“

امرتا، دی ایس گل اندر بھاویں کوئی فلسفہ آہا یاں نہیں، پر ایہہ گل نواپئے دے پلے پئی اُکا کائی نہ۔ نواپئے دے سردا سائیں وی تاں ایس قہر ہتھوں لٹوہ پڑھ گیا آہا۔ مڑ کے امرتا دی کیتی ہوئی گل نواپئے وریام ساہنے دھری تاں اوس اپنا سر انج ہلایا جیویں سبھ کجھ سمجھ گیا ہووے۔ مڑ اوویں ای چوپال نوں مڑ گیا تے کمی نوں گھل کے مربعے توں راجمو کاٹھیے نوں سدوا لیوس۔ جیویں کوئی ضروری گل ہُنے دی ہُنے نکھٹناں چاہوندا ہووے.....

ولے دے ویاہ بارے کوئی گل نہیں ہوندی آہی، شروع لا، توں ای۔ ہُن تاں انج ای اوہدی عمر دی پرچھائیں ڈھلدی پئی آہی۔ اوہدے ویاہ بارے کوئی گل کردا وی

تاں کون؟ امینے سُنیا رے نوں مل کے گہنے گھڑاون آلی تاں آپوں ای بار دی ڈونگھی نیں
 وچ گواچ گئی۔ اوہ آپ وی مٹی نال مٹی ہو گیا آہا۔ اودوں جدوں اوہنوں کنسو ہوندى ہے
 جو انگریز ہر پاسے واہی تباہی پھیر رہیا ہے تے ہر اوس بندے نوں بھوکیں تے واہی نیجی
 توں ہٹا کے اوہدا مل سواہ کر دیندا ہے۔ جیہدے بارے اوہنوں پتا لگدا ہے جو اوہدے من
 وچ انگریز ورودھ انتقام دی نکی جیہی چنگ وی بلدی ہے..... ولے خاں سوچدا، جیکر
 اوہنوں وی بھوکیں گڈن توں ہٹا دتا گیا تے اوہناں دی بھوکیں کسے ہورس نوں دے دتی
 گئی تاں اوہ کیویں جیوے گا؟“

ایہی مسئلہ وریام دے ساہمنے آہا ایس لئی اوس ایس مسئلے نوں پنچایت ساہمنے
 دھرن دا سوچیا آہا۔ ”برالا جوگیاں“ تیکر انگریز سرکار نہیں بچتی تاں ایہدا مطلب ایہہ نہیں
 کہ اسیں اوہناں دیاں اکھاں توں پروکھے واں۔ سانوں پتا لگ رہیا ہے جو وڈی جنگ
 وچ اوہدے لئی فوج بن کے لڑن آلیاں تے کسے وی طرح اوہناں دی امداد کرن آلیاں
 نوں انگریز وڈے عہدے دے رہیا ہے اوہناں نوں زمیناں الاٹ کر رہیا ہے۔ ایہدے
 وچ اُبھردی لاہم دے تے وڈے شہراں دے لوکی ڈھیر نیں۔ ساڈے ارگے جانگی جو
 اوہدے بھاویں مخالف ہین یا نہیں اوہ تاں انج جیویں اوہدے جُستے تے سب آنگوں
 ڈنگدے نیں۔ گل ایہہ ہے جو جیکر اوہ برالا جوگیاں، وچ وی ایہو کجھ کرن آئے تاں
 سانوں کیہ کرنا چاہیدا اے؟“ وستی آلیاں نوں اتھے اکٹھیاں کرن دامنڈھلا مقصد وی ایہی
 ہے۔ وریام اپنی گل مکائی تاں ڈھیر چرتیک پنچایت وچ ڈونگھی چُپ ای رہی۔ اخیر چر کے
 راجمو کاٹھیا بولیا:

”سانوں آون والے حالات نوں ویکھناں چاہیدا ہے۔ میں ایہہ گل پہلوں
 وی کر چُکیاں..... ہو سکدا اے جو کجھ باہر ہو رہیا ہے اوہ برالا جوگیاں وچ نہ ہووے۔“
 ”ایہہ کیویں ہو سکدا اے؟“ گھگھر یائی ہوئی ایہہ واج پرہیا نے پہلی واریں

سُنی۔ ولے خاں، جھے دی نڑی مونہہ وچوں کڈھدیاں آکھیا۔ اوہ بولیا تے مُڑ بولد ای گیا:
 ”تسیں سنیا نہیں آہ، میرے پتریرٹور محمد مرگ آلی منجی تے پیاں پیاں کیہ آکھیا
 آہا۔ اوس آکھیا آہا۔ ایہہ انگریز تہاڈے توں تہاڈیاں زمیناں کھوہ کے کسے ہور نوں دے
 دیون، گھر بار ساڑ چھڈن۔ تہاڈے کھوہ تے کھوہاں تے پانی تہاڈے کول نہ راہن دیون
 تے ساڈی آل اولاد نوں بھکھاں تے تسپے دیون۔ اجیہا ویلا آون والا ہووے۔ سانوں
 پتا وی ہووے تے اسیں بناں کسے تیاری دے اوس ولے نوں اڈیکدے رہے کہ جدوں
 سرتے آوے گی تاں اودوں ویکھ لاں گے؟“

”ٹھیک آکھدا ہے چاچا ولیا، مینوں یاد ہے۔ مینوں پیوسد کے آکھیا ہا۔ اوہناں
 من پریت تے امریندر نوں نہیں ماریا اوہناں میری بھین تے بھنویئے نوں ماریا تے اوہ
 سیکڑیاں لوکی جو مارے گئے۔ اوہ ساڈے ای لگدے لیندے ہاں۔ رکتوں باہروں نہیں آئے
 ہاں۔“ وریام انج جیویں ساہ لین لئی چپ ہويا۔ تاں راجو کاٹھیا وچوں دی بول پیا:

”تسیں سردار او، تہاڈا فیصلہ ای اخیر لا فیصلہ ہووے گا پر ایہہ گلاں وی یاد رکھو،
 جو ہر وستی، ہر تھاہر تے ہر طرح دی ہون آلی گل انگریز تیک لازمی اپڑدی ہے۔ کیویں؟
 کوئی ذیلدار اپڑاوند ا ہے۔ بیلدار یاں تحصیلدار۔ اوہ ایٹھوں دے ای، ساڈے وچ دے
 ای بندے ہوندن..... اک ہور گل یاد رکھنی وی لازمی ہے۔ تسیں کس طرح دی تیاری کرو
 گے۔ اوہ جیہڑے آزاد ہند فوج وچ رلے ہوئے نیں تے ساڈے آٹھ گوانڈھ وچوں
 اٹھ کے لیہناں نابراں نال جار لے نیں، بھگت سنگھ دی واج ہر روز ودھدی جا رہی سنندی
 پئی ہے۔ پر مُڑ وی جیویں ساڈی مخبری ہندی ہے۔ سانوں کوئی پتا ہے۔ کوئی خبر ہے۔ کجھ
 سنیا ہے اسیں۔ لیہناں نابراں دے اندر وی انگریز اپنے جاسوس گتے ہوئے نیں۔ مینوں
 تاں لگدا ہے اج یاں کل، گل تھاہراں تے انگریز قابض ہو جاسی۔ ایہہ اسیں سوچناں اے
 جو اسیں گٹھے وچ رُل کے گھٹا ہوونا ہے یاں ہوادا مہاڑ ویکھنا ہے۔“

راحمو کاٹھیے دی گل مکی تاں پرہیا آلیاں ویکھیا جو پیرو جیہڑا ہُن حیاتی دے دریا
 دی دوجی من تے لگن آلا آہا تے اپنے بُت دیہہ توں کجھ ای دناں دا پروہناں لگدا آہا،
 اوس اپنا نیزہ پھڑیا..... نیڑے کھلوتی مُشکی گھوڑی تے پلا کی ماریوس تے اوس لاسے ٹر و گیا
 جدھر اج تیک کوئی گھٹ ای جاوند آہا۔ خورے کیوں، کیہ جانے؟ پر ایس توں وی ودھ
 ایہہ گل ہوئی جو سارے اوہنوں جاندے نوں ویہندے رہے پر کسے نوں توفیق نہ ہوئی جو
 کوئی اوہدے توں کُچھ ای لیندا کہ وہ کدھرنوں جا رہیا اے تے کیوں؟

.....

مُڑ کے وریام، پیرو بارے جدوں وی سوچدا۔ ایہی آکھدا: ودھ توں ودھ اک
 ادھ انگریز دا گاٹا کس لیا ہونا پسو، اپنے کمزور ہتھاں وچ پھڑے ہوئے رومال نال، پر اوہ
 نہیں جاند ا جواتھے بُرا لا جو گیاں وچ اوہدے دو ہتھاں دے نہ ہوون نال اسیں کنے ہتھل
 ہو گئے آں۔“

بُرا لا جو گیاں، وچ راہن آلیاں دی حیاتی اُنج ای اگے ٹردی رہی جیویں
 اجیہاں وستیاں وچ راہن آلیاں دی ٹردی راہندی اے۔ انج جیویں اوہناں راحمو کاٹھیے
 دیاں گلاں نوں من لیا ہووے۔ انج جیویں اوہ کسے ہونی نوں اڈیک رہے ہوون۔
 چیر دی اک کوئی شام راول جوگی نوں ایتھوں لنگھیاں ویکھیا گیا، آکھدے
 نیں، ”اوہدے ہتھیں کھوٹدی دی تھاہرے کنگ آہی جیہدے اُتے اوہ گاوند جا رہیا آہا۔“



18

آوونی بھیناں رل گاوونی گھوڑیاں

بُرا لا جوگیاں ہُن اجیہی وستی آہی۔ جتھے حیاتی دیاں لوڑیندیاں سبھے شیواں لبھ جاندیاں۔ بُرا لا جوگیاں تے پکی ماڑی نیڑے لائل پور، دے ناں توں اک وڈی منڈی بن گئی آہی۔ دوسا بھر لائی فجراں ساراں اپناں گڈا، جولیندا، جیہندے اگے خچر بدھا ہوندا، شام پین توں پہلاں سودا لے کے وستی اپڑ آؤندا۔ کدی کدی راجمو کاٹھیا وی اپنے شوقی ٹانگے اُتے منڈی جاؤندا تے کدی نرا ٹانگے تے دو چار لوکاں نوں بٹھا کے کچی سڑک تے دور تائیں جھوٹے دواندا۔

مرد، کم کار توں ویہلے ہو کے چھے خموں کپڑے پاؤندے۔ جیہناں نوں دھون لکیاں نیل لایا جاندا۔ دھون مگروں وی جیہدے نشان رہ جاندا۔ نیل، کپڑیاں وچ رلی میل کھا جاندا..... وڈی عمر دیاں کچھ زنانیاں کالے بانے پائی چرنے ڈاہ کے ایدھر او دھر دیاں گلاں کر کے دینہہ لاہن دا جتن کردیاں۔ جوان مٹیاراں پانی بھر دیاں..... وستی وچ ہوون آ لے ویا ہواں، شادیاں تے گاؤں کڈھ دیاں۔ سٹی کھیڈ دیاں، چھیمبیاں دے رنگے ہوئے کپڑے، سوئے دیاں والیاں تے کانٹے پاؤندیاں۔ کواریاں چھوہریاں کنناں وچ

چاندی دے بُندے، والیاں یاں پھیر سوئے دے بنائے ہوئے دُر ورتدیاں۔ اوہناں دے پہراوے توں پتا لگ جاندا جو ایہناں حالے پر نیوناں ہے۔

کتیں دی تریہہ ہو گئی آہی مگھر سر، نوں آن چڑھیا آہا..... نواپئے گھنڈی پھڑی، کے نین دے سرتے روں دی گھڑی دھریوس تے پنجان لئی ٹرن لگی تاں امرتا اوہنوں روک لیا۔ رضائیاں، ٹلائیاں دا کپڑا اپنے ہتھیں کردیاں آکھیوس: ”تسیں سارا دینہہ او تھے پٹنے کول ہڈ ضرور بھنوانے نیں میں جاوندی آں۔“

نواپئے عمر نال اپنی گھر دی، کب دی واج وچ آکھیا: ”جوان جہان دھیاں گھرے ای سوہندیاں نیں۔ پُتری، تھوڑا جیہا ٹر لاں گی تاں ٹنگاں نسل ہو جاسن نالے کوئی بڈھڑی ٹھیری ٹکر پئی تاں اوہدے نال کائی دُکھ سکھ کر لیاں۔“

”اماں، توں ٹنگاں نسل کرن تے دُکھ سکھ کرن ضرور ٹر، پر میں وی نال ای جاساں۔ نالے کئی واری تہانوں آکھیا ہے مینوں دھیاں آنگ نہ سمجھو، جوان جہان تاں اُکا نہیں..... توں نہیں جاندی ایں اماں بڈھیئے! ورھے ہو گئے میں اندروں بدل گئی آں۔“ امرتا دی گل سُن کے نواپئے چُپ کر گئی۔ پر اوہدی کھونڈی کتے کتے روڑاں آلی پکی بھوئیں تے لگدی تاں واج ضروری اُبھردی۔

سو جے پٹنے، نواپئے تے امرتا دے کوٹھڑی وچ وڑدیاں ای او تھے پہلوں توں پئی رُوں نوں اک پاسے کیتا۔ اوہناں دی رُوں لے کے بھوئیں تے وچھاون لگ پیا تے ہر آری وانگوں ایہہ گل کیتوس:

”وکیھو، نا ایہنوں آکھدے نیں ویلی ہوئی رُوں، مجال ہے جو کوئی وڑیواں، پھٹی وچ رہ جاوے۔“ اوہ جاندا آہا جو رُوں نواپئے آپ ویلدی ہے۔ تے گل ایہہ آہی جو ہر وسا کھی تے نواپئے اوہنوں دو چار پڑوپے کنک ودھ پا دیندی۔ ایس پاروں دو جے گھراں اچوں آون آلی رُوں وچ وڑیویاں دا ہونا تے نواپئے دی ویلی ہوئی رُوں وچ

وڑیویاں دا نہ ہووناں لازمی امر آہا..... اک نظر اوس چھت نال لگے ہوئے گنڈے وچ
پھسی کمان، تندے تے رسے نوں ویکھیا تے ہتھیں پھڑی مُنگلی نوں تار، اُتے مارن لگ
پیا۔ اک ہنری پٹنے آنگ اوس دوجے ہتھ وچ تاڑا پھڑ لیا۔ دھک دھک، تھے تھے دی
واج ودھن لگ پئی۔

اک دو جوان نگاہاں امرتا دے وجود اُپر ضرور پیاں پر نواپے نال دُکھ سُکھ سانجھا
کرن لئی کوئی زنانی نہ اپڑی۔ اوہ وان دے موڑھے اُپر کھونڈی کھاڈی پٹھ دھری ڈونگھیاں
سوچاں وچ گواچی رہی۔
مگھر لنگھ گیا۔
پوہ آن دُھکا۔

پٹنے توں بھروائیاں ہوئیاں سوتاں منجیاں تے وچھر گئیاں۔

نویاں فصلاں بیجن آسٹے کیاریاں وچ پانی بھردتا گیا۔ دُہراں، تہراں لگ
گئیاں..... فصلاں گڈیاں گئیاں پر فصلاں بارے وریام نال چھڑیاں راحمو کاٹھیے دیاں
گلاں نہ مُکئیاں ہان تے نہ ای مُکئیاں۔

وریام ڈونگھی سوچ وچ دُبیا سوچدا..... اوہ انگریزاں ورودھ لڑن توں کیوں
انکاری ہے۔ کیوں حیلے بھانے لبھدا ودا ہے کیہ اوہ میر و مراٹی دیاں گلاں سُن کے ای ریک
گیا۔ اودوں جدوں اوہ وتی وچ لوکاں دیاں بماریاں ویکھن حکیم نال آیا آہا..... کیہ اوہ
اوس مان مریادا نوں گوا بیٹھا ہے جو اوہدے خانوادے دی خاص نشانی رہی، تے جیہنوں
قائم دائم رکھن آسٹے اوہدے دادے تے دادے دے بھراواں اپنیاں جاناں اپنے ای لہو
دیاں لکیراں تے روڑھ دتیاں..... مربعیاں تے مال مویشیاں دی مالکی تے چودھراہٹ ای
تے نہیں اوہنوں چُپ رکھی ودی۔ کیہ بہادر راں تے سورمیاں دی ایہو ای نشانی ہوندی ہے
جو وریام وچ دس دی پئی ہے۔“

”مینوں انج نہیں کرناں چاہیدا۔“

”میں ایس نموشی نال کیویں جی سکداں؟“ اوہ سوچدا۔

رنجکے دی کیاری تے پٹھیاں ولے خاں نواپئے نوں اپنا سفناں دسیا۔

”میری ماں دوروں رُکھاں دی جھنگی وچوں بھجدی آئی تے مینوں انج سینے

لایوس جیویں مینہ وسن مگروں روڑاں آلی بھوئیں وچوں اوہنوں کوئی خزانہ لہہ گیا ہووے۔“

”توں اوہدے آسٹے خزانے آنگ ای تاں ہاویں، سوہنیا۔“ نواپئے اوہدے سر

تے ہتھ پھیر دیاں موہ نال آکھیا۔

وستی دی پٹھلی لاسے بہوں گھٹ رقبہ رہ گیا آہا۔ جتھے جانگی ککرلا دتے گئے

ہاؤن۔ تاں جو کجھ سے مگروں ایہہ بھوئیں وی گڈن جوگی ہو جاوے۔

جیہڑی بھوئیں بن گئی آہی اوہدے وچ کنگ، رُوں، کماند، ماہ، مُنگی، مسر،

چھولے گڈے جاندے۔ مکئی، جوار، تل، گوارا، رنجکا، لوسن، شٹالا تے گھاہ عام ہوندا۔

شادیاں، ویاہواں تے گاواں، وچھیاں کٹیاں تے وچھے کوہے تے پکائے جاندے۔

پُواں آلی چکی نال گھراں وچ ای آٹا پیٹھا جاند، بھاویں وستی وچ آٹا پیٹھن

آسٹے خراس لگ گئے ہاؤن۔ گھراں وچ آٹے دیاں سیویاں، حلوہ، پُوے، باجرے تے مکئی

دیاں روٹیاں پکدیاں۔ چھولیاں دی پلی تے امیاں دی چٹنی نال گلی کھائی جاندی۔

بھنڈی، وٹاؤں، گوہی، کدو، دھاہنے، تھوم وصل تے مرچاں عام اُگدیاں..... بیر، شہتوت،

پیلھو آں، ڈیہلے، لسوڑے، امب، جموں، نمبو، مالٹے، امرود عام آون لگ پئے۔ فصلوں

دے بنیاں اُتے سیو بیراں دیاں قطاراں لکیاں ہوندیاں۔ حیاتی اپنے سُہا اپنے ٹھہا وچ

لنگھ رہی آہی۔ دُکھ، سُکھ، جین، مرن تے ویاہ، منکھ پورے طور منائے جاندے.....

وریام تے صاحبان دی منگنی ہو گئی۔ ویاہ دے دیہاڑ نیڑے توں نیڑے آون

لگ پئے..... پر مُلکھ وچ امن کوئی ناہس۔

ہر چوک، ہر بازار وچ پھاہیاں گڈ دتیاں گئیاں۔

حیاتی مُڑ کے سُنکون، سمنن لگ پئی۔ ڈرتے سہم، ہرجی دے جتے وچ لہو آنگ

رکن لگ پیا.....

باراں صاف ہونیاں، جنگل وڈھے گئے، فصلاں پک کے گھر آون لگ پیاں

تاں گلاں ہوون لگ پیاں جو انگریزاں واہی وانان توں ملکیت دا حق کھوہ کے نراواہی نیجی دا

حق دیون دا فیصلہ کیتا ہے۔ تدوں بھگت سنگھ تے اوہدے ساتھیاں انگریز خلاف بغاوت دا

جھنڈا چک لیا آہا..... باری دو آب ایکٹ تے آب کاری بل کنے ای لوکاں نوں بغاوت

تے مجبور کیتا کنیاں ای کالے پانی دی قید بھگتی تے کنیاں حیاتی دی قید توں مُکیتی حاصل کر

لئی۔ ایہناں وچ ای بھگت سنگھ وی رلا آہا۔ لاہور، وچ آزادی دے ایس سورے نوں

پھاہے لا دتا گیا۔ پچھوں خلقت اوہدے سوہلے گاویں۔ بھگت سنگھ دی شہیدی تے شاعری

بنی۔ اوہدی شہادت اُتے بنی گھوڑی گھر گھر گاویں جا رہی آہی..... ویڑھے وچ کسی رات

لتھدی آہی جدوں نواپئے نوں امرتا دی واج سُنجی۔ اوہ ہولے ہولے گوں رہی آہی:

گل پھانسی دا سوہناں ہاروے ہاں

ماتا پیاری اج، ہنچھواں دا پانی

پئی پُتر اُتوں ہے واردی وے ہاں

بھین پیاری دیاں بھریاں نیں اکھیاں

ڈُلھ ڈُلھ پیندا وچوں نیروے ہاں

آوو نی بھیناں رل گاوو نی گھوڑیاں

راج گرو، سُکھ دیووی ژ پئے

یاراں دے پکے جیہڑے یاروے ہاں

شمع وطن دے تن پروانے

چلے سدن ڈولا ماروے ہاں

چالھی کروڑ تیری جنج وے لاڑیا

کئی پیدل تے کئی اسواروے ہاں

آوو نی بھیناں رل گاوو نی گھوڑیاں

کھڑ کھڑ ہسدے، غم نہ کوئی

متھے تے لالی بے شماروے ہاں

قوم لئی مٹن داشوق دل وچ

رتجھاں رہیاں ٹھاٹھاں ماروے ہاں

آوو نی بھیناں رل گاوو نی گھوڑیاں

جد تک چمکن چن تے تارے

جد تک رہے سنساروے ہاں

آوو نی بھیناں رل گاوو نی گھوڑیاں

رسی پھانسی دی شیر نے چم کے

دتا تریک نوں شنگاروے ہاں

بلاکاری امر ہو یا دلش تے مٹ کے

بھگت سنگھ سرداروے ہاں

آوو نی بھیناں رل گاوو نی گھوڑیاں

جنج وے ہوئی اے تیاروے ہاں

جنج وے ہوئی اے تیاروے ہاں

ایہہ گاؤں گاوندی امرتا نوں سُن کے، کجھ سمے پہلاں امرتا نال اوہدے ویاہ

بارے کیتی گل تے اوہدے دتے جواب نوں یاد کر کے نواپئے دے ہوٹھاں تے ورسی کھلر گئی۔ مُڑ کے اوہدے اندر دُکھ بھر آیا۔ اوہدا من تے اکھاں گلیاں ہو کنیاں..... اوہدے ساہمنے امرتا دی اضا تعیں جاندی جوانی دا دُکھ آہا یاں کوئی اپنا صدمہ، اوہ کوئی فیصلہ نہ کر سکی پر اوس منجی تے لمیاں پئی پئی نے اکھاں میٹ لیاں۔ اکھاں میٹ لیاں تے مُڑ کے اوس سگوس دا سگواں اوہی سفتاں ویکھیا۔ جیہڑا اوس کجھ راتاں پہلے ویکھیا آہا۔

.....

میرے نانے چودھری اروڑے خاں بارے خلقت کیہ کیہ گلاں کردی ہے۔ وستی دے ہورس لوکاں نوں تاں میرے ساہمنے کجھ کہن دی جرأت نہیں ہوندی پر کدے کدے میرے لگدے لینے، میرے اپنے رشتے دار انج دیاں گلاں کریندن جیویں میرے اُپر ٹچکراں کریندے ہوون۔ پر میں سوچداں جو چودھری اروڑے خاں بھنگ دا نشہ کر کے کیہڑی دنیا توں لگناں چاہوندا ہووے گا۔ جیویں میں اج اک دنیا توں لگ کے اک دوجی دنیا وچ پناہ لیناں۔ جدوں اوس دنیا توں ڈر کے مُڑناں تاں پہلے آلی دنیا مینوں ٹنبدی ہے۔ اک دنیا اوہ ہے جیہدے وچ جین دا عہد میرے توں میرے پیو نور محمد لیا آہا تے اک دوجی دنیا ہے جیہدے وچ جین، جیہدے وچ راہن، جیہدے وچ وسن دی صلاح مینوں راحمو کاٹھیے دتی ہے۔ جیہدے وچ میں آپوں وی راہناں چاہونداں، پہلے توں ای میں اندروں چاہوندا ساں جو مینوں کوئی اجیہی ای صلاح دیوے جیکر اوہ راحمو کاٹھیے دے دتی ہے تاں اوہدے وچ اوہد اوش کیہ ہے؟ راحمو کاٹھیا اوس ہندو بیٹے توں ودھ انگریزاں نوں انصاف پسند سمجھدا ہے۔ آہندا ہے انگریز دے آون نال لوکاں نوں فائدہ ہووے گا۔ آہندا ہے انگریز حکومت آ، جان نال لیہناں بنیاں دا کوٹھیا جاوے گا۔ جیہڑے بیٹھے بٹھائے ساڈا محتاں نال کھٹیا مال ہڑپ کر جاندن، تے اوہ دھاڑوی وی قاعدے قانون پیٹھ آ جاوَن گے جیہڑے جتھے بنا بنا کے سانوں لٹن آ وندے نیں..... اوہ آہندا ہے مینوں

وی انگریز نال رل کے اپنی طاقت ودھاوئی چاہیدی ہے..... اوہدے وڈکیاں دی جیکر انگریزاں نال لڑائی رہی ہے۔ تاں اوہدے وچ اوہ نال شامل نہیں رہیا..... ”پرانج کرن نال میرے وڈکیاں دا خون تے امرتا دے مایاں دی بے دوسی موت تاں اضائعیں جاوے گی۔“ اوہدیاں سوچاں وچ بدلاؤ آؤندا رہندا۔ اوہ مُر سوچدا۔ ”میں وی تے اک اجیہی دنیا دی بھال وچ آں۔ جیہدیاں جڑھاں بُرالا جوگیاں وچ بہوں ڈونگھیاں نیں۔ ہوائیں آنگ آون والے راول جوگی دی روح آنگ جیوندی ہے بُرالا جوگیاں دی وستی دی ہر اک شے۔ جیہدے وچ میرے وڈکے جیوندے نیں۔

اک اجیہی دنیا جیہڑی قانون، نویاں بندیاں پیہیاں سراواں، ریلوے لائنیں، نہراں، فوجی کیمپاں تے نویں نویں ہتھیاراں کچھے چھپی جا رہی ہے۔ اخیر اپنی کو چھپ جاوے گی جو ساڈے بھانے تاں مرای جاوے گی۔

”انگریز ضرور بر ضرور ظلم کر رہیا ہے۔ قبضے دی نیت نال ہر آون آلا اک ارادہ کر کے آؤندا ہے تے اوہدے ارادے دی غینہ ظلم نال ای اُسردی ہے جیکر اوہ ظلم نہ کرے تے لوکاں وچ ڈر، خوف تے اوہدی بہادری اوہدی جرأت نہیں منی جاندی۔ حکومت تے سرداری تاں اوہدے ناں نوں منے جاون نال ای قائم رہ سکدیاں نیں۔ انگریز وی اپنے ارادے نوں جرأت تے ظلم تے نویں نویں ہتھیاراں نال اُساردا ہے۔ اوہ ساڈے نیزیاں تے برچھیاں دے ساہمنے بندوقاں، بارود تے توپاں لے کے آیا ہے.....“

”کیہ توں نہیں جاندا وریام خاں جو میرو مرانی تے اوہدے پُتر، اج انگریز دے بانہہ بلی بنے ہوئے نیں۔ ہر روز ودھ توں ودھ بھوئیں اوہناں دی مالکی وچ آوندی جا رہی ہے..... بار، جیہنوں تیرے تے میرے جیسے راٹھاں دیاں وڈکیاں لہو، مُڑھکا وہا کے اباد کیتا۔ ہُن اجیہے ای لوک اوہنوں سنبھالی جا رہے نیں۔ انگریز بہادر اباد کاراں نوں لمبڑداریاں تے سرداریاں بخشی جا رہیا ہے۔ میرو مرانی جیسے جاسوساں راہیں، اوہنوں

جدوں پتا لگدا ہے کہ کتھے کتھے لوک انگریز سرکار دے ورودھی نیں اوہناں نال کیہ کجھ نہیں کیتا جاندا..... تے فرض کرو جیکر اوہ ہور کجھ نہ وی کرے اوہناں توں بھونیاں ای لے لوے یاں اوہناں دیاں زمیناں نوں جاون آ لے پانیاں دے موگھیاں دے نکے ای سوڑے رکھ دیوے۔ اوہناں آسٹے تاں ایہی گھاٹا بہوں وڈا ہے..... ”سوچ لو یں انگریز مخالفت دامنڈھ بنھناں سوکھا ہے پر اوہنوں توڑ چاڑھناں بہوں اوکھا ہوسی۔ توں جاندا ایں جو مومورے فنیانے تے سردار سے خاں سیال دیاں دوہتریاں پوتریاں نوں کوں ذلیل تے رسوا کیتا گیا۔ جیہناں اپنے وڈکیاں دی ریت توں ہٹ کے انگریز ورودھ وارج کڈھی۔ اوہناں دے کمیّاں ہتھوں ای اوہناں نوں پھایاں تے چاڑھیا گیا۔ اوہناں توں گندیاں نالیاں دیاں صفائیاں کروائیاں کنیاں۔ اوہناں نوں کالے پانیاں گھل دتا گیا۔“

وریام نوں انج لگدا جو ہر ایلے اوہدے ضمیر تے وجود وچکار اک یدھ، اک جنگ ای ہوندی راہندی۔ اوہدے ضمیر ورودھ جیہڑی اک شے ہے۔ اوہنوں اوہ وجود آکھدا ہے۔ اوہ راجمو کاٹھیے دا حامی ہے تے ضمیر پتا نہیں اوہ آپ ہے یاں زندگی جین دی سدھر۔ وریام، ستیاں جاگدیاں، سُفنے ویکھدیاں ایس ای خیال پیا راہندا۔ جیہدا کوئی حل، کوئی انت مہار اوہدے ہتھیں نہ آؤندا۔

بھادروں دیاں ہمس بھریاں راتاں وچ وریام ایہناں ای خیالاں وچ مڑھکو مڑھکی راہندا۔ اک اگلی راتیں اوس دو وکھ وکھ سُفنے ویکھے۔ پہلے سُفنے وچ اوہ دریا دی گنڈ وچ پھر رہیا ہے دوئی لاہے بھرواں جنگل ہے۔ اکے آریں جنگل چوں ہاتھیاں دا اک ٹولہ آن نکلدا ہے۔ تے پورا ٹولہ اوہدے ویکھدیاں ویکھدیاں نچدا ہے تے نچدا نچدا دلہلی بھونیں وچ تھلے لہہ جاندا ہے۔ بس اوہناں دے سُنڈ اُتے رہ جاندا ہے نیں۔ اوہ گھابر کے اُٹھدا ہے۔ پانی پی کے سوں جاندا ہے تاں اگلے ای سُفنے وچ ویکھدا ہے راجمو کاٹھیا اوہنوں اجنا لے ہون آلی نابری بارے دس رہیا ہے۔ جو کجھ اوہ دس رہیا ہے اوہنوں اوہ

نظر وی آ رہیا ہے۔ اوہ ویکھدا ہے جو کیویں اجنالے نابری مگروں قتلّام ہوندا ہے تے
 کیویں راحمو کاٹھیے دا اک وڈکا ایس قتلّام وچ ماریا جاندا ہے۔ راحمو کاٹھیے تے وریام دے
 ویکھدیاں کنے ای لوکی فریڈرک دی فوج دیاں انھیاں گولیاں توں بچن لئی دریا دیاں
 موجاں وچ گواچ جاندا ہے۔ وریام اگے ودھدا ہے تے لیہناں چھالاں مارن آلیاں
 پھٹو نابراں دا لہو نتھار کے چڑے دی اک مشک وچ بھر دا ہے تے سُفنے وچ ای سوچدا
 ہے۔ نابراں دی موت وچ راحمو کاٹھیے دے وڈکے دا ماریا جاناں صدے دی گل ہے یاں
 فخر دی.....؟“

اوہ کوئی وی فیصلہ کیتے بنا گھابر کے اٹھ باہندا ہے۔



19

چیتر دی تانگھ

”راحمو کاٹھیا بھاویں بندہ وی پورے وقوف دا نہیں لگدا پر مُڑ وی کجھ گلاں
اجیہیاں کر جاندا ہے جیہناں اُتے بندہ سوچدا ضرور ہے۔“

”پر میں اوہدیاں گلاں تے کیوں سوچدا ودا آں اج کل؟“ وریام انج جیویں
راحمو کاٹھیے تے اوہدیاں گلاں نوں گلوں لاہ کے لاہے سٹیا تے مُڑ کے ٹوکے آنی ول نوں
ٹُر پیا۔ اوس سوتے ایلے صاحبان نوں ملن دا کارا کیتا ہویا آہا۔ کجھ ای دیہاڑ پہلوں
صاحبان نال نکی جیہی گل اُتے رُسن مگروں نواپئے اوہناں دی رسائی کرا چھڈی آہی۔ اوہ
صاحبان بارے سوچدا جا رہیا آہا۔ نواپئے صاحبان دے دینہہ بر رات گُن گاؤندی وتدی
تے اوہنوں اپنی وڈکی راسباں آنگ گُن وتی آکھدی۔ راسباں جیہدے بارے اوس آپ
سنیا ای ہویا آہا۔ اپنے ہنر تے کسیدہ کڈھن الوں۔ گھر دے کموں کاجوں صاحبان، وریام
نوں وی ڈھیر دانی لگدی یاں شاید اوس جدوں دا اوہدے بارے سوچناں شروع کردتا آہا
اوہ ہر ایلے اوہدے بارے ای سوچدا راہندا۔ اوہ کیویں گھر دیاں کندھاں، دانیاں آلے
بھڑولے، رسوئی دے اوٹے، ہارے، چلھے، لوہے تے مٹی نال پوچ کے رکھدی۔ کیویں

منجی پیڑھی، پنگھوڑے، وان تے سوتر نال چٹائیاں، دریاں تے وچھونے اُندی تے اوہناں
نوں صاف ستھرا رکھدی، تے کیویں پچھیاں تے ٹوکریاں دوروں ای دسدیاں جو اوہناں
نوں صاحبان دے ہتھ لگے نیں۔

اوہ نویں واہی پہلی دے سیہاڑاں وچوں اوہناں دے اُبھاراں تے نواناں
وچوں لنگھدا ہویا جا رہیا آہا۔ اوس اک تھاہریں ٹیہری دے چترے آٹڈے ویکھے۔ دور
بولدی ٹیہری دی واج سنیوس۔ نویں نویں پھیرے گئے سہاگے آلی بھونیں وچوں لنگھیا۔
جتھے ولے تارے میرے دے سیہاڑاں چوگرداسی دا دائرہ جیہا بنا چھڈیا آہا۔
پھلن مک چکلیا آہا۔

چیتھر، نے چڑھدیاں ای اوہدے من وچ عجیب تاںگھاں جگا چھڈیاں ہائیں۔
اوہدے چاروں پاسے جیویں قدرتی رنگاں دی پھہار پیندی ہووے۔ اوہ ٹوکے آنی دے
نیڑے اڑیا۔ اوہنوں صاحبان گاوندی دی واج سنیجی اوس پیراں دا بھار ہولا کر لیا، تے
کن اوہدی واج تے دھریوس۔

”روح ہو جاوے گی سیلانی۔ بُت وچ گلیاں دے رُسی۔“

صاحبان کجھ چرتیک چپ کیتی رکھی مُو کے انج جیویں آہ بھریوس۔

”میں تینوں گھر گھر ڈھونڈاں۔ کراگ دا بہانہ۔“

اوس جاندیاں ای اپنی بانہہ صاحبان دے موڈھے تے دھر کے اوہنوں اپنے
ال نوں چھکیا، گل نال لاوندیاں کچھویوس، ”کیہنوں اگ دے بھانے گھر گھر ڈھونڈ دی
سیلانی ہو گئی ایں؟“

”اڑیا، تینوں ای، ہور کسے نوں میں اگ وچ گھتتاں ایں۔“ ”اج تیری ونجھلی
دی واج نہیں آئی مینوں، تے جدوں میں تیری ونجھلی نہیں سندی مینوں انج جیویں تاپ
جیہا چڑھ جاندا ہے۔ اُدریویں دا، تیری ونجھلی میرے اُدریویں دا تاپ لاہ چھڈ دی ہے.....“

میرے ہاں دیاں سبھ پرینج گئیاں، پتا نہیں مینوں توں کدوں تیک اڈیک دی سولی تے لٹکائی رکھناں ایں۔ صاحبان دی گل سُن کے وریام ماڑا جیہا ہسیا، پر مڑ کے چُپ ہو گیا۔

”توں ونجھلی دی واج دی گل کردی ایں، میں سوچداں جو ساڈے جیسے بندیاں دیاں خوشیاں وی شاید رب نوں نہیں بھاوندیاں۔ ہُنے میں ویاہ بارے سوچداں پیا ساں، تیری وجہوں نہیں، نواپئے وجہوں جیہڑی دینہہ بر رات ساڈے ویاہ دیاں گلاں ای کردی راہندی ہے..... پر اج انگریز دے کرندے آکے مینوں ہورس ای لاسے سوچن تے لا گئے نیں۔“ اوس جویں چب چب کے گل کیتی۔

”انگریز دے کرندے؟“ صاحبان دی واج وچ حریانی آہی۔ گل کردے کردے اوہ اپنے اُتلے نوں ہتھ وچ لے کے مروڑن لگ پئی۔ اُتلے تے چمکدے تارے جھڑ جھڑ کے بھوئیں تے ڈگن لگ پئے۔

”انگریز دے کرندے آئے ہاں۔ ایس واریں مالیہ لین لئی نہیں۔ بھیدیاں، گاواں، اُٹھاں، مجھاں، ڈھکیاں تے ٹیکس سگوں چھولیاں، کنک، مکئی ایہتھوں تیک جو گھاہ بوٹ تے دبھ تے مالیہ دیوناں ہُن اوکھا نہیں لگدا سانوں پر ایدکیں تے اوہ حدای کر گئے نیں۔“ گل کردیاں اوہدی واج نیویں ہوندی گئی۔

”اوہناں کیہ آکھیا تینوں؟“ صاحبان انج جیویں اوہنوں بُلکل وچ لیندی ہووے۔ اوس اوہدے سردے والاں وچ ہتھ پھیریا۔ اوہدی کھاڈی تے ہتھ رکھ، منہ، منہ تے اکھاں، اکھاں دے ساہمنے کردیاں آکھیا: ”میں چراند توں گھوڑی نول ول کے لیا رہیا آہا، اوہ چار جنے ہاں۔ چاروں گھڑ اسوار، ترے ایہتھوں دے اک باہرلا۔ اوہناں میرے ال تکیا تے پھیر گھوڑیاں میرے ول لیاوندے ہوئے ہوئے ہولے ہولے تھلے لہندے گئے۔ بہوں نیڑے آکے اوہناں دسیا۔“ اوہ سرکار دے بندے نیں تے بُرالا جوگیاں دی بھوئیں بارے حساب کتاب کرن آئے نیں۔“

میں آکھیا، ”بُرا لا جوگیاں، دی پوری وستی دی بھوئیں دا مالہ سرکار دے خزانے وچ جمع ہوندا ہے ہمیش۔“

”مالیے دا نہیں، بھوئیں دا حساب کتاب۔“ اوہ ہور تر کھے ہو کے بولے۔

”بھوئیں تے ساڈی ہے تے تسیں ایہدا حساب کتاب کیویں کر سکدے او؟“ میری ایس گل تے اوہ بولے۔

”وڈی جنگ مگروں سرکار برطانیہ نوں پسیاں تے بندیاں دی لوڑ ڈھیر ہے۔ ایقھوں دی خلقت نوں نہراں کڈھ کے دیون تے ریلوے دا نظام چلاون مگروں کنے ای سرکاری کم ادھ چچدھے پئے نیں؟“ اوہناں آکھیا۔

”پر نہراں تے ریلوے دا نظام تاں تسیں ایقھوں دے عام لوکاں تے جیلاں وچ ڈھکے قیدیاں توں مشقت کروا کے تے ایقھوں دے خزانیاں نوں لٹ کے چلایا ہے تہاڈے پلیوں کیہ خرچ ہو یا؟“ پتا نہیں میں ایہہ گل کیویں کیتی پر میری ایہہ گل تاں جیویں اوہناں نوں ڈانگ آنگ لگی۔

”تیریاں ایہناں گلاں بارے پتا لگن وجہوں ای سانوں تیرے ال گھلیا گیا ہے۔“ اوہ ایہہ آکھدے ہوئے ایقھوں ٹرو گے جو۔ توں سر پنچا، اپنے قبیلے تے وستی آلیاں نوں دس دے جو اسیں کسے ویلے وی آسکدے واں۔ اک نواں انتظام کرن۔“ اوہناں گھوڑیاں دا مونہہ موڑ لیا..... ”میں چھیتی چھیتی ٹرن لگ پیا، گھوڑی دا کڑیا لاہتھیں پھڑ کے، مینوں گھوڑی اُتے چڑھن دا وی خیال نہیں آیا۔ جوان جہان ہوندیاں وی انج جیویں میریاں ہڈیاں دُکھن لگ پیاں ہون۔ اوہ جاندے جاندے رُکے، مُڑ کے میرے الوں وکھوئیں تے جنگل وچ ہر بندے اک اک فار کیتا۔ جیہدی واج مینوں حالے وی جنگل وچ گونج رہی سُنیدی اے۔“

ڈھیر چرتیک اوہ اک دو جے نال لگے کھلوتے رہے۔

ڈھیر چر تیک چُپ رہی..... مُرد کے انج جیویں اوہ ہر گل بھُل گئے ہوون۔
 ”توں تے چکھن وی نونہہ آیا۔ میں تاں ڈھیر بمار رہی آں۔ ستی دیاں گڑیاں
 دیاں مہنیاں مینوں نج کیتی نوں ہو رساڑیا ای وریام۔“ صاحبان گل کردی کردی پھس پئی۔
 ستی وچ بھاویں اوہناں بندیاں دے آون دا کسے نوں پتا نہیں لگا آہا۔ سوائے
 وریام یاں صاحبان دے، جیہنوں اوس آپ اوہناں بارے دسیا آہا، تاں جو اوہدے من
 توں بھارتھ جاوے، اک اجیہا بھار جیہنوں اوہ کوئی وی ناؤں نہیں دے سکيا آہا، جیہڑا
 اوہنوں اپنے پیٹھ پیہندا جا رہیا آہا۔ اوہ ایس بھارتھلے ایس وجہوں ای آیا آہا۔ اوس فرض
 کر لیا آہا جیویں سرکاری کِرنِ دیاں نوں اوہدے نال رُعب نال گل کردیاں ستی آلیاں سُن
 لیا ہے، تے جاندیاں ہویاں فائر کردیاں نوں ستی آلیاں اک قطار وچ کھلو کے ویکھ لیا
 ہے، اک بچ، اک سردار ہوندیاں اوہدے آسٹے ایہہ بڑی نموشی آلی گل آہی۔

وریام نوں لگدا، اوہدے وجود دا تھم رکتوں وچکار دیوں کڑک گیا ہے تے
 اوہدے وجود اُپر اُسریا ہويا پوری ستی دا میجل ڈگن آلا ہے۔ ایس ای وجہوں اوہ اپنے
 آپ نوں پوری ستی توں لکاوند ا ہويا آوند ا جاوند ا۔

کنے ای دینہہ لنگھ گئے..... اوہناں بندیاں نوں ستی وچ آ کے وریام نوں
 ملیاں، اوہنوں تڑی لا کے گیاں نوں..... اوہ مُرد کے نہیں آئے۔ ہولے ہولے اوہدے من
 توں ایس واقع دا بھارتھدا گیا..... ستی دا کار و بیہار جو پہلوں ای اکسارتا نال چل رہیا
 آہا۔ چلدا رہیا۔ وریام اپنے آپ نوں اوس ای طریقے وچ ڈھال لیا جو پچھلے دناں وچ
 اوہدا وتیرہ آہا۔

صاحبان تے اوہدی منگنی ہو گئی..... ویاہ دی تیاری ہوون لگ پئی.....
 بُرا لا جو گیاں وچ محنتی تے کامے لوکاں دینہہ برات ہڈ پیر بھن کے ہر پاسوں
 جھاڑ جھنکار مکا چھڑی آہی۔ کجھ جانگلی لکراں بناں، جیہناں نوں کلری بھوکیں وچ آپ ای

اوہناں لایا آہا، تاں جو اوس بھوئیں نوں واہن دے لائق بنایا جا سکے۔ ہُن ہر پاسے فصلوں ٹھکدیاں دسدیاں۔ ڈیک نیڑے ذخیرے وچ لوکیں اپنے جنور کھلے چھڈ دیندے تے شامناں نوں ہر گھر دا کوئی نڈھا، گڑی یاں بڈھا ٹھیرا اوہناں نوں موڑ کے باہکاں تے لے آوندا۔ واہی وان فجر پھدیاں نال ای داندناں دے گل پنجالیاں گھت کے بھوئیں واہن ٹر پمدے۔ کھوہاں تے ٹنڈاں گڑدیاں تے ندیوں وگدا نیر کھیتاں ول نوں مُردیاں نالیاں نوں ٹر پیندا۔ سچ جمیاں سویراں لوکاں دیاں دیجاں تے خوشیاں دے تھال دھر جاندیاں۔ حیاتی نو بر نو دسدی۔ لوکی سمجھدے جیویں اوہناں دی حیاتی دُکھاں دی کٹھالی وچوں نکل کے سُکھاں دے سچے وچ ڈھل گئی ہے۔

پانیاں آسٹے کھٹے گئے تلاں تے ٹوئے بے اکساہرے کر دتے گئے۔ جو بھوئیں وچ پہلے توں موجود ہائُن۔ زراعت دے ماہر عملے ولوں وکھ وکھ تھاہراں تے بنائے گئے مٹی دے اوہ مینارے وی جیہناں اُتے بہہ کے اوہ اپنیاں دور بیناں تے دوجیاں آلیاں نال بھوئیں دا اُچا نیواں تھاں پدھرا کر دے۔ ایس عملے نوں زمیناں دی گنتری تے اوہناں دے نمبر لان لئی انگریز سرکار گھلیا آہا۔ ایہدے ای مگروں جھوکاں تے وستیاں نوں نمبر دتے گئے تے اوہناں نوں وکھ وکھ ضلعیاں تے تحصیلاں وچ رلایا گیا..... ہُن ایہناں میناراں تے ٹبیاں دی لوڑ وی نہیں رہ گئی آہی۔ جھوکاں دے نمبر لگ گئے تے اوہناں دے وچکاروں نہراں کڈھیاں گئیاں۔

کھیتی باڑی عام ہو گئی۔

وستیاں مِتھ کے جنساں موجب وچکار دیاں تھاہراں تے منڈیاں بنا دتیاں گئیاں۔ جتھے وکھ وکھ جنساں اکٹھیاں کیتیاں جاندیاں تے مُردے کے من مرضی دیاں تھاہراں تے اپڑا دتیاں جاندیاں.....

کلے کارے بیٹھیاں وریام کدی کدی سوچدا جو اوہدے وچ نابری دا مادہ مر مٹ

تے مُک مُکا گیا ہے۔ ایہدے وچ راجو کاٹھیے دی صلاح دا اوناں حصہ نہیں جناں اوہ سمجھدا ہے۔ حالات کئی واریں اپنے آپ نُون اُنج وی بدل لیندن، جیویں تسیں چاہندے او۔“ سگوں اوہ ایہد اک ہور وی کارن سمجھدا آہا۔ جو بہوں حد تک ٹھیک وی آہا۔ آسے پاسے دیاں بہت ساریاں وستیاں وچ انگریز نے وکھ وکھ تھاہروں لیا کے جیہڑے لوکی اباد کیتے ہائن۔ اوہناں وچوں کئی تے ایٹھوں دے ای وسنیک ہائن، تے وڈی جنگ وچ برطانیہ آسٹے فوجی خدمتاں دے چکے ہائن۔ ہور دھاڑوی قوماں نال تعلق رکھدے ہائن۔ جیہناں دا مڈھلا وسب ای طاقت ور تے حکمران قوتاں نال رل کے حیاتی لنگھاؤنا آہا۔ وریام سمجھدا آہا۔ جو ایس نظام دے ہوندیاں، بُرا لا جوگیاں دے واسی نابر ہووی ویندے تاں کئی کو وڈی نابری دی وِتھ ہوندی اوہناں دی۔

اُجاڑ، ویران تے تتی تھاہراے۔ دور دور تیک کسے رُکھ دی وی کوئی چھاں نہیں۔ نواپئے اوہدے وچ تُردی جا رہی ہے۔ ایس دھیلی تے تتی بیابان تھاہر وچ اوہدا وجود اگ بندھا جا رہیا ہے۔ اوہنوں انتاں دی تریہہ لگی ہے..... اوہ ویکھدی ہے نہ تے مادہ پکھیرو اوہدے اُتے اُڈدے جا رہے نیں۔ نواپئے سوچدی ہے عجیب گل ہے پکھیرو وواں نوں نہ تے دھپ پئی لگدی ہے تے نہ ای تریہہ۔

”ایہہ تریہائی مرے گی یاں دھپ وچ سڑ کے بھوئیں دی تپدی بھٹھی وچ بھج جاوے گی؟“ مادہ پکھیرو پچھدی ہے۔

”ایہہ نہ تے تریہائی مرے گی تے نہ ای دھپ وچ سڑ کے.....!“ نہ پکھیرو آکھدا ہے۔

”مڑ ایہہ کنج مرے گی، میرے توں تے ایہدی حالت ویکھی نہیں پئی جاندی۔“ مادہ پچھدی ہے۔

”ایہہ پانی دے وساہ وچ مرے گی..... جیہنوں ایہہ پانی سمجھے گی اوہ پانی ہووے گا نہیں۔“ نر آکھدا ہے۔

عجیب گل ایہہ ہوندی ہے۔ جو نواپئے ایہہ سارا کجھ ویکھ تے سُن وی رہی ہوندی ہے۔ اوہ ایہہ وی جاندی ہے جو ایہہ اوہی پکھیر و نئیں ”چھوئیاں آلے پتن“ نیڑے راہندیاں وی جیہناں دیاں گلاں اوس سُندیاں ہائَن۔ اودوں وی اوہ کیویں اک واری تراه کے اُٹھی آہی۔ جدوں نر پکھیرو آکھیا آہا۔“ ایہہ بناں اولاد دے ای جاوے گی۔ پر کھسم اُلوں تے قبیلے اُلوں مُڑ، وی ایہدی مان مریدا تے عزت آبرو بہوں ہووے گی۔“

”ایہناں پکھیر وواں میری اجیہی حالت بارے تاں کوئی گل نہیں کہیتی آہی۔“ اوہ سوچدی ہے میں اپنے اُتے اُڈدے جا رہے ایہناں پکھیر وواں توں کجھ پچھناں چاہوندی آں۔ اپنی ایس حالت بارے، صاحبان تے وریام دے ویاہ بارے۔ امرتا دی حیاتی بارے۔ تے ایہہ وی کیہ اوہ جیوندے جی واپس بُرالا جوگیاں مُڑ جاوے گی۔ تے اوہ سارا کجھ کر سکے گی جیہدی سدھر اوہدے من وچ جاگدی ہے؟“

”پکھیرو آ.....؟“

”ہاں پکھیر وینے.....؟“

”نواپئے سوچدی ہے جو اوہ، اوہ سارا کجھ جیوندے جی کر سکے گی؟“ مادہ پچھیا۔ ”اوکھی گل ہے..... ہُن تیک اوس جو کجھ کہتا ہے اوہ گھٹ ہے۔ نالے اک نویں ہجرت مڑ کے وستی آلیاں دے بوہے تے آن کھلوتی ہے۔“ نر آکھیا۔

”اک ہوہ ہجرت، پہلے گھٹ ہجرتاں کیتیاں لیہناں؟“ انج جیویں نواپئے دے من دی گل کر دتی ہووے، مادہ پکھیرو۔

”توں نہیں جاندی، جدوں ایہہ بار وچ ساڈے نال راہندے ہائَن تے اسیں اک دوجے دے متھاج ہوندے آہے۔ اسیں ایہناں نوں فجر اں پھٹدیاں سار

جگاوندے۔ ایہہ آپ وی کھاندے تے سانوں وی چوگا، پاوندے۔ مُڑ کے اسیں اڈ، اڈ
 جاندے۔ ایہہ وی کے کارے لگے راہندے۔ مُڑ پتا نہیں کیوں ایہناں دے من وچ
 چوگ نوں ملکیت بناون دی حرص جاگی۔ رولے ارج جیہڑے ایہناں نوں پئے ہوئے نیں۔
 ایہہ سارے ملکیت تے مالکی دے ہے نی پکھیر و غیے..... تے ایہہ اوہ جال ہے۔ جیہدے
 وچ اسیں آپوں وی کئی واری پھاتے آں۔ پر منکھ تاں ارج جیویں ایس جال نوں اپنی کچھ
 وچ چُکی پھردا ہے، تے جتھے وی چنگا چوسا ویکھدا ہے ایہہ جال او تھے سُخدا ہے تے وچ
 آپ وی پھس جاوندی ہے۔ ہُن توں ویکھیں اک نویں تے پکی مالکی دی حرص، انسان دا
 لہو دھرتی اُپر کیویں وہاندی ہے۔ ایہہ کیویں اپنی اصلیت، اپنی حقیقت بھُل جاندن.....
 اوس ویلے جدوں نواپئے دے ساہ دے نال ساہ نہیں رلدا پیا آہا۔ اوہنوں ارج
 اپنے ساہمنے پانی دی جیویں چمک پئی ہووے۔ اوہ بک بنا کے دھرتی ول نیویں تے مُڑ
 نیوندی ای گئی۔ ایہتھوں تیک جو دھرتی اوہنوں اپنے اندر سما لیا۔



20

جتھیاں آلا چوراہا

اوس سُتیاں آنگ سُفناں ویکھیا تے جاگدیاں آنگ ہتھ پیر ہلاوندی تے اُسل
وٹے لیندی رہی۔

رات دی رات لہو پینیاں ڈائیاں تے رتی لال انھیری۔ ”بُرالا جوگیاں“ دے
چاروں پاسے ایہناں دوہاں دا راج آہا۔ اوس سوچیا: ”ہُنے سورج چڑھے گا تے اوہدی
لاٹ وچ ایہہ سارا کجھ مُک جاوے گا۔ لہو پینیاں ڈائیاں تے رتی لال انھیری۔“

سماں ادھی رات توں کجھ اگانہہ ای ہوندا ہے۔ صاحبان نوں واجاں آونیاں
شروع ہو جاندیاں نیں۔ ”بندے جون، بندے جون۔“ مُڑ کے روندے، گُمراندے
بھج دے، بچدے لوکاں دیاں خوف بھریاں واجاں تے پیراں دی دھمک۔ رُکھاں وچوں
لنگھدی تیز انھیری دی شوکر۔ انج جیویں رکھاں دے ٹاہن تڑتڑ کے ڈھاہندے
ہوون۔ بلیاں دے چیکن تے کُتیاں دے کوکن دیاں واجاں اوہ سُندی ہے۔ دور واڑے
وچ ڈھکیاں مجھاں ارڑانگدیاں نیں۔ جیویں چھپر داوڈا چھتیر تڑتڑ کے اوہناں اُپر آن
ڈھٹھا ہووے۔ مُڑ کے اوہی واج ”بندے جون.....“ اوہ ڈر کے اُٹھدی ہے۔ اُٹھ کے

منجی تے بہہ جاوندی ہے۔ اوہ اپنا جُشہ مڑھکو مڑھکی ہوندا ہے۔ اوہ جھلی جیہدے اُتے اوہ سستی ہوندی ہے پوری طرح بھیجی ہوندی ہے۔ اوہ نال ای لمے پئے وریام الوں تکدی ہے اوہ نچنٹا سٹا ہے۔ مونہہ بند ہوون کر کے اوہ دیاں ناساں وچوں آوندے جاوندے ساہاں دی شوکر سُنیدی پئی ہے..... مڑ کے واگھلن لگ پمدی ہے۔ ہولی ہولی تیز ہوندی۔ اوہدی لوتھ کنبن لگ پمدی ہے۔ اوہ اپنا ہتھ وریام دے سینے تے دھر کے زور زور دی واجاں ماردی ہے۔ پیر بھارا ہوون وجوں گھر کن لگ پمدی ہے۔ وریام اکھاں کھولدا ہے تے حریانی نال اوہدے الوں کجھ چر تکدا راہندا ہے۔ انج جیویں کائی گل اوہدی سمجھ وچ نہ آ رہی ہووے۔ مڑ کے اوہ اپنیاں باہاں صاحباں ال ودھاوندے۔ صاحباں سُنگو کے اوہدے سینے اُتے سر رکھ کے آکھدی ہے: ”باہر تیز انھیری دا شور تے ڈایناں دیاں واجاں توں سُنیاں نیں۔ حالے وی پیاں امڈیاں نیں؟“

وریام ہُن پوری طرح جاگ جاوندے اُٹھ کے منجی تے بہہ جاوندے تے باہر ال کن دھر کے واجاں دی کنسولیندا ہے۔ اوہنوں کوئی واج نہیں آوندی۔ اوہ نہ وچ سر ہلاوندے۔

”تُوں کوئی ڈراؤناں سفناں ویکھیا ہے کلمہ پڑھ کے سم جا۔“ وریام آکھدا ہے۔ اوہ کلمہ پڑھدی ہوئی مڑ کے اوویں ای اوہدے سینے تے سر دھر کے پیر سنگیز کے سوں جاوندی ہے صاحباں دے بُکھاں وچ پڑھیا جا رہیا کلمہ وریام پورا کردا ہے۔

بنیریاں تے سورج چڑھ امدے جیہدی لاٹ وچ رات دا ڈرتے انھیری دا شور گواچ جاوندے۔

بھینی دی اُتلی لاسے اُسارے ہوئے گھر اُتے وریام اک چبارہ وی چھت لیا آہا۔ گھر دے پچھواڑے ال نوں حالے وی سروٹے اُگے ہاں۔ سروٹیاں وچ ورھے دے ورھے بن آ لے کانیاں نوں وڈھ لیا جاندا، اوہناں دے پڑدے تے چلمناں بنائیاں

جانندیاں۔ پتل بنھ کے چھتاں چھتن دے کم لیا یا جاوند اتے چھواہر چھتر ایہناں دیاں
گر گٹھاں بنا کے اڈا کھڈا کھیڈ دے۔

گھر دے پچھواڑے ال کندھ وچوں جھروکا کڈھ کے لکڑ دی تاکڑی لادتی گئی
آہی۔ پچھواڑے ال نوں جاون لئی ایہی راہ ورتی جانندی۔ ایس تاکڑی وچوں نکلدیاں سار
ای سچے ہتھ نوں کچی کندھ کر کے بالن لئی تھاہر ول لئی گئی آہی جتھے ہر ایلے ککراں، ٹاہلیاں
تے ہور رُکھاں توں وڈھ کے لیا ندیاں ہوئیاں سالھاں پیاں ہونندیاں۔ رُوں چُگن مگروں
چھڑیاں دا ڈھگ وی لگا راہندا۔ ویلے کویلے زنانیاں دے ورتن لئی اک ہور لاسے کندھ دا
پڑدہ وی بنا دتا گیا آہا۔

نجات خاں، بلداں دے نال نال ٹُریا جاوند آہا۔ ککراں دی سالھ بلداں مگر
دھر کیندی امدی آہی۔ جدوں اکے واریں راجمو کاٹھیا اوہدے ساہنے آن کھلوتا۔ کچھ سے
توں ولے خاں ڈھیر کرنویا راہن لگ پیا آہا، تے ہُن گھربا ہر دی ذمے واری نجات خاں
دی لگ گئی آہی۔

”سالھ لاه کے نکی جیہی گل تاں سُن جاویں نجات خاں۔“ راجمو کاٹھیے، نجات
دے نال ٹُردے آکھیا۔

”ضرور سُنن آوساں، پر بلداں نوں ڈھاری تے بنھ کے۔“ نجات ولد ادا۔
”ضرور آویں، آہم لاہم وچ گل ہُلی ودی ہے جو نویں نویں مُلکھ پئے بندن،
مسلماناں آسٹے وکھ تے ہندوواں، سکھاں آسٹے وکھ۔“

”سُنیا تاں میں وی ہے۔ ڈھاری تے کوئی دسدا پیا آہا۔ اسیں تے ڈھیر ڈرے
ودے ہاہموں، بئی ہُن بنسی کیہ؟“ ”ولے خاں تاں ڈھیر دناں توں منجی مل گیا ہے۔ آہدا
ہے جیکر ساڈی بھوئیں تے اساں اک دو جے دی سلامتی وچ نہیں راہناں تاں لہہو
گاہن واہن دی کھچل وی کیوں کریئے؟ جھلا جیہا نہ ہووے تاں..... بھلا انج وی ہو سکدا

ہے کدیں؟“ نجابت انج جیویں اپنے آپ نال گل کیتی ہووے۔

”ہوتاں کجھ وی سکدا ہے، نجابتا، جیویں دی واگھلی ہوئی ہے۔ سو، طرح دے

وہم بھرم من وچ اٹھیوندے ہین..... ایس ای گلوں تاں آہدا پیا ہاہموں جو رل بہن نال کوئی صلاح گوچر، لواں گے۔“

ایہو ای گلاں کردے دوویں اپنی اپنی راہے پئے، پر اوہناں دیاں ملیاں راہاں اوہ نہیں ہائَن جیہڑیاں اوہناں نوں اپنے اپنے گھر چُچا دیندیاں۔ سگول ایہہ راہاں تاں آون والے ویلے وچ ہوون آلی ادلا بدلی دے جھلکارے دیندیاں ہائَن، جیہناں تے ٹر کے خورے اوہ کیہ دے کیہ ہو جاندے۔ خورے اوہناں تے کیہ کجھ ورت جاندے؟ ”کیہ سانوں اک ہوو اُچالا کرناں پوسی؟“ نجابت خاں بلداں نوں ہاکدا ہو یا سوچدا جا آ رہیا آہا۔

ادلا بدلی دی گل دُھمی نوں ورھے لنگھ گئے..... وستی بُرالا جوگیاں دے لوکاں ہر طرحاں دی تیاری کیتی آہی۔ اوہ ہر روز ڈیرے تے پرہیا لاوندے تے آون والے ویلے بارے گوہ کردے۔ سوچ وچار کردے۔ آہموں لاہموں پکڑیاں تے منڈاسیاں نال ہتھاں وچ تلواراں لے کے لُٹ مار کردے جتھیاں دیاں گلاں ہم ہمان لگ پیاں۔

اجیہے ای اک جتھے دے سردار نوں کسے بُرالا جوگیاں وچ امرتا کور دی دس پادتی آہی۔ دس پان آلا بُرالا جوگیاں دا ای کوئی جی لگدا آہا۔

اپنی اپنی تھاہروں اُٹھ جاون آلی منکھی دے ایس کارن نوں لُٹ داناؤں دتا جا رہیا آہا۔ جبری لاگو کیتے گئے ضابطیاں تے قاعدے قانون کھوہ دھروہ کر کے تے تروڑ کے ہر کوئی آزاد ہو چکیا آہا تے ایس ازادی اوہنوں انسان دے منصب توں ہٹا کے وحشی درندے وچ بدل دتا آہا۔

اوس ایلے جدوں وریام دی حویلی تے پرہیا بیٹھی آل دوالے ہون آلی وڈھ ٹک بارے گل بات کر رہی آہی تے ایس گل تے اُکا یقین کیتی بیٹھی آہی جو بُرالا جوگیاں تے

آسے پاس دی کسی نیڑلی وتی وچ کوئی سکھ، ہندو گھرانہ نہیں وسدا ہے ایس لئی کسے جتھے دے اتھے آون دا ڈر گھٹ ہے پروریام دے من وچ پتا نہیں کیوں وار وار امرتا دا خیال آونداتے اوہدیاں اکھاں وچ 'امرتا' دی صورت گھمن لگ پمدی..... مُڑ اوہنوں ایہہ سوچ کے تسلا ہو گئی جو برالا جوگیاں دی خلقت اک ٹبر آنگ ہے تے امرتا اوس ٹبر دی دھی آنگ۔

جدوں اوہ سارا کجھ انج وچا ردا آہا اودوں ای بُرالا جوگیاں دی اُبھردی لاسے ٹاہلیاں تے شہتوتاں دے رُکھاں پٹھ اٹھ، نو، جنیاں دا جتھا ایس کیہڑ وچ بیٹھا آہا جو اوہ امرتا، دا بھانا کر کے وریام دی حویلی تے ہلے بولے تے اوہ سارا سونناں تے سمیان لٹ گھٹ کے لاسے ہووے۔ سونناں جیہڑا اوہناں دے گھر پُٹھتاں توں موجود آہا جیہنوں لٹن دا بھانا بن گئی آہی امرتا، جیہڑی ایس گھر ایس ٹبر دی دھی آہی، ایس گھر وچ اپنی مان مریا داتے عزت نال پلدی، سنبھردی، سمبھلدی آ رہی، آہی۔

اڈا، منڈا سے وٹ کے جتھے ایہہ جتھا بیٹھا آہا اصلوں اک چوراہا آہا۔ جتھوں وکھ وکھ جھوکاں تے وستیاں نوں راہاں جاندیاں ہائن۔ جتھے دے آگوتھے ای اک پاسے ٹویا مار کے لٹیاں ہوئیاں شیواں سانجھ کے رکھی جاوندے ہائن۔ گڑیاں، مٹیاراں نوں کیویں تے کتھے سنبھالیا جاوے گا۔ ایہدے بارے اوہناں حالے کجھ وی نہیں سوچیا آہا۔ شیت اوہناں دے من وچ اوہناں نوں سنبھالن دی سدھر وی ناہی۔ نہر دے ایس چوراہے وچوں نکلدے مینڈر دا پانی روز دیہاڑ آنگ شور کردا، لہریے لیندا برالا جوگیاں دیاں فصلاں ال نوں وگدا جا رہیا آہا، جتھے دے جنے اکسارتا نال ایس پانی نوں تیکدے جا رہے ہائن، دینہہ دی لاٹ گھنڈی جا رہی آہی..... دیگر ویلے جتھے دے سردار اوہناں نوں دھاوا کرن لئی آکھیا۔ اوہناں اپنیاں تلواراں، ہتھیاراں تے ہتھ پھیر کے ویکھیا تے گھوڑیاں تے دوہیلے چڑھن لگ پئے۔ سردار، اک گھوڑی تے وکھ اسوار ہويا۔

اڈے دا ایہہ حصہ جونہر وچوں بُرالا جوگیاں دیاں فصلاں ول نکلدے مینڈر دا سنگم ہے۔ ہر طرحاں دیاں سنگتاں دا ٹھکانہ رہیا۔ اودوں لاتوں، جدوں توں ایتھے ٹاہلیاں تے شہوتوں دیاں ساویاں پتراں آلیاں ٹاہنیاں جھاڑ دی شکل بنائی کھلوتیاں ہاں۔ جیہناں دے اوہلے جیہدا جس ایلے جی چاہوے لگ چھپ جاوے تے جیہدا جس ایلے جی چاہوے تہاڑے ساہنے آن کے تہانوں بھاویں حیران کر دیوے تے بھاویں قتل..... ایہہ تھہر سگوں ”چھوٹیاں آلے پتن“ ورگی آہی۔ جیہدے وچوں نکل کے اٹماں سبھرائی دامن نوں جی ناہس کیتا..... اوہ اٹھ نو جنے گھوڑیاں نوں دُکی چال ٹرانڈے ورہیاں پہلوں کڈھے تلاں دے کنڈھے تے آن اپڑے ہاں۔ تلاں تے بُرالا جوگیاں نوں رلاوندی سڑک پانی نال بھرتج کے تلاں دا ای حصہ بن گئی آہی۔ دیگر ایلے وی سورج دی دھپ دا تپ وادھو آہا۔ بھاویں جیٹھ ہاڑھ دیاں دھپاں اپنے سائے چھڈ گئیاں ہاں۔ پر پانی نے بھوکیں تے فصلاں وچ رل کے ڈھیر ہمس بھر دتا آہا..... ایتھوں اگے بُرالا جوگیاں دی اُتلی لاسے لنگھدے نالے اُتے اُگے سرکڑے، جنگلی جھاڑیاں تے رُکھاں دی چھاں ہر ایلے اپنیاں پر چھائیاں نال انھیرا کیتی رکھدیاں۔ سوائے اوہناں دناں دے جدوں کسان رل مل کے کھیاں تے کہاڑیاں نال ایس نالے نوں چھانگ کے صاف کریندے۔

گھڑ اسواراں ایتھے آن کے گھوڑیاں شتری کر دتیاں۔ ہتھیار سوت لئے تے منڈا سے کناں تیک اُچے کر لئے تاں جو کسے دی وی حال دھروئی نہ سُن سکے۔

ساری سستی آلے کیوں سمبھل کے چوگردے کھلوتے رہے۔ سنے راجو کاٹھے دے انج جیویں کوئی تماشا لگا ہووے۔ دعویٰ جتھے آلیاں دا ایہو ای آہا، جو سکھاں تے ہندوواں تاں مسلمان زنانیاں دیاں عزتاں لٹیاں تے مسلماناں نوں وڈھ ٹک دتا۔ پر تسیں ایتھے اک سکھ زنانی نوں سانجھ کے بیٹھے او۔ اوہدے تے پردہ گھت کے، اوہنوں بچار ہے او۔ جدوں کہ اوہناں توں ویرلین دا ایس توں ودھ سانوں کد موقعیا ملے گا۔

”امرتا.....“ وریام سوچیا۔ جیہنوں اوہدے پیو نور محمد اپنیاں بھیناں آنگ سانھیا

پالیا۔ امرتا، اوہدی وی تاں عزت ہے اُنج ای جیویں نور محمد دی آہی۔“

امرتا، ول اوہ انج گھیرا پا کے ودھے جیویں لکڑی نوں پھڑیا جاندا ہے۔ امرتا

دیاں نگاہاں ساہنے انھیرا پھر گیا۔ اوہ ترلے لیندی کملیاں ہار اوہناں وچوں نکلن دا جتن

کردی۔ جیہڑے اوہنوں بچاسکدے ہاں۔ جیہناں تے اوہ مان کر سکدی آہی۔ اوہناں

نوں تے ایہناں ظالماں پہلوں ای وڈھ ٹک دتا آہا۔ امرتا ترلے لیندی نوں انج لگا

جیویں کوئی بھاری شے اوہدے موراں تے آن ڈھٹھی ہووے اوہ پھڑ پکھیرو آنگ چکی۔

اک گھوری دیاں ٹنگاں تھلیوں اوہنوں نکلن دا موقعیا لہ گیا۔ اوہ اک اک کر کے تنوں

لوتھاں توں اُلانگھدی، وریام، ولے خاں تے نجابت دیاں لوتھاں انج جیویں اوہدے

پیراں دیاں تلیاں نوں اپنے ہتھاں تے چُک کے اُبھار رہیاں ہوون۔ اوہنوں ہمت تے

آسنگ دے رہیاں ہوون۔ اوہنوں اپنی عزت، اپنا وجود بچا کے لے جاوَن لئی اُلیل

رہیاں ہوون۔

اوہ کھوہ جیہڑا نور محمد اپنے قبیلے تے ٹکے خاں دے بندیاں نال رل کے اُساریا

آہا۔ جیہدی گادھی تے بیٹھ کے نہال سنگھ بُرا لا جوگیاں دیاں فصلاں نوں پیچ دیندا رہیا آہا۔

انج امرتا دے وجود، اوہدی ہوند، اوہدی عزت نوں اپنے ٹھنڈے ٹھار تھڑے پانی وچ لکا

لیا۔ اوہ ہمیش ہمیش لئی بُرا لا جوگیاں دی خلقت دیاں نگاہاں توں اوڈھر ہو گئی۔

صاحبان سچ لپے چونترے تے مودھی پئی ہے۔ ہوش وچ آوندیاں ای اوہدی

اکھ کھلدی ہے۔ اوہدا سر چکر کھا رہیا ہے۔ زویں اوہدے آل دوالے گھم رہی ہے۔

اوہدے ساہنے اوہدے پتر سواہرے خاں تے وریام دیاں شکلاں بنن مٹن لگ پمدیاں

نیں۔ گھڑ اسواراں دے جتھے دے بندے اوہناں دا ہمو کجھ لٹ لٹا کے امرتا تے ہتھ

گھستدے نیں۔ اوہناں ہتھاں نوں تروڑن اوہناں توں امرتا نوں چھڑاون لئی وریام،
 نجابت تے ولے خاں اک اک کر کے بھوکیں تے ڈھاہندے جاندے نیں۔ تتیاں توں
 وڈھے ہوئے رکھاں آنگ، ولے خاں، ڈنگوری دا آسرالیندا ہویا اک قطار وچ کھلوتے
 وستی آلیاں نوں ایہہ سارا کجھ ویکھدیاں نوں غیرت دواندا ہے۔ اوہ راجموکاٹھیے نوں سد مار
 دا ہے پر کوئی اک وی اگے نہیں ودھدا۔ انج جیویں سارے کیلے گئے ہوں۔

مڑ کے اک نیزا، آن ولے خاں دا سینہ چیر دیندا ہے۔ وستی آلیاں دی قطار
 صاحبیاں دیاں نگاہاں وچ اک نقطے وچ سمٹی ہوئی اوہدے پتر وساہرے خاں دی
 صورت داروپ دھار لیندی ہے۔ جیہڑا ماں نوں واجاں ماردا ہویا رو رہیا ہے تے روندے
 روندے دے مکھڑے تے وگدے اتھرو گھر الاں بن کے جم گئے نیں۔

صاحبیاں اٹھئی کے اپنے اُتلے نال اوہدا مکھڑا صاف کردی ہے تے اوہنوں
 اپنے سینے نال لالیندی ہے۔ بھٹھاں ماردی ہوئی..... اوہ چرتیک ڈسکارے لیندی راہندی
 ہے۔



21

مُڑ کے بار، الے

ایہہ ہُمس بھریاں راتاں ہائُن۔ ٹوئیاں، ٹمپیاں وچ کھلوتے پانی وچوں بدبو تے
 چھرا کے آریں اڈ کے ساہویں مونہہ وچ آن وڑدے۔ ایہے چھرا جیہناں دے ڈنگ زہر
 بھرے ہوندے۔ جیہنوں لڑدے اوہ سُکھ دی نیندر گھٹ ای سوندا، اوہدی ساری رات
 اُچوی تے بے سکونی وچ لنگھدی۔ عام طور تے لوکی اپنے آل دوالے بھسھل بال کے
 سوندے تے کونین ورتدے، تاں جو ملیرے توں بچ سکن۔ ایہناں ای دناں وچ رشید
 الدین بُرا لا جوگیاں وچ آن وڑیا۔ جیہدی دولت، شرافت تے سخاوت داشہرہ ہرایلے راحمو
 کاٹھیے دی زبان تے ہوندا۔ رشید الدین دو جے پاسیوں لٹ وجھوں تباہ برباد ہو کے آیا۔
 اُبھردے پنجاب وچ اوہدیاں ڈھیر زمیناں تے جائیداد آہی۔ اوس ایدھر آ کے کلیم داخل
 کروائے جیہدے بدلے سرکار اوہنوں ڈھاباں نیڑے بھوکس الاٹ کردتی ہے۔ بہوں دانا
 زویں دار ہے۔ ورھیاں وچ ای ٹھاٹھ باٹھ بنا لئی سو۔ ہُن اگانہہ ہور بھوکس حصے تے
 لیناں چاہوندا ہے۔ میں آکھیا، ”چودھری وریام آلی پنجاہ کھلے ہُن کس گڈنی ہے میرے وچ
 تاں آسنگ کافی نہیں۔ صاحبان دھی نال صلاح کرنی ہے جے بھوکس حصے تے دین لئی

راجی ہو جاوے تاں میں اپنی نگہبانی وچ کاشت کروا سکداں۔“ راجمو کاٹھیا جیہڑی تھاں وی باہندا ایہی گل اوہدی زباں اُتے ہوندى۔

رشید الدین وی ہر دو جے تیجے دینہہ مگروں بُرالا جوگیاں، اپڑیا ہوندا، ہمیش دو گھوڑیاں اُتے۔ اک گھوڑی تے اوہدے کاسے خرچین وچ وکھ وکھ سوغاتاں بھریاں ہوندىاں۔ اوہ جیہڑا ویلا بُرالا جوگیاں وچ گزاردا، وکھ وکھ طرح دے کھانے پکدے۔ محفل جی راہندی۔ مُڑ کے بُرالا جوگیاں دے ہر اک بندے دی زبان تے اوہدی دولت، شرافت تے سخاوت دے بول چڑھ گئے۔

اُچے لمے قد تے بھارے بُت آ لے رشید الدین دارنگ ڈونگھا سانولا کالی جیہی بھاہ ماردا، ہوٹھ موٹے تے اکھاں نکلیاں نکلیاں ہائُن۔ اوہدے سرتے ہر ایلے بدھے چٹے رنگ دے شملے دا طرّہ اُتاناہہ نوں کھلوتا ہوندا..... راجمو کاٹھیے جدوں صاحبان نال اوہدے قبضے وچ پنجاہ کلے بھوئیں اوہنوں حصے تے دیون دی گل کیتی تاں اوس آکھیا، ”جدوں تیک اوہ آپ رو برو ہو کے رشید الدین داروں، اوہدا سبھا، ویکھ پرکھ نہیں لیندی، اوہ اوہنوں بھوئیں کیوں دے سکدی ہے؟“ تے مُڑ اک دینہہ راجمو کاٹھیا، رشید الدین نوں حویلی لے اپڑیا۔ صاحبان نوں اوہدیاں اکھاں وچ لوبھ تے ہتھاں وچ ظلم تے جبر دی سختی نال اُکریاں جھریٹاں دسیاں۔ اوہدے اندروں واج آئی۔ ”نہیں صاحبان، ایہہ بندہ ٹھیک نہیں۔“ پر اوہ اوہنوں بھوئیں حصے تے دیون نوں وی راجی ہو گئی۔ شاید ایس لئی جو راجمو کاٹھیا اوہدی تعریف وچ زویں اسمان اک کیتی بیٹھا آہا تے بُرالا جوگیاں وچ ہو رکون آہا جیہڑا ٹکے خاں تے نور محمد دے قبیلے دے ڈھیر نیڑے ہوندا اتے اوہ وی ورھیاں توں۔ راجمو کاٹھیے توں اڈ۔

بھوئیں حصے تے لیاں رشید الدین نوں چھماہی وی نہیں گزری ہوونی جو قانونوگو تے گرداور پرتاں سنے بُرالا جوگیاں دے پھیرے لاوے شروع کردتے۔ اوہ وی بھوئیں

وچکار رکھاں دی جھنگی نیڑے، جتھے رشید الدین ڈیرہ بنالیا آہا۔ کئی آریں تے دینہہ بر رات حساب کتاب تے پڑت پڑتالاں ہوندیاں راہندیاں۔ اخیر اک راتیں قانونو گونے بتی دے چائن وچ زرعی فرد بندی رشید الدین دے ساہنے کھولی تے بڑی باریکی نال اک اک کر کے نمبر کھیوٹ، نمبر کھتونی، ناں پتی، نمبر دار، ناں مال، ناں کاشت کار، وسائل آب پاشی، نمبر خسرہ، رقبہ قسم اراضی، لگان، تفصیل شرح تے تعداد، رقبہ تشریح مال تے کیفیت سنے ساریاں خانیاں اُتے وارو واری انگلی دھر کے اوہنوں دسیا:

”چودھری رشید بھوئیں پوری تاں ٹکے خاں دے ناویں وی نہیں بولدی۔ صاحبان دا کھاتا تاں کیہ ہوناں آہا۔ اتھے تاں نور محمد داوی کوئی ذکر اذکار نہیں۔ پر، رانی حصے دار ضرور ہے تے ایس پاروں نور محمد، تے رانی دا پتر وریام وی حصے دار تاں بندا ہے، تے صاحبان دے وریام دی بیوہ ہون پاروں بھوئیں تے اوہدی وی بندی ہے قانونوں تے اخلاقوں۔ اسیں جیکر کجھ غلط ملط کریئے تاں کل نوں اوہ حق شفع وی کرسکدی ہے، اگے ہُن تسمیں دسو کیہ کرسکدے آں اسیں؟“

”میں کیہ دسناں یا کرناں ہے قانونو گو صاحب، ایس کم دے تسمیں آپ استاد او..... یاد رکھو، تہاڈا حصہ میں آپدی حیثیت توں ودھ کے دیواں گا۔“

”مڑ قانونو گوالوں، بُرالا جوگیاں دے ایہناں پنجاہ کلیاں دی اک رسید کلیم دفتر وچ جمع کروائی گئی۔ لکھیا آہا، ”منشی فتح دین قانونو گو دسیا ہے جو اوہ اپنے نال ریکارڈ بُرالا جوگیاں حد نسبت نمبر..... چک نمبر..... بُرالا، علاقہ لائل پور نال لیا یا ہے۔ رجسٹر حق دار اُتے ٹکے خاں ولد گھنے خاں، قوم..... دے ناویں 21-50 بیگھے رقبہ درج ہے۔ جیہڑا حالے تیک تصدیق بنا ہے ایہہ رقبہ کسے کلیم اُپر تصدیق نہیں ہو یا ہے۔ ٹکے خاں دی کوئی اولاد نرینہ / غیر نرینہ نہ ہوون وجہوں کوئی دعوے دار نہیں۔ ایس وجہوں سرکار دے حکم نمبر..... دے تحت ایہہ رقبہ متبادل دے طور تے چودھری رشید الدین ولد حمید الدین خاں

52-9-21 نوں ناویں چاڑھ دتا گیا ہے۔ کسے دعوے دار دے اعتراض یاں دعوے بنا.....“

ایہہ گل پورے علاقے وچ ہل گئی جو رشید الدین ٹکے خاں آلی بھوئیں دا حصہ دار نہیں مالک ہے۔ تے بُرالا جوگیاں دی نمبرداری اج یاں کل اوہدے ناویں چڑھن آلی ہے۔

صاحبان تے، تاں جیویں قیامت لنگھ گئی۔ اوس وساہرے خاں دا ہتھ پھڑیا تے حویلی وچ لگی پنچایت ساہمنے جا اپڑی۔ وساہرے خاں دے سر تے ہتھ دھریوس۔ ایمان تے یقین آلیاں نوں قسماں کھا کھا کے آکھیوس، ایہہ بھوئیں اوہدی ہے جدی پشتی۔ اوہناں دی مالکی ہے۔ پنچایت آ لے قرآن، رسول، اصولاں تے ضابطیاں نوں مندے تاں ہاں پر زرعی فرد تے پرت اُتے لکھیاں لکیراں نوں کیویں کوڑیاں آکھدے۔ انج صاحبان پرہیا ساہمنے کوڑی پے کے مُڑ آئی۔ اوہنوں انج لگا جیویں اوہدا ہانہہ بڈا جاندا ہے تے ہُنے ای اوہ مرن دلیج تے اپڑن آلی ہے۔

ایس ہونی نوں واپریاں حالے ڈھیر دینہہ کوئی ناہس ہوئے جواک شامیں ہتھ وچ خالی ولٹو ہی پھڑی رجو مچھانی صاحبان کول اوہدے گھر آن اپڑی۔ اوہ چلھانی کول بیٹھی سواہرے خاں نوں روٹی کھوا رہی آہی، اوہ اک تیتلا پھڑ کے چلھے وچ بلدیاں چنگاریاں نوں اک اک کر بجھاوندی تے اوہنوں سواہ وچ رلا کے سواہ کر دیندی۔ حال احوال تے ایدھر اودھر دیاں چار گلاں کرن مگروں رجو اوہدے تے واپری دا روناں رون لگ پئی۔ اوہدی پہاڑ ارگی جوانی تے اوتر جانے جہان دیاں بدخونیاں کیتوس۔

وچوں وچ چودھری رشید دے ظلم تے زیادتی نوں وی نیندیوس۔ اوہنوں گالھ مندا بولیوس۔ اخیر ایہہ آکھ جو مثال بنی ہے، ”رٹڈی تاں رٹڈیا کٹ لیندی ہے پر لوکی

نہیں کٹن دیندے۔“ نال ای حدوں ودھ دردن بن کے آکھن لگی، ”جے توں راضی ہوویں تاں رشید الدین نال گل ٹوراں..... میری ماننا کردا ہے تے من وی لیندا ہے۔ عمروں پکیرڑا ہے تاں کیہ ہويا، مال دولت تاں ویکھوس، اوہدا تاں اوڑ بناں ای کوئی نہیں..... نالے تیری بھوئیں، حویلی سارا کجھ تیرے قبضے وچ اُنج دا اُنج ای آجاسی، جیویں وریام دے ہوندیاں آہا۔ تیرے سواہرے نوں وی تاں سر، دا سایہ چاہیدا ہے نا.....“ رجو چب چب کے تے ہتھ ہلا ہلا کے گلاں کردی چپ کرگئی۔ اُنج جیویں اوہدا مقصد پورا ہو گیا ہووے۔ جیویں ہر اوہ گل جیہڑی اوہ کرناں چاہوندی آہی اوہدے تیک اپڑ گئی ہووے۔ پر رجو مچھانی دی کیتی ہوئی ہر گل اپنی تھاہریں اوہنوں تاں اپنے آپ تے مگروں بڑی حیرانی ہوئی جو اوس کیویں سدھے سبھائیں اوہنوں آکھ دتا، ”رجو تینوں جیکر ایہہ گل چودھری کر کے گھلیا ہے یاں توں میری دردن بن کے میرے نال آپ الوں کیتی ہے اگانہہ توں نہ کریں۔ میں تاں ہمیش ہمیش لئی اپناں وجود وریام دے ناویں کر چکی آں، تے رہ گئی گل بھوئیں تے حویلی آلی..... اوہ مالک اُتے بیٹھا ویکھدا پیا ہے نا، جس روز ازل ظالم تے مظلوم وچکار نیاں دا وعدہ کر رکھیا ہے۔ میں اپنی ڈور اوہدے ہتھیں دتی چاہے۔ پر مینوں منکھ چودھری تے اوناں نہیں۔ منکھ تے مینوں بُرا لے دے لوکاں تے راجمو ورگیاں تے ہے جیہناں تے میرے کھسم تے سوہرے پر چھائیں کیتی رکھی۔ اوہناں نوں دکھ نہ آن دتیونیں تے ہر آئی بلا نوں اپنے ہتھ نال ڈکی رکھیونیں۔ خیر..... کچھ ویکھیا نہیں توں ملکھی تے وا کیسے جیہی گھلی ہے۔ بندہ، بندے نوں پچھان توں گیا، جیکر میرے تے کروپی آگئی ہے تاں کیہ ہويا؟ رب جہاناں دا مالک کٹ دیوے گا..... اپنی گل کر صاحبان سواہ وچ اوویں تیل مار دی ہوئی ہنچھو وہان لگ پئی..... رجو ڈھیر چر بیٹھی اڈیکدی رہی، مڑ کے اوویں ای ولٹو ہی پھڑ رشید الدین دے ڈیرے ول نوں ٹروگی، روز آنگ ددھ لین۔

رشید الدین اک دو واراں ہور زنانیاں وی گھلیاں، شاید جو صاحبان من ای

جاوے۔ ایس گلوں صاحبان بے تھتھی پین لگی جوانج اک اک کر کے تاں اوہ وستی دیاں
 ساریاں زنانیاں نوں سنبھو بنا کے میرے ال گھل دیوے گا، اک روز اوہ سدھی ساہویں
 آپ حویلی گئی تے لوکاں دے ساہنے رشید الدین دی لتھی لہائی کر آئی۔ کڑک کے
 آکھیوس، ”خبردار اگانہہ توں کوئی گل توں میرے بارے اجیہی سوچی تاں میرے توں ودھ
 برا کوئی نہ ہوسی۔“ حویلی وچ بیٹھے لوکاں پہلاں اک دو جے دے مونہاں ال تکیا مُڑ کے
 چودھری دی گل سنن لگ پئے جیہڑی اوہ پہلے توں کر رہیا آہانج جیویں صاحبان نہ تے
 ڈیرے تے آئی ہووے تے نہ ای اوس کوئی گل بات کیتی ہووے۔

اک ہو رورہا لنگھ گیا۔

صاحبان دا حدوں ودھ اوکھیاں دا ورہاتے بُرا لا جوگیاں دے لوکاں دا اُنج آر،
 جیویں اوہ پچھلے لنگھا آئے ہاں.....

اک راتیں راحمو کاٹھے دی دھی صاحبان ال آئی۔ ساہکدی ہوئی۔ اوہدا ساہ
 دے نال ساہ نہیں رل رہیا آہا۔ صاحبان تینوں ہتھ جوڑدی پئی اوہاں، آپناں آپ تے
 اپنے پتر سواہرے خاں نوں بچا کے ایتھوں جیویں ہووی نکل جا۔“
 فی ہویا کیہ ہے؟ توں اپنی گھاہری کیوں ایں؟“

”میں راتیں اپنے کنیس سُدا ہے، رشیدا، میرے پیو نال صلاح بناندا پیا آہا، جو
 تیرے پتر سواہرے خاں نوں مار گتے، تے تینوں اوہ زبردستی اپنے عقد وچ لے لوے.....
 مصیبت ہی فی بھینے تیرے تے۔ اوہ چُجدا ہے تے میں ویکھیا اے جو دنیا اوہناں دے ای
 نال ٹردی ہے جو چُجدا ہے ہوون۔“ اوہ کجھ چرچپ رہی مُڑ کے ایہہ آکھدی ٹروگی۔ ”بھینے
 میں جو سنی، ویکھی رب دا خوف تے ترس کھاندیاں تینوں کر چھڈی او، اگے تیرے بھاگ
 تے کرنی اللہ دی.....“

ہاڑھ دیاں تتیاں راتاں وچوں ایہہ رات ہائی، صاحبان سواہرے نوں اپنے ہانہہ نال لا کے سُتی رہی، سُتی نہیں لَمیاں پئی رہی۔ تھوڑے تھوڑے چر مگروں جاگ کے ویڑھے ال، اگولانی تے بوہے دیاں جھاتیاں وچوں ویکھ لیندی..... ساری رات ای پلسیٹیاں لیندی تے پاسے پرتدی دی لنگھ گئی۔ انج جیویں اپنے آپ نال، اپنے اندر نال جنگ کردی ہووے۔ اوہنوں رہ رہ کے قیاس آوندے۔ گزریا ویلا، دینہہ راتاں، موسماں تے فصلاں آنگ لہلہاوند، کھلاوندا اکھاں ساہمنے لنگھ رہیا آہا۔ اوہنوں اپنے ساہمنے ہر راہ بند ملی۔ اک لمی نہ مُکن آلی، پورے جہان تے وچھری ہوئی کالی رات دسی۔ جیہدا اور چھور اوہنوں نہ دسدا۔ دور وستی دے مولی مسیت دی چھت تے چڑھ کے تہجد ایلے بارے دسیا۔ صاحبان اٹھیجی، وضو سازیوس تے نماز پڑھ کے مصلے تے بیٹھی بیٹھی فیصلہ کیتوس۔

سویر حالے پوری طرح اُگھڑی ناہی، اوس و ساہرے خاں نوں ادھ سُتے، ادھ جاگدے نوں اُٹھایا تے گھر دے پچھواڑے الوں دی ہوندی نکل کھلوتی۔ اوہنوں جاندی نوں کجھ ہالیاں بنجھا کے ویکھیا مُڑ کے بلداں نوں ہاکدے، سدّھے ٹوردے واہن آلیاں زمیناں نوں نکل گئے۔

”کدی انج ای سوختے وریام دی جوڑیاں ہک لجاندا آہا۔“ صاحبان سوچیا۔

اوہ اڈے آ لے چوراہے کول آ کے کھلو گئی۔ روندی نوں ویکھ کے و ساہرے خاں وی رون لگ پیا۔ مُڑ کے اوہ ضبط کر گئی۔ دو دلیلی جیہی ہوئی۔ جواگے جاوے یاں پچھانہہ بُرالا جوگیاں نوں مُڑ جاوے۔ جتھے اوہ ہر اوہ گل تے عمل قبول کر لوے جو رشید الدین اوہدے توں قبول کرواناں چاہوند اہے..... ایس اڈے آ لے چوراہے تے ای اک واریں وریام اوہنوں اوس راہ دا، وی دسیا آہا جیہڑی توڑ و ساہرے خاں تے لٹماں سھرائی دیاں قبریں ال نوں جاندی آہی، تے جتھے وریام دے وڈکیاں کنے ای ورھے

لنگھائے ہائیں..... اوس اوہی راہ مل لئی۔ جیہڑی سدھی اوہناں گوراں ال نوں جاوندی آہی۔ اُجاڑ، بار بیاباں ال نوں۔

دینہہ چڑھدے ساراں دس دتا آہا جو اوہ تندور آنگ تتا ہے، تے بھوکیں تے کناں کپڑ چاڑھن آلا ہے صاحبان ہاری نہیں، تھکی نہیں تے اوس پچھانہہ مُرن دا فیصلہ وی نہیں کیتا۔ پر اوہ جدوں پیر پُندے تاں دھوڑاں اُٹھدیاں۔ ساہمنیوں تتیاں لُواں وا ورو لے بن کے آوندیاں۔ سواہرے خاں کدی اوہدی ڈھاک تے ہوندا تے کدی ٹرن لگ پمدا۔ اوہناں دیاں تلیاں تے چھالے بن لگ پئے ہائیں۔ اوہ چھاواں بھالن لگ پئے، اک تھاہرے اک چھدری جیہی چھاں آلا جنڈ آیا تاں اوہدے تھلے نٹھ کے بہہ گئے۔ اوہناں نوں لگا جو اوہ ایناں کو تھک ٹرٹ گئے ہین۔ ہُن اگے ٹرن دی اوہناں وچ ہمت نہیں رہی.....

”اماں پانی..... تریہہ لگی ہے؟“ سواہرے خاں وار وار آکھدا۔

”تھوڑا کو اگے کھوہ آون والا ہے، پتر صبر کر لے۔ صاحبان اوہنوں دلاسا دیندی۔ تتی دوپہر بن لگ پئی۔ اوہ ٹرے..... ہر اک شے انج تپ گئی جیویں اگ دا کوئی گولا ہووے جیہدے اُتے اوہ چکر کھا رہے ہوں۔ اوہناں دیاں تلیاں سڑ بل رہیاں ہائیں..... سواہرے خاں تے اوہدی ماں..... کل مُکّے..... دھوڑ بھریاں ایہناں راہاں وچ وا ورو لے آنگ بھٹک رہے ہائیں۔ دور بہوں دور سواہرے خاں نوں چمکدے شیشے آنگ کوئی شے دی۔ اُتوں تھلے تے تھلیوں اُتے نوں پانی آنگ ویہندی ہوئی۔ اوہ اوہنوں پانی سمجھ کے اگے ودھیا۔ اوہدی ماں اوہدے ول نجھا کے ویکھیا، اوہدیاں کالیاں سیاہ اکھاں اوس چمکدی ہوئی شے آنگ ای چمکیاں تے مُر کے بجھ گئیاں۔ صاحبان دیاں چکراندیاں اکھاں دوالے سواہرے خاں دا مکھڑا جھولیا تے اوہ اتھے ای ترامے ورگی بھوکیں تے انھیری وچ ٹٹے ہوئے ٹاہن وانگ آن ڈٹھی۔ اوہنوں ڈگدی ہوئی نوں

جایا۔ اوہ سواہرے خاں دا ہتھ پھڑی بار ال نوں جا رہی ہے۔ اوہناں نوں ترہہ لگی ہے اچنتے اوہناں ساہمنے پانی آلی کھوہی آ جاندی ہے۔ کھوہی دا پانی دو ہتھ تیک ڈونگھا ہوندا ہے۔ اوہ بھیون لئی اپنا اُتلا کھوہی وچ سُدی ہے۔ کچھدی ہے تاں اوہ سُکا واپس مُردا ہے۔ مُردا اوہ آپ کھوہی اُتے نیوندی ہے۔ تاں پانی پٹھاں ای پٹھاں لہن لگ پمدا ہے۔ اوہ وی ڈھلدے ویلے دے پر چھاویں آنگ پانی دے کچھے کچھے لگی جاوندی ہے۔ پانی نوں ہتھ وی نہیں لاسکدی تے واپس وی نہیں مُرد سکدی۔ کھوہی دے نیاں تے کھلوتے سواہرے خاں نوں کنے ای سے بیت جاندی ہے۔

نیڑ لے ای رُکھ تے نر تے مادہ پکھیرو آن پٹھدے نیں۔ اوہ گلاں کردے سُنندے نیں مادہ پکھیرو بولی: ”بہوں ظالم ہے آدم دی ذات، کناں ظلم اپنے آپ تے اپنی جنس تے کردا ہے..... ہُن ایہناں نال کیہہ بیتے گی؟“

”توں سچ آہدی ایں..... پر جدوں ماں دے ساہ دین مگروں وی پُتر ایہدے اُٹھ کھلون دی آس وچ استھے رہیا تاں مینوں ڈر ہے جو ساڈے ہم جنس، ایہدی ماں دے پنجر دے نال نال پُتر دے جیوندے وجود نوں وی چوٹ جاون گے۔ توں ہُنے ویکھیں گی۔ گر جھاں دیاں ڈاراں آسمان تے اڈ دیاں.....!“ مادہ پکھیرو آکھیا۔

”ایہہ بچ کیویں سکدے نیں؟“ مادہ بولی۔

”تقدیر سببوں خانہ بدوشاں دی اک زنانی آوے گی جو بالک نوں اپنے نال لے جاوے گی۔“

”تے ماں؟“ مادہ پچھیا۔

”ماں تے ہُن تیک ساہ وی دے چکی ہے۔“

”اوہ خانہ بدوش بالک نوں کتھے لجائے گی تے اوہدے نال کیہہ کرے گی؟“ مادہ

مُرد کے بالک بارے پچھیا۔

”ایہہ اک نویں کہانی ہے..... جیہنوں جانن لئی سانوں کجھ سمے اڈیکناس پوے
 گا.....“ نر، ایہہ آکھدا اڈپیا تے مادہ وی اوہدے کچھے اڈن آسٹے پر کھولے.....!

